

সাইয়েদ আবুল হাসান আলী নদভী

সংগ্রামী সাধকদের ইতিহাস

[৩য় খণ্ড]

(23) تاریخ دعوت و عزیمت سوم

از سید ابوالحسن علی ندوی

مترجم: ابوسعید محمد عمر علی

ناشر: محمد برادر س 38، بنگلہ بازار، ڈھاکہ 1100.

আবু সাঈদ মুহাম্মদ ওমর আলী

অনূদিত

মুহাম্মদ ব্রাদার্স

৩৮, বাংলাবাজার, ঢাকা-১১০০

শংগ্রামী সাধকদের ইতিহাস (৩য় খণ্ড)
মূল : সাইয়েদ আবুল হাসান আলী নদভী (র)
অনুবাদ : আবু সাঈদ মুহাম্মদ ওমর আলী (র)

প্রকাশকাল
জানুয়ারী, ২০১৫ ঈসাব্দী
মাঘ, ১৪২১ বঙ্গাব্দ; রবিউস সানী ১৪৩৬ হিজরী

প্রকাশনায়
মুহাম্মদ ব্রাদার্স, ৩৮, বাংলা বাজার, ঢাকা-১১০০
সেলঃ ০১৪২২-৪০৬১৬৩; ০১৭২৪-৫৯৪৪৪০

মুদ্রণে : মেসার্স তাওয়াক্কুল প্রেস
৬৬/১, নয়া পল্টন, ঢাকা-১০০০

প্রচ্ছদ
সালসাবিল

ISBN: 978-984-90178-1-3

মূল্য : ২৩০.০০ (দুইশত ষাট) টাকা মাত্র।

Shangrami Shadhakder Itihas: (History of the Saviours of Islamic Sprit) written by Allama Sayeed Abul Hasan Ali Nadvi (R) in Urdu and translated by A. S. M. Omr Ali (R) into Bengali and Published by Muhammad Abdur Rouf, Muhammad Brothers, 38, Bangla Bazar, Dhaka-1100. BANGLADESH. Cell Phone: 01822-806163

উৎসর্গ

ইসলামের প্রচার ও প্রসারে যাঁরা চরম আত্মত্যাগের সম্মুখীন হয়েও বিন্দুমাত্র বিচলিত হন নি,

এ পথের সকল প্রতিকূলতাকে যাঁরা হাসিমুখে মুকাবিলা করেছেন, অত্যাচারী জালিমের খড়্গ-কুষ্ণাণ ও বন্ধ কারা-প্রাচীর যাদের বিশ্বাসের ভিতকে এক বিন্দুও টলাতে পারেনি,

বিলাসী ও আয়েশী জীবনযাপনের শত সুযোগ থাকা সত্ত্বেও যাঁরা নির্লোভ ও নির্মোহ জীবন যাপন করে মানুষের সামনে অনুপম আদর্শ স্থাপন করেছেন,

পর্ণ কুটিরে বাস করে এবং অনাড়ম্বর পরিবেশে থেকেও যাঁরা রাজা-বাদশাহুর ঔদ্ধত্য ও দান্তিকতার সামনে নিজেদের শির সম্মুখ রেখেছেন,

দুঃখী ও মজলুম মানুষের পাশে দাঁড়িয়ে যাঁরা তাদের হতাশ অন্তরে আশা-ভরসার প্রদীপ জ্বালিয়েছেন,

তাদেরকে কাছে টেনেছেন,

আপন করেছেন,

রুহানিয়াতের প্রোজ্জ্বল আলোক-ধারায় যাঁরা পাপক্লিষ্ট ও পথভ্রষ্ট মানুষকে হিদায়াতের প্রশস্ত রাজপথে এনে দাঁড় করিয়েছেন, সেই সব জানা-অজানা মর্দে মু'মিন ও মর্দে মুজাহিদের পবিত্র রুহের উদ্দেশে।

আমাদের কথা

খুলাফায়ে রাশেদীনের পর মুসলিম ইতিহাসের আদর্শবাদী ধারা যথেষ্ট দুর্বল হয়ে পড়লেও পরবর্তী প্রত্যেকটি যুগে এমন কিছু কিছু বিরল ব্যক্তিত্বের আবির্ভাব ঘটেছে যারা পুনরায় ফিরে যেতে চেয়েছেন ইসলামের মূল আদর্শের দিকে এবং আজীবন সংগ্রাম ও সাধনা করেছেন ইসলামী আদর্শের পুনঃ প্রতিষ্ঠার লক্ষ্যে। তাঁরা কেউ কেউ যেমন-ওমর বিন 'আবদুল 'আযীয, গাযী সালাহুদ্দীন রাষ্ট্রীয় পর্যায়ে এই সাধনা ও সংগ্রামে লিপ্ত হয়েছেন, কেউ কেউ এই সাধনার কারণে তৎকালীন রাষ্ট্র শক্তির কোপদৃষ্টিতে পতিত হয়েছেন, আবার অনেকেই রাষ্ট্রীয় অঙ্গন থেকে দূরে অবস্থান করে ইসলামের আধ্যাত্মিক, নৈতিক, দার্শনিক ও সামাজিক আদর্শকে সমুন্নত রাখার কঠোর সাধনায় নিজেদের জীবন উৎসর্গ করেছেন। ইসলামের প্রকৃত ইতিহাস যতটা মুসলিম রাজা-বাদশাহ ও শাসকদের ইতিহাস, তার চাইতেও অধিক এই সব সাধক ও সংগ্রামী পুরুষদের ইতিহাস। আজকের বিশ্বব্যাপী ইসলামী নবজাগরণের পেছনে এইসব অমর সাধকদের শত সহস্র বছরের নিঃস্বার্থ সাধনার অবদানকে অস্বীকার করা আর বাস্তবতাকে অস্বীকার করা একই কথা।

দুর্ভাগ্যের বিষয়, ইসলামের ইতিহাসের এই স্বর্ণোজ্জ্বল ধারা আজও আমাদের কাছে প্রায় অজানাই রয়ে গেছে। ইসলামী আদর্শের পুনঃ প্রতিষ্ঠাকামী এই বিপ্লবী তাৎপর্যমণ্ডিত প্রবাহের চাপা পড়া ইতিহাস পুনরুদ্ধারকল্পে আত্মনিয়োগ করে উপমহাদেশের প্রখ্যাত ইসলামী চিন্তাবিদ ও গবেষক সায়্যিদ আবুল হাসান 'আলী নদভী (র) মুসলিম উম্মাহকে চির কৃতজ্ঞতাপাশে আবদ্ধ করেছেন। উর্দু ভাষায় রচিত তাঁর এ সম্পর্কিত যুগান্তকারী গ্রন্থ 'তারীখ-ই-দা'ওয়াত ও 'আযীমত' ছয় খণ্ডে সমাপ্ত এবং হযরত 'ওমর ইবন 'আবদুল 'আযীয (র) থেকে শুরু করে বিপ্লবী অগ্নিপুরুষ সাইয়েদ আহমদ শহীদ বেরেলভী (র) পর্যন্ত সাধক সংগ্রামীদের আলোচ্য এতে স্থান লাভ করেছে। এই গ্রন্থমালা বাংলা ভাষায় প্রকাশের কর্মসূচী মুহাম্মদ ব্রাদার্স ইতোপূর্বেই গ্রহণ করেছে। বর্তমান গ্রন্থ উক্ত তারীখ-ই-দা'ওয়াত ও 'আযীমত গ্রন্থের তৃতীয় খণ্ডের অনুবাদ। এতে দু'জন মহান সাধক হযরত নিজামুদ্দীন আওলিয়া (র) এবং হযরত শায়খ শরফুদ্দীন

(ছয়)

ইয়াহইয়া মুনাযরী (র)-এর সংগ্রামী জীবনালেখ্য স্থান পেয়েছে। চতুর্থ খণ্ডের কাজও অনেক দূর অগ্রসর হয়েছে। ইনশাআল্লাহ সত্বরই সে খণ্ডটিও প্রকাশিত হবে।

পূর্ববর্তী সংস্করণগুলোর মত বর্তমান সংস্করণটিও বহুল প্রচার আশা করছি। এক্ষণে আমরা পরম করুণাময়ের দরবারে এই গ্রন্থের লেখক আল্লামা সাইয়েদ আবুল হাসান আলী নদভী (র)-এর জান্নাতী রুহের উদ্দেশ্যে সালাম পেশ করছি এবং এর অনুবাদকের সুস্থ ও কর্মময় দীর্ঘ হায়াত কামনা করছি। আল্লাহ পাক আমাদের এই নগণ্য খেদমতটুকু কবুল করুন। আমীন!

সেপ্টেম্বর, ২০০৩ ইং

- প্রকাশক

ঢাকা-১১০০

অনুবাদের আরম্ভ

আল্লাহপাকের অপর অনুগ্রহে অবশেষে মুসলিম বিশ্বের প্রখ্যাত 'আলিম, লেখক ও চিন্তাবিদ সাইয়েদ আবুল হাসান 'আলী নদভী রচিত 'তারীখ-ই-দা'ওয়াত ও 'আযীমত' সিরিজের তৃতীয় খণ্ডের বাংলা তরজমা 'ইসলামী রেনেসাঁর অগ্রপথিক' নামে প্রকাশিত হল। যাঁর অসীম কৃপায় এটি বাংলাভাষী পাঠকদের হাতে পৌঁছতে পারল সেই মহান আল্লাহ্ রাক্বুল আলামীনের দরবারে জানাই অসংখ্য শোকর ও সজ্জদ।

উর্দু-ভাষী পাঠকের নিকট 'তারীখ-ই-দা'ওয়াত ও 'আযীমত'-এর নতুন করে পরিচয়ের অবকাশ নেই। সর্বপ্রথম ভারতে প্রকাশিত হলেও ইতিমধ্যেই তা আরবী ও ইংরেজী ভাষায় অনূদিত হয়ে বিশ্বের বিভিন্ন দেশের পাঠক মহলে সাড়া জাগিয়েছে। কুয়েত ও বৈরুত থেকে আরবী ভাষায় গ্রন্থটির পঞ্চম সংস্করণ প্রকাশিত হয়েছে। ইংরেজী ভাষায় Saviour of Islamic Spirit নামে দুটি সংস্করণ, উর্দু ভাষায় লাখনৌ থেকে দুটি সংস্করণ এবং করাচী থেকে উর্দুতে এর একটি সংস্করণ প্রকাশিত হয়েছে।

১৯৭৯ সালে সর্বপ্রথম এ সিরিজের ৩য় খণ্ডটি আমার হাতে আসে। বইটি আমাকে আকৃষ্ট করে এবং সঙ্গে সঙ্গেই আমি তরজমার সিদ্ধান্ত গ্রহণ করি; কিন্তু তখন অন্য একটি বই আমার হাতে থাকার এটির তরজমায় স্বভাবতই একটু বিলম্ব হয়। তারপর ১৯৮০ সালের শেষ দিকে তরজমার কাজে হাত দিই এবং ১৯৮১ সালের মে মাসে তা সম্পন্ন করতে সক্ষম হই। তরজমার সঙ্গে এর পূর্বকার দু'টি খণ্ড সংগ্রহের সযত্ন চেষ্টা চালিয়ে যাই। অতঃপর মেজর জেনারেল আকবর খান রচিত ইসলামের প্রতিরক্ষা কৌশলের উপর প্রণীত বিখ্যাত 'হাদীছের দেকা' গ্রন্থটির তরজমায় হাত দিই এবং আল্লাহ্ র ফযলে যথাসময়ে তা সম্পন্ন করতেও সমর্থ হই। অবশেষে বহু চেষ্টা-তদবীরের পর Karim international- এর স্বত্বাধিকারী বন্ধুবর নাজমুল করিম সাহেবের আন্তরিকতায় উক্ত খণ্ড দুটি সংগ্রহে সমর্থ হয়েছি। এজন্য আমি তাঁর কাছে ঋণী। আল্লাহ্ র রহমত এবং পাঠকের দু'আ' পেলো সত্বর সে দু'টির তরজমাও পেশ করতে সক্ষম হব।

(আট)

বর্তমান পুস্তকের তরজমা সম্পর্কে আমার কিছু বলার নেই। ইসলামী বিশ্বকোষ প্রকল্পের দায়িত্ব বহন করতে নিরন্তর যে পরিশ্রম আমাকে করতে হয়েছে তজ্জন্য নিজের কাজের প্রতি যতটুকু সুবিচার করা দরকার ছিল তা পারিনি। তবুও এতে প্রশংসার যদি কিছু থাকে তবে তা বিশিষ্ট অনুবাদক ও লেখক বন্ধুবর আবদুল মতীন জালালাবাদীর প্রাপ্য। কেননা এর সম্পাদক হিসাবে একে সর্বাঙ্গ সুন্দর করে তুলতে তিনি চেষ্টার কোন কসূর করেন নি। আর দোষত্রুটি কোথাও কিছু ঘটলে তার সকল দায়-দায়িত্ব নিজের ঘাড়ে তুলে নিচ্ছি। এরপর আগামী সংস্করণ ছাড়া কাফফারা আদায়ের কোন সুযোগ দেখছি না।

আমার সকল বক্তব্য প্রথম খণ্ডের জন্য তুলে রেখে এখানেই বিদায় নিচ্ছি। সকল হাম্দ আল্লাহর।

.....

অনেক আগেই গ্রন্থের প্রথম সংস্করণ নিঃশেষ হয়ে যাওয়ায় এক্ষণে এর দ্বিতীয় সংস্করণ প্রকাশিত হ'ল। এ গ্রন্থের প্রতি পাঠকের আগ্রহ আমাকে উৎসাহিত করেছে প্রচুর। তাঁদের প্রতি শুকরিয়া জানাবার ভাষা আমার নেই। সেই সঙ্গে সিরিজের অন্যান্য খণ্ডের প্রতি পাঠকের চাহিদা ও আগ্রহ দৃষ্টে দীন অনুবাদক গভীরভাবে অভিভূত বটে। বিশেষ করে সংগ্রাম সম্পাদক বন্ধুবর আবুল আসাদ, আজিজিয়া কুতুবখানার স্বত্বাধিকারী জনাব ওজীহ আহমদ সাহেব এবং চট্টগ্রামের মাওলানা আবদুর রহীম ইসলামাবাদী সিরিজের অন্যান্য খণ্ডের দ্রুত তরজমা করার জন্য এযাবত যেভাবে আমাকে তাকীদ দিয়ে এসেছেন তজ্জন্য আমি তাঁদের প্রতি জানাই আমার আন্তরিক কৃতজ্ঞতা। আল্লাহর অসীম মেহেরবানী, অবশেষে তাঁরই অপার অনুগ্রহে ১ম খণ্ডটির তরজমার কাজও শেষ হবার পর এক্ষণে প্রকাশের অপেক্ষা করছে এবং ২য় খণ্ডটির তরজমার কাজও দ্রুত গতিতে এগিয়ে চলেছে। পাঠকের দু'আ ও আল্লাহর রহমত হলে শারীরিক অসুস্থতা এবং নিরন্তর কর্মব্যস্ততা সত্ত্বেও আগামী ডিসেম্বরের পূর্বেই তরজমার কাজ শেষ করতে সক্ষম হব বলে আশা করি।

অনুবাদকের পরম সৌভাগ্য, 'যব ঈমান কী বাহার আঈ' (ঈমান যখন জাগলো' নামে প্রকাশিত) এবং বর্তমান গ্রন্থের অনুবাদের সূত্রে এ সব গ্রন্থের মূল লেখক 'আল্লামা সাইয়েদ আবুল হাসান আলী নদভী (মা. জি. 'আ)-র সঙ্গে অধর্মের সাক্ষাৎ ও সাহচর্য লাভের সুযোগ ঘটে। তাঁর গ্রন্থের অনুবাদ প্রকাশিত হওয়ায় এরং তাঁর লেখনীর প্রতি এদেশের পাঠক সমাজের প্রচুর আগ্রহ দৃষ্টে তিনি

(নয়)

অত্যন্ত সন্তোষ প্রকাশ করেন। এ সময় তিনি সিরিজের অন্যান্য খণ্ডের তরজমার ব্যাপারে অনুমতি প্রদান করে দীন অনুবাদককে অনুগৃহীত করেন। পরম করুণাময়ের দরবারে একান্ত মুন্সাজাত, তিনি যেন হযরত (মা. জি. 'আ)-কে হায়াত দারায় করেন এবং অধমকে তাঁর গভীর জ্ঞান, প্রজ্ঞা ও সোহবতের ফয়েয থেকে বরকত লাভ করবার তওফীক দান করেন।

.....

বর্তমান গ্রন্থের সর্বশেষ সংস্করণ প্রকাশিত হয় একযুগ আগে। এরপর এ সিরিজের কোন খণ্ডই আর প্রকাশিত হয়নি। অথচ এসব খণ্ডের প্রতি পাঠকের আশ্রয়ের কোন কমতি ছিলনা। দীর্ঘ অপেক্ষার পর অবশেষে বিশিষ্ট প্রকাশক মুহাম্মদ ব্রাদার্স-এর স্বত্বাধিকারী বন্ধুবর অধ্যাপক আবদুর রউফ সাহেব আল্লামা সাইয়েদ আবুল হাসান আলী নদভী (র)-এর সকল গ্রন্থের অনুবাদ প্রকাশের ব্যাপারে আশ্রয় প্রকাশ করায় কতিপয় শর্তাধীনে অন্যান্য কয়েকটি গ্রন্থের মত বর্তমান গ্রন্থটিও তিনি প্রকাশ করছেন। আল্লাহ্ পাক তাঁর দীনের জন্য আমাদের এ খেদমতটুকু কবুল করুন। আমীন!

- আবু সাঈদ মুহাম্মদ ওমর আলী

ভূমিকা

সমস্ত প্রশংসা আল্লাহর এবং সালাম ও শান্তি তাঁর মনোনীত বান্দাদের ওপর। আলহামদুলিল্লাহ্। 'তারীখ-ই-দা'ওয়াত ও 'আযীমত'-এর তৃতীয় খণ্ড পেশ করার সৌভাগ্য হ'ল। দ্বিতীয় ও তৃতীয় খণ্ডের মাঝখানে এত দীর্ঘ বিরতি ঘটে যে, গ্রন্থকার বিমর্ষ এবং আগ্রহী পাঠক নিরাশ হয়ে পড়েন। ইতোমধ্যে গ্রন্থকারের ছোট্ট কলম কিছু গ্রন্থ-রচনা করেছে এবং তা প্রকাশিত হয়েছে। যতই বিলম্ব ঘটছিল ততই এ সন্দেহ ঘনীভূত হচ্ছিল যে, আল্লাহ্ না করুন, এই ফলপ্রসূ ও কল্যাণকর সিলসিলা প্রাচীন গ্রন্থকারদের অনেক গুরুত্বপূর্ণ কিতাবের-এমন কি খোদ এই গ্রন্থকারের কতকগুলো ধারাবাহিক গ্রন্থ প্রণয়ন প্রকল্পের মতো অসম্পূর্ণই না থেকে যায়। সম্ভবত এমনিটাই হ'ত-কমপক্ষে এ বিরতি দীর্ঘ থেকে দীর্ঘতর হ'ত-যদি না এর ভেতর একটি লক্ষণীয় অভিব্যক্তি এবং অবশ্য পালনীয় ইশারা-ইঙ্গিত ও প্রচণ্ড দাবির অস্তিত্ব থাকত।

আমার আধ্যাত্মিক উস্তাদ হযরত মাওলানা 'আবদুল কাদির সাহেব রায়পুরী (তাঁর বরকত চিরন্তন হোক) 'তারীখ-ই-দা'ওয়াত ও 'আযীমত' বারবার শুনে এবং বারবার তাঁর মজলিসে-মাহফিলে পড়িয়ে গ্রন্থ ও গ্রন্থকারের সম্মান ও সাহস বাড়িয়ে দিয়েছেন। এই দু'খণ্ডের পর তিনি তৃতীয় খণ্ডের জন্য তাগাদা দিতে থাকেন এবং এই খাদেম (গ্রন্থকার)-কে তা সম্পূর্ণ করার জন্য বারবার নির্দেশ প্রদান করেন। অনেক বার এমনিও হয়েছে যে, আমি বাইরে থেকে যখনই তাঁর খেদমতে গিয়ে হাযির হয়েছি তখনই তাঁর প্রথম প্রশ্ন ছিল, তৃতীয় খণ্ড কি সমাপ্ত করেছে? কয়েকবার আমি আমার সংকট ও বিড়ম্বনার কথা তাঁকে জানাই। তিনি তা শুনেই বলে ওঠেন, অন্তত তৃতীয় খণ্ডটি শেষ করে ফেল। অতঃপর তিনি যখন জানতে পারলেন যে, এই অংশটিতে সুলতানুল মাশায়িখ হযরত খাজা নিজামুদ্দীন মাহবুবে ইলাহী (কা)-এর আলোচনা থাকবে, তখন তিনি তাঁর রহনী ও বিশেষ সম্পর্কের কারণে তাগাদার মাত্রা আরও বাড়িয়ে দেন। এদিকে এই অধমের অবস্থা এই হয়েছিল যেন সে কলম রেখে দিয়েছিল এবং এ প্রসঙ্গে ইতি টানার উপক্রম হয়েছিল। জুন, ১৯৬১ সালে আমি একবার হযরত রায়পুরী সাহেবের খেদমতে হাযির হলে দেখতে পাই, হযরত খাজা (র)-এর মলফুযাতের সেই

(এগার)

সংকলন পাঠিত হচ্ছে—যা আমীর খসরু (র) কর্তৃক সংগৃহীত ও ‘আফযালুল ফাওয়াইদ’ নামে লাহোর থেকে প্রকাশিত হয়েছে এবং যা আমার এক প্রিয় দোস্ত তোহফাশ্বরূপ নিয়ে এসেছেন। এ সংকলনটি এমনই সনদবিহীন ও ভিত্তিহীন বর্ণনায় ভরপুর যে, তা শ্রবণ করাটাও কোন বিশ্লেষণী শক্তি ও ঐতিহাসিক দৃষ্টিভঙ্গীর অধিকারী ব্যক্তি, এমন কি সাধারণ বিচার-বুদ্ধিসম্পন্ন লোকের পক্ষেও বোঝাস্বরূপ মনে হবে। এর সংগ্রাহক হিসাবে আমীর খসরু (র)-কে সম্পর্কিতকরণ আদৌ যুক্তিযুক্ত নয়। হযরত খাজা সায়্যিদ মুহাম্মদ গেসুদরায (র)-যাঁর ও সুলতানুল মাশায়িখের ভেতর কেবল একটিই মাধ্যম রয়েছে এবং তাও হযরত চেরাগে দিল্লী (র)-এর, যিনি উক্ত আধ্যাত্মিক সিলসিলার নয়নমণি এবং গুপ্ত রহস্যের অধিকারী—সুস্পষ্ট ভাষায় বলেন যে, ‘ফাওয়ানেদুল ফুওয়াদ’ ছাড়া মলফূযাতের যতগুলি সংকলন মশহুর হয়ে আছে—তাঁর সবগুলোই বাহুল্য দোষে দুষ্ট ও অবিশ্বাস্য। যা হোক, মজলিসে উক্ত কিতাব পাঠিত হচ্ছিল। হযরত রায়পুরী কখনো কখনো এর কোন কোন অধ্যায়ে বিস্ময় প্রকাশ করছিলেন। তাঁর অর্ধনিমিলিত ও অর্ধ-উন্নীলিত অথচ চিত্তাকর্ষক দৃষ্টি—যা কখনো কখনো এই গ্রন্থকারের ওপরও পড়ছিল এবং ইশারা-ইঙ্গিতে বলছিল যে, যদি নির্ভরযোগ্য ও বিশ্বাস্য কিতাব খুঁজে পাওয়া যেত তা হলে এ ধরনের অনির্ভরযোগ্য ও অবিশ্বাস্য কিতাব হাতে নেওয়ার কোন প্রশ্নই উঠত না। তাঁর ঐ দৃষ্টি আমার অন্তরে গিয়ে তীরের মতো বিদ্ধ হ’ল এবং আমি সেখানেই সিদ্ধান্ত নিলাম যে, প্রথম অবকাশেই আমি অবশ্যই এ দায়িত্ব সম্পাদন করব এবং এ সওগাত আমাকে অবশ্যই পেশ করতে হবে।

এ কাজ মাঝপথে আটকে পড়ার অন্যতম কারণ ছিল পথের বন্ধুরতা। ভারতীয় উপমহাদেশের আওয়ালিয়ায়ে কিরাম, ইসলামের মুবাঞ্জিগবন্দ এবং মহান বুয়ুর্গগণের জীবনী সম্পর্কে অসংখ্য গ্রন্থ রচিত হয়েছে। এর ভেতর বিরাট আকারের গ্রন্থও রয়েছে। কিন্তু যখন এ যুগের কোন গ্রন্থকার তাঁদের জীবনের ঘটনাবলী একত্রিত করার মানসে কাজে নামেন এবং তাঁদের প্রকৃত কামালিয়াত, তাঁদের দীনী ও তবলীগী চেষ্টা-সাধনা, তাঁদের তালীম ও তরবিয়তের ফলাফল এবং তাঁদের মেযাজ ও প্রকৃতির ওপর আলোকপাত করার চেষ্টা করেন এবং এ যুগের লোকদের জন্য ঐ সব জীবন-বৃত্তান্ত শিক্ষণীয়, উৎসাহ-উদ্দীপক ও সাহসিকতামণ্ডিত করে তোলার প্রয়াস পান, তাঁদের জীবনের ঘটনাবলী ও অন্যান্য অবস্থা প্রকাশ্য দিবালোকে উদ্ভাসিত করে তুলতে প্রয়াস পান, প্রয়াস পান তাঁদের জীবনের সত্যিকার বিশ্বুদ্ধ কাঠামো উপস্থাপিত করতে—তখন বিদগ্ধ রচনাকারীকে দারুণ ভাবে নিরাশ হতে হয়—হতে হয় বিব্রতকর অবস্থার সম্মুখীন। কোন কোন সময় শত শত পৃষ্ঠার একটি গ্রন্থ থেকে, এমন কি কতিপয় গ্রন্থ

(বার)

থেকেও একটি পৃষ্ঠা লিখবার মতো উপকরণ সংগ্রহ করা যায় না। এভাবে মহান ও শ্রেষ্ঠতম মনীষীদের জীবন-কাহিনীতে এমন সব বিরাট শূন্যতা দৃষ্টিগোচর হয় যে, কোনরূপ কল্পনা, অনুমান ও ভাষার অলংকার-চাতুর্য দিয়েও তা পূরণ করা যায় না। গোটা পুস্তকের পৃষ্ঠার পর পৃষ্ঠা কাল্পনিক গল্প, অলৌকিক কাহিনী ও বুদ্ধিবিক্রম ঘটাবার মতো ঘটনাবলী কল্পকাহিনীতে ভরপুর থাকে। তাতে প্রয়োজনীয় বিষয়সমূহের দুঃখজনক ঘাটতি পরিলক্ষিত হয়। ভারতীয় উপমহাদেশের একজন খ্যাতনামা ঐতিহাসিক, যিনি স্বীয় জ্ঞানভাণ্ডার সমৃদ্ধকরণ ও গ্রন্থ প্রণয়নের আবশ্যিকতা পূরণের উদ্দেশ্যে ভারতীয় উপমহাদেশের ইতিহাসের এত ব্যাপক অধ্যয়ন করেছেন যার দ্বিতীয় কোন নবীর বর্তমান যুগে মেলা দুরূহ। এই বিখ্যাত গ্রন্থ প্রণেতা ও ঐতিহাসিক ভারতবর্ষের বিশিষ্ট ও প্রখ্যাত লোকদের জীবনী আটটি বিরাট খণ্ডে সমাপ্ত করেছেন; তাঁকেও নিম্নোক্ত উপায়ে অভিযোগ পেশ করতে দেখা গেছে :

‘দেশের জন্য কি পরিহাস দেখুন, প্রথম থেকে আজ পর্যন্ত ভারতীয় উপমহাদেশের শত শত ইতিহাস লেখা হয়েছে এবং বিভিন্ন শিরোনামে লেখা হয়েছে, কিন্তু এগুলোর ভেতর কোন গ্রন্থই ঐতিহাসিকের বিস্তৃত মানদণ্ডে উত্তীর্ণ হয় না। যে কোন কিতাব হাতে নিল, মনে হবে—যদিও যুদ্ধের ময়দান ও বিলাস মাহফিলের গল্প-কাহিনী, বিউগল ও কাড়া-নাকাড়ার বর্ণনা থেকে এর কোন কোন পৃষ্ঠা মুক্ত—কিন্তু বাদ্যযন্ত্রের বাঁহকার থেকে তা আদৌ মুক্ত নয়। ছন্দোবদ্ধ বাণী ও অলংকার-সমৃদ্ধ গাথার কাঁটাবর্ণে আপনার আঁচল জড়িয়েও আপনি তা খুঁজে পাবেন না। এমতাবস্থায় কী করে আশা করা যায় যে, আমরা আমাদের মহান পূর্বপুরুষদের জ্ঞান-সমৃদ্ধ জীবনের সঠিক চিত্র ট্রেটিমুক্ত এ্যালবামে পাব? এসব বুয়ুর্গের কিছু কিছু জীবনী-গ্রন্থ পাওয়া যায় যাঁরা তরীকতের কোন না কোন সিলসিলার সঙ্গে যুক্ত ও সম্পৃক্ত ছিলেন। কিন্তু এ এক নিদারুণ পরিহাস যে, আপনি যদি সেসব গ্রন্থ থেকে তাঁদের নাম ও বংশ-পরিচয়, লালন-পালন, শিক্ষা-দীক্ষা, জীবনযাপন ও জ্ঞান-সাধনা সম্পর্কে পর্যালোচনা ও বিশ্লেষণ করতে চান তবে একটি শব্দও তাতে পাবেন না। কাড়া-নাকাড়ার ও রণদামামার কাজ এখানে অবশ্য নেই, কিন্তু বাদ্যযন্ত্রের বাঁহকার থেকে এর একটি পৃষ্ঠাও আপনি মুক্ত পাবেন না। দেখা যায়, ঐ সব গ্রন্থকারের সকল শক্তি ব্যয়িত হয়েছে ঐ সব মহান বুয়ুর্গের কাশুফ ও কারামাত তথা অলৌকিক কাহিনীর বর্ণনায় এবং তাঁদেরকে এই পর্যায়ে উপনীত করবার প্রচেষ্টা চালানো হয়েছে যেন তাঁরা রক্ত-মাংসে গড়া মানুষের উর্ধ্বের অপর কোন সৃষ্টি; আদৌ এ জগতের কেউ নন। মনে হয় তাঁরা খান না, পান করেন না, শয়ন করেন না এবং মানবীয় বৈশিষ্ট্য ও জ্ঞান-সাধনার সাথে তাদের কোন সম্পর্ক কিংবা প্রয়োজনীয়তা নেই। তাঁদের কাজ শুধু যেন এই

(তের)

যে, তাঁরা আল্লাহর সৃষ্টি প্রাকৃতিক বিধান সর্বদাই ভেঙে-চুরে খান খান করে যাবেন এবং প্রাণীজগত, উদ্ভিদ জগত ও বস্তু জগতের চারটি মৌলিক পদার্থের (আগুন, পানি, বাতাস ও মাটি) ওপর যে কোন উপায়ে নিজেদের শাসন কর্তৃত্ব চালিয়ে যাবেন।”

এ মুহূর্তে আপনি যদি এর বাস্তব অভিজ্ঞতা লাভ করতে চান তবে ভারতীয় উপমহাদেশের চিশতিয়া সিলসিলার প্রতিষ্ঠাতা বরং আর এক দিক থেকে এ উপমহাদেশে ইসলামী সিলসিলার প্রতিষ্ঠাতা হযরত খাজা মুঈনউদ্দিন চিশতী (র) এর জীবন-চরিত সম্পর্কিত কিতাবাদি অধ্যয়ন করুন এবং তা থেকে সংক্ষিপ্ত কোন জীবনী প্রণয়নে প্রয়াসী হোন, সম্ভবত আপনার মনে হবে, যুগটা যেন ইসলামের প্রাথমিক যুগ; গ্রন্থ রচনা ও কিতাবাদি প্রণয়ন যুগের সূচনাই যেন হয়নি। বাস্তব ঘটনা কিন্তু তা নয়। কেননা এ যুগেই আমরা কাযী মিনহাজ উদ্দীন ‘উছমানী জুযেজানীর তাবাকাতে নাসিরী এবং নূরউদ্দীন আওফীর কিতাব ‘নুবাবুল আলবাব’-এর সাক্ষাত পাই। এ দুটো কিতাবই হিজরী সপ্তম শতাব্দীর রচনা। আর যদি তা কোন মতে মেনেও নেওয়া হয় তবে এ ব্যাপারে কী বলা যাবে যে, শায়খুল ইসলাম হযরত বাহাউদ্দীন যাকারিয়া মূলতানী (র), যিনি ছিলেন একজন মহান আধ্যাত্মিক নেতা ও অভ্যন্তর শ্রদ্ধের সংস্কারক-যিনি তাঁর যুগকে গভীরভাবে প্রভাবিত করেছিলেন এবং এমন একটি শহরে জীবনপাত করেছিলেন যা ছিল সে যুগের ভারতবর্ষের সর্বশ্রেষ্ঠ শিক্ষাকেন্দ্র, যে যুগে রাজনৈতিক অবস্থার ভেতর ভারসাম্য ও স্থায়িত্ব সৃষ্টি হয়েছিল, কিন্তু তথাপিও এই মহান ব্যক্তিত্বের জীবন-চরিত লিখতে গিয়ে এবং তাঁর কার্যাবলীর ইতিহাস প্রণয়ন করতে গিয়ে প্রয়োজনীয় উপকরণের ঘাটতি পরিলক্ষিত হয়, অথচ তাতে অদ্ভুত ও অলৌকিক কাহিনী এবং কাশ্ফ ও কারামতের ঘটনাবলীর কোন কমতি দেখা যায় না।

এদিক থেকে হযরত সুলতানুল মাশায়খ খাজা নিজামুদ্দিন আওলিয়া (র) এবং হযরত মাখদুমুল মুল্ক শায়খ শরফুদ্দীন ইয়াহুইয়া মুনাযরী (র) (যাঁরা হিজরী অষ্টম শতাব্দীর দু’জন নামকরা ব্যক্তিত্ব এবং মহান আধ্যাত্মিক নেতা ও সংস্কারক) বিশেষ বৈশিষ্ট্য ও স্বাতন্ত্র্যের অধিকারী ছিলেন। কয়েক শতাব্দী পর্যন্ত কোন তরীকতপন্থী নেতার এবং কোন ধর্মীয় ব্যক্তিত্বের জীবন-বৃত্তান্তই এতখানি আলোকোজ্জ্বল নয় যতখানি এ দু’জন মহান ব্যক্তিত্বের। এ উপকরণ এদিক থেকেও বিশেষ বৈশিষ্ট্যের দাবিদার যে, সেগুলো এঁদের মলফুযাত ও চিঠিপত্রাদি (মকতুবাভ) থেকে অথবা সমসাময়িক ইতিহাস এবং তাঁদের খাদেম ও মুরীদানদের লিখিত কিতাবাদি থেকে সংগৃহীত হয়েছে। এদিক দিয়ে ঐতিহাসিককে এখানে সর্বাপেক্ষা কম সমস্যা ও সংকটের সম্মুখীন হতে হয়।

(চৌদ্দ)

অবশ্য বাহাই ও পর্যালোচনার কাজ এখানেও অপরিহার্য। কেননা সংঘটিত ঘটনাবলী ও সন-তারিখ নিয়ে অত্যন্ত বিশৃঙ্খল ও পরস্পরবিরোধিতা এখানেও দৃষ্টিগোচর হয়।

কিন্তু এ দু'জন মহান বুয়ুর্গকে বেছে নেবার কারণ এ নয় যে, তাঁদের সম্পর্কে লিখতে গিয়ে ঐতিহাসিক উপকরণ অত্যন্ত সহজেই হস্তগত হয়। এটা অন্যান্য আরো কিছু ব্যক্তিত্বের বেলায়ও প্রযোজ্য। তবে এঁদের বেছে নেবার কারণ হ'ল, তাঁরা ইসলামী রেনেসাঁ তথা পুনর্জাগরণের ইতিহাসে সম্মানিত আসন অধিকার করেন এবং ভারতীয় উপমহাদেশে (যা সপ্তম শতাব্দীর পর থেকে ইসলাম জগতের কেন্দ্রবিন্দু এবং নবজাগরণ ও রেনেসাঁ আন্দোলনেরও উৎসভূমি) সংস্কারধর্মী আন্দোলনের নেতৃত্ব দেন—যা নিজেদের যুগ ও পরবর্তী বংশধরদের সর্বাধিক প্রভাবিত করেছে।

জীবন-বৃত্তান্ত ও শিক্ষামালা বাহাই ও নির্বাচনের ক্ষেত্রে গ্রন্থকার সব সময়ই সেসব অনুচ্ছেদ ও অধ্যায়গুলোকে অধিকতর গুরুত্ব দিয়েছেন যা বর্তমান বংশধরদের জন্য উপকারী, শিক্ষণীয়, অনুকরণীয়, সাধারণের পক্ষে বোধগম্য ও চিন্তাকর্ষক এবং যাতে ভুল বোঝাবুঝি ও গলদ আচরণের সম্ভাবনা কম এবং যা কাল্পনিক ও নৈতিক দর্শনের সঙ্গে কম সম্পর্কযুক্ত। কেননা ঈমান ও একীন, ইশক ও মুহব্বত, রাসূল কারীম (স)-এর বাস্তব জীবনাদর্শ (সুন্নত) অনুসরণের প্রেরণা ও আবেগ, অটুট সংকল্প ও উচ্চ মনোবল, দাওয়াত ও তবলীগের প্রতি আগ্রহ, আমল ও আখলাকের সংস্কার, বিশুদ্ধ ইল্ম ও ধর্মীয় বিধান অধ্যয়ন ও অনুসরণই ছিল ঐ সমস্ত বুয়ুর্গের আসল সম্পদ এবং তাঁদের জীবনেতিহাসের আসল পয়গাম।

সম্ভবত গ্রন্থকারে অন্যান্য ব্যস্ততা এবং এমন সব কাজ-কর্ম যা কোন দিনই শেষ হবার নয়—এত সত্ত্বর বর্তমান কিতাবকে পরিপূর্ণতায় পৌঁছবার সুযোগ দিত না, যদি স্বীয় জন্মভূমি (রায়বেরেলী)-র সাই নদীর বন্যা একটা গ্রামে (ময়দানপুর) গ্রন্থকারকে বন্দী করে এর প্রয়োজনীয় উপায়-উপকরণ যুগিয়ে না দিত। ফলে যে কাজে মাসের পর মাস লেগে যেত সে কাজ আল্লাহর ফযলে কয়েক সপ্তাহের ভেতরই হয়ে গেল। “আল্লাহর সেনাবাহিনী আসমান-যমীনের সর্বত্র ছড়িয়ে রয়েছে।”

গ্রন্থকারের এটা নৈতিক দায়িত্ব বন্ধু ও সহযোগীদের গুরুরিয়া আদায় করা। প্রাচীন উৎসের ভেতর গ্রন্থকার সর্বাপেক্ষা অধিক কৃতজ্ঞ ‘সিয়ারুল আওলিয়া’ প্রণেতা আমীর খোর্দ এবং ‘ফাওয়ানেদুল ফুওয়াদ’ গ্রন্থের প্রণেতা আমীর হাসান ‘আলা সিদ্দযীর নিকট য়াঁরা হযরত খাজা নিজামুদ্দীন (র)-এর জীবন-বৃত্তান্ত ও শিক্ষামালার সর্বাধিক বিস্তৃত ও নির্ভরযোগ্য উপকরণ সরবরাহ করেছেন। আমি

(পনর)

হযরত মাখদুমুল মুল্ক শরফুদ্দীন বিহারী (র)-এর জীবনীমালার ভেতর 'সীরাতুশ শরফ' থেকে বিরাট সাহায্য ও দিক-নির্দেশনা লাভ করেছি এবং এ থেকে প্রাচীনতম উৎসের সন্ধান পেয়েছি। মাওলানা সাইয়েদ মানাযির আহসান গিলানী (র)-এর রচিত গ্রন্থরাজির অধ্যায়গুলো বরাবরের মত আমার জন্য বিরাট উপকারী ও সহায়ক প্রমাণিত হয়েছে। শ্রদ্ধেয় ওয়ালিদ সাহেব মাওলানা হাকিম সাইয়েদ 'আবদুল হাই (র)-এর মূল্যবান গ্রন্থ 'নুযহাতুল খাওয়াতির' স্বাভাবিক নিয়মেই ইতিহাস ও ভাষিকিরার একটি বিশ্বকোষের কাজ দিয়েছে এবং গ্রন্থকার এ থেকে এভাবে সাহায্য ও সহায়তা নিয়েছেন, এর দিকে হাত বাড়িয়েছেন এত বারবার যেমন কোন ছাত্র বারবার অভিধানের শরণাপন্ন হয়ে থাকে। এ বিষয়ের ওপর ব্যাপক অধ্যয়নের পর পরিমাপ করতে পেরেছি, তাঁর দৃষ্টি কত বিস্তৃত ও গভীর এবং তাঁর নির্বাচন ও রুচি কত পবিত্র ও শালীন ছিল।

আমি সহযোগী বন্ধুদের মধ্যে জনাব মাওলানা সাইয়েদ নাজমুল হুদা সাহেব নদভী দসনবী ও বন্ধুবর মওলবী মুরাদুল্লাহ সাহেব মুনারী নদভীর নিকট অত্যন্ত কৃতজ্ঞ যাঁরা হযরত মাখদুমুল মুল্ক (র)-এর জীবন-কাহিনী ও রচনাবলীর মধ্যে কতক দৃষ্টান্ত বিষয় আমাকে যোগান দিয়েছেন। বন্ধুবর মওলবী শাহ শাকবীর 'আতা নদভী (যিনি ইতিহাস ও জ্ঞানগত বিষয়ে গভীর আগ্রহ তাঁর স্বনামখ্যাত পিতা থেকে উত্তরাধিকারসূত্রে পেয়েছিলেন) থেকেও কতক জরুরী বিষয়ে সহায়তা পেয়েছি। ভাগ্যবান বন্ধুবর সাইয়েদ মুশারররাফ 'আলী নদভীও গ্রন্থকারের শুকরিয়া পাবার হকদার। এ গ্রন্থকার বর্তমান পুস্তকের বিরাট অংশ রচনা করেন এবং প্রিয় বন্ধু অত্যন্ত সাহসিকতা ও কঠোর পরিশ্রমের সাথে তা লিপিবদ্ধ করেন। মওলবী ইকবাল আহমদ সাহেব আ'জমীও শুকরিয়া পাওয়ার হকদার যিনি সময়-অসময়ে আমাকে নানা সাহায্য-সহযোগিতা প্রদান করেছেন। আল্লাহ তা'আলা এসব বুয়ুর্গ ও বন্ধুদের উপযুক্ত শুভ প্রতিদান দিন এবং তাঁদের আমলকে কবুল করুন।

প্রথম থেকে শেষাবধি আল্লাহর যাবতীয় প্রশংসা, তাঁরই শ্রেষ্ঠ সৃষ্টি মুহাম্মদ (স), তাঁর বংশধর, সাহাবীকুল ও সমগ্রের ওপর মহান আল্লাহর রহমত বর্ষিত হোক।

মারকাযে দা'ওয়াতে ইসলাম্‌হ ও
তবলীগ, লাখনৌ

আবুল হাসান 'আলী
১১ সফর, ১৩৮২ হিজরী
২৪ জুলাই, ১৯৬২ ঈসাব্দী

সূচীপত্র

বিষয়

পৃষ্ঠা

প্রথম অধ্যায়

ভারতবর্ষে চিশ্‌তিয়া সিলসিয়া এবং এ সিলসিয়ার শ্রেষ্ঠতম ব্যুর্গগণ

ইসলামী বিশ্বের আধ্যাত্মিক ও মনস্তাত্ত্বিক কেন্দ্র	২৭
মুসলিম ভারতের স্থপতি	২৯
ভারতবর্ষের সাথে চিশ্‌তিয়াদের প্রাথমিক সম্পর্ক	৩০
হযরত খাজা মুঈনুদ্দীন চিশতী (র)	৩১
খাজা কুতুবুদ্দীন বখতিয়ার কাকী (র)	৩৩
হযরত খাজা ফরীদুদ্দীন গঞ্জ শকর (র)	৪১

হযরত শায়খ খাজা নিজামুদ্দীন আওলিয়া (র)

দ্বিতীয় অধ্যায়

সুলতানুল মাশায়িখ হযরত নিজামুদ্দীন আওলিয়া (র)-এর

জীবনী ও কামালিয়াত

প্রাথমিক শিক্ষা ও প্রশিক্ষণ	৫৮
কঠোর দারিদ্য ও মা'য়ের প্রশিক্ষণ	৫৮
শায়খুল কবীর হযরত শায়খ ফরীদ (র)-এর সাথে সম্পর্ক এবং	
আন্তরিক মিল-মুহব্বত	৫৯
দিল্লী ভ্রমণ	৫৯
দিল্লীতে ছাত্রজীবন	৬০
উস্তাদের প্রিয়পাত্র	৬০
জ্ঞানের ক্ষেত্রে বিশেষ বৈশিষ্ট্য ও অগ্রাধিকার	৬১
'মাকামাত' কর্তৃস্থ ও এর কাফফারা	৬১
হাদীছের এজায়ত প্রাপ্তি	৬১
অন্তরের অস্তিত্বতা এবং আল্লাহর দিকে ধাবমানতা	৬২
ওয়ালিদা সাহেবার ইত্তিকাল	৬২

(আঠার)

বিষয়	পৃষ্ঠা
মা'য়ের স্মৃতি স্মরণ	৬২
আল্লাহর প্রতি মা'য়ের যাকীন ও তাওয়াক্কুল	৬৩
একটি ভুল আকাজক্ষা	৬৩
আজুদহনে প্রথমবার উপস্থিতি	৬৪
প্রার্থী, না প্রার্থনা পূরণকারী?	৬৪
মুরীদকে সাদরে গ্রহণ	৬৪
বায়'আত	৬৫
শিক্ষার ধারাক্রম অব্যাহত অথবা পরিত্যক্ত	৬৫
শায়খুল কবীর (র) থেকে দরুস গ্রহণ	৬৬
দরুস-এর আনন্দ	৬৬
আত্মবিলুপ্তির শিক্ষা	৬৭
চূড়ান্ত মুহূর্ত	৬৮
বন্ধুর ভর্ষনসা	৬৯
উপস্থিতি কতবার?	৭০
শায়খুল কবীর (র)-এর অনুগ্রহ	৭০
বিদায় ও ওসিয়ত	৭০
একটি দু'আর আবেদন	৭১
আজুদহন থেকে দিল্লী	৭১
ন্যায্য অধিকার প্রত্যর্পণ	৭২
দিল্লীর অবস্থানস্থল	৭৩
দারিদ্র্য ও অনাহার	৭৫
অন্যের মাধ্যম ব্যতিরেকে	৭৫
শায়খুল কবীর (র)-এর ওফাত	৭৬
গিয়াসপুরে অবস্থান	৭৬
জনশ্রোত	৭৯
অনুগ্রহ বিতরণকারী ফকীর	৭৯
জাঘত হবার পর প্রথম প্রশ্ন	৮০
দুনিয়ার প্রতি বিতৃষ্ণা এবং বিনিময় ও দান	৮০
জমি-জায়গা ও অতিরিক্ত ধন-সম্পদ থেকে বিরত থাকা	৮১
ফকীরের শাহী দস্তরখান	৮১

(উনিশ)

বিষয়	পৃষ্ঠা
শায়খ (র)-এর খোরাক	৮২
নিয়ম-প্রণালী	৮৩
সমকালীন সুলতানের সাথে সম্পর্কহীনতা	৮৩
সুলতান 'আলাউদ্দীনের পরীক্ষা ও শ্রদ্ধা	৮৫
বাদশাহুর আগমনের সংবাদে ওয়রখাহী	৮৬
ঘরের দু'টি দরজা	৮৬
ইসলামের জন্য চিন্তা-ভাবনা	৮৬
সুলতান কুতবুদ্দীনের বিরোধিতা ও হত্যা	৮৮
গায়েবী লগরখানা	৮৯
গিয়াসউদ্দীন তুগলকের রাজত্বকাল এবং সরকারী বিতর্ক সভা	৮৯
হরযত খাজা (র)-এর যবানীতে বিতর্ক সভার অবস্থা	৯৩
দিল্লীর ধ্বংস	৯৩
সময়ের ব্যবস্থাপনা	৯৪
আর্মীর খসরুর বৈশিষ্ট্য	৯৫
রাত্রের প্রকৃতি	৯৫
সাহরী	৯৫
ভোর বেলায়	৯৬
দিনের বেলায়	৯৬
মনস্ত্বষ্টি সাধন ও প্রশিক্ষণ	৯৭
ওফাত নিকটবর্তী হ'লে	৯৭
মর্যাদাশীল খলীফাদের এজায়তনামা প্রদান	
মুহব্বত ও পারম্পরিক ভ্রাতৃত্ব	৯৭
ওফাতের অবস্থা	৯৮

তৃতীয় অধ্যায়
চরিত্র ও গুণাবলী

সামগ্রিক গুণাবলী	১০২
ইখলাস	১০২
শক্রের প্রতি উদারতা	১০৪
দোষ গোপন এবং মহত্ত্ব ও উদার্য	১০৬
স্নেহপ্রবণতা ও আত্মীয়-কুটুম্বিতা	১০৭
সাধারণের প্রতি সমবেদনা	১০৮
ছোটদের প্রতি স্নেহ	১১০

(কুড়ি)

বিষয়

পৃষ্ঠা

চতুর্থ অধ্যায়

স্বাদ-আহ্লাদ ও বাস্তব অবস্থা

শ্রেয়-মুহব্বত ও স্বাদ-আহ্লাদ	১১২
'সামা'	১১৩
বাদ্যযন্ত্রের প্রতি ঘৃণা ও অবজ্ঞা এবং এর ওপর নিষেধাজ্ঞা	১১৬
'সামা'র মধ্যে হযরত খাজা নিজামুদ্দীন (র)-এর অবস্থা	১১৭
কুরআনুল করীমের স্বাদ	১১৯
শায়খ (র)-এর সাথে সম্পর্ক	১২১
জামা'আতের ব্যবস্থাপনা ও দৃঢ় মনোবল	১২১
শরীয়তের পাবন্দী এবং সুলতানের অনুসরণে কর্মপন্থা	১২১

পঞ্চম অধ্যায়

পরোপকার ও গভীর বিশ্লেষণ

জ্ঞানের মর্যাদা	১২২
জ্ঞান-বিজ্ঞান ও সাহিত্যের সঙ্গে সম্পর্ক	১২২
হাদীস ও ফিকাহুর ওপর দৃষ্টি নিক্ষেপ	১২৩
ইলমের গুরুত্ব	১২৪
গভীর জ্ঞানরাজি ও প্রবন্ধাদি	১২৫
শরীয়তের বিশুদ্ধ ও সঠিক জ্ঞান	১২৬
হালাল বস্ত্র আল্লাহর পথে প্রতিবন্ধক নয়	১২৭
কল্ব (আত্মা) আল্লাহর দিকে নিবিষ্ট হলে কোন বস্ত্রই ক্ষতিকর নয়	১২৭
দুনিয়া পরিত্যাগের হাকীকত	১২৭
বাধ্যতামূলক ও ইচ্ছাধীন আনুগত্য	১২৮
কাশফ ও কারামত আল্লাহর পথের অন্তরায়	১২৮
আওলিয়া ও আধিয়ায়ে কিরামের জ্ঞান	১২৮
দুনিয়ার মুহব্বত ও দুষমনী	১২৯
তিলাওয়াতে কালামে পাকের মরতবা	১২৯

ষষ্ঠ অধ্যায়

ফয়েয ও বরকত

ইমানের নব জাগরণ এবং ব্যাপক ও সাধারণ তওবা	১৩১
বায়'আত একটি অঙ্গীকার ও পারস্পরিক ওয়াদা পালনের নাম	১৩৩

বিষয়	পৃষ্ঠা
সাধারণ ও ব্যাপক বায়'আত-এর হিকমত	১৩৪
জনজীবনে এর প্রভাব	১৩৬
শ্রেমের বাজার	১৪০
খলীফাদের তরবিয়ত	১৪১
চিশতী-খানকাহ	১৪৩
বিশিষ্ট মুরীদবর্গ	১৪৩

সপ্তম অধ্যায়

হযরত খাজা (র) এর তা'লীম ও তরবিয়তের প্রভাব এবং তাঁর
খলীফাদের ধর্মীয় ও সংস্কারমূলক খিদমত

তৎকালীন সুলতানদের সঙ্গে নির্ভীকতা ও স্পষ্টবাদিতার নমুনা	১৪৮
ইসলামী সালতানাতের পথ প্রদর্শন ও তত্ত্বাবধান	১৫২
ইসলামের প্রচার ও প্রসার	১৫৭
ইলম-এর খিদমত ও প্রচার	১৬১
শেষ কথা	১৬৩

মাখদুমুল মূলক হযরত শায়খ শরফুদ্দীন আহমাদ
ইয়াহুইয়া মুনাররী (র)

প্রথম অধ্যায়

জীবনের ঘটনাবলী ও বিভিন্ন অবস্থা জন্ম থেকে বায়'আত ও
এজায়ত লাভ পর্যন্ত

খান্দান	১৬৯
জন্ম	১৭০
শিক্ষা	১৭০
মাওলানা শরফুদ্দীন আবু তাওয়ামার শিষ্যত্ব গ্রহণ এবং সোনারগাঁও	১৭১
সফর	১৭৩
বিবাহ	১৭৩
দেশে প্রত্যাবর্তন	১৭৩
দিল্লী সফর ও একজন মহান বুয়র্গের নির্বাচন	১৭৫
শায়খ নাজীবুদ্দীন ফিরদৌসী (র)	১৭৬

দ্বিতীয় অধ্যায়

ভারতবর্ষে ফিরদৌসিয়া সিলসিলা এবং এর মহান ব্যুর্গগণ

খাজা নাজমুদ্দীন কুবরা (র)	১৭৭
ভারতীয় উপমহাদেশে কুবরোধী সিলসিলার আগমন	১৭৮
ভারতীয় উপমহাদেশে ফিরদৌসিয়া সিলসিলার আগমন	১৭৯
খাজা বদরুদ্দীন সমরকন্দী (র)	১৭৯
খাজা রুকনুদ্দীন ফিরদৌসী (র)	১৮১
খাজা নাজীবুদ্দীন ফিরদৌসী (র)	১৮২

তৃতীয় অধ্যায়

মুজাহাদা, নির্জনবাস, লোকালয়ে অবস্থান এবং ইরশাদ ও প্রশিক্ষণ

দিল্লী থেকে প্রত্যাবর্তন	১৮৪
শ্রমের উচ্ছ্বাস	১৮৪
রাজগীরের জঙ্গলে	১৮৫
বিহারে বসবাস এবং খানকাহ্ নির্মাণ	১৮৬
উপদেশ ও হিদায়াত প্রদান	১৮৯

চতুর্থ অধ্যায়

গুণাবলী ও বৈশিষ্ট্যসমূহ

আত্মবিলুপ্তি	১৯১
আখলাক ও মহান চরিত্র	১৯৩
স্নেহ ও করুণা	১৯৫
দুনিয়ার সাথে সম্পর্কহীনতা	১৯৬
বুলন্দ হিম্মত	১৯৭
তাজরীদ ও তাফরীদ	১৯৮
সৎকাজে আদেশ এবং মুসলমানদের অবস্থা ও কার্যকলাপ	
সম্পর্কে চিন্তা-ভাবনা	২০০
সুনুতের অনুসরণ	২০০

পঞ্চম অধ্যায়

ওফাত

সালাতে জানাযা ও দাফন	২১৩
সন্তান-সন্ততি ও বংশধর	২১৪
বিশিষ্ট খলীফা এবং মুরীদবর্গ	২১৫
রচিত গ্রন্থাদি	২১৬

(তেইশ)

বিষয়

পৃষ্ঠা

ষষ্ঠ অধ্যায়
মকতূবাত

মকতূবাত তাঁর শিক্ষা ও সাহিত্য কর্ম	২১৭
চিঠিপত্রের (মকতূবাত) সংকলন এবং যাকে লেখা হয়েছে	২২১
রচনার উৎস	২২৩

সপ্তম অধ্যায়

মকামে কিবরিয়া

দুনিয়া জাহানের মহান স্রষ্টার পরমুখাপেক্ষীহীনতা	২২৪
মহা করুণাসিন্ধুর প্রবল উচ্ছ্বাস	২৩০
সাধারণ প্রতিদান	২৩২
দয়ালু সমালোচক	২৩৩
তওবার তা'ছীর	২৩৩

অষ্টম অধ্যায়

মানবতার সম্মান ও মর্যাদা

একটি বিপ্লবাত্মক দা'ওয়াত	২৩৫
স্রষ্টার বিশেষ দৃষ্টি	২৩৬
মুহব্বতের আমানত	২৩৭
হাসিলে ওজুদঃ মানুষের অস্তিত্ব লাভ	২৩৮
আমানতের বোঝা	২৩৯
মাটির ঢেলার সৌভাগ্য	২৪০
আল্লাহর গুণ-রহস্যের ধারক ও বাহক	২৪০
সিজদা ও ঈর্ষার পাত্র	২৪১
সতর্ক দিল	২৪১
অধিকতর পরাজিত, অধিকতর প্রিয়	২৪৩
মুহব্বতের রাজত্ব	২৪৩

নবম অধ্যায়

বিশ্লেষণসমূহ ও উচ্চতম জ্ঞান

উচ্চতম ও সূক্ষ্ম জ্ঞান ও নিবন্ধসমূহ	২৪৪
ওয়াহ্দাতুশ শুহূদ	২৪৪
পরিবর্তন ও বিবর্তন গুণাবলীর মধ্যে, সত্তার মধ্যে নয়	২৪৬
দ্রুতগতিসম্পন্ন বস্তুর নড়া-চড়া চোখে পড়ে না	২৪৬

বিষয়	পৃষ্ঠা
প্রবৃত্তিজাত কামনা-বাসনার উৎসাদন আসল উদ্দেশ্য ও লক্ষ্য নয়, উদ্দেশ্য ও লক্ষ্য হ'ল তাকে পরাভূতকরণ	২৪৭
কারামতও এক প্রকার মূর্তি	২৪৯
কাশফ, কারামত ও ইন্সিদেরাজ	২৪৯
সেবার মর্যাদা	২৫০
'নফস' সংশোধনের তথা ইসলাহে নফস-এর মানদণ্ড	২৫০

দশম অধ্যায়

দীনের হেফাজত ও শরীয়তের সাহায্য-সমর্থন

একটি সংস্কার ও সংশোধনমূলক কাজ	২৫২
বিলায়েতের মর্যাদা থেকে নবুওতের মর্যাদা উত্তম	২৫৩
আখিয়ায়ে কিরামের একটি নিঃশ্বাস ওলীদের সমগ্র জীবনের সাধনা থেকেও উত্তম	২৫৫
আখিয়ায়ে কিরামের দেহ আর আওলিয়ার আত্মা	২৫৬
শরীয়তের পূর্ণ পাবন্দী সর্বাবস্থায় অপরিহার্য	২৫৬
শরীয়তের স্থায়িত্বের গোপন রহস্য	২৫৮
একটি পরিপূর্ণ দৃষ্টান্ত	২৫৮
'উলামা ও কামিল বুয়ুর্গগণের আদর্শ	২৬০
শরীয়তের শর্ত	২৬১
মুহাম্মদ (স)-এর পদাংক অনুসরণ ব্যতিরেকে গতান্তর নেই	২৬১
ফিরদৌসিয়া সিলসিলার প্রচার এবং এর কতিপয় কেন্দ্র	২৬২
হযরত মাখদুম সাহেব (র)-এর দোহা ও হিন্দী প্রবাদ বাক্য নির্ঘণ্ট	২৬২

সংগ্রামী সাধকদের ইতিহাস

[৩য় খণ্ড]

بِسْمِ اللَّهِ الرَّحْمَنِ الرَّحِيمِ

প্রথম অধ্যায়

ভারতবর্ষে চিশতিয়া সিলসিলা ও এ সিলসিলার শ্রেষ্ঠতম বুয়ুর্গগণ

ইসলামী বিশ্বের আধ্যাত্মিক ও মনস্তাত্ত্বিক কেন্দ্র

হিজরী ষষ্ঠ শতাব্দী (খ্রিস্টীয় ১২শ শতাব্দী) ইসলামের ইতিহাসে বিশেষ গুরুত্বপূর্ণ। এ শতাব্দীর শেষভাগে বিশাল বিস্তৃত ইসলামী বিশ্বে এমন এক সুবিশাল নতুন রাষ্ট্রের বিকাশ ও বিস্তৃতি ঘটেছিল যা প্রাকৃতিক সম্পদ, মানবীয় যোগ্যতা ও প্রতিভায় ছিল পরিপূর্ণ এবং যার ললাটে নিকট-ভবিষ্যতে ইসলামের বিপ্লবী দাওয়াত ও পয়গামের বিশ্বজয়ী কেন্দ্র ও ইসলামী জ্ঞান-ভাণ্ডারের রক্ষক ও আমানতদার হওয়ার কথা লেখা ছিল।

এ শতাব্দীর প্রাক্কালেই অর্ধবন্য তাতারীদের আক্রমণ সমগ্র মুসলিম জাহানের ওপর পঙ্গপালের ন্যায় ছড়িয়ে পড়ে। এদের বর্বরতা ও নিষ্ঠুর বন্য অত্যাচারে দেশের পর দেশ, সাম্রাজ্যের পর সাম্রাজ্য, শহরের পর শহর, জ্ঞান-বিজ্ঞান ও সভ্যতা-সংস্কৃতির পীঠস্থান, শিক্ষায়তন ও আধ্যাত্মিকতার কেন্দ্রভূমিসমূহ ধ্বংসস্তুপে পরিণত হয়। শহরের শান্তি-শৃঙ্খলা ও নিরাপত্তা, জীবনের অটুট বাঁধন, ভদ্র ও মর্যাদাশীল লোকদের মান-সন্ত্রম সবই ধুলোয় মিশে যায়। বুখারা, সমরকন্দ, রে, হামাদান, জুনযান, কায়ভীন, মার্ভ, নিশাপুর, খাওয়ারিযম এবং শেষ পর্যন্ত খিলাফতের কেন্দ্র ও ইসলামের আবাসভূমি বাগদাদ এ দুর্যোগ ও বিপর্যয়ের শিকারে পরিণত হয় এবং তার অতীত ও সুপ্রাচীন সভ্যতা ও সংস্কৃতি

ধ্বংসস্বরূপে পরিণত হয়। এরূপ আকস্মিক বিপদ ও দুর্যোগের শিকারে পরিণত হয়ে মুসলিম জাহানের ভিত্তি নড়বড়ে হয়ে ওঠে এবং সমগ্র প্রাচীন ইসলামী বিশ্বের ওপর রাজনৈতিক অবক্ষয়, চিন্তা ও জ্ঞান-বিজ্ঞানের ক্ষেত্রে বিপর্যয় নেমে আসে। এ সময় সমগ্র মুসলিম বিশ্বে ভারতবর্ষই কেবল একটি মাত্র দেশ যা দুনিয়াব্যাপী এ অশুভ ফিতনা ও বিপর্যয়ের হাত থেকে রক্ষা পেয়েছিল। এখানে তখন প্রাণবন্ত, শক্তিশালী, অত্যাশাহী, আবেগদীপ্ত তুর্কী বংশোদ্ভূত লোকদের রাজত্ব চলছিল যারা ঐ সমস্ত তাতার ও মোগলদের আক্রমণের অত্যন্ত সাফল্যজনকভাবে মুকাবিলা করতে সক্ষম ছিলেন। তারা নিজেদের ঈমানী শক্তি ও ইসলামের নবোদ্দীপ্ত উৎসাহ আবেগের ভিত্তিতে সমর শক্তি, রণকৌশল ও সাহসিকতায় কেবল ওদের সমকক্ষই ছিলেন না, বরং তুলনামূলকভাবে শ্রেষ্ঠতর ছিলেন। তাতার ও মোগল বাহিনী বারবার ভারতবর্ষের ওপর হামলা চালাতে থাকে এবং প্রতিবারই প্রচণ্ড মার খেয়ে পিছু হটতে থাকে। একমাত্র সুলতান আলাউদ্দীন খিলজীর রাজত্বকালেই চেঙ্গিস খানের বংশধর মোগলরা পাঁচবার ভারতবর্ষ আক্রমণ করে। প্রথম আক্রমণ ঘটে ৬৯৬ হিজরীতে এবং চতুর্থ ও পঞ্চম আক্রমণ পরিচালনাকালে সুলতানের পক্ষ থেকে মালিক তুগলক (মালিক গাযী) এমন বীরত্ব ও রণনৈপুণ্য প্রদর্শন করেন এবং মোগলদের এমনভাবে পরাজিত করেন যে, সেদিন থেকে ভারতবর্ষের স্বপ্ন মোগলদের মন-মগজ থেকে উঠে যায় এবং তাদের লোভাতুর দৃষ্টি চিরদিনের তরে ঘোলাটে ও নিশ্চভ হয়ে পড়ে।^১

মুসলিম বিশ্বের অভিজাত ও সম্ভ্রান্ত পরিবারগুলোর কাছে মান-সম্মান, ঈমান ও 'আকীদা ছিল অত্যন্ত প্রিয় বস্তু। তাঁদের মধ্যে যারা শ্রেষ্ঠ ও মহত্তম হৃদয় ও বুদ্ধিবৃত্তির অধিকারী ছিলেন তারা নিজেদের দেশে শান্তি ও জীবনের নিরাপত্তা লাভে বঞ্চিত হয়ে অবশেষে শান্ত ও নিরাপদ ইসলামের এই নতুন আবাসভূমি ভারতবর্ষের দিকে দলে দলে হিজরত করতে শুরু করে। যোগ্যতম ও প্রতিভাবান ব্যক্তিদের অভিজাত ও ভদ্র পরিবারবর্গের হিজরতকারী এ কাফেলা বন্যার বেগে ইরান, তুর্কিস্তান, ইরাক থেকে ভারতবর্ষের দিকে আহড়ে পড়তে থাকে, যার ফলে দিল্লী একটি আন্তর্জাতিক শহরে— এককালের মুসলিম সাম্রাজ্যের গৌরব বাগদাদ ও কর্ডোভার ঈর্ষার বস্তুতে পরিণত হয়। শুধু দিল্লীই নয় বরং ভারতবর্ষের অন্যান্য শহর ও শহরতলী পর্যন্ত সিরাজ ও ইয়ামানের সমকক্ষতা লাভ করে। ভারতবর্ষের প্রখ্যাত ঐতিহাসিক যিয়াউদ্দীন বারনী প্রমুখ এ সমস্ত অভিজাত ও সম্ভ্রান্ত

১. মুনতাজাবুত্তাওয়ারীখ, পৃ. ১৮৬ ও তারীখে ফীরোযশাহী, ঐতিহাসিক যিয়াউদ্দীন বারনীকৃত, পৃ. ২৫১, ৩০২, ৩২০ ও ৩২৩।

বংশ-গোত্রের খ্যাতনামা শিক্ষকমণ্ডলীর, মশহুর উলামায়ে কিরাম ও পণ্ডিতমণ্ডলীর, ইসলামের সুমহান ও শ্রেষ্ঠতম বুয়ুর্গ ও মনীষীদের নামের যে তালিকা পেশ করেছেন যারা তাতারী ফিতনার পরিণতিতে ভারতবর্ষে হিজরত করতে বাধ্য হয়েছিলেন এবং পরে এখানে শিক্ষকতা ও ধর্মপ্রচার তথা জনগণের ব্যাপক আত্মশুদ্ধির অভিযানে মনোনিবেশ করেছিলেন। অধিকন্তু সাম্রাজ্যের ঋকি-পূর্ণ দায়িত্বও সামলিয়ে ছিলেন এবং যারা ছিলেন সাম্রাজ্যের গৌরব ও সৌন্দর্যের কেন্দ্রবিন্দু, তাতে মনে হয় তখন সমগ্র ইসলামী বিশ্বের আভিজাত্য, মর্যাদা ও মহত্ত্বের এখানেই যেন সমাবেশ ঘটেছিল।^১

এই বিপ্লবের ফলে ভারতবর্ষ শুধু মুসলিম জাহানের একটি গুরুত্বপূর্ণ ও অপরিহার্য অংশেই পরিণত হয় নাই, বরং ইতিহাসের সুস্পষ্ট ইঙ্গিত এদিকেই ছিল যে, সে (ভারতবর্ষ) ইসলামের চিন্তা ও আত্মিক শক্তি, জ্ঞান-বিজ্ঞানের বিপ্লব ও পুনরুজ্জীবনেরও নতুনতর কেন্দ্রে পরিণত হতে যাচ্ছে। উপরন্তু ইসলামের জ্ঞান-গবেষণা, ঈমানের বিপ্লবী দাওয়াত ও আকীদার অটুট ও দৃঢ়সংকল্পের ইতিহাস রচয়িতাদের ধারাবাহিক ও পর্যায়ক্রমিকভাবে কয়েক শতাব্দী ধরে এরই উপর সকল মনোযোগ নিবদ্ধ করতে হবে।

মুসলিম ভারতের স্থপতি

মুসলিম বিশ্বের জন্য ভারতবর্ষের আবিষ্কার ও প্রাপ্তি একটি নতুন দুনিয়া আবিষ্কার থেকে কম গুরুত্বপূর্ণ ছিল না। হিজরীর প্রথম শতাব্দীতেই এখানে ইসলামের উৎসাহদীপ্ত কাফেলার আগমন ঘটেছিল এবং ৯৩ হিজরীতে ইসলামের বীর সন্তান মুহাম্মদ ইবন কাসিম ছাকাফী সিন্ধু থেকে মুলতান অবধি সমগ্র এলাকা তলোয়ার ও চারিত্রিক মাধুর্যের সাহায্যে মুসলিম অধিকারে আনয়ন করেন। অধিকন্তু এ উপমহাদেশের স্থানে স্থানে দ্বীপ ও উপদ্বীপের ন্যায় ইসলামের মুবাঞ্জিগবন্দের কেন্দ্র ও খানকাহসমূহ স্থাপিত হয়ে গিয়েছিল এবং সেগুলো অন্ধকার রাত্রিতে প্রান্তরের মধ্যে ক্ষুদ্র প্রদীপের ন্যায় আলো বিকিরণ করছিল। কিন্তু প্রকৃতপক্ষে ভারতবর্ষ বিজয়ের পুরো কৃতিত্বের অধিকারী হচ্ছেন আলেকজান্ডারের ন্যায় দুঃসাহসী ইসলামের বীর সৈনিক সুলতান মাহমুদ গযনভী (৪৪১ হি.) এবং ভারতবর্ষে সুদৃঢ় ও স্থায়ী ভিত্তিতে ইসলামী সাম্রাজ্যের ভিত্তি স্থাপনের কৃতিত্বের অধিকারী হচ্ছেন সুলতান শিহাবুদ্দীন মুহাম্মদ ঘোরী (৬০২ হিজরী)। আর এখানে আধ্যাত্মিক, নৈতিক ও ঈমানী বিজয় প্রতিষ্ঠার মূল স্থপতি হচ্ছেন শায়খুল ইসলাম হযরত খাজা মুঈনুদ্দীন চিশতী (র) (৬২৭ হি.)।

ভারতবর্ষে বিজয়ের প্রাক্কালেই ইসলামের প্রসিদ্ধ চারটি আধ্যাত্মিক সিলসিলা কাদিরিয়া, চিশতিয়া, নকশবন্দিয়া ও সুহরাওয়ার্দিয়া তরীকা জন্মলাভ করেছিল এবং বেশ কিছুকাল থেকেই ফলে-ফুলে সজীব ও প্রাণবন্ত হয়ে উঠছিল। নিজস্ব সময় ও সুযোগ মুতাবিক এদের প্রত্যেকটিরই ফয়েয ও বরকত ভারতবর্ষে পৌঁছে যায় এবং ভারতবর্ষের ইসলামী সভ্যতা ও সংস্কৃতির ভিত্তি ও কাঠামো নির্মাণে সবগুলো সিলসিলারই যৌথ অবদান রয়েছে। আল্লাহ্ পাকও তাঁদের প্রচেষ্টাকে ধন্য করেছেন। কিন্তু ভারতবর্ষের আধ্যাত্মিক বিজয়ে এবং এখানে ইসলামের চারা রোপণে (যার ছায়া ও ফল লাভে দুনিয়ার একটি বিরাট অংশ উপকৃত হতে যাচ্ছিল) আল্লাহর কুদরতী বিধান চিশতিয়া সিলসিলাকে বেছে নিয়েছিল। “আর তোমার প্রতিপালক যা ইচ্ছা পয়দা করেন ও যেমনটি ইচ্ছে। বাছাই করেন।” (আল-কুরআন)

আল্লাহর এ সমস্ত গুণ রহস্য ছাড়াও চিশতিয়া তরীকার ওপর আমাদের এ দেশের প্রতিবেশীসুলভ অধিকারও ছিল। চিশতিয়া তরীকার সিলসিলা আমাদের দেশেরই প্রতিবেশী রাষ্ট্র ইরানে উজ্জ্বলতররূপে বিকশিত হচ্ছিল। স্বীয় সংবেদনশীল মেয়াজ, প্রেম ও ভালবাসা ভিত্তিক হবার কারণে যা চিশতিয়া তরীকার মৌলিক গুঁজি ও মূলধনও বটে, এ সিলসিলা ভারতবর্ষের অধিবাসীবৃন্দের অন্তর-মন জয় এবং স্বীয় প্রেমে পাগলপারা ও মাতোয়ারা করতে যে অত্যন্ত সহজেই সক্ষম হবে এটা অত্যন্ত স্বাভাবিক। কেননা প্রাচীনকাল থেকেই ভারত ভূমির প্রাণসত্তা ও কাঠামো প্রেম ও বেদনার জারক রসে সঞ্জীবিত।

ভারতবর্ষের সাথে চিশতিয়াদের প্রাথমিক সম্পর্ক

উপরে উল্লিখিত জানা-অজানা গূঢ় রহস্য ও কৌশলসমূহের কারণে আল্লাহ তাঁর প্রাকৃতিক বিধান অনুযায়ীই ভারতবর্ষের বুকে ইসলামের পরিচিতি ও প্রচার-প্রসারের উদ্দেশ্যে চিশতিয়া সিলসিলাকে নির্বাচিত করেন। আর চিশতিয়া তরীকার ধারক ও বাহক মহান সন্তানদের প্রতি ভারতবর্ষের দিকে গতি পরিবর্তনের গায়েবী ইঙ্গিত আসে। সর্বাত্মে চিশতিয়া তরীকার যে বুয়র্গ সাধক ভারতবর্ষের দিকে নিজের গতিধারা পরিচালিত করেন তিনি ছিলেন খাজা আবু মুহাম্মাদ চিশতী^১ যার দু’আ, পবিত্র ও বরকতময় অস্তিত্ব সুলতান মাহমুদ

১. খাজা আবু মুহাম্মাদ চিশতী (মৃত্যু ৪০৯ অথবা ৪১১ হিজরীতে) খাজা আবু আহমাদ চিশতীর পুত্র ও খলীফা ছিলেন যিনি খাজা আবু ইসহাক শামীর সর্বপ্রধান খলীফা এবং খাজা নাসিরুদ্দীন আবু যুসুফের পীর ও মুরশিদ ছিলেন। খাজা নাসিরুদ্দীন আবু যুসুফ আবার খাজা কুতুবুদ্দীন মওদুদ (র)-এর পীর ছিলেন এবং তিনি (খাজা কুতুবুদ্দীন মওদুদ চিশতী) হাজী শরীফ যিন্দানীর পীর; হাজী শরীফ যিন্দানীর খলীফা হযরত খাজা উছমান হারুনী এবং খাজা উছমান হারুনীর খলীফা হযরত খাজা মুঈনুদ্দীন চিশতী (র)।

গযনভীর ধারাবাহিক বিজয়ের পেছনে সদা ক্রিয়াশীল ছিল। মাওলানা জামী 'নাফাহাতুল উনস' নামক গ্রন্থে বলেন :

“যখন সুলতান মাহমুদ সোমনাথ^১ আক্রমণের উদ্দেশ্যে রওয়ানা হন, তখনই খাজা আবু মুহাম্মাদ গায়েবী নির্দেশ পান যেন তিনি সুলতান মাহমুদের সাহায্যার্থে গমন করেন।

“তিনি ৭০ বছর বয়সে কতিপয় দরবেশ সাথে নিয়ে রওয়ানা হন এবং সেখানে পৌঁছে স্বয়ং জিহাদে শরীক হন।”

হযরত খাজা মু'ঈনুদ্দীন চিশতী (র)

কিন্তু যেমন সুলতান মাহমুদের রাজনৈতিক বিজয়ের পরিপূর্ণতা এবং ইসলামী সাম্রাজ্যের সুদৃঢ় ও ময়বুত ভিত্তি প্রতিষ্ঠার সৌভাগ্য লাভ সুলতান শিহাবুদ্দীন মুহাম্মাদ ঘোরীর ভাগ্যে নির্ধারিত ছিল, ঠিক তেমনিই আবু মুহাম্মাদ চিশতী (র)-এর মিশনের পূর্ণতা সাধন, ইসলামের ব্যাপক প্রচার ও প্রসার, ময়বুতভিত্তিক ইসলামী কেন্দ্র এবং সততা ও হিদায়াতের প্রতিষ্ঠা উক্ত সিলসিলারই একজন বুয়ুর্গ আওলিয়াকুল শিরোমণি হযরত খাজা মু'ঈনুদ্দীন চিশতী সিজযী^২ (র)-এর ভাগ্যে নির্ধারিত হয়েছিল।

প্রাচীন ঐতিহাসিকগণ (যার মধ্যে তাবাকাতে নাসিরীর লেখক কাযী মিনহাজুদ্দীন 'উছমানী জুনজানীও অন্তর্ভুক্ত, যিনি হযরত খাজা সাহেবের অল্পবয়স্ক

১. সুলতান মাহমুদ ৪১৬ হিজরীতে সোমনাথ আক্রমণ করেন। যদি উল্লিখিত বছর (৪০৯ অথবা ৪১১ হিজরী) খাজা আবু মুহাম্মাদ চিশতীর ঠিক মৃত্যু সন হয়ে থাকে তবে এর পূর্বেই তাঁর মৃত্যু হয়ে গিয়েছিল। সম্ভবত মাওলানা জামী “আক্রমণ” দ্বারা ভারতবর্ষের আক্রমণকে বুঝিয়েছেন এবং তিনি ভারতবর্ষ আক্রমণকেই সোমনাথ আক্রমণের সমার্থক ভেবেছেন। কেননা সুলতান মাহমুদের একমাত্র সোমনাথ বিজয়ই ভারতবর্ষের বাইরে ব্যাপক খ্যাতি ও প্রসিদ্ধি পেয়েছিল। সোমনাথ আক্রমণের পূর্বেই তিনি ৮ বার ভারত আক্রমণ করেন। এর মধ্যে কোন একটিতে (সম্ভবত প্রথম আক্রমণ পরিচালনাকালে) শায়খ আবু মুহাম্মাদ (র) সুলতান মাহমুদের সঙ্গী ছিলেন।
২. খাজা মু'ঈনুদ্দীন চিশতী (র) বীয় জন্যভূমির প্রকৃত নামে সম্পর্কিত হওয়ার কারণে ‘সিজযী’ হবেন; কিন্তু লেখকদের ভুলেই হোক কিংবা সাধারণের উচ্চারণদোষে হোক তিনি ‘সজরী’ হয়ে গেছেন। প্রাচীন পাণ্ডুলিপি এবং কবিতা ও গাঁথা থেকে অবগত হওয়া যায় যে, প্রথমে ‘সিজযীই’ লেখা হত এবং বলা হত। ‘সিজয’ সিজিস্তান-এর দিকে সম্পর্কিত। প্রাচীন ভূগোলবেত্তাগণ একে সাধারণভাবে খুরাসান প্রদেশের অন্তর্গত বলে ধরে নেন। বর্তমানে এর অধিকাংশ এলাকাই ইরানের এবং বাকী অংশ আফগানিস্তানের অন্তর্গত। এই এলাকার রাজধানী ছিল জরনজ যার ধ্বংসাবশেষ বর্তমানে (বাকী অংশ পরবর্তী পৃষ্ঠায় দেখুন)

সমসাময়িকও ছিলেন^১)। বলেন, হযরত খাজা মুঈনুদ্দীন চিশতী (র) সুলতান শিহাবুদ্দীন ঘোরীর সেইসব সৈন্যবাহিনীর সাথেই ছিলেন যারা আজমীরের রাজা রায় পাথুরাকে (পৃথিরাজ-^২) পরাজিত করেন এবং ভারতবর্ষ বিজয় সম্পূর্ণ

(পূর্ব পৃষ্ঠার পর) সাহিদানের নিকট পাওয়া যায়। এককালে সিজিস্তানের সীমানা গমনী পর্যন্ত বিস্তৃত ছিল। (আহসানুত-তাকাসীম)

কোন কোন চুগোলবেস্তার মতে, 'সিজয' সিজিস্তানের অন্তর্গত একটি বিশেষ জায়গার নাম যার দিকে সম্পর্কিত হওয়ার কারণে একজনকে সিজযী বলা চলে। কখনো কখনো সমগ্র সিজিস্তানের দিকে সম্পর্কিত হওয়ার কারণেও একজনকে সিজযী বলা হয়।

'প্রাচ্যের খিলাফতের ভৌগোলিক সীমারেখা'র লেখক মি. জি. বি. স্ট্রেন্ড ৩০ পৃষ্ঠা জুড়ে সিজিস্তানের ভৌগোলিক সীমারেখা বর্ণনা করেছেন। এর সংক্ষিপ্তসার হচ্ছে 'সিস্তান' ফরাসী শব্দ, সংগীস্তান থেকে উদ্ভূত। আরবরা তাকে সিজিস্তান বলে। উক্ত এলাকার যমীন নীচুতে এবং হ্রদ জেরাহ নামক জায়গার পাশে এবং তার পূর্বদিকে অবস্থিত। হিলমন্দ নদীসহ যতগুলি নদী উক্ত হ্রদে পতিত হয়, এর সবগুলির উৎসমূল এ এলাকাতেই পড়ে।

ফারসী ভাষায় সিদ্ধানকে 'নিমরোজ' (দক্ষিণাঞ্চলের রাষ্ট্র)-বলা হয়। সিস্তানখন খুরাসানের দক্ষিণে অবস্থিত বলে একে দক্ষিণ অঞ্চলের রাষ্ট্র বলা হয়েছে (পৃ. ৫০৩ ও ৫০৪)

১. কাশী সাহেবের জন্ম ৫৮৯ হিজরীতে হয়েছিল।

২. পৃথিরাজ অথবা রায় পাথুরা (১১৭৭-১১৯৪ খ্রিষ্টাব্দ) সোমেশ্বরের পুত্র ছিলেন-বিনি আজমীরে চৌহান রাজবংশের প্রতিষ্ঠাতা অরুনা রাজার পুত্র এবং এ বংশেরই প্রখ্যাত শাসক ভোগর রাজা ওরফে দলীল দেবের ভাই ছিলেন। সোমেশ্বরের দিল্লীর তুমার রাজপুত্র নৃপতির বংশ এবং আজমীরের চৌহান বংশের ওপর একচ্ছত্র কর্তৃত্ব ছিল। সোমেশ্বর দিল্লীর শেষ তুমার রাজা আনন্দ পাল (অনঙ্গ পাল)-এর জামাতা ছিলেন এবং এই সুবাদে পৃথিরাজ দিল্লীর শেষ নৃপতির দৌহিত্র হন। আনন্দ পালের জীবিত কোন পুত্রসন্তান ছিল না বিধায় তিনি পৃথিরাজকে পালকপুত্র হিসেবে গ্রহণ করেন। ফলে নৃপতির মৃত্যুর পর পৃথিরাজ স্বাভাবিকভাবেই দিল্লীর ক্ষমতায় অধিষ্ঠিত হন এবং পৈত্রিক সূত্রে রাজা সোমেশ্বরের মৃত্যুর পর আজমীরের শাসনভারও লাভ করেন। এভাবেই রাজা পৃথিরাজ রাজপুত্র রাজাদের দু'টি শক্তিশালী কেন্দ্র দিল্লী ও আজমীরের সিংহাসনের অধিকারী হন। যেহেতু আজমীর ছিল তাঁর জন্মস্থান ও পৈত্রিক আবাসভূমি এবং দাদার সিংহাসনও এখানেই ছিল, তাই ষোল আনা সম্ভাবনা যে, পৃথিরাজ অধিকাংশ সময় আজমীরেই কাটাতেন। আর এ কারণেই সে যুগে আজমীরই ছিল সমগ্র ভারতবর্ষের রাজনীতির প্রাণকেন্দ্র। ব্যক্তিগতভাবে পৃথিরাজ অত্যন্ত উৎসাহী ও উচ্চাকাঙ্ক্ষী-বীর বাহাদুর এবং অদ্বিতীয় তীক্ষ্ণদী রাজপুত্র ছিলেন। অনেকগুলি যুদ্ধে তিনি বিজয় শিরোপা লাভে সক্ষম হন যা শতাব্দীকাল পর্যন্ত তাঁর নাম ও খ্যাতিতে অম্লান ও উজ্জ্বল রেখেছিল। কনৌজের রাজা জয়চন্দ্রের মেয়ে সংযুক্তাকে স্বয়ম্বর সভা থেকে উঠিয়ে আনার কারণে তিনি রূপকথার রাজপুত্রের ন্যায় কিংবদন্তীর নায়ক হিসেবে উত্তর ভারতের গাঁথা ও কাব্যে স্থান লাভ করেন যা অদ্যাবধি গীত ও পঠিত হয়ে থাকে। পৃথিরাজ স্বীয় রঞ্জনপুণ্যে, দৃঢ় চেতনায় এবং বিবিধ বিজয়ের কারণে ভারতবর্ষের শেষ দু'জন বাহাদুর রাজপুত্র এবং শক্তিশালী নৃপতির মধ্যে গণ্য হবার যোগ্য। কিন্তু তাঁর জীবনের শেষ পরাজয় তাঁর মান-মর্যাদা পর্দার অন্তরালে ঢেলে দেয়। ১১৯১ খ্রিষ্টাব্দে (হিজরী ৫৮৭) যখন সুলতান শিহাবুদ্দীন মুহাম্মাদ ঘোরী ভারতবর্ষ আক্রমণ করেন তখন পৃথিরাজ থানেশ্বর থেকে ১৪ মাইল দূরে অবস্থিত তরাইন (বর্তমানে ডেলোড়ী) নামক স্থানে একটি সুসংবদ্ধ ও সুশৃঙ্খল সেনাবাহিনী নিয়ে তাঁর মুকাবিলা করেন এবং সুলতানকে পরাজিত করেন। পরবর্তী বছর ১১৯২ খ্রিষ্টাব্দে (হিজরী ৫৮৮) সুলতান বিরাট প্রস্তুতি নিয়ে নব উদ্যমে এক লাখ বিশ হাজার সৈন্যসহ দ্বিতীয়বার আক্রমণ করেন। পৃথিরাজ তিন লাখ ঘোড়সওয়ার এবং তিন হাজার হাতি সহকারে যুদ্ধের ময়দানে অবতীর্ণ হন। ১৫ জন রাজপুত্র রাজাও নিজ নিজ বাহিনীসহ যুদ্ধে উপস্থিত ছিলেন। পৃথিরাজ পরাজিত হন এবং বন্দী অবস্থায় নীত ও নিহত হন। এভাবেই রাজপুত্রদের স্বাধীন সাম্রাজ্য এবং ভারতবর্ষের প্রাচীনতম শাসনামলের পরিসমাপ্তি ঘটে। (অধ্যাপক ঈশ্বরী প্রসাদ ও অন্যান্য ঐতিহাসিক থেকে সংক্ষিপ্তভাবে সংকলিত)

করেন। এ বিজয়ে তাঁর দুআ ও তাওয়াজ্জুহ এবং আধ্যাত্মিক শক্তির এক বিরাট ভূমিকা ছিল।^১

পরবর্তীকালে ঐতিহাসিকদের বর্ণনা থেকে জানা যায় যে, হযরত খাজা মু'ঈনুদ্দীন চিশতী (র) সুলতান শিহাবুদ্দীন ঘোরীর আক্রমণ পরিচালনার মধ্যবর্তী সময়ের (৫৭৯ হিজরী থেকে ৬০২ হিজরী) প্রথমদিকেই আজমীরে যা সে সময়ে রাজপুত শক্তি ও সাম্রাজ্যের এবং হিন্দু ধর্ম ও আধ্যাত্মিকতার একটি বিরাট কেন্দ্র^২ ছিল, অবস্থান গ্রহণ করেছিলেন, যখন মুহাম্মাদ ঘোরীর আক্রমণ দ্বারা ভারতবর্ষের ভাগ্য নির্ধারিত হয়ে যায়নি এবং যখন তাঁর আক্রমণ পরিচালনা উত্তর-পশ্চিম ভারতবর্ষের মধ্যেই সীমাবদ্ধ ছিল। ঠিক এমনি এক মুহূর্তে এমন একটি ঘটনার উদ্ভব ঘটে যদ্বারা ভারতবর্ষের ভাগ্যের ফয়সালা হয়ে যায়। রাজা পৃথ্বিরাজ কোন এক মুসলমানকে (সম্ভবত তাঁরই দরবারের সাথে সম্পর্কিত কেউ হবেন)— কষ্ট ও বিপদের মধ্যে ফেলেন। এর প্রতিকার চেয়ে হযরত খাজা মু'ঈনুদ্দীন চিশতী (র) পৃথ্বিরাজকে একটি পত্র লিখেন। পৃথ্বিরাজ অত্যন্ত গর্বভরে অবমাননাকর ভাষায় ঐ পত্রের জবাবে বলেন, 'এই লোকটি এখানে আসার পর এমন বড় বড় কথা বলে যা কেউ কখনও বলেনি এবং শোনেও নি।' হযরত খাজা মু'ঈনুদ্দীন চিশতী (র) ঐ জবাব শুনে বলেন, 'আমি পৃথ্বিরাজকে জীবিত বন্দী করে মুহাম্মাদ ঘোরীর হাতে তুলে দিলাম।' এর পরপরই মুহাম্মাদ ঘোরী হামলা করেন। পৃথ্বিরাজ মুকাবিলা করেন এবং পরাজিত হন।^৩

যাই হোক, ঘটনার বিবরণে যতটুকু জানা যায় তাতে কোনই সন্দেহ নেই যে, হযরত খাজা মু'ঈনুদ্দীন চিশতী (র) মুহাম্মাদ ঘোরীর হামলার মধ্যবর্তী সময়ে এবং ভারতবর্ষে ইসলামী সাম্রাজ্য সাধারণভাবে ও সুদৃঢ়ভিত্তিক প্রতিষ্ঠালাভের পূর্বেই প্রাচীন ভারতবর্ষের বিরাট রাজনৈতিক ও আধ্যাত্মিক কেন্দ্র আজমীরকেই আবাসস্থল হিসেবে বেছে নিয়েছিলেন। এ সিদ্ধান্ত ছিল তাঁর অটুট সংকল্প, উচ্চ মনোবল ও ঈমানী সাহসিকতার এমন একটি উজ্জ্বল ঘটনা যার নজীর শুধু ধর্মীয় নেতা ও বিশ্ববিজেতাদের জীবনকথায় পাওয়া যাবে। তাঁর দৃঢ়তা, ধৈর্য,

১. তাবাকাতে নাসীরী, পৃ. ৪০; ভারীখে ফিরিশতা, পৃ. ৫৭ মুনতখাবুতাতওয়ারীখ, পৃ. ৫০।
২. আজমীর থেকে ৭ মাইল উত্তরে পুশকর একটি প্রসিদ্ধ তীর্থ ভূমি যার দর্শন উপলক্ষে দূর-দরাজ এলাকা থেকে লোক সমাগম ঘটত। এর ঝিল (হ্রদ ও পুকুর) ধর্মীয় পবিত্র বস্তুর মর্যাদা লাভ করেছিল। একমাত্র মানস সরোবরই তার সমপর্যায় ও সমমর্যাদার দাবি করতে পারত। পুশকরের ঝিল সম্পর্কে সাধারণ্যে এ ধরনের বিশ্বাসও প্রচলিত যে, ব্রহ্মা সেখানে ধ্যানস্থ হন এবং স্বরস্বতী নিজস্ব পাঁচটি ধারা দ্বারা প্রকটিত হন। (আজমীর গেজেটিয়ার, পৃ. ১৮)।
৩. সিয়াকুল আওলিয়া, পৃ. ৪৭ মাআহিরুল কিরাম, পৃ. ৭।

ঐকান্তিকতা, আল্লাহর ওপর নির্ভরশীলতা, তাকওয়া, পরহেযগারী ও ত্যাগ স্বীকারের কারণেই, যে ভূখণ্ড ছিল হাযার হাযার বছর ধরে সত্যিকার ধর্মবিশ্বাস এবং ধর্মের প্রকৃত রূপ ও পরিচিতি থেকে বঞ্চিত, তাওহীদের বজ্রকণ্ঠ থেকে ছিল বধির ও অজ্ঞ, সেই ভূখণ্ডই 'উলামায়ে কিরামের আবাসভূমি এবং ইসলামী জ্ঞান-বিজ্ঞান ও দীনী পরিপূর্ণতার বিশ্বস্ত আমানতদার ও সংরক্ষক হয়ে পড়ে। তার আকাশ-বাতাস আযানের শব্দে অনুরণিত আর পর্বতমালা ও গিরি-কন্দর 'আল্লাহ্ আকবার' ধ্বনিতে প্রতিধ্বনিত এবং শহর-বন্দরগুলি আল্লাহর কালাম ও রসূল পাক (সা)-এর বাণীতে গুঞ্জরিত ও মুখরিত হয়ে ওঠে।

সিয়রুল আওলিয়ার গ্রন্থকার কী সুন্দর করেই না লিখেছেন :

ভারতবর্ষ নামক দেশটির শেষ পূর্ব প্রান্ত পর্যন্ত কুফর ও শিরকের রাজত্ব ছিল। আল্লাহদ্রোহীরা তারদ্বরে 'আনা রাক্বুকুমুল আ'লা' (আমিই তোমাদের সর্বশ্রেষ্ঠ প্রভু) আওয়ায হাঁকছিল। সৃষ্টির শ্রেষ্ঠ মানুষ ইট, পাথর, গাছ, পশু, গাভী ও গৌবরকে প্রণতি জানাচ্ছিল। কুফর ও অন্ধকার দ্বারা মানুষের অন্তর-মন ছিল আচ্ছন্ন ও তালাবদ্ধ। সবাই ছিল দীন ও শরীয়তের হুকুম সম্পর্কে অনীহ, অসতর্ক এবং আল্লাহ্ ও তাঁর বার্তাবাহী রসূল (স) সম্পর্কে অজ্ঞ ও বেখবর। এরা কেউ কেবলা চিনত না, আল্লাহ্ আকবার আওয়াজ কেউ শোনেনি। বিশ্বাসীদের সূর্য হযরত খাজা মুঈনুদ্দীন চিশতী (র)-এর কদম মুবারক এদেশের মাটিতে পড়ামাত্রই রাজ্যের নিশ্চিন্দ অন্ধকাররাশি ইসলামের সুশোভিত আলোকমালায় রূপান্তরিত ও পরিবর্তিত হয়ে গেল। একমাত্র তাঁরই প্রচেষ্টা ও প্রভাবে যেখানে ক'দিন আগেও শিরকের কালো প্রতীক বিরাজ করত, সেখানে মসজিদ, মিহরাব ও মিম্বর দৃষ্টিগোচর হতে লাগল। যে আসমান পৌত্তলিকতা ও শিরকের বিষবার্ণে ছিল ভরপুর, সেখানে 'আল্লাহ্ আকবার' ধ্বনি উথিত হতে লাগল। এদেশে যাঁরাই ঈমান ও ইসলামের মহামূল্যবান সম্পদের অধিকারী হয়েছেন এবং কিয়ামততক হবেন শুধু তাঁরাই নন, বরং তাঁদের সন্তান-সন্ততি, অধঃস্তন বংশধরগণ সবই তাঁরই 'আমলনামার অন্তর্ভুক্ত। ভারতবর্ষে কিয়ামত পর্যন্ত মুসলমানদের যতই সংখ্যা বৃদ্ধি ঘটতে থাকবে এবং ইসলামের প্রচার ও প্রসার সীমা যতই বিস্তৃত হতে থাকবে, তার ছওয়াব শায়খুল ইসলাম খাজা মুঈনুদ্দীন হাসান সিজযী (র)-এর রূহ মুবারকে ততই পৌঁছতে থাকবে।'

এভাবে ভারতবর্ষের বুকে আল্লাহর নাম যা কিছু নেয়া হয়েছে এবং ইসলামের জন্য যা কিছু কাজ করা হয়েছে, তার সবই চিশতীদের এবং তাদের একনিষ্ঠ ও উচ্চ-দৃঢ় মনোবলের অধিকারী উক্ত সিলসিলার প্রতিষ্ঠাতা হযরত খাজা মুঈনুদ্দীন চিশতী (র)-এর সৎকর্মশীলতা ও কার্যকলাপের মধ্যে অন্তর্ভুক্ত করবার যোগ্য। আর এ ব্যাপারে কোনই সন্দেহ নেই যে; এ উপমহাদেশে চিশতিয়া সিলসিলার দাবি ও অধিকার অত্যন্ত প্রাচীন। মাওলানা গুলাম 'আলী আযাদ ঠিকই লিখেছেন :

এ ব্যাপারে কোনই সন্দেহ নেই যে, চিশতিয়া সিলসিলার মহান বুয়ুর্গ ও মনীষীদের ভারতীয় উপমহাদেশের ওপর চিরন্তন দাবি ও অধিকার রয়েছে।^১

সিয়্যারুল আকতাব গ্রন্থের লেখকও ঠিকই বলেছেন :

এদের (চিশতিয়া সিলসিলার মহান সাধকদের) পদধূলির বরকতেই ভারতবর্ষের বুকে ইসলামের প্রচার ও প্রসার ঘটেছে এবং কুফরীর অন্ধকার দূরীভূত হয়েছে।^২

হযরত খাজা মুঈনুদ্দীন চিশতী (র)-এর জীবদ্দশায়ই ভারতবর্ষের রাজনৈতিক শক্তিকেন্দ্র আজমীর থেকে দিল্লীতে স্থানান্তরিত হয়ে যায় এবং আজমীর তার গুরুত্ব অনেকটা হারিয়ে ফেলে। খাজা মুঈনুদ্দীন চিশতী (র) নিজের স্থলাভিষিক্ত হিসাবে তাঁর প্রধান খলীফা খাজা কুতবুদ্দীন বখতিয়ার বাকী (র)-কে দিল্লীতে অধিষ্ঠিত করেন। আজমীরেই তিনি তাঁর বাকী জীবন ইসলামের প্রচার, ধর্মোপদেশ দান, তালীম ও ভরবিয়ত এবং সত্যের সাধনায় নিমগ্ন থাকার ভিতর দিয়ে অতিবাহিত করেন। কোন প্রাচীন ঐতিহাসিক উৎসের মধ্যেই এসব প্রচার-প্রচেষ্টা ও প্রয়াসের পরিণতি বা প্রভাব-প্রতিক্রিয়ার নির্ভরযোগ্য ও বিস্তারিত কোন বর্ণনা পাওয়া যায় না। সাধারণভাবে এতটুকুই বলা হয়ে থাকে যে, বিরাট ও বিপুল সংখ্যক আল্লাহর বান্দা তাঁর হাতে ঈমান ও ইহসানের অমূল্য সম্পদ লাভে ধন্য হয়েছিল এবং মানুষ দলে দলে ইসলামের পতাকাতে সমবেত হয়েছিল। আবুল ফযল 'আঈন-ই-আকবরী' নামক গ্রন্থে বলেন :

(তিনি) আজমীরেই অবস্থান গ্রহণ করেন এবং ইসলামের প্রদীপ শিখা উজ্জ্বলতররূপে প্রজ্জ্বলিত করেন। তাঁর পবিত্র সন্তায় মুঞ্চ হয়ে লোকে দলে দলে ঈমানরূপ সম্পদ লাভে ধন্য হয়েছিল।^৩

১. মাআছিরুল কিরাম, পৃ. ৭।

২. সিয়্যারুল আকতাব, পৃ. ১০১।

৩. আঈন-ই-আকবরী, স্যার সায়্যিদ সংস্করণ, পৃ. ২৭০।

প্রায় অর্ধ-শতাব্দীকাল যাবত ধর্মোপদেশ এবং ইসলামী শিক্ষার প্রচার, ইসলামের মুবাল্লিগ ও সূফী-সাধকদের তা'লীম ও তরবিয়ত এবং সত্যের অনুসরণে অত্যন্ত কায়মনে লিপ্ত থেকে ৯০ বছর বয়সে ৬২৭ হিজরীতে তিনি সেই মুহূর্তে ইন্তেকাল করেন যখন ভারতবর্ষের মাটিতে তাঁর নিজ হাতে লাগানো সাধের চারাটি ফলে-ফুলে সুশোভিত এবং রাজধানী দিল্লীতে তাঁরই স্থলাভিষিক্ত ও দীক্ষাপ্রাপ্ত সে যুগের মনীষী হযরত খাজা বখতিয়ার কাকী (র) ধর্মোপদেশ ও হিদায়াতের কাজে অত্যন্ত সংগ্রামরত এবং কায়মনোবাক্যে নিমগ্ন। অন্যদিকে তাঁরই একান্ত ভক্ত ও অনুরক্ত অন্যতম খাদিম সুলতান শামসুদ্দীন আলতামাশ ইসলামী সাম্রাজ্যের ব্যাপকভিত্তিক প্রসারে, তার ভিত্তি সুদৃঢ়করণে, ন্যায়ের শাসন প্রতিষ্ঠায় এবং সৃষ্টির কল্যাণ সাধন ও প্রতিপালনে গভীরভাবে মশগুল।

খাজা কুতুবুদ্দীন বখতিয়ার কাকী (র)

খাজা কুতুবুদ্দীন বখতিয়ার কাকী (র) ক্ষুদ্র শহর আওশ^১ নামক স্থানে (মাউরাউল্লাহার) জন্মগ্রহণ করেন। মাত্র দেড় বছর বয়সে তিনি পিতাকে হারান। মা-ই তাঁকে লালন-পালন করেন। পাঁচ বছর বয়সে তিনি মজ্জবে ভর্তি হন এবং মাওলানা আবু হাফস আওশী (র)-এর নিকট শিক্ষালাভ করেন। অতঃপর বাগদাদের উদ্দেশ্যে যাত্রা করেন। সেখানে তরীকতের এক মহান ও শ্রেষ্ঠ বুয়র্গের সাথে তাঁর সাক্ষাৎ ও সান্নিধ্য লাভ ঘটে যাঁর নেতৃত্বে তিনি আধ্যাত্মিকতার সোপান বেয়ে সর্বোচ্চ সীমায় পৌঁছতে সক্ষম হন। ফকীহ আবুল-লায়েছ সমরুকন্দী (র)-এর ঐতিহাসিক ও বরকতময় মসজিদে উল্লেখযোগ্য ও খ্যাতনামা 'উলামায়ে কিরাম ও তরীকতের সাধকদের উপস্থিতিতেই তিনি খিলাফতের খিরকা লাভে ধন্য হন। অতঃপর ভারতবর্ষে পদার্পণ করেন এবং স্বীয় পীর ও মুরশিদের নির্দেশ ও হিদায়াত মুতাবিক দিল্লীকেই স্থায়ী ঠিকানারূপে মনোনীত করেন যা উর্বর ও প্রসারমান ইসলামী সালতানাতের রাজধানী ছিল এবং যা একদিকে উচ্চ মনোবলসম্পন্ন মুসলিম বাদশাহদের আনুকূল্য ও অনুগ্রহ প্রদর্শনে এবং জ্ঞানী-গুণীজনের মর্যাদা ও কদর দানীর ফলে, অন্যদিকে তাতারীদের হামলার ফলে 'উলামায়ে কিরাম, ভদ্র ও অভিজাত মহলের এবং বিজ্ঞসুধী ও আধ্যাত্মিক ক্ষেত্রে পূর্ণতাপ্রাপ্ত ওলীয়ে কামিলদের আশ্রয়স্থলে পরিণত হয়েছিল। এক কথায় বলতে গেলে তখন দিল্লীতে মুসলিম জাহানের সম্পদ ও প্রতিভা স্থানান্তরিত হচ্ছিল।

১. ইয়াকূত মু'জামুল বুলদান নামক গ্রন্থে বলেন : আওশ ফাবগানা রাজ্যের অন্তর্গত একটি প্রধান শহরের নাম।

সুলতান শামসুদ্দীন আলতামাশ তাঁকে যথাযোগ্য কদর ও মর্যাদা দান করেন। কিন্তু তিনি শাহী দরবারের সাথে কোনরূপ সম্পর্ক রাখা পসন্দ করলেন না। সুলতানের তরফ থেকে পেশকৃত হাদিয়া-তোহফা কিংবা কোনরূপ জায়গীর ও ভূ-সম্পত্তি কবুল করা থেকেও তিনি বিরত রইলেন। প্রথমে তিনি কিলোখড়ি, পরে মালিক 'ইযুদ্দীনের মসজিদের নিকট ফকীর-দরবেশের জীবন যাপন শুরু করেন।^১ সুলতান বরাবরের মতই শ্রদ্ধা ও ভক্তি সহকারে তাঁর দরবারে হাযিরাদিতে থাকেন এবং এ ভক্তি ও শ্রদ্ধার মাত্রা ক্রমশ বাড়তে থাকে। শেখাবধি খাজা বখতিয়ার কাকী (র)-এর দরবারে শহরবাসী লোকজনের আনাগোনা এমনভাবে বেড়ে যায় যে, সে যুগের শায়খুল ইসলাম শায়খ নাজমুদ্দীন সুগরা (র)-এর মনেও তাঁর সম্পর্কে কিছুটা অসন্তুষ্টি ও দর্ষা সৃষ্টি হয়। হযরত খাজা মু'ঈনুদ্দীন চিশতী (র) স্বীয় খলীফার সাথে মুলাকাতের উদ্দেশ্যে দিল্লী এলে শায়খ নাজমুদ্দীন সুগরা (র), যিনি খাজা মু'ঈনুদ্দীন চিশতী (র)-এর অত্যন্ত পুরানো দোস্ত ছিলেন, বখতিয়ার সম্পর্কে অভিযোগ পেশ করেন। এতে হযরত খাজা চিশতী (র) স্বীয় ভক্ত মুরীদকে উদ্দেশ্য করে বলেন :

বাবা বখতিয়ার! এত সত্বর তুমি এত মশহুর হয়ে গেছ যে, আল্লাহর বান্দাদের মনে তোমার সম্পর্কে দর্ষা সৃষ্টি হয়ে গেছে। তুমি এ জায়গা ছাড় এবং আজমীরে চলে এস। তুমি সেখানেই বসবাস করবে এবং তোমার খিদমতের জন্য আমি সব সময় প্রস্তুত থাকব।^২

হযরত খাজা (র) এমন একটি কথা উচ্চারণ করলেন যা তাঁর মত উচ্চ ও মহান মর্যাদার অধিকারী শায়খের পক্ষেই সম্ভব যিনি ইখলাস ও রব্বানী ভাবধারার পূর্ণতম মর্যাদায় উপনীত হয়েছেন। ন্যায়, সত্য ও আল্লাহর পথের যিনি পথিক, আল্লাহর এক নগণ্য সৃষ্টির অভিযোগ ও হা-হতাশকেও যেক্ষেত্রে তিনি গুনাহ মনে করেন, সেক্ষেত্রে শায়খুল ইসলামের অসন্তুষ্টি ও অভিযোগের কথা তো বলাই বাহুল্য। উপরন্তু ইসলামের প্রাণকেন্দ্রে বিশৃঙ্খলা ও মনোমালিন্য সৃষ্টি করাকে তিনি মোটেই পসন্দ করতেন না। সূক্ষ্মতর উপায়ে আপন মুরীদকে এই বলে সান্ত্বনা দেন যে, যদি এখানকার জ্ঞানী-গুণী ও বিদ্বজ্জনেরা তোমার সম্মান, মর্যাদা ও অবস্থান সম্পর্কে অজ্ঞ থেকে থাকে তবে আমি তো জ্ঞাত আছি। এখানে কে খাদিম আর কে মাখদুম, কে শায়খ (পীর) আর কে মুরীদ সে প্রশ্ন অবান্তর। ওখানে (আজমীরে) তুমি মাখদুমের মত থাকবে আর আমি খাদিম হিসেবে তোমার খিদমতে সর্বদা প্রস্তুত থাকব। এতে হযরত খাজা কুত্বুদ্দীন বখতিয়ার কাকী (র) সে জবাবই দিয়েছিলেন যা দেওয়া তাঁর পক্ষেই ছিল সম্ভব ও স্বাভাবিক। তিনি নিবেদন করলেন :

মাখদুম তো বহুত দূরের কথা, আমি আপনার সামনে খাদিমের অধিকার নিয়ে দাঁড়াবার যোগ্যতাও তো রাখি না; বসা তো আরও অসম্ভব ও অকল্পনীয়।^১

অবশেষে শায়খ ও মুরশিদ হযরত খাজা বখতিয়ার কাকী (র)-কে আজমীর গমনের নির্দেশ দেন। বিশ্বস্ত মুরীদও সাথে সাথে কোনরূপ আপত্তি ও প্রতিবাদ ছাড়াই মুরশিদের আদেশ পালনে প্রস্তুত হয়ে যান। কিন্তু যখন শহরের বাইরে পা রাখেন তখনই শায়খ হযরত খাজা মুঈনুদ্দীন চিশতী (র) আপন মুরীদের অসম্ভব ও অস্বাভাবিক রকমের জনপ্রিয়তা উপলব্ধি করতে সক্ষম হন। তিনি এও বুঝতে পারেন যে, এ জনপ্রিয়তা আল্লাহর তরফ থেকে এবং এতে প্রবৃত্তিজাত ও নিজস্ব সৃষ্টিজাত কোন বিষয়ই নেই। সুযোগ্য মুরীদ যে সমস্ত দিল্লীবাসীর মন ইতিমধ্যেই প্রেমবিমুগ্ধ ও আবেশবিহ্বল করে ফেলেছে এটা তিনি ভালভাবে হৃদয়ঙ্গম করতে পারেন। সিয়ারুল আওলিয়া প্রণেতার ভাষায় :

খাজা কুতুবুদ্দীন (র) স্বীয় শায়খ ও মুরশিদের সাথে আজমীরের দিকে রওয়ানা হন। এ সংবাদ দিল্লীবাসীদের কানে পৌঁছতেই শহরে একটা হাঙ্গামা ও গোলযোগের উপক্রম হয়। সমস্ত শহরবাসী, এমন কি সুলতান শামসুদ্দীন আলতামাশও শহর থেকে বেরিয়ে এসে তাঁর অনুগামী হন। যেখানেই খাজা কুতুবুদ্দীনের কদম ম্বুবারক পড়ছিল সেখানকার পদস্পর্শিত ধূলিকে লোকেরা তাবাররুক ভেবে সাথে সাথেই উঠিয়ে নিচ্ছিল আর অস্থির ও বিহ্বলচিত্তে কান্নাকাটি করছিল।^২

একটি মাত্র মন-মানসকে সন্তুষ্ট করার জন্য এবং একটি সামান্যতম কল্যাণের প্রতি লক্ষ্য রাখতে গিয়ে আল্লাহর লাখো বান্দার মন-মানসকে ব্যাথাতুর ও বেদনাক্রান্ত করে তোলা মোটেই সমীচীন ছিল না। তাই মুরশিদ আপন মুরীদকে আজমীর নিয়ে যাবার ইরাদা পরিত্যাগ করে বলেন :

বাবা বখতিয়ার! তুমি এখানেই থাক। কেননা তোমার বাইরে যাবার কথা জেনে আল্লাহর এতগুলি বান্দা অত্যন্ত ব্যাথাতুর ও বিপর্যস্ত অবস্থায় পৌঁছে গেছে। আমি এটাকে জায়েয মনে করি না যে, এতগুলি লোকের অন্তর-জ্বালাকে বাড়িয়ে তুলি। যাও, এ শহরকে আমি তোমার আশ্রয়ে রেখে গেলাম।^৩

১. ঐ. পৃ. ৫৪।

২. সিয়ারুল আওলিয়া পৃ. ৫৫।

৩. আখয়ারুল আখবার, পৃ. ২৬।

সুলতান শামসুদ্দীন আলতামাশ, যাঁর রাজধানী এমন একটি পবিত্র সত্তার উপস্থিতি ও অবস্থিতি থেকে বঞ্চিত হতে যাচ্ছিল, উপরিউক্ত ঘটনার ফলে অত্যন্ত সন্তুষ্ট হন এবং হযরত খাজা মুঈন্নুদ্দীন চিশতী (র)-এর শুকরিয়া আদায় করেন। খাজা কুত্বুদ্দীন বখতিয়ার কাকী (র) শহরে প্রত্যাগমন করেন আর ওদিকে খাজা মুঈন্নুদ্দীন চিশতী (র) আজমীরের পথে রওয়ানা হন।

হযরত খাজা কুত্বুদ্দীন বখতিয়ার কাকী (র) দিল্লী ফিরে এসেই স্বীয় চাটাইয়ের আসনে বসে জোরেশোরে ধর্মীয় উপদেশ, শিক্ষা ও তদনুযায়ী বাস্তব প্রশিক্ষণ দিতে শুরু করলেন। তিনি শুধু সরকার ও শাহী দরবারের সাথে সম্পর্কই ছিন্ন করেন নি, বরং এটাকেই জীবনের লক্ষ্য ও মূলনীতি বানিয়ে নেন। এমনকি স্বীয় সিলসিলাভুক্ত সবার জন্যই এ নীতি নির্ধারণ করেন যে, দারিদ্র্য বরণ ও ধনাঢ্যতা বর্জনের সাথে সাথে শাহী দরবার থেকে দূরে অবস্থান করেই নিজেদের কাজ করে যেতে হবে। এরূপ সংস্রবহীনতা ও বর্জন নীতি গ্রহণ করা সত্ত্বেও বিশিষ্ট এবং সাধারণ, বাদশাহ এবং গরীব সকলেই তাঁর ভক্ত ও অনুরক্তে পরিণত হয় এবং তাঁকে কেন্দ্র করে মানুষের আনাগোনা উত্তরোত্তর বৃদ্ধি পেতে থাকে।

সমগ্র দুনিয়া, অভিজাত-অনভিজাত, বিশিষ্ট ও সাধারণ সবাই ছিল তাঁর দু'আ ও অনুগ্রহ লাভের জন্য লালায়িত এবং পাগলপারা।^১

সুলতান শামসুদ্দীন আলতামাশ সপ্তাহে দু'বার তাঁর দরবারে হাযির হতেন এবং তাঁর খেদমতে ঐকান্তিক নিষ্ঠা ও ভক্তি-শ্রদ্ধা প্রকাশ করতেন। দিল্লীতে যা তখন শুধু ভারতবর্ষের রাজধানীই ছিল না, বরং মুসলিম জাহানের নবতর শক্তি, ইসলামের বিপ্লবী দাওয়াত ও সংস্কারের নতুন কেন্দ্র এবং বিশিষ্ট 'উলামায়ে কিরাম, শিক্ষকমণ্ডলী, নেতৃস্থানীয় ব্যক্তিবর্গ, অভিজাত মহল, তরীকতের পথ-প্রদর্শক ও সিলসিলাভুক্ত অন্যান্য ব্যুর্গ এবং ইসলামী বিশ্বের শ্রেষ্ঠতম সন্তান ও প্রতিভাধরদের সমাবেশস্থলও ছিল, সেখানে তরীকতের প্রচার ও প্রসার, মানুষের অন্তর-মানসকে ধর্মীয় চেতনায় উদ্বুদ্ধ করার বাস্তব প্রশিক্ষণ এবং নবোদ্ভিত ইসলামী সাম্রাজ্যের সঠিক নৈতিক নেতৃত্ব ও পথ-প্রদর্শনের দায়িত্ব ও কর্তব্য পালন, দারিদ্র্য অনুসরণ ও ধনাঢ্যতা বর্জনের নীতিকে এতটুকু কালিমায়ুক্ত ও ধূলি-মলিন না করে আজগাম দেওয়াটা মোটেই সহজ কাজ ছিল না। এজন্য প্রয়োজন ছিল পর্বতপ্রমাণ ধৈর্য ও দৃঢ়তা এবং বাতাসের মত ক্ষিপ্র প্রবহমান গতি যাতে কোন কিছুর গায়ে আঁচড়াটিও না লাগে। হযরত খাজা সাহেব (র) অত্যন্ত সাফল্যজনকভাবে এবং সুন্দর ও সুচারুরূপে নাযুক ও কঠিন এ

দায়িত্বটি আঞ্জাম দেন। একাজের জন্য তিনি দীর্ঘ সময় পাননি। স্বীয় শায়খ ও মুরশিদ হযরত খাজা মুঈনুদ্দীন চিশতি (র)-এর পর বড় জোর চার কি পাঁচ বছর তিনি জীবিত ছিলেন।^১ কিন্তু তাঁর বদৌলতে ভারতবর্ষে চিশতিয়া সিলসিলা বুনয়াদই শুধু প্রতিষ্ঠিত হয়নি, বরং যে সুমহান ও উচ্চ লক্ষ্যের জন্য হযরত খাজা মুঈনুদ্দীন চিশতী (র) ভারতবর্ষকে নিজের অবস্থানস্থল ও কর্মক্ষেত্ররূপে বাছাই করেছিলেন তা অত্যন্ত সুষ্ঠুতার সাথে সার্থকতা লাভ করে।

তখন তাঁর বয়স ৫০ বছর কি তার কিছু বেশী হবে, ঐশী প্রেম ও মুহব্বতের যে ছত্ৰাশন তিনি ধৈর্য ও শ্রুত্বের ভিতর বাস্তবন্দী করে রেখেছিলেন এবং যে আশ্বন তিনি গোটা সৃষ্টির বাস্তব প্রশিক্ষণ ও হিদায়াতের মহত্তম লক্ষ্য ও কল্যাণ দ্বারা নিপিষ্ট করে রেখেছিলেন, তাই হঠাৎ করে জ্বলে ওঠে, ছাপিয়ে ওঠে সব কিছুর ওপর :

صدائے تیغ توامد ببزم زنده دالای

کدام سرکه درد ذوق این سرود نماند

আপনার তলোয়ারের ধনি সজীব অন্তর লোকদের সমাবেশে পৌঁছেছে।
এমন ব্যক্তি কে আছেন যিনি এ ধনির দ্বারা প্রভাবান্বিত হন নি?

একবার শায়খ ‘আলী সাকাজ্জীর^২ খানকাহতে ‘সামা’র মজলিস ছিল অত্যন্ত সরগরম। এক কাওয়াল কবিতা আবৃত্তি করল :

کشتگان خنجر تسلیم را - هر زمان از غیب جانے دیگر است

‘আত্মসমর্পণের অস্ত্রাহত ব্যক্তির প্রতি মুহূর্তে অদৃশ্য জগৎ থেকে নবজীবন লাভ করে থাকে।

এতে খাজা কুতুবুদ্দীনের উন্মত্ততা ও মুমূর্ষ প্রায় অবস্থা দেখা দেয়। খানকাহ থেকে আবাসস্থল পর্যন্ত কোনক্রমে আসেন, কিন্তু মত্ততা ও বেহুঁশী অবস্থা কাটেনি। কিছুটা হুঁশ ফিরতেই তিনি কবিতাটি আবৃত্তি করতে নির্দেশ দেন। আদেশ মাত্রই তা পালন করা হয়। এভাবেই চার রাত্র-দিন একাদিক্রমে তিনি বেহুঁশপ্রায় অবস্থায় কাটান। কিন্তু যখনই সালাতের ওয়াক্ত এসে যেত তখনই তিনি চেতনা ফিরে পেতেন। সালাত আদায় করতেন। অতঃপর পুনরায় উক্ত কবিতা আবৃত্তির নির্দেশ দিতেন। আবৃত্তি করা হতো, ফলে তিনি পুনরায়.

১. যদি খাজা মুঈনুদ্দীন চিশতী (র)-এর মৃত্যুসন ৬২৭ হিজরী মেনেও নেয়া যায় তবে খাজা কুতুবুদ্দীন (র) তাঁর ইতিকালের পর মাত্র ৬ বছর বেঁচেছিলেন।

২. কতক বর্ণনাতে ‘সিজযী’ লিখিত পাওয়া যায়।

বেহুঁশী অবস্থায় চলে যেতেন। পঞ্চম রাত্রিতে তিনি ইত্তিকাল করেন।^১ এ ঘটনা ৬৩৩ হিজরীর।^২

ইত্তিকালের আগে 'ঈদের দিন তিনি 'ঈদগাহ থেকে ঘরের দিকে ফিরছিলেন। পথে তাঁকে এমন একটি জায়গা অতিক্রম করতে হয় যেখানে কোন গ্রাম কিংবা বসতি ছিল না। খাজা কুতুবুদ্দীন সেখানে কিছুক্ষণ অপেক্ষা করেন এবং অনেকক্ষণ দাঁড়িয়ে কাটান। জৈনক খাদিম আরয করল, আজ 'ঈদের দিন। উপরন্তু সবাই আপনার জন্য অপেক্ষমান, আপনি এখানে দাঁড়িয়ে আছেন কেন? উত্তর এলো : مرا ازین زمین بوئے دلهامی اید "আমার এখান থেকে অন্তরের খোশবু আসছে।" পরে কোন এক সময় উক্ত যমীনের মালিককে ডেকে নিজস্ব অর্থ দ্বারা তা খরিদ করেন এবং নিজের দাফনের জন্য সে যমীনটুকুই নির্বাচন করেন। শেষ পর্যন্ত সেখানেই তাঁকে দাফন করা হয়।^৩

হযরত খাজা কুতুবুদ্দীন বখতিয়ার কাকী (র)-এর খলীফার সংখ্যা (যাঁদের নাম 'আওলিয়া' কিরামের জীবনীগ্রন্থে বিদ্যমান) নয় কিংবা দশজনের কম ছিল না। কিন্তু তাঁর স্থলাভিষিক্ত হওয়া, হযরত খাজা মুঈনুদ্দীন চিশতী (র)-এর অসম্পূর্ণ কাজগুলি সম্পন্ন করা, আর জারিকৃত কাজগুলি অব্যাহত রাখা, তাঁর উদ্দেশ্য ও লক্ষ্যসমূহের পরিপূর্ণতা সাধন ও প্রসারের সৌভাগ্য হযরত খাজা ফরীদুদ্দীন গঞ্জ শকর (র)-ই লাভ করেছিলেন।

হযরত খাজা ফরীদুদ্দীন গঞ্জ শকর (র)

যেমনভাবে হযরত খাজা মুঈনুদ্দীন চিশতী (র) ভারতবর্ষের বুকে চিশতিয়া সিলসিলার ভিত্তি স্থাপনকারী ও প্রতিষ্ঠাতা, তেমনি হযরত খাজা ফরীদুদ্দীন গঞ্জ শকর এ সিলসিলার মুজাদ্দিদ ও দ্বিতীয় আদম। তাঁরই দু'জন খলীফা সুলতানুল মাশায়িখ হযরত খাজা নিজামুদ্দীন দেহলভী (র) এবং হযরত শায়খ 'আলাউদ্দীন 'আলী সাবির পীরানে কলীরী (র)-এর মাধ্যমে এই সিলসিলা ভারতবর্ষের বুকে ছড়িয়ে পড়ে এবং এঁদের খলীফা ও সিলসিলাভুক্ত অন্যান্য লোকদের দ্বারা এখন পর্যন্ত তা সঞ্জীবিত ও প্রতিষ্ঠিত আছে।

خم خمخانه بامهر ونشان است -

শরাব ও শরাবখানা প্রতিষ্ঠিত ও চিহ্নিতাবস্থায় বিরাজমান রয়েছে।

১. সিয়াকুল আওলিয়া বর্ণনায় হযরত খাজা নিজামুদ্দীন আওলিয়া (র)।

২. কতক বর্ণনায় ৬৩৩ হিজরীর পরিবর্তে ৬৩৪ হিজরী পাওয়া যায়।

৩. সিয়াকুল আওলিয়া, বর্ণনায় হযরত খাজা নিজামুদ্দীন আওলিয়া (র), পৃ. ৫৫; বর্তমানে জায়গাটি হযরত কুতুবুদ্দীন (র)-এর নামে প্রসিদ্ধ।

হযরত খাজা ফরীদুদ্দীন গঞ্জ শকর (র)-এর প্রকৃত নাম মাস'উদ; উপাধি ছিল ফরীদুদ্দীন। সাধারণভাবে 'গঞ্জ শকর' উপাধিতেই তিনি সারা দুনিয়ায় মশহুর হয়ে আছেন।^১ তিনি হযরত 'ওমর ফারুক (রা)-এর বংশধর ছিলেন। তাঁর শ্রদ্ধেয় পিতামহ কাযী শু'আয়ব তাতারী হামলা ও গোলযোগের কারণে কাবুল থেকে লাহোরে আগমন করেন। কিছুকাল কাসুর নামক স্থানেও অবস্থান করেন এবং কাহীনওয়াল শহরের কাযীর পদ ও জায়গীর প্রাপ্ত হন। এখানে ৫৬৯ হিজরীতে তাঁর জন্ম হয়। বাল্যকালেই তিনি মুলতান সফর করেন (যা সে সময় ভারতবর্ষের মধ্যে জ্ঞান-বিজ্ঞান ও ধর্মীয় শিক্ষার সবচেয়ে বড় কেন্দ্র ছিল)। শহরের শিক্ষকমণ্ডলীর নিকট থেকে শিক্ষালাভ করেন। মাওলানা মিনহাজুদ্দীন তিরমিযীর নিকট ফিকহের উল্লেখযোগ্য কিতাব 'আন-নাফে' পড়েন এবং এখানেই ৫৮৪ হিজরীতে হযরত খাজা কুতুবুদ্দীন বখতিয়ার কাকী (র)-এর সাথে তাঁর সাক্ষাত লাভ ঘটে এবং পরে তাঁরই হাতে বায়'আত গ্রহণের সৌভাগ্যও লাভ করেন। শায়খ ফরীদুদ্দীন (র) খাজা কাকী (র)-এর ব্যক্তিত্বে ও সান্নিধ্য লাভে এতই মুগ্ধ ও প্রভাবান্বিত হয়ে পড়েন যে, শিক্ষালাভের সকল পাট চুকিয়েও তিনি স্বীয় মুরশিদের সাহচর্যে কাল কাটাবার দৃঢ় সংকল্প গ্রহণ করেন। ওলীয়ে কামিল হযরত শায়খ (র) তাঁকে নিবৃত্ত করেন এবং পড়াশোনা সমাপ্ত করার নির্দেশ দেন। তখন তিনি ভারতবর্ষ ও ভারতবর্ষের বাইরে গিয়ে লেখাপড়া সমাপ্ত করেন।^২

শিক্ষা সমাপ্তির পর তিনি স্বীয় শায়খ ও মুরশিদের খিদমতে দিল্লীতে গিয়ে উপস্থিত হন। শায়খ (র) তাঁর অবস্থানের জন্য গযনী দরজার সন্নিকটে একটি জায়গা নির্বাচিত করেন এবং সেখানেই তিনি রিয়াযত ও মুজাহাদায় (কঠোর আত্মিক সাধনা) নিমগ্ন হয়ে পড়েন। সলুক পরিপূর্ণতার পর তিনি খিলাফত লাভে ধন্য হন এবং শায়খ (র)-এর এজাযতে হাঁসিতে অবস্থান গ্রহণ করেন যা তাঁরই একনিষ্ঠ একজন ভক্ত (যিনি পরে তাঁরই সর্বশ্রেষ্ঠ খলীফাদের মধ্যে পরিগণিত হন) শায়খ জামালুদ্দীন খতীব হাঁসির আবাসভূমি ছিল। শায়খের ইত্তিকালের মুহূর্তে তিনি হাঁসিতে ছিলেন। ইত্তিকালের তৃতীয় দিনে তিনি দিল্লীতে আসেন।

১. এ উপাধির প্রকৃত ঘটনা ও ইতিহাস সম্বন্ধে নানা জনের নানা মত বিধায় আমরা কিছু বলতে অক্ষম।

২. 'রাহাতুল কুলুব' নামক গ্রন্থে, যা তাঁরই সকল মলফুখাতের সংকলন, এ সফরের ও অন্যান্য ভ্রমণের বিস্তারিত বর্ণনা দেওয়া আছে। উক্ত কিতাব নির্ভরযোগ্য নয় বিধায় তার ওপর নির্ভর করা হয়নি। অপর কোন কোন পুস্তকে আরও বিস্তারিত মিলবে।

শায়খ (র)-এর মাযারে ফাতিহা পড়েন। কাযী হামীদুদ্দীন নাগোরী (র) শায়খ খাজা কুতুবুদ্দীন বখতিয়ার কাকী (র)-এর ওসীয়ত মুতাবিক তাঁর প্রদত্ত খিরকা ও অন্যান্য আমানত তাঁকে সোপর্দ করেন। এটা ছিল খাজা ফরীদুদ্দীন গঞ্জ শকর (র)-কে স্থলাভিষিক্ত বানিয়ে যাবার সুস্পষ্ট ইঙ্গিত। দু'রাকাত সালাত আদায় করে তিনি খিরকা পরিধান করেন এবং স্বীয় শায়খ খাজা কাকী (র)-এর স্থলাভিষিক্ত হন।

দিল্লী আসার এবং শায়খ হযরত খাজা কুতুবুদ্দীন কাকী (র)-এর স্থলাভিষিক্ত হবার তৃতীয় দিনে সরহিসা নামীয় তাঁরই একজন পুরনো বন্ধু ও ভক্ত হযরত গঞ্জ শকর (র)-কে দেখার প্রবল আগ্রহে দিল্লী আসেন। খাদিমরা তাঁকে ভেতরে প্রবেশ করতে বাধা দেয়। ভক্ত ও খাদিমদের ভীড়ে উক্ত দরবেশ শায়খ (র)-এর মুলাকাভের সুযোগ লাভে ব্যর্থ হন। অগত্যা অপেক্ষায় থাকেন কবে তিনি বাইরে আসেন। একদিন হযরত খাজা ফরীদুদ্দীন (র) বেরিয়ে আসতেই দরবেশ তাঁর পায়ের ওপর পড়ে যান এবং কেঁদে কেঁদে বলতে থাকেন, “যতদিন আপনি হাঁসিতে ছিলেন ততদিন অতি সহজেই এবং বিনা বাধায় আপনার সাক্ষাত লাভে ধন্য হতাম। এখানে আমাদের মত গরীবদের পক্ষে আপনার সাক্ষাত লাভ মোটেই সম্ভব নয়।” শায়খ (র) এ কথায় অত্যন্ত ব্যথা পান এবং বুঝতে পারেন যে, দিল্লীতে থেকে তাঁর নিজের আন্তরিক শান্তি লাভ এবং সর্বসাধারণ ও দরিদ্র মানুষের পক্ষে তাঁর দেখা-সাক্ষাত লাভের অবাধ সুযোগ নেই। তিনি তখনই বন্ধু-বান্ধবদের বললেন, “আমি হাঁসি যাব।” উপস্থিত সবাই আরম্ভ করল, “শায়খ কুতুবুদ্দীন (র) তো আপনাকে এখানেই বসিয়ে গেছেন। এখন আপনি আবার কোথায় যাবেন?” উত্তরে হযরত ফরীদুদ্দীন গঞ্জ শকর (র) জানান, “শায়খ (র) তাঁর আমানত সোপর্দ করে দিয়েছেন। এখন আমি শহরে থাকি আর প্রান্তরে থাকি কিংবা জঙ্গলে যাই তা আমার সাথেই থাকবে।”^১

আবাসস্থল হিসেবে হাঁসিকে তিনি বেছে নেন যেন শান্তিতে থাকতে পারেন এবং থাকতে পারেন লোকচক্ষুর অন্তরালে। এখানেও খাজা কুতুবুদ্দীন (র)-এর একজন মুরীদ মাওলানা নূর তুর্কের কারণে যিনি হাঁসির অধিবাসীদেরকে তাঁর (হযরত গঞ্জ শকরের) মর্তবা ও মর্যাদা সম্পর্কে ওয়াকিফহাল করিয়ে দেন। তাঁর খ্যাতি ছড়িয়ে পড়ে এবং এতে বিপুল জনসমাগম হতে থাকে। অবশেষে তিনি তাঁর পুরনো আবাসস্থল কাহীনওয়ালে গমন করেন। কাহীনওয়াল ছিল মুলতানের সন্নিকটে। তাঁর খ্যাতি ও মর্যাদার কথা দূর-দূরান্তরে ছড়িয়ে গেছে তখন। তিনি

আজুদহনকে^১ অবস্থানস্থল হিসেবে নির্বাচন করেন এবং বলেন : যেহেতু আজুদহনের অধিবাসীবৃন্দ জাহিল ও অজ্ঞ এবং জায়গাটিও অখ্যাত ও অপরিচিত, তাই এখানে বামেলা কম হবে। কিন্তু এখানে পৌছবার স্বল্পকালের ভেতরই তিনি মশহুর হয়ে ওঠেন এবং চতুর্দিক থেকে লোকের ভীড় বাড়তে শুরু করে। হযরত খাজা ফরীদুদ্দীন গঞ্জ শকর (র)-এর খ্যাতি ও মর্যাদার সূর্য তখন মধ্যাহ্ন গগনে এবং তার আলোকচ্ছটা চতুর্দিকে বিচ্ছুরিত। অল্পদিনের ভেতরেই লোকসমাগম বেড়ে যায় এবং আগত লোকের আনাগোনা বিরামহীন গতিতে চলতে থাকে। ফলে অর্ধেক রাত্রি পর্যন্ত তাঁর ঘরের দরজা খোলা থাকত।

এখানে অবস্থানকালে বেশ কিছুদিন টানাপোড়েন, দুঃখ-কষ্ট ও কঠোর দারিদ্র দশায় তাঁর জীবন কাটে। পীলু গাছের ফল ছিঁড়ে আনা হ'ত এবং এতে কিছু লবণ ছিটিয়ে তাই গরীব জনসাধারণের মধ্যে বণ্টন করে দেওয়া হত, আর নিজেও মেহমান ও সমস্ত খাদিমকে নিয়ে তাই খেতেন। আল্লাহর ওপর তাওয়াক্কুল ও নির্ভরশীলতার অবস্থা এমন ছিল যে, একবার তিনি সিয়াম শেষে ইফতারের উদ্দেশ্যে এক লোকমা মুখে উঠিয়েই বললেন, এর ভেতর নীতিহীনতার গন্ধ পাচ্ছি। খাদিম উত্তরে জানায়, লবণ ছিল না। তাই একটু লবণ ধার নিয়ে এতে দেওয়া হয়েছে। প্রত্যুত্তরে তিনি বললেন, তুমি নীতিহীন কাজ করেছ। আমার জন্য এরূপ খাবার শোভা পায় না।^২ কিছুকাল পর অবস্থা এমন হয়েছিল যে, রাত-দিন চুলা জ্বলত এবং অর্ধেক রাত অবধি খানাপিনার ধারাবাহিকতা বজায় থাকত। সেখানে যেই আসত সেই তার খাবার প্রস্তুত পেত।^৩ তাঁর হৃদয়ের উষ্ণতা ও অন্তরের প্রীতি সবার প্রতিই ছিল একরকম। হযরত খাজা নিজামুদ্দীন (র) বলেন : আশ্চর্য ছিল তাঁর শক্তি, আর এমন আশ্চর্য ছিল তাঁর জীবন-ধারণ পদ্ধতি যা বরদাশত করা অন্য কারো পক্ষে সহজসাধ্য ছিল না। তিনি নবাগত এবং বহু বছর যাবত পরিচিত ও একান্ত সান্নিধ্যে বসবাসকারী সবার সাথে একই রূপ খোশমেযাজ, দয়া, প্রীতি ও একাগ্রতার সাথে মিশতেন। মাওলানা বদরুদ্দীন ইসহাক বলেন : তাঁর ব্যক্তিগত খাদিম আমিই ছিলাম। তিনি যা বলতেন, আমাকেই বলতেন। তাঁর ঘরে-বাইরে তথা সদরে-অন্দরে ছিল একই অবস্থা। তাঁর প্রকাশ্য ও অপ্রকাশ্যের মাঝে কোন বিরোধ বা পার্থক্য ছিল না। বছরের পর বছর তাঁর খিদমত ও সাহচর্যে থাকা সত্ত্বেও আমি তাঁর মধ্যে কোনরূপ পরস্পর-বিরোধিতা লক্ষ্য করিনি।^৪

১. আজুদহনকে বর্তমানে পাকগড়ন বলা হয়। বর্তমানে এটি মটোগোমারী জেলার একটি ছোট শহর (পাকিস্তান)

২. সিয়রুল আওলিয়া, পৃ. ৬৬।

৩. সিয়রুল আওলিয়া, পৃ. ৬৪।

৪. সিয়রুল আওলিয়া, পৃ. ৬৫।

একবার সুলতান নাসীরুদ্দীন মাহমুদ সমগ্র সেনাবাহিনী সমেত আউচ ও মুলতান সফরে আসেন এবং খাজা (র)-এর দর্শনলাভের উদ্দেশ্যে আজুদহনে হাযির হন। হযরত খাজা নিজামুদ্দীন আওলিয়া তাঁর অবস্থা বর্ণনা করেন : “ভীড় ছিল নিয়ন্ত্রণের বাইরে। অবশেষে খাদিমকুল একটি কৌশল অবলম্বন করল। হযরত খাজা ফরীদুদ্দীন গঞ্জ শকর (র)-এর একটি পিরহান (জামা)-এর আস্তিন প্রাসাদের বাইরে টাঙিয়ে দেওয়া হল। সেনাবাহিনী আসত এবং তাতে চুমু দিয়ে চলে যেত। শেষ পর্যন্ত আস্তিন টুকরো টুকরো হয়ে যায়। বাধ্য হয়ে তিনি মসজিদে তশরীফ রাখেন এবং খাদিমবন্দকে লক্ষ্য করে বলেন : আমার চারিপাশে বেষ্টনী তৈরি কর যেন কোন দর্শনপ্রার্থী এর ভেতর না আসতে পারে। লোকেরা আসত এবং বাইরে দাঁড়িয়ে সালাম জানিয়ে বিদায় নিয়ে চলে যেত। আকস্মিকভাবে একজন বৃদ্ধ ফরাশ বেষ্টনী ভেদ করে ভেতরে এসে পড়ে এবং শায়খ (র)-এর পায়ের ওপর লুটিয়ে পড়ে। সে তাঁর পা জড়িয়ে ধরে চুমু দেয় এবং বলে, ‘শায়খ ফরীদ! শ্রান্ত হয়ে গেছ। আল্লাহ পাকের দেওয়া এ পুরস্কারের আরও বেশি শুকরিয়া আদায় কর।’ শায়খ (র) একথা শুনে জোরে আল্লাহ আকবার ধ্বনি দিয়ে উঠেন এবং উক্ত ফরাশকে অত্যন্ত খাতির ও সম্মান করেন।”^১

সুলতান নাসীরুদ্দীন নিজেই শায়খ (র)-এর দরবারে হাযির হওয়ার সংকল্প নেন। সাম্রাজ্যের দ্বিতীয় প্রধান ব্যক্তি গিয়াছুদ্দীন বুলবন, যিনি সুলতানের সাথেই ছিলেন, আরম্ভ করলেন : সাথে বিরাট সৈন্যবাহিনী, আর এদিকে আজুদহন পানি ও ঘাস-পাতাহীন শুষ্ক ও রুক্ষ জায়গা। আপনার নির্দেশ হলে এ বান্দাহু নিজে গিয়ে জাহাঁপনার পক্ষ থেকে ‘ওষরখাহী করে আসত ও হাদিয়া তোহফা পেশ করত। অতঃপর কিছু নগদ অর্থ ও চারটি গ্রাম জায়গীর প্রদানের শাহী ফরমান নিয়ে বুলবন খাজা (র)-এর দরবারে হাযির হন এবং অর্থ ও ফরমান শায়খ ফরীদুদ্দীন গঞ্জ শকর (র)-এর সামনে পেশ করেন। তখন শায়খ (র) বলেন, “এটা কি?” গিয়াছুদ্দীন বুলবন জানান, এতে কিছু নগদ অর্থ-কড়ি আছে আর তার সাথে হযরকে প্রদত্ত জায়গীরের শাহী ফরমান। শায়খ (র) মুচকি হেসে উত্তর দেন, “নগদ টাকা-কড়ি আমাকে দিয়ে যাও, আর শাহী ফরমান ফিরিয়ে নাও। ওর গ্রাহক অনেক মিলবে।” একথা বলে তিনি নগদ টাকা-কড়ি তখনই উপস্থিত দরবেশদের মধ্যে বিলিয়ে দেন।^২

১. সিয়াসুল আওলিয়া, পৃ. ৭৯।

২. সিয়াসুল আওলিয়া, পৃ. ৭৯-৮০।

সুলতান গিয়াছুদ্দীন বুলবন হযরত শায়খ (র)-এর সাথে অত্যন্ত ভক্তি ও শ্রদ্ধাপূর্ণ সম্পর্ক রাখতেন। দিল্লীর সালতানাত লাভ করাকেও তিনি হযরত (র)-এর দু'আ, প্রেম ও আন্তরিক মুহব্বতের পরিণতি মনে করতেন এবং তাঁর খাদিমবৃন্দের খিদমত করাকেও তিনি নিজের জন্য পরম সৌভাগ্য বলে বিবেচনা করতেন। হযরত খাজা শায়খ ফরীদুদ্দীন গঞ্জ শকর (র)-একবার এক ব্যক্তির অনুরোধ-উপরোধে একান্ত বাধ্য হয়ে বাদশাহর নিকট তার সম্পর্কে একটি সুপারিশ পত্র লিখে দেন, যা একই সাথে সুপারিশ ও অমুখাপেক্ষিতার আশ্চর্য এক সংমিশ্রণ ও সমন্বয় ছিল। তিনি লিখেন :

আমি এ ব্যক্তির বিষয় আল্লাহ পাক এবং পরে আপনার সামনে পেশ করছি। যদি আপনি তাকে কিছু দেন তবে আল্লাহ পাকই প্রকৃত দাতা হবেন আর আপনি তত্ত্বজন্য কৃতজ্ঞতাজন হবেন। আর যদি না দেন তবে তাতেও আল্লাহ পাকের ইচ্ছাই প্রকাশ পাবে। সেক্ষেত্রে আপনি আপনার অসমর্থতার কারণে দায়ী হবেন না।^১

হযরত শায়খ ফরীদুদ্দীন (র) সমসাময়িককালে খ্যাতনামা ওলীয়ে কামিল ও অন্যান্য সিলসিলার প্রবীণ বুয়ুর্গদের সাথেও বন্ধুত্ব ও ভ্রাতৃত্বপূর্ণ সম্পর্ক রাখতেন। তিনি তাঁদের মর্তবা ও মর্যাদার প্রতি ছিলেন শ্রদ্ধাশীল। শায়খুল ইসলাম শায়খ বাহাউদ্দীন যাকারিয়া মুলতানী (র), যিনি সুহরাওয়ারদিয়া তরীকার খ্যাতনামা মুরশিদ এবং ভারতবর্ষের অন্যতম প্রখ্যাত আধ্যাত্মিক নেতা ও মুবাল্লিগ, তাঁরই সমসাময়িককালের-সম্ভবত সমবয়সী ছিলেন।^২ উভয়ের মধ্যে খুবই ঘনিষ্ঠ ও বন্ধুত্বপূর্ণ সম্পর্ক ছিল এবং পরস্পরের মধ্যে অত্যন্ত আকর্ষণীয় ও খোলামেলা চিঠিপত্রের আদান-প্রদান হত। হযরত শায়খ ফরীদুদ্দীন (র) শায়খ বাহাউদ্দীন (র)-কে শায়খুল ইসলাম উপাধিতে সম্বোধন করতেন। উভয়ের খলীফা ও মুরীদবর্গও নিজেরা গভীর আন্তরিকতামণ্ডিত ও প্রীতিপূর্ণ পরিবেশের মধ্যে পরস্পরের সাথে মিলিত হতেন। তাঁরা একে অপরের সম্মান ও মর্যাদার প্রতি লক্ষ্য রাখতেন। শায়খুল ইসলাম হযরত যাকারিয়া মুলতানী (র)-এর পৌত্র শায়খ রুকনুদ্দীন আবুল ফাত্হ (র) এবং শায়খুল কবীর হযরত শায়খ ফরীদ (র)-এর খলীফা সুলতানুল মাশায়িখ হযরত খাজা নিজামুদ্দীন আওলিয়া (র)-এর ভেতর বিরাট হৃদয়তা ও প্রীতিপূর্ণ সম্পর্ক বিদ্যমান ছিল।

১. আব্বাকরুল আখয়ার; আসল চিঠি অলংকরণপূর্ণ আরবী ভাষায় লিখিত।

২. শায়খুল ইসলাম শায়খ বাহাউদ্দীন যাকারিয়া (র)-এর জন্ম ৫৬৬ হিজরীতে এবং শায়খ ফরীদ (র)-এর জন্ম ৫৬৯ হিজরীতে।

হযরত খাজা ফরীদুদ্দীন (র)-এর জীবনের প্রকৃত ও আসল সম্পদ এবং অনন্য বৈশিষ্ট্য হচ্ছে তাঁর বিপুল আগ্রহ ও আবেগ, ঐশী প্রেমে মত্ততা ও আল্লাহুরই জন্য পাগলপারা-প্রায় অবস্থা। হযরত খাজা নিজামুদ্দীন (র) এক দিনের ঘটনা বর্ণনা করতে গিয়ে বলেন যে, শায়খুল কবীর হযরত খাজা শায়খ ফরীদুদ্দীন (র) নিজস্ব হুজরায় (কামরা) ছিলেন। মাথা ছিল উন্মুক্ত আর চেহারা ছিল পরিবর্তিত। হুজরার মধ্যে পাগলের মত তিনি পায়চারী করছিলেন আর নিম্নোক্ত কবিতাটি আবৃত্তি করছিলেন :

خواهم که همیشه درو فائے توزیم -

خاکے شوم و بزیرپائے توزیم مقصود من خسته ز کونین توی -

ازبهر تو میرم از برائے توزیم

আমার ইচ্ছা যে সর্বদাই তোমার হয়েই আমি বেঁচে থাকি, মাটিতে মিশে যাই। তোমারই পায়ের তলায় আমি জীবন কাটিয়ে দেই। আমার মত নিঃস্ব ও সর্বহারার ইহকালে ও পরকালে একমাত্র কাম্য তুমিই। তোমারই জন্য বেঁচে থাকি আর তোমারই জন্য মারা যাই।

এই কবিতা আবৃত্তির পর তিনি সিজদাবনত হয়ে মাটিতে মাথা রাখছিলেন। অতঃপর আবার এই কবিতাই আবৃত্তি করছিলেন এবং কামরার মধ্যে চতুর্দিকে অস্থিরভাবে পায়চারী করছিলেন। এভাবে তিনি বারবার সিজদায় পড়ছিলেন এবং বহুক্ষণ ঐ অবস্থায়ই কেটে যাচ্ছিল।^১

আল্লাহুর ভয়-ভীতিতে তিনি সব সময় কাঁদতেন। কখনও উপদেশপূর্ণ কথা শুনলে কিংবা মর্মস্পর্শী বর্ণনা কানে এলে অথবা তার সামনে প্রেমোদ্দীপক কবিতা আবৃত্তি করা হলে কিংবা কোন বুয়ুর্গের কোন প্রভাব সৃষ্টিকারী ঘটনা শুনলে তিনি বে-এখতিয়ার কেঁদে ফেলতেন। কোন সময় অবিরাম কাঁদতে থাকতেন। সর্বদাই সিয়াম পালন করতেন। পবিত্র কুরআনুল করীম হিফয ও তিলাওয়াতের প্রতি খুবই আগ্রহী ছিলেন এবং এ দু'টির (সিয়াম ও কুরআন হিফয) জন্য খাস খলীফা ও বিশেষ বিশেষ মুরীদকে ওসীয়াত করতেন ও তাকিদ দিতেন।^২ তিনি সামা'র (এক প্রকার প্রেম ও ভক্তিমূলক গয়ল) প্রতি অত্যন্ত আগ্রহী ছিলেন। কেউ বলেছিলেন, সামা'র বৈধতা নিয়ে 'উলামায়ে কিরামের মধ্যে মতভেদ আছে। তাতে তিনি বলেন :

سبحان الله! یکے سوخت و خاکستر شد یگرے هنوز در

اختلاف است -

১. সিয়াকুল আওলিয়া। ২. সুলতানুল মাশায়িখ (র)-এর জীবনী দ্রষ্টব্য।

সুবহান্নালাহ! একজন জুলে-পুড়ে ছাই হয়ে গেল আর তারা এখনও মতভেদেই লিগু রইল।^১

তাঁর সারা জীবনের নীতি ছিল ধনী ও ক্ষমতাসীনদের থেকে দূরে থাকু, নিজের অবস্থা গোপন রাখা এবং দরবেশী জীবন যাপন করা। স্বীয় প্রবীণ বুয়র্গদের রীতি-নীতি ও চলন-পদ্ধতি আয়ত্ত করে এবং সেগুলির মধ্যে ঐকান্তিকতা ও নিষ্ঠার হিফায়ত তথা তরীকার প্রচার ও প্রসারের গোপন রহস্য নিহিত আছে জেনে তিনি তার ওপরই শক্ত ও সুদৃঢ়ভাবে কায়েম ছিলেন। আপন তরীকতের (তরীকতে চিশতিয়া) একজন ভাই হযরত শায়খ বদরুদ্দীন গযনভী (র) [বিনি ছিলেন হযরত খাজা কুতুবুদ্দীন বখতিয়ার কাকী (র)-এর শ্রেষ্ঠ খলীফাদের অন্যতম] সাম্রাজ্যের কিছু অমাত্যবর্গের সাথে সম্পর্ক রাখতেন। তারা শায়খ গযনভী (র)-এর জন্য দিল্লীতে একটি খানকাহও তৈরি করে দিয়েছিলেন এবং স্বতন্ত্র ও বৈশিষ্ট্যমণ্ডিত পদ্ধতিতে তাঁর খিদমতও করতেন। বিপ্লবাত্মক রুযী-রোযগারের কারণে যখন তিনি শাহী আর্মীরের রোযানলে পড়েন, তখন তাঁকে বেশ দুঃখ-কষ্ট পোহাতে হয়। তিনি এই দুর্দশা থেকে উদ্ধারের আশায় শায়খুল কবীর হযরত গঞ্জ শকর (র)-এর নিকট দু'আপ্রার্থী হলে তিনি জবাবে লিখেছিলেন :

যে ব্যক্তি নিজস্ব পদ্ধতিতে চলতে চায় সে অবশ্যই এমন অবস্থায় পতিত হবে যেখানে সে সর্বদা অস্থির ও পেরেশান থাকবে। আপনি তো গীরানে পাক হযরত খাজা কাকী (র)-এর ভক্তদের অন্যতম। অতএব তাঁর তরীকা ও পন্থার পরিপন্থী খানকাহ কেনই-বা নির্মাণ করলেন আর কেনই-বা সেখানে অধিষ্ঠিত হলেন? হযরত খাজা কুতুবুদ্দীন (র) এবং হযরত খাজা মু'ঈনুদ্দীন চিশতী (র)-এর তরীকা ও জীবন-পদ্ধতিতে এটা ছিল না যে, নিজের জন্য খানকাহ নির্মাণ করে দোকান সাজাবেন। তাঁদের আদর্শ ও নীতিই ছিল নাম নিশানাহীন নির্জন বাস।^২

এই স্বভাবগত ঝোঁক ও প্রবণতার কারণে এবং সর্বসাধারণ ও বিশিষ্ট ব্যক্তিবর্গের ভীড় ও আনাগোনার ফলে ইস্তিকালের পূর্বে পুনরায় তাঁর জীবনে অভাব-অভিযোগ ও টানাপোড়েন দেখা দেয়। সিয়াকুল আওলিয়া পুস্তকে হযরত খাজা নিজামুদ্দীন আওলিয়া (র) বলেন :

১. সিয়াকুল আওলিয়া।

২. সিয়াকুল 'আরিকীন, পৃ. ৮৫; বয়সে সূফীয়া থেকে গৃহীত।

শুয়ুখুল 'আলাম হযরত শায়খ ফরীদ (র) শেষ বয়সে ইত্তিকালের কাছাকাছি সময়ে খুবই আর্থিক অনটনের ভেতর ছিলেন। আমি রমযান মাসে তাঁর খিদমতে উপস্থিত ছিলাম। এত অল্প পরিমাণ খাবার আসত যে, তা উপস্থিত লোকদের জন্য মোটেই যথেষ্ট হ'ত না। সে সময় কোন রাত্রিতেই আমি পূর্ণ পরিতৃপ্তি সহকারে খেতে পাইনি। খাদ্য-সামগ্রী যা দেখা যেত তা ছিল নিতান্তই সামান্য ও মামুলী ধরনের। আমি রওয়ানা হবার প্রাক্কালে হযরত শায়খ (র) আমাকে একটি সুলতানী (সম্ভবত সে যুগের প্রচলিত মুদ্রা) পথ খরচের জন্য দিলেন। ঐ দিনই মাওলানা বদরুদ্দীন ইসহাকের মাধ্যমে নির্দেশ পেলাম, আজ অবস্থান কর, কাল যেও। ইফতার মুহূর্তে হযরত শায়খ ফরীদ (র)-এর ঘরে খাবার কিছুই ছিল না। আমি জানতে পেরেই তৎক্ষণাৎ শায়খ (র)-এর খিদমতে যাই এবং আরম্ভ করি যে, ছয়ুরের দরবার থেকে আমাকে একটি সুলতানী দেওয়া হয়েছিল। যদি অনুমতি পাই তবে তা দিয়ে কিছু খানা-পিনার ইত্তিজাম করতে পারি। হযরত অনুমতি দেন এবং আমার জন্য প্রাণ খুলে দ'আ করেন।^১

সিয়ারুল আওলিয়া প্রণেতা হযরত খাজা নিজামুদ্দীন আওলিয়া (র)-এর বর্ণনা থেকে ইত্তিকালের অবস্থা নিম্নরূপ বর্ণনা করেন :

মুহাররাম মাসের পাঁচ তারিখে অসুখ অত্যন্ত বেড়ে যায়। 'ইশার সালাত জামা'আতেই আদায় করেন। সালাতের পর তিনি বেহুশ হয়ে পড়েন। কিছুক্ষণ পর হুশ ফিরে পেলেন জিজ্ঞাসা করেন, 'আমি কি 'ইশার সালাত আদায় করেছি? সবাই বলল, হাঁ! তিনি বলেন, 'দ্বিতীয়বার পড়ি, জানি না কখন কি হয়!' তিনি সালাত আদায় করেন এবং এরপর আবারও বেহুশ হয়ে যান। এবার বেহুশী অবস্থা ছিল দীর্ঘক্ষণ। হুশ ফেরার পর পুনরায় জিজ্ঞাসা করেন, 'আমি দ্বিতীয়বার সালাত আদায় করেছি?' জানানো হ'ল, হাঁ! আপনি ইতিমধ্যেই তা দু'বার আদায় করেছেন।' তখন তিনি উত্তরে বললেন, 'আরও একবার আদায় করি। কে জানে কখন কি হয়?' এরপর তিনি তৃতীয় দফা সালাত আদায় করেন। অতঃপর মৃত্যুর কোলে চলে পড়েন।^২

ইত্তিকালের তারিখ ছিল ৫ই মুহাররাম, মঙ্গলবার, হিজরী ৬৬৪।^৩ আজুদহনে (পাকপত্তনে) তাঁকে দাফন করা হয়। পরে সুলতান মুহাম্মদ তুগলক তাঁর কবরের উপর গুম্বজ নির্মাণ করে দেন।

১. সিয়ারুল আওলিয়া, পৃ. ৬৬। ২. সিয়ারুল আওলিয়া, পৃ. ৮৯।

৩. সিয়ারুল আওলিয়া প্রণেতা কতিপয় স্থানে ৬৬৯ হিজরীর এমন অনেক ঘটনা বর্ণনা দিয়েছেন যা হযরত খাজা শায়খ ফরীদ (র)-এর জীবনী সম্পর্কিত। কতক জায়গায় হযরত খাজা নিজামুদ্দীন (অপর পৃষ্ঠায় দেখুন)

হযরত খাজা শায়খ ফরীদুদ্দীন গঞ্জ শকর (র) পাঁচজন ছেলে ও তিনজন কন্যা রেখে যান। পুত্রদের নাম যথাক্রমে শায়খ নাসরুদ্দীন নাসরুল্লাহ, শায়খ শিহাবুদ্দীন, শায়খ বদরুদ্দীন সুলায়মান, খাজা নিজামুদ্দীন ও শায়খ ইয়া'কুব। কন্যাত্রয় হলেন বিবি মাসতুরা, বিবি ফাতিমা ও বিবি শরীফা।

হযরত খাজা শায়খ ফরীদুদ্দীন গঞ্জ শকর (র)-এর ওফাতের পর তৃতীয় পুত্র শায়খ বদরুদ্দীন সুলায়মান (র) পিতার স্থলাভিষিক্ত হন! তাঁরই পুত্র সাজ্জাদানশীন শায়খ 'আলাউদ্দীন আজুদহনী (র) পবিত্রতা ও আল্লাহ্‌তীরুতার দিক দিয়ে অত্যন্ত মশহুর ছিলেন। মুহাম্মদ তুগলকও তাঁর মুরীদ দলের অন্তর্ভুক্ত হয়ে যান।' আল্লাহ্ পাক রুহানী সিলসিলার ন্যায় হযরত খাজা শায়খ ফরীদ (র)-এর সন্তান-সন্ততি ও বংশাবলীর ক্ষেত্রেও অত্যন্ত বরকত দান করেছিলেন। হিন্দুস্তানের বিভিন্ন অংশে তাঁর বংশধরগণ ছড়িয়ে আছেন। সাধারণভাবে তাঁরা ফরীদী নামে খ্যাত।

হযরত খাজা শায়খ ফরীদুদ্দীন গঞ্জ শকর (র)-এর পাঁচজন খলীফার নাম বিশেষভাবে উল্লেখ করবার মত। এঁরা হলেন শায়খ জামালুদ্দীন হাঁসুবী (র), শায়খ বদরুদ্দীন ইসহাক (র), শায়খ নিজামুদ্দীন আওলিয়া (র), শায়খ 'আলী আহমদ সাবির (র) এবং শায়খ আরিফ (র)।

শায়খ জামালুদ্দীন (আহমদ ইবন মুহাম্মদ) খতীব হাঁসুবী (র) হযরত খাজা শায়খ ফরীদ (র)-এর অত্যন্ত প্রিয় ও বিশ্বস্ত খলীফা ছিলেন। তাঁরই খাতিরে তিনি সুদীর্ঘ ১২ বছর যাবত হাঁসিতে অবস্থান করেন। যখনই তিনি কাউকে খিলাফতনামা লিখে দিতেন, তখনই বলতেন, "যাও, হাঁসিতে গিয়ে শায়খ জামালুদ্দীনকে দেখিয়ে নেবে।" যদি শায়খ জামালুদ্দীন খিলাফতনামা কবুল করে নিতেন তবে তিনিও কবুল করতেন। শায়খ জামাল নামঞ্জুর করলে তিনিও নামঞ্জুর করতেন এবং বলতেন, 'জামালের ছেঁড়া জিনিস সেলাইয়ের অযোগ্য।' তিনি প্রায়ই বলতেন, "জামাল আমার সৌন্দর্য।"^২

(পূর্ব পৃষ্ঠার পর) আওলিয়া (র)-এর লিখিত বরাত দিয়ে বলা হয়েছে, "হযরত খাজা (র) আমাকে এটা বলেছেন, এটার জন্য হিদায়ত করেছেন।" যদি ঐ সন সঠিক ও বিশ্বস্ত মনে করা হয় তবে ৬৬৪ হিজরী মৃত্যু তারিখ যা সাধারণভাবে মশহুর ও অধিকাংশ কিভাবেই উল্লিখিত ও বর্ণিত, তা সন্দেহহীন হয়ে পড়ে এবং মেনে নিতে হয় যে, হযরত শায়খ ফরীদ (র)-এর ওফাত এর পরে হয়েছিল। অন্যান্য পুস্তকে যা উল্লেখ করা হয়েছে তাতে অনুমান করা চলে যে, হযরত শায়খ ফরীদ (র)-এর ওফাত ৬৭০ হিজরীতে হয়েছিল, যা খাখীনাতুল আসফিয়া ও তায়ফিকাতুল 'আশিকীন নামক গ্রন্থের বরাত দিয়ে পেশ করা হয়েছে।

১. সিয়্যারুল আওলিয়া, পৃ. ১৯৬।

২. নুযহাতুল খাওয়াতির, সিয়্যারুল আওলিয়া ও আখবারুল আখয়ার প্রভৃতি থেকে গৃহীত।

শায়খ জামালুদ্দীন স্বীয় শায়খ (র)-এর জীবদ্দশায় ৬৫৯ হিজরীতে ইত্তিকাল করেন। শায়খ কুতবুদ্দীন মুনাওয়ার [হযরত খাজা নিজামুদ্দীন আওলিয়া (র)-এর প্রিয় খলীফা] তাঁরই পৌত্র।

শায়খ বদরুদ্দীন ইবন ইসহাক ইবন 'আলী (র) বুখারার নেতৃস্থানীয় ব্যক্তিবর্গের অন্যতম ছিলেন। তিনি হযরত খাজা শায়খ ফরীদুদ্দীন (র)-এর খলীফা, খাদিম এবং জামাতা ছিলেন। হযরত খাজা নিজামুদ্দীন আওলিয়া (র) তাঁকে অত্যন্ত সম্মান ও শ্রদ্ধা করতেন। তিনি ছিলেন স্বীয় শায়খ (র)-এর শিক্ষা ও সাহচর্যের জীবন্ত প্রতিমূর্তি। চোখ থাকত সর্বদাই অশ্রুভেজা। প্রায়ই কাঁদতেন, যার ফলে চোখের দৃষ্টিশক্তি দুর্বল ও ক্ষীণ হয়ে গিয়েছিল। জনৈক ব্যক্তি বলেছিল, "আপনি যদি কান্না সংযত করেন তাহলে আপনার ব্যবহারের জন্য আমি সুরমা বানিয়ে দেব।" উত্তরে তিনি বলেছিলেন, "চোখের ওপর আমার কোন নিয়ন্ত্রণ নেই।" তাঁর ইবাদত-বন্দেগী, আল্লাহর পথে অব্যাহত প্রয়াস ও নিরলস সাধনা দেখে শায়খুল কবীর হযরত শায়খ ফরীদুদ্দীন গঞ্জে শকর (র)-এর স্মৃতি জীবন্ত হয়ে উঠত। তিনি অত্যন্ত প্রতিভাধর ও ক্ষণজন্মা পুরুষ ছিলেন। বহু দিন তিনি দিল্লীর প্রসিদ্ধ শিক্ষা প্রতিষ্ঠান মু'ইয্বিয়া মাদরাসায় শিক্ষকতা করেন। পরিপূর্ণ শিক্ষালাভের উদ্দেশ্যে বুখারা পর্যন্ত গিয়েছিলেন। ফারসী ও আরবী ভাষায় এমত পরিমাণ ব্যুৎপত্তি লাভ করেন যে, অবলীলাক্রমে কবিতা রচনা ও আবৃত্তি করে যেতে পারতেন। পঠিত ও শিক্ষণীয় অধ্যায়কে পদ্যে ঢেলে সাজাবার আশ্চর্য ক্ষমতা ছিল তাঁর। 'কিতাবুস্ সরফের' সমস্যাবলী সম্পর্কে তাঁর পদ্যে লিখিত একখানা পুস্তকও পাওয়া যায়। হযরত খাজা নিজামুদ্দীন আওলিয়া (র)-এর সালাতের ইমাম খাজা মুহাম্মদ এবং খাজা মুহাম্মদ মুসা হযরত শায়খ বদরুদ্দীন ইবন ইসহাকেরই সাহেবযাদা ছিলেন। ৬৯০ হিজরীর ৬ই জমাদিউছ ছানী তাঁর ওফাত হয়।^১

শায়খ 'আরিফকে হযরত খাজা শায়খ ফরীদুদ্দীন (র) খিলাফত প্রদান করে সিবিস্তান পাঠিয়ে দেন। কিন্তু তিনি এ খিলাফতনামা স্বীয় শায়খ (র)-কে এই বলে ফিরিয়ে দেন যে, এ বড় নায়ুক দায়িত্ব। তিনি এতবড় দায়িত্ব পালনের উপযুক্ত নন। শায়খ (র)-এর দু'আ ও অনুগ্রহই তাঁর জন্য যথেষ্ট। অতঃপর শায়খ (র)-এর এজাযত নিয়ে হজ্জ-পর্ব সমাধা করবার নিয়তে তিনি বায়তুল্লাহ্ শরীফ রওয়ানা হন। পরে সেখান থেকে আর ফিরে আসেন নি।^২

১. নূ'যহাভুল খাওয়াতির।

২. দিয়ারুল আওলিয়া, পৃ. ১৮৪ ও ১৮৫।

শায়খ কবীর 'আলাউদ্দীন 'আলী ইবন আহমদ সাবির ইসরাঈল বংশীয় ছিলেন। নির্জনবাস এবং আল্লাহর সন্তুষ্টি ও রিয়ামন্দী লাভের উদ্দেশ্যে দুরূহ সাধনায় তিনি ছিলেন অতুলনীয়। পীরান কলীর নামক স্থানে ইবাদত, জনসেবা এবং আত্মোন্নতির ভেতর মশগুল থেকে ১৩ই রবিউল আওয়াল, ৬৮১ হিজরী অথবা ৬৯০ হিজরীতে তিনি ওফাত পান। হযরত শায়খ শামসুদ্দীন তুর্ক পানিপথী ঐরই খলীফা ছিলেন।^১

সুলতানুল মাশায়িখ হযরত শায়খ নিজামুদ্দীন (র) চিশতিয়া সিলসিলার প্রথম বুয়ুর্গ য়াঁর প্রভাব-বলয় ও প্রতিপত্তি নিজেই জীবদ্দশায়ই সমগ্র ভারতবর্ষে পরিব্যাপ্ত হয়ে পড়ে এবং যিনি ভারতবর্ষের ইসলামী সমাজ জীবনকেও বিশেষভাবে প্রভাবান্বিত করেন। রাষ্ট্রীয় জীবন থেকে গুরু করে সাধারণ মানুষ ও দরিদ্রের পর্ণ কুটির জীবন পর্যন্ত সর্বত্রই তিনি নিজেকে শ্রদ্ধাশীল করে তোলেন। তিনি ভারতবর্ষের বুকে তরীকতের প্রথম শায়খ ও আধ্যাত্মিকতার পথপ্রদর্শক (মুরশিদ) য়াঁর সর্বাপেক্ষা বিস্তারিত ও নির্ভরযোগ্য জীবনী পাওয়া যায়।

১. মুহহাতুল খাওয়াতির। আর্চর্যজনক ব্যাপার এই যে, শায়খ 'আলী আহমদ সাবিরের অবস্থা সম্পর্কে সমসাময়িক বর্ণনা ও ইতিহাস নীরব। সিয়ানুল আওলিয়া গ্রন্থে আমীর খোরদ তাঁর বর্ণনা দিতে গিয়ে অগ্রাসঙ্গিকভাবে বলেন যে, শায়খ 'আবদুল হক মুহাদ্দিহ দেহলভী (র) সন্দেহ গোষণ করেন যে, এটা হযরত শায়খ 'আলী আহমদ সাবির পীরান কলীর বর্ণনা অথবা এ নামেরই অপর কোন বুয়ুর্গ ব্যক্তির বর্ণনা। আমীর খোরদ বলেন :

“অধম নিজ ওয়ালিদ (র)-এর কাছ থেকে শুনেছে যে, একজন উচ্চ মর্যাদাসম্পন্ন দরবেশ ছিলেন যাকে 'আলী আহমদ সাবির বলা হ'ত। তিনি দরবেশীতে অটল ও ময়বুত নিসবত ও প্রভাবসম্পন্ন এবং ডিহ্বী নামক স্থানের অধিবাসী ছিলেন। তিনি হযরত শায়খ ফরীদুদ্দীন (র)-এর মুরীদ ছিলেন এবং তিনি তাঁকে বায়'আত গ্রহণের এজামতও দিয়ে রেখেছিলেন।

সমসাময়িক কিংবা নিকটবর্তীকালের বর্ণনায় তাঁদের বর্ণনা থাকুক আর নাই থাকুক কিংবা ছিটেফোঁটা ও সফক্ষিণ্ড থাকুক, তাদের সিলসিলার মহান বুয়ুর্গগণের অবস্থাদি, উচ্চ মর্যাদা, জ্ঞান ও প্রজ্ঞার ক্ষেত্রে আসন, দূরদৃষ্টিসম্পন্ন লোকদের এই সিলসিলার জনপ্রিয়তার ওপর ঐকমত্য এবং সারা দুনিয়ায় এর ফয়েয ও বরকত ও প্রভাব-প্রতিপত্তি সাক্ষী যে, এই সিলসিলার প্রতিষ্ঠাতা অত্যন্ত উচ্চ মকাম, উচ্চ নিসবতের অধিকারী, অধিকন্তু আল্লাহ পাকের নিকট মকবুল ও প্রিয় বান্দারূপে গৃহীত। ইতিহাসের সাক্ষ্যও এর থেকে বড় হতে পারে না। এটাই ইতিহাসের প্রথম অসতর্কতা ও ভুল নয়। প্রাচীনকালে বহু কামিল ব্যক্তি এমনও অতিক্রান্ত হয়ে গেছেন যারা ইতিহাসের তীক্ষ্ণদৃষ্টি থেকে এড়িয়ে গেছেন এবং লোকচক্ষুর অন্তরালে রয়ে গেছেন।

এই সিলসিলার (সাবিরিয়া চিশতিয়া) বড় বড় ও বিরাট মাশায়িখ, 'আরিফ, মুহাক্কিক ও সংস্কারক জন্মেছেন। যেমন হযরত মাখদুম আহমাদ 'আবদুল হক রুদাওলভী (র) য়াঁর পবিত্র বরকতময় সন্তাকে কতক পণ্ডিত ও বিজ্ঞজন নবম শতাব্দীর মুজাদ্দিদ হিসেবে গণ্য করেছেন, হযরত শায়খ

(পরবর্তী পৃষ্ঠায় দ্রষ্টব্য)

অপরদিকে তাঁর পীর ও মুরশিদগণ লিখিত কোন কিছুই রেখে যান নি। তাঁদের খলীফাবর্গও স্বীয় পীর ও মুরশিদগণের মলফুযাত ও জীবনের ঘটনা ও অবস্থাদি না সংগ্রহ করেছেন, আর না তাঁরা স্বীয় শায়খ ও মুরশিদগণের মালফুযাত ও জীবনীর সংকলন তৈরি করেছেন।' কিন্তু তাঁর মলফুযাত ও জীবনী সংকলনের বিশেষ ব্যবস্থা নেওয়া হয়েছে। এ ক্ষেত্রে দু'টো মূলবান, বিশ্বস্ত ও নির্ভরযোগ্য উৎস রয়েছে। তন্মধ্যে একটি ফাওয়াদুল ফুওয়াদ-আমীর হাসান 'আলা সিজযী (মৃত্যু ৭৩৭ হিজরী) এটি রচনা করেন। হযরত খাজা নিজামুদ্দীন (র)-এর

(পূর্বের পৃষ্ঠার পর) আবদুল কুদ্দুস গংগুহী (র), হযরত শায়খ মুহিবুল্লাহ এলাহাবাদী (র), শায়খুল 'আরব ওয়াল আজম হযরত হাজী ইমদাদুল্লাহ মুহাজিরে মক্কী (র), কুতুবুল ইরশাদ হযরত মাওলানা রশীদ আহমাদ গঙ্গুহী (র), কাসিমুল 'উলুম হযরত মাওলানা কাসিম নানুতবী (র) যিনি দেওবন্দ মাদরাসার প্রতিষ্ঠাতা ছিলেন, হাকীমুল উম্মত হযরত মাওলানা আশরাফ 'আলী খানবী (র), হযরত শায়খুল হিন্দ মাওলানা মাহমুদ হাসান দেওবন্দী (র), হযরত খলীল আহমাদ সাহারানপুরী (র), হযরত শায়খ 'আবদুর রহীম রায়পুরী (র), হযরত মাওলানা হুসায়ন আহমাদ মাদানী (র), হযরত মাওলানা মুহাম্মদ ইলিয়াস কানদেহলজী (র), শায়খুল হাদীছ হযরত মাওলানা মুহাম্মদ যাকারিয়া কানদেহলজী (র) প্রমুখ। আমাদের এ যুগেও আল্লাহ তা'আলা এই সিলসিলা দ্বারা দীন ইসলামের হিফায়ত ও বিশ্বব্যাপী রেনেসাঁর কাজ করিয়ে নিচ্ছেন। এ মুহুর্তে সবচেয়ে ব্যাপক ও কার্যকরী এই সিলসিলা জোরদারভাবে সক্রিয়। দারুল উলুম দেওবন্দ এবং মাজাহিরুল 'উলুম সাহারানপুরের তা'লিমী খিদমত, মাওলানা আশরাফ আলী খানবী (র)-এর লেখনী ও মাওয়া'ইজ গ্রন্থসমূহ ও সর্বশেষ মাওলানা মুহাম্মদ ইলিয়াস (র)-এর দাওয়াত ও তাবলিগী আন্দোলন অভিযানের দ্বারা এই সিলসিলার ফয়েয দুনিয়াব্যাপী প্রসার লাভ করেছে। অধ্যাপক খালীক আহমদ নিজামী 'তারীখে মশায়খে চিশত' (চিশতিয়া তরীকার মহান বুয়র্গদের ইতিহাস) নামক গ্রন্থে বলেন : বিগত শতাব্দীগুলিতে কোন বুয়র্গই চিশতিয়া সিলসিলার সংস্কারমূলক মৌলিক নীতিগুলি এমনভাবে চুষে নিতে সক্ষম হয়নি যেমনটি মাওলানা মুহাম্মদ ইলিয়াস (র) সক্ষম হয়েছেন। (২৬৪ পৃ.)

আজও রায়পুরে হযরত মাওলানা আবদুল কাদির সাহেবের খানকাহ চিশতিয়া সিলসিলার প্রাচীন খানকাহগুলির একগ্রন্থতা, কর্মতৎপরতা, আল্লাহুর স্মরণে নিমগ্নতা, প্রেম ও প্রীতির ও ব্যাখ্য-বেদনার কর্ম কোলাহলের স্মৃতিকেই জীবন্ত করে তোলে। আফসোস যে, হযরত মাওলানা 'আব্দুল কাদির সাহেবের ওফাতের পর এ খানকাহটিও প্রাচীন অবলুপ্ত খানকাহগুলির তালিকায় স্থান পেয়েছে। "আল্লাহ ব্যতীত প্রতিটি বস্তুই ধ্বংসশীল।"-আল-কুরআন।

১. হযরত নাসীরুদ্দীন চেরাণে দিল্লী (র)-এর মলফুযাত-খায়রুল মাজালিসে বর্ণিত আছে, তিনি বলেন, আমার হযরত পীর ও মুরশিদ জনাব সুলতানুল আওলিয়া কুদ্দিসাল্লাহ সিররুহুল 'আযীয বলেন, আমি কোন কিতাব প্রণয়ন করি নাই এজন্যই যে, খিদমতে শায়খুল ইসলাম হযরত ফরীদুদ্দীন (র), শায়খুল ইসলাম হযরত খাজা কুতুবুদ্দীন বখতিয়ার কাকী (র) এবং বাকী অন্যান্য চিশতিয়া তরীকার বুয়র্গণ যারা আমাদের শেজরার অন্তর্গত, কেউই কোন কিতাব প্রণয়ন করেন নাই। খায়রুল মাজালিস-এর অনুবাদ সিরাজুল মাজালিসের ৩৫ পৃ.।

প্রতিটি শব্দ আলাদা আলাদা শুনেছেন এবং এর সৌন্দর্যের প্রশংসা করেছেন। তাঁর সাথী ও খাদিমবৃন্দও এর বিশুদ্ধতাকে সাধারণভাবে স্বীকার করেছেন এবং একে জীবনের গুসীলা ও তাবিয়রূপে গ্রহণ করেছেন।^১

দ্বিতীয়, সিয়ারুল আওলিয়া; আমীর খোরদ সায্যিদ মুহাম্মাদ মুবারক 'আলভী কিরমানী (মৃত্যু ৭৭০ হিজরী) এটি রচনা করেন। আমীর খোরদ খোরদসালগীতে হযরত খাজা নিজামুদ্দীন আওলিয়া (র)-এর হাতে বায়'আত হন এবং তাঁর সাহচর্য ও সান্নিধ্য লাভে ধন্য হন। এরপর হযরত শায়খ নাসীরুদ্দীন চেরাগে দিল্লীর হাতে বায়'আত হন। তাঁর পিতা নুরুদ্দীন মুবারক ইবন সায্যিদ মুহাম্মাদ কিরমান (মৃত্যু ৭৪৯ হিজরী) হযরত খাজা নিজামুদ্দীন (র)-এর পুরনো বন্ধু ও একনিষ্ঠ ভক্ত ও অনুরক্ত ছিলেন। এ কিতাবের অধিকাংশ বর্ণনা তাঁর থেকেই নেওয়া হয়েছে। স্বীয় শায়খ হযরত নাসীরুদ্দীন চেরাগে দিল্লী (র)-এর থেকে শোনা বহু বর্ণনাও এতে লিপিবদ্ধ করেছেন। নিজের চোখে দেখা অবস্থাাদি ও নিজ কানে শোনা মলফুযাতও এতে লিপিবদ্ধ করা হয়েছে। হযরত খাজা নিজামুদ্দীন আওলিয়া (র)-এর জীবন ও ঘটনাপঞ্জী, তাঁর শ্রেষ্ঠতম খলীফাদের অবস্থা ও কামালিয়াতের এটাই বিস্তৃত ও নির্ভরযোগ্য সংকলন। উল্লিখিত দু'টি কিতাবের ফলেই বিশেষ করে হযরত খাজা নিজামুদ্দীন আওলিয়া (র)-এর জীবন ও অবস্থাাদি, বৌক ও স্বাভাবিক প্রবণতা, তা'লীম ও তরবিয়তের প্রক্রিয়া, সংস্কার ও প্রচারধর্মী নিরলস প্রয়াস ও সাধনা, তাঁর ফয়েয ও বরকত এবং প্রভাবপঞ্জী সংরক্ষিত হয়ে যায় এবং ইতিহাসের উজ্জ্বলতর লেখনীমালার মধ্যে তা বন্দী হয়ে পড়ে।

এ মহান ব্যক্তির মর্যাদা ও প্রভাব, বিভিন্ন অবস্থা ও উৎসমূলের সহজপ্রাপ্যতার কারণে, ইসলামী রেনেসাঁর ইতিহাসের কেন্দ্রীয় ও যুগনায়ক ব্যক্তিত্ব হিসাবে তাঁর সত্তাকে নির্বাচিত করা হয়েছে।

১. এতে ৩রা শা'বান, ৭০৭ হিজরী থেকে ৯ই শা'বান, ৭২০ হিজরী পর্যন্ত বিভিন্ন মজলিসের মলফুযাত সংকলিত হয়েছে।

হযরত শায়খ খাজা
নিজামুদ্দীন আওলিয়া (র.)

Handwritten text, possibly a signature or a list of names, located at the top center of the page. The text is faint and difficult to read.

17

18

দ্বিতীয় অধ্যায়

সুলতানুল মাশায়িখ হযরত নিজামুদ্দীন (র)-এর জীবনী ও কামালিয়াত

নাম মুহাম্মাদ, নিজামুদ্দীন উপাধিতে সাধারণে খ্যাত ও পরিচিত। পিতার নাম আহমদ ইবন 'আলী। তিনি ইমাম হুসায়ন (রা)-এর বংশধর ছিলেন। মাতামহ সায়্যিদ বংশোদ্ভূত ছিলেন। পিতামহ খাজা 'আলী এবং মাতামহ খাজা 'আরব দু'জনেই একই পিতামহের পৌত্র ছিলেন। উভয়ই বুখারা থেকে এসে কিছুদিন লাহোরে অবস্থান করার পর সেখান থেকে বদায়ুন আসেন।

৬৩৬ হিজরীতে তিনি বদায়ুনে জন্মগ্রহণ করেন।^১ বদায়ুন (প্রাচীন বদাউন)^২ অভিজাত ও নেতৃস্থানীয় ব্যক্তিবর্গের আবাসভূমি ছিল। বহু নেতৃস্থানীয়, সম্মানিত ও শ্রদ্ধেয় বুয়র্গ ইরান ও খুরাসান প্রভৃতি স্থান থেকে এসে এখানে বসতি স্থাপন করেছিলেন।

১. সিয়্যারুল আওলিয়া গ্রন্থে তা হযরত খাজা নিজামুদ্দীন (র)-এর বয়স হিসাব করে উপরিউক্ত জন্ম সনকেই নির্ভরযোগ্য মনে করেছেন।

২. বদাউন রোহিলাখণ্ডের সূঠ নদীর বাম তীরে অবস্থিত। সে যুগে জনবসতিপূর্ণ ও জৌলুসপূর্ণ স্থান ছিল। দিল্লীর জন্য সীমান্ত শহর হিসেবে বিবেচিত হত। সেজন্য পুরাতন দিল্লীর একটি দরজার নামই ছিল বদাউন দরজা (নুহাতুল খাওয়াতির)।

বদাউন কেন্দ্রার বর্তমান ধ্বংসাবশেষ তার অতীত মর্যাদা ও সুদৃঢ় ভিত্তির স্বাক্ষর বহন করছে। ১১৯৬ খ্রিষ্টাব্দে সুলতান মুহাম্মাদ ঘোরীর প্রধান সেনাপতি কুতবুদ্দীন আয়বক একে জয় করেন এবং আপন ক্রীতদাস মালিক শামসুদ্দীন আলতামাশকে বদাউনের আমীর (শাসনকর্তা) নিযুক্ত করেন। আলতামাশ এখানে ১২২২ খ্রিষ্টাব্দে একটা সুদৃশ্য ও প্রশস্ত মসজিদ নির্মাণ করান যা আজ পর্যন্ত বিদ্যমান আছে। দিল্লীর দু'জন বাদশাহ আলতামাশ এবং তাঁরই পুত্র রুকনুদ্দীন ফিরোয শাহ উভয়েই সিংহাসনে আসীন হবার পূর্বে বদাউনের গভর্নর ছিলেন (ইনসাইক্লোপেডিয়া ব্রিটানিকা, বুদায়ুন বদাউন)। 'দীনি ও জ্ঞান-বিজ্ঞান সম্পর্কিত বিভিন্ন উক্তি' নামক মওলবী শফী এম.এ. কৃত গ্রন্থ থেকে বর্ণিত, ১ম খণ্ড, পৃ. ২৪১।

প্রাথমিক শিক্ষা ও প্রশিক্ষণ

হযরত নিজামুদ্দীন পাঁচ বছর বয়সে পিতৃহীন হন। তাঁর সংকর্মশীলা ও আল্লাহভক্ত মা এই ইয়াতীম শিশুর প্রতিপালন এবং ধর্মীয় ও নৈতিক প্রশিক্ষণ পুরূষোচিত সাহসিকতা ও প্রিত্বনেহে সম্পন্ন করেন। কিতাব পড়বার মত বয়সে উপনীত হলে তিনি মাওলানা ‘আলাউদ্দীন উসুলীর’ সামনে নীত হন এবং ফিকহ-এর প্রাথমিক কিতাবাদির শিক্ষা সেখানেই লাভ করেন। কুদুরী সমাণ্ড করার পর মাওলানা ‘আলাউদ্দীন বললেন, “মাওলানা নিজামুদ্দীন! এখন শ্রেষ্ঠত্ব, মহত্ত্ব ও ফযীলতের পাগড়ী মাথায় বাঁধো!” ঘরে এসে তিনি মাকে জানালেন, উস্তাদ তাকে দস্তারবন্দীর হুকুম দিয়েছেন। এখন দস্তার কোথেকে আনি। মা বললেন, ‘বাবা! নিশ্চিত থাক, আমিই তার বন্দোবস্ত করব।’ অতঃপর তুলা ত্রয় করে সুতা কাটিয়ে পাগড়ী বানিয়ে দিলেন।^১ এতদসংক্রান্ত অনুষ্ঠানে ‘উলামায়ে কিরাম ও সে যুগের সংকর্মশীল মহান ব্যক্তিদের আমন্ত্রণ জানান হয়। শায়খ জালালুদ্দীন তাবরিযী (র)-এর মুরীদ খাজা ‘আলী এক পাঁচ বাঁধেন এবং অনুষ্ঠানে উপস্থিত সুবীবন্দ তাঁর কল্যাণকর জ্ঞান ও সার্বিক পরিপূর্ণতা প্রাপ্তির জন্য দু‘আ’ করেন।^২

কঠোর দারিদ্র্য ও মা’য়ের প্রশিক্ষণ

ছোট অথচ অভিজাত পরিবার যা পিতার স্নেহচ্ছায়া থেকে বঞ্চিত- দারিদ্র্যের নিপেষণ সহ্যে, তাতে আর বিচিত্র কি! আর এতে নতুনত্বেরও তেমন কিছু নেই। হযরত খাজা নিজামুদ্দীন (র) বলেন, মা’র অভ্যাস ছিল, যেদিন আমাদের ঘরে রান্না করবার মত কিছুই থাকত না তখন তিনি বলতেন : আমরা আজ সবাই আল্লাহর মেহমান। আমি একথা শুনে বড়ই মজা পেতাম। একদিন আল্লাহর জনৈক বান্দাহ স্বল্প পরিমাণের খোরাক ঘরে পৌঁছিয়ে যায়। পর পর বেশ কয়দিন তা দিয়ে রুটি প্রস্তুত হতে থাকে। আমি শেষ পর্যন্ত হাঁপিয়ে উঠলাম এবং এই আশায় থাকলাম, ওয়ালিদা সাহেবা কখন বলেন যে, আজ আমরা সবাই আল্লাহর মেহমান। শেষাবধি সে খোরাকীর শেষ দানাটুকু শেষ হবার পর আমার ওয়ালিদা সাহেবা বললেন, ‘আজ আমরা সবাই আল্লাহর মেহমান।’ এ কথা শোনায় যে পরিমাণ মজা ও আনন্দ পেয়েছিলাম তা বর্ণনাতীত।^৪

১. মাওলানা আলাউদ্দীন ‘আলী আল-উসুলী শায়খ জালালুদ্দীন তাবরিযী (র)-এর মুরীদ ছিলেন। শায়খ হযরত জালালুদ্দীন তাবরিযী (র)-এর পদাংক অনুসরণের ওপর প্রচ্ছন্ন অবস্থা ও রহস্যের খুবই প্রচেষ্টা (ইহতিমাম) ছিল। সবার ও রেযামন্দী (ধৈর্য ও সন্তুষ্টি) সহকারে জীবন যাপন করতেন এবং সব সময় পরোপকার অথবা ইবাদত-বন্দেগীতে মশগুল থাকতেন (মুযহাভুল খাওয়াতির, ফাওয়ায়েদুল ফুওয়াদের বরাত)।

২. খায়রুল মাজালিসের অনুবাদ সিরাজুল মাজালিস, পৃ. ১৪৫।

৩. ঐ, পৃ. ৯৬। ৪. সিরাজুল আওলিয়া, পৃ. ১১৩।

শায়খুল কবীর^১ হযরত শায়খ ফরীদ (র)-এর সাথে সম্পর্ক এবং আন্তরিক মিল-মুহাব্বত

হযরত খাজা শায়খ নিজামুদ্দীন আওলিয়া (র) বলেন, আমি তখন ছোট ছিলাম। বয়স সম্ভবত বারো বছর কিংবা তার কিছু বেশি অথবা কম। তখন আমি অভিধান পড়তাম। আবু বকর খাররাত নামে প্রখ্যাত এক ব্যক্তি, কেউ কেউ আবু বকর কাওয়ালও বলেন, আমার উস্তাদের নিকট আসেন। তিনি মুলতান হয়ে আসছিলেন। তিনি বর্ণনা করেন যে, আমি হযরত শায়খ বাহাউদ্দীন যাকারিয়া মুলতানী (র)-এর নিকট থেকে আসছি। এর পর তিনি তাঁর মাহাত্ম্য, মর্যাদা ও গুণ-বৈশিষ্ট্যের বর্ণনা দিতে গিয়ে বলেন, ওখানকার জনগণ সর্বদা আল্লাহর যিকরকারী, তাঁরই ধ্যানে মশগুল, সাথে সাথে বহুবিধ নফল বন্দেগীতে এমতরূপ মগ্ন এবং সেখানে যিকরের পরিবেশ এমনই যে, ঘরের চাকরাণী, সেবিকা ও দাসী-বান্দীরা পর্যন্ত যাঁতায় গম পিষতে পিষতে যিকরে ইলাহীতে নিমগ্ন থাকে এবং এ ধরনের আরও অনেক বৈশিষ্ট্যের বর্ণনাই তিনি দিচ্ছিলেন। কিন্তু তাঁর কোন জিনিসই আমার অন্তরে স্থান পাচ্ছিল না। এরপর লোকটি বলা শুরু করল যে, তারপর আমি সেখান থেকে আজুদহন আসলাম। সেখানে আমি এমত দীনদার বাদশাহর সাক্ষাত পেলাম। লোকটি শায়খুল ইসলাম শায়খ ফরীদুদ্দীন (র)-এর কথা আলোচনা করলেন। এটা শুনেই আমার অন্তরমানসে প্রেম ও প্রীতির ফল্লুধারা স্বতঃস্ফূর্ত ধারায় উৎসারিত হয় এবং তাঁর মুহাব্বত ও অন্তরের আকর্ষণ এমনতরভাবেই স্থান করে নেয় যে, শেষ পর্যন্ত তাঁর নাম নিতেই আমি স্বাদ অনুভব করতাম এবং আমি প্রতিটি সালাতের পরই আনন্দ ও উল্লাস সহকারে তাঁর নাম জপতাম।^২

দিল্লী ভ্রমণ

ষোল বছর বয়সে হযরত খাজা নিজামুদ্দীন (র) বদায়ুন থেকে দিল্লী এসে উপস্থিত হন।^৩

১. এই পুস্তকে শায়খুল কবীর বলতে প্রত্যেক স্থানে শায়খ ফরীদুদ্দীন গজে শকর (র)-কে বুঝানো হয়েছে।
২. সিয়াকুল আওলিয়া, পৃ. ১০০; ফাওয়াদুল ফুওয়াদ, পৃ. ১৪৯।
৩. এটা সিয়াকুল আওলিয়ার বর্ণনা, আর এটাই সহীহ ও শুদ্ধ বলে মনে হয়। কেননা দিল্লীতে তিন-চার বছর ছাত্রজীবন কাটানোর পর খাজা সাহেব আজুদহন যান এবং হযরত খাজা ফরীদুদ্দীন (র)-এর হাতে বায়'আত গ্রহণ করেন। বায়'আতের সময় তিনি বিশ-বছর বয়সের ছিলেন বলে জানিয়েছেন। (সিরাজুল আওলিয়া, পৃ. ১০৭)।

দিল্লীতে ছাত্রজীবন

তিনি দিল্লী এসে শিক্ষা গ্রহণের ধারাবাহিকতা বজায় রাখেন। এ সময়সীমা ছিল তিন থেকে চার বছর। দিল্লীতে সে সময় বহু প্রখ্যাত শিক্ষাবিদ বর্তমান ছিলেন।^১ এটা ছিল সুলতান নাসিরুদ্দীন মাহমুদের রাজত্বকাল এবং তৎকালীন উষীরে আযম ছিলেন গিয়াছুদ্দীন বলবন। মাওলানা শামসুদ্দীন খারিযমী যিনি মুস্তাওফিল মামালিক হয়ে শামসুল-মুলক উপাধি লাভ করেন। তিনি শিক্ষকদেরও মহান উস্তাদ-এর মর্যাদা রাখতেন। সাম্রাজ্যের একটি গুরুত্বপূর্ণ পদের যিম্মাদারী এবং নানাবিধ ব্যস্ততার সাথে সাথে তিনি সে যুগের 'আলিম-উলামার মত পঠন-পাঠনের দায়িত্বও পালন করেন। হযরত খাজা নিজামুদ্দীন আওলিয়া (র) ছিলেন তাঁর অন্যতম ছাত্র।

উস্তাদের প্রিয়পাত্র

হযরত খাজা নিজামুদ্দীন (র)-এর সাথে মাওলানা শামসুদ্দীনের বিশেষ সম্পর্ক ছিল। আর তিনি ছিলেন তাঁর সর্বাপেক্ষা প্রিয় শাগরিদ। তিনি নিজে যে বিশেষ হজরায় পড়াশুনা করতেন, সেখানে আর কোন শাগরিদের প্রবেশাধিকার ছিল না। কিন্তু খাজা নিজাম (র) এবং তাঁর দু'জন বন্ধু মাওলানা কুতুবুদ্দীন নাকিল এবং মাওলানা বুরহানুদ্দীন বাকী ছিলেন এর ব্যতিক্রম।^২

খাজা শামসুল মুলকের অভ্যাস ছিল, যদি কোন শাগরিদ অনুপস্থিত থাকত কিংবা দেৱী করে আসত, তবে তিনি বলতেন, শেষ পর্যন্ত আমার এমন কোন ক্রটি হয়েছে যে জন্যে আপনি আসেন নি। হযরত খাজা স্বয়ং এ কাহিনী বলতে গিয়ে মুচকি হেসেছেন এবং বলেছেন যে, যদি তিনি কখনও কাউকে ঠাট্টা করতে চাইতেন তবে বলতেন, আমার দ্বারা এমন কী অপরাধ সংঘটিত হয়েছে যে, আপনারা আসেন নি? কিন্তু আমি কখনো উপস্থিত হতে ব্যর্থ হলে কিংবা দেৱী করে এলে আমার অন্তরে উদিত হত যে, তিনি আজ আমাকেও এমনটি বকবেন। কিন্তু আমাকে দেখামাত্রই নিম্নোক্ত কবিতাটি আবৃত্তি করতেন :

اخر کم از انگه گاه گاہے - ای ویمای کنی نگاہے

এটা বর্ণনা করতে গিয়ে তাঁর চোখ অশ্রুসিক্ত হয়ে উঠত এবং সমস্ত শোতার ওপর কান্নাবস্থা দেখা দিত। তিনি এও বলেন যে, তিনি তাঁর নিজস্ব হজরায়

১. দেখুন, কাযী গিয়াউদ্দীন বারনীকৃত তারীখে ফীরোযশাহী, পৃ. ১১২।

২. এটা ছিল হিসাব বিভাগীয় প্রধান বা একাউন্ট্যান্ট জেনারেলের পদ যা বড় বড় জ্ঞানী ব্যক্তিকেই দেওয়া হত।

৩. সিয়রুল 'আরেফীন'।

আমাকে সাথে বসাতেন। আমার শত আপত্তি সত্ত্বেও তিনি তা মঞ্জুর করতেন না।^১

জ্ঞানের ক্ষেত্রে বিশেষ বৈশিষ্ট্য ও অগ্রাধিকার

হযরত খাজা নিজামুদ্দীন (র) লেখাপড়ার ক্ষেত্রে আল্লাহ প্রদত্ত অসামান্য প্রতিভা ও ধী-শক্তি দ্বারা সহপাঠীদের ভেতর বিশেষ বৈশিষ্ট্য ও অগ্রাধিকার লাভ করেন। জ্ঞান-বিজ্ঞান সম্পর্কিত বিতর্ক ও প্রশ্নোত্তরে (যা প্রাচীন শিক্ষা ব্যবস্থার একটি গুরুত্বপূর্ণ অংশ ছিল) তাঁর বাকপটুতা ও বাকচাতুর্যের এবং প্রমাণপঞ্জী উপস্থাপনা শক্তির এমনই প্রকাশ ঘটে যে, তিনি জ্ঞান-বিজ্ঞান সম্পর্কিত যে সমস্যা ও প্রশ্নের ওপরই আলোচনা করতেন অন্যান্য ছাত্র তাতে লা-জওয়াব হয়ে যেত এবং গোটা বিতর্ক ও প্রশ্নোত্তর সভায় তাঁর জ্ঞান, বিদ্যাবত্তা ও প্রতিভার স্বীকৃতি প্রতিষ্ঠিত হয়ে যেত। অতঃপর তাঁর সহপাঠীরা তাঁকে মাওলানা নিজামুদ্দীন 'বাহুহাছ' (বাগী) এবং মাওলানা নিজামুদ্দীন 'মাহফিল শিকন' (মাহফিল ও বৈঠক চূর্ণ-বিচূর্ণকারী) উপাধিতে সম্বোধন করতে থাকে।^২

'মাকামাত' কঠিন ও এর কাফফারা

সে যুগের পাঠ্যতালিকায় 'আরবী সাহিত্যের প্রখ্যাত পুস্তক 'মাকামাতে হারীরী' অন্তর্ভুক্ত ছিল। সাধারণভাবে ছাত্ররা পুস্তকটির মর্মোদ্ধার এবং তার কঠিন শব্দ ও বাক্যসমষ্টি মুখস্থ করাকেই যথেষ্ট মনে করত। কিন্তু হযরত খাজা নিজামুদ্দীন (র) তাঁর সীমাহীন জ্ঞানস্পৃহা, উচ্চ মনোবল ও সাহসিকতার দ্বারা এর চল্লিশটি মাকামাই মুখস্থ করে ফেলেন। পরে এরই কাফফারাস্বরূপ হাদীছের মশহুর কিতাব 'মাশারিকুল আনওয়ার' মুখস্থ করেন।^৩

হাদীছের এজাযত প্রাপ্তি

তিনি কামালুদ্দীন যাহিদ (মৃত্যু ৬৮৪ হিজরী) নামে বিখ্যাত সে যুগের প্রসিদ্ধ মুহাদ্দিছ শায়খ মুহাম্মাদ ইবন আহমদ আল-মারিকলী-এর নিকট হাদীছ শিক্ষা লাভ করেন। তিনি 'মাশারিকুল-আনওয়ার' প্রণেতা আল্লামা হাসান ইবনে মুহাম্মাদ আস্-সাগানীর সরাসরি ছাত্র ছিলেন। 'ইল্‌মে ফিকহুতে (ইসলামী আইন শাস্ত্রে) তিনি একই সূত্রে 'হিদায়া' প্রণেতা 'আল্লামা বুরহানুদ্দীন আল- মারগিনানীর ছাত্র

১. ফাওয়ায়েদুল ফুওয়াদ, পৃ. ৬৮।

২. সিয়াকুল আওলিয়া, পৃ. ১০১।

৩. সিয়াকুল আওলিয়া, পৃ. ১০১।

ছিলেন। হযরত খাজা নিজামুদ্দীন (র) তাঁর নিকট থেকে মাশারিকুল-আনওয়ারের দরুস গ্রহণ করেন এবং হাদীছ সম্পর্কে এজাযত লাভ করেন।^১

অন্তরের অস্থিরতা এবং আল্লাহর দিকে ধাবমানতা

হযরত খাজা নিজাম (র) যদিও সমগ্র দেহ-মন দিয়ে শিক্ষা অর্জনের পেছনে নিমগ্ন ছিলেন এবং তাঁর উঁচু মনোবল ও সাহসিকতা এবং অটুট ও সুদৃঢ় সংকল্প এক্ষেত্রে কোনরূপ অলসতা ও গাফিলতির প্রশ্রয় দেবার পক্ষপাতী ছিল না, তথাপি তাঁর অন্তর-মানস অন্য কোন বস্তু অধীর আগ্রহে খুঁজে ফিরছিল। জ্ঞান-বিজ্ঞান সম্পর্কিত আলাপ-আলোচনা এবং প্রকাশ্য জ্ঞানরাজ্যের উন্মুক্ত পরিবেশে তাঁর প্রকৃতি ভীত ও সন্ত্রস্ত হয়ে যেত। একদিন তিনি বলেন : যৌবনে যখন লোকজনের সাথে গভীরভাবে সম্পর্কিত ছিলাম এবং তাদের সাথে উঠাবসা করতাম, তখন সর্বদাই নিজেকে ভারাক্রান্ত মনে হত এবং মনে মনে বলতাম, কখন আমি এ সমস্ত লোকের মাঝ থেকে চলে যেতে পারব-যদিও এ সমস্ত লোক ছিলেন শিক্ষিত ও সুধীজন এবং তাঁরা সর্বদা জ্ঞানরাজ্যের বিভিন্ন বিষয় ও শাখা নিয়ে আলাপ-আলোচনা করতেন, তথাপি অধিকাংশ সময়ই তাদের প্রতি আমার প্রকৃতি থাকত চরমভাবে বিরক্ত ও বিতৃষ্ণ। আমি আমার বন্ধু-বান্ধবদের বলতামঃ দেখ, আমি কিন্তু চিরদিনই তোমাদের মাঝে থাকব না। কিছুদিন তোমাদের এখানে আমি ম্লেহমান মাত্র। আমীর হাসান 'আলা সিজযী (র) বলেন, "আমি আরয় করলাম, এটা কি শায়খুল ইসলাম হযরত শায়খ ফরীদুদ্দীন (র)-এর খিদমতে হাযির হবার পূর্বকারণ ঘটনা?" তিনি বললেন, "হ্যাঁ।"

ওয়ালিদা সাহেবার ইত্তিকাল

দিল্লীতে অবস্থানকালীন হযরত খাজা নিজামুদ্দীন (র)-এর শ্রদ্ধেয়া ওয়ালিদা সাহেবা ইত্তিকাল করেন।

মা'য়ের স্মৃতি স্মরণ

অনেককাল পর একদিন হযরত খাজা (র) স্বীয় মা'য়ের ইত্তিকালের কথা বর্ণনা করেন। বর্ণনা করতে গিয়ে তিনি এমত পরিমাণ কেঁদেছিলেন যে, অতিরিক্ত কান্নার ফলে তিনি যা কিছুই বলছিলেন পুরাপুরি বোঝা যাচ্ছিল না।

১. সিয়াকুল আওলিয়া, পৃ. ১০৫। এজাযতনামা আরবীতে লিখিত এবং সিয়াকুল আওলিয়া গ্রন্থে তা অবিকল উদ্ধৃত করা হয়েছে। এজাযতনামা ২২শে রবিউল আওয়াল, ৬৭১ হিজরীতে প্রদত্ত। যার অর্থ এই যে, যখন তিনি এজাযতনামা পান তখন তাঁর বয়স (জন্ম তারিখ ৬৩৬ হিজরী হিসাবে) ৪৩ বছর ছিল এবং এ ঘটনা শায়খুল ক্ববীর হযরত শায়খ ফরীদ (র)-এর ওফাতের ১৩ বছর পরের ঘটনা এবং সে সময়কার ঘটনা, যখন তিনি নিজেই জনগণের হিদায়াত ও ইরশাদ এবং তালীম ও তরবিয়তের আসনে সমাসীন এবং তাঁর খ্যাতি দূর-দূরান্তরে ছড়িয়ে পড়েছে।

আল্লাহর প্রতি মা'য়ের ইয়াকীন ও তাওয়াক্কুল

হযরত খাজা নিজামুদ্দীন আওলিয়া (র) বলেন, “একদিন নতুন চাঁদ দেখে মা'য়ের খিদমতে হাযির হলাম এবং কদমবুসি করলাম। অতঃপর পবিত্র চাঁদ দেখার শুভ সংবাদ বরাবরের মতই পেশ করলাম। তিনি বললেন, ‘আগামী মাসে চাঁদ দর্শন উপলক্ষে কার কদমবুসি করবে?’ আমি বুঝে ফেললাম যে, ইত্তিকালের মুহূর্ত সমাগত। দুঃখ ও বিষাদে আমার অন্তর-মন ভরে গেল। আমি কাঁদতে শুরু করলাম। আমি বললাম, ‘আম্মা! এ অধম ও গরীব বেচারাকে কার কাছে সোপর্দ করে যাচ্ছেন?’ তিনি উত্তরে জানালেন, এর জবাব আগামীকাল পাবে। আমি আপন মনেই বললাম এ মুহূর্তেই কেন তিনি জবাব দিচ্ছেন না। তিনি এও বললেন, ‘যাও! আজ রাত শায়খ নাজীবুদ্দীনের ওখানেই কাটাবে।’ মা'য়ের নির্দেশ মুতাবিক আমি সেখানেই গেলাম। শেষরাত্রে ভোরের দিকে ঘরের সেবিকা দৌড়াতে দৌড়াতে এসে ডেকে বলল, বিবি সাহেবা তাঁকে ডাকছেন। আমি ভয় পেয়ে জিজ্ঞেস করলাম, সব খবর ভাল তো? সে ‘হাঁ’ বলায় আমি নিশ্চিত্তে মা'য়ের খিদমতে হাযির হলে তিনি বললেন, ‘গতকাল তুমি আমাকে একটি কথা জিজ্ঞেস করেছিলে আর আমি তার জবাব দেবার ওয়াদাও করেছিলাম। এখন আমি তার জবাব দিচ্ছি। মনোযোগ সহকারে শোন।’ তিনি বললেন, ‘তোমার ডান হাত কোনটি?’ আমি আমার ডান হাত বাড়িয়ে দিলাম। তিনি আমার ডান হাত নিজের হাতের মুঠোর ভিতর টেনে নিলেন এবং বললেন : আল্লাহ পরওয়ারদিগার। একে তোমার হাতেই সোপর্দ করছি। একথা বলেই তিনি ইত্তিকাল করলেন। আমি এতে আল্লাহ পাকের দরবারে অসংখ্য শুকরিয়া আদায় করলাম আর আপন মনেই বললাম যে, আমার আম্মা যদি স্বর্ণ ও মণিমুক্তায় পূর্ণ একটি ঘরও আমার জন্য রেখে যেতেন তবুও আমি এত খুশি হতাম না।”^১

একটি ভুল আকাঙ্ক্ষা

সে সময় রাজধানী দিল্লীর আকাশে-বাতাসে, বিশেষ করে ছাত্র ও বিদ্বানমণ্ডলীর গোটা সমাজে বিচার ও ফতওয়া বিভাগ সম্পর্কিত আলোচনা ও চর্চা এবং এসব পদে ‘আলিম-উলামার নিযুক্তি এবং কাষী ও মুফতীদের জাঁকজমক ও জৌলসপূর্ণ জীবন-যাপন, উপরন্তু ধন-দৌলতের কিসসা-কাহিনীতে ছিল সরগরম। হযরত খাজা নিজাম (র)-এর প্রকৃতিগত সৌভাগ্য এবং উচ্চ আধ্যাত্মিক যোগ্যতা সত্ত্বেও এ সময় তাঁর বয়স ছিল কম। জ্ঞানগত বৈশিষ্ট্য এবং

জীবন ও জীবিকার ক্ষেত্রে অভাব-অনটন তথা দারিদ্র্যের কারণে তাঁর মনে উল্লেখযোগ্য ও গুরুত্বপূর্ণ পদলাভের কামনা-বাসনা যদি জেগেই থাকে তবে তা মানবীয় প্রকৃতির পক্ষে একেবারে অস্বাভাবিক কিছু ছিল না। একদিন তিনি শায়খ নাজীবুদ্দীন মুতাওয়াক্কিল (র)-এর নিকট গিয়ে আরম্ভ করলেন, “দু’আ’ করুন যেন আমি কাষী হতে পারি।” শায়খ নাজীবুদ্দীন কোন উত্তর না দিয়ে চুপ করে রইলেন। হযরত খাজা নিজামুদ্দীন (র) মনে করলেন, হয়ত তিনি গুনতে পাননি। দ্বিতীয় বার কিছুটা উচ্চ শব্দে বললেন, “আমি আপনার নিকট দু’আ’র দরখাস্ত করছি যেন কোথাও কাষী হয়ে যেতে পারি।” শায়খ উত্তর দিলেন, “অন্য আর যাই কিছু হও, কাষী হয়ো না।”^১

আজুদহনে প্রথমবার উপস্থিতি

হযরত খাজা নিজামুদ্দীন আওলিয়া (র) আজুদহন গিয়ে উপস্থিত হবার পূর্বেই দিল্লীতে শায়খুল কবীর (র)-এর আপন ভাই খাজা নাজীবুদ্দীন মুতাওয়াক্কিল (র)-এর সাথে পরিচিত হয়েছিলেন এবং তাঁর সাথে বেশ কিছুকাল অবস্থানও করেছিলেন। তাঁর সাহচর্য ও আলাপ-আলোচনা শায়খুল কবীর হযরত খাজা শায়খ ফরীদ (র)-এর প্রতি প্রীতি ও মুহব্বতের সে স্কুলিংগ— যা অল্প বয়সে এবং বদায়ুনে অবস্থানকালীন সময়ে তাঁর রক্ত-মাংসে মিশে গিয়েছিল—প্রজ্জ্বলিত হয়ে ওঠে ও নতুন বিপ্লব সৃষ্টি করে। তিনি শায়খুল কবীর (র)-এর এর খিদমতে হাযির হবার অটুট সংকল্প গ্রহণ করেন এবং শেষাবধি হাযিরও হয়ে যান।

প্রার্থী, না প্রার্থনা পূরণকারী?

খাজা নিজামুদ্দীন আওলিয়া (র) এই মুলাকাত এবং প্রথমবারের উপস্থিতির অবস্থা সম্পর্কে বলতে গিয়ে নিজেই বলেছেন যে, আমি যখন শায়খুল কবীর (র)-এর খিদমতে হাযির হই তখন তাঁর আকর্ষণীয় ব্যক্তিত্বের প্রভাবের কারণে আমি আমার বাকশক্তি হারিয়ে ফেলি। শুধুমাত্র কোনক্রমে এতটুকুই উচ্চারণ করতে সক্ষম হয়েছিলাম, “কদমবুসি করতে অত্যন্ত আগ্রহী।” শায়খ (র) যখন দেখতে পেলেন আমি অত্যন্ত ভীত ও হতচকিত, তখন তিনি বললেন : لكل داخل ۱. প্রতিটি নবাগতই ভীত-বিহ্বল হয়ে থাকে।^২

মুরীদকে সাদরে গ্রহণ

শায়খুল কবীর হযরত শায়খ ফরীদুদ্দীন গঞ্জ শকর (র) হযরত খাজা নিজামুদ্দীন (র)-কে অত্যন্ত সমাদর করেন। তিনি ইরশাদ করেন, “এই ভিনদেশী

১. ফাওয়ানেদুল ফুওয়াদ, পৃ. ২৮।

২. ফাওয়ানেদুল ফুওয়াদ, পৃ. ৩১।

ছাত্রটির জন্য জামাতখানায় যেন চারপায়ী বিছানো হয়।” হযরত খাজা নিজাম (র) বলেন, “যখন চারপায়ী বিছানো হল তখন আপনি মনেই বললাম, আমি কখনোই চারপায়ীর ওপর বিশ্রাম নেব না। কত সম্মানিত মুসাফির, আল্লাহর কালাম পাকের কত হাফিয এবং আল্লাহর কত ‘আশিক প্রেমিক ভূমিশয্যায় শায়িত- আর আমি চারপায়ীর ওপর কেমন করে শুই?” এ সংবাদ খানকাহর ব্যবস্থাপক মাওলানা বদরুদ্দীন ইসহাক পর্যন্ত গিয়ে পৌঁছুতেই তিনি বললেন, “তুমি নিজের ইচ্ছেমতো কাজ করবে, না কি শায়খ (র)-এর নির্দেশ মান্য করবে?” আমি বললাম, “শায়খ (র)-এর নির্দেশই মান্য করব।” বললেন, “তবে যাও, চারপায়ীর ওপর শুয়ে পড়।”^১

বায়’আত

এখানে উপস্থিত থাকাকালীন কোন এক মুহূর্তে যে উদ্দেশ্য সামনে রেখে তিনি এসেছিলেন সে উদ্দেশ্য পূরণ করেন এবং শায়খুল কবীর (র)-এর হাতে হাত রেখে বায়’আত নেন। সে সময় তাঁর বয়স ছিল বিশ বছর।^২

শিক্ষার ধারাক্রম অব্যাহত অথবা পরিত্যক্ত

সম্ভবত হযরত খাজা নিজামুদ্দীনের কতকগুলি কিতাব অধ্যয়ন তখনও বাকী ছিল। গভীর আত্মহ ও স্পৃহা দাবি করছিল যেন পড়াশোনার পাট এখানেই চুকিয়ে দেয়া হয় এবং প্রকৃত ‘ইলম ও আল্লাহর মারিফত (পরিচয়) লাভের পেছনেই জীবন ব্যয় করা হয় যা মানব সৃষ্টির একমাত্র উদ্দেশ্য। শিক্ষা আহরণ ও শিক্ষা প্রদানের দীর্ঘ ধারাবাহিকতা প্রথমেও তাঁর সংবেদনশীল মন-মানসিকতা এবং সদাজাগ্রত আত্মার ওপর বোঝাস্বরূপ ছিল। কিন্তু প্রয়োজন ও আবশ্যিকীয় মনে করে, কিন্তু অন্য কোন অবলম্বন খুঁজে না পেয়ে তিনি তাই আঁকড়ে ধরে ছিলেন। কিন্তু যখন ‘ইলমে যাকীনের প্রতিষেধক এবং ‘ইলমে হাকীকীর উৎসমূল মিলে গেল, তখন এ দীর্ঘ ধারাক্রম বজায় রাখা তাঁর স্বভাব ও প্রকৃতির ওপর দুর্বল বোঝাস্বরূপ হয়ে দাঁড়াল।

কিন্তু যে শায়খ ও মুরশিদে কামিলের সাথে তিনি আন্তরিক সম্পর্ক স্থাপন করেছিলেন, তিনি আধ্যাত্মিক কামালিয়াত হাসিলের সাথে সাথে ‘ইলমের দিক দিয়েও কামিল ছিলেন। তিনি তরীকতের ‘ইলম হাসিলের জন্য আবশ্যিকমত জাহিরী ‘ইলম হাসিল করাকেও অত্যন্ত দরকারী ও অপরিহার্য মনে করতেন।

১. সিয়্যারুল আওলিয়া, পৃ. ১০৭।

২. সিয়্যারুল আওলিয়া, পৃ. ১০৭।

স্বয়ং তাঁর শায়খ ও মুরশিদও এ হিদায়াত দান করেছিলেন। অতএব মাওলানা নিজামুদ্দীনের দ্বারা ইরশাদ (ধর্মীয় পথ-নির্দেশনা) এবং তরবিয়তের (নির্দেশিত পথের বাস্তব প্রশিক্ষণ) যে দুনিয়াব্যাপী দায়িত্ব আজ্ঞাম দেওয়া স্রষ্টার অভিপ্রেত ছিল, সেরূপ দায়িত্ব পালনের জন্য দরকার ছিল গভীর পাণ্ডিত্যের। এমনিতেও দূরদৃষ্টিসম্পন্ন ও বিচক্ষণ শায়খ ও মুরশিদগণ আল্লাহর যিনি প্রার্থী-তাঁর গণ্ডী ও সীমারেখার দিকটিও দেখে থাকেন। হযরত খাজা নিজামুদ্দীন (র) বায়'আত গ্রহণের পর বললেন, “লেখাপড়ার পাট চুকিয়ে দিয়ে কি নফল ইবাদত-বন্দেগী ও রিয়াযত-মুশাহাদায় লিপ্ত হয়ে পড়ব?” শায়খুল কবীর (র) বললেন, “আমি কাউকেই লেখাপড়া ও শিক্ষালাভের পথ ছেড়ে দিতে বলি না। ওটাও কর এবং এটাও কর অর্থাৎ লেখাপড়ার সাথেই আধ্যাত্মিক সাধনাও চালিয়ে যাও। দেখতে থাক কোনটি বিজয়ী হয়।” তিনি আরও বললেন : “দরবেশের জন্যও অল্পবিস্তর ইলম্ব হাসিল করা অবশ্যই উচিত।”^১

শায়খুল কবীর (র) থেকে দরুস গ্রহণ

শায়খুল কবীর (র)-এর বিশেষ অনুগ্রহ ও খাস মেহেরবানী যে, তিনি স্বয়ং খাজা নিজাম (র)- কে সরাসরি নিজস্ব তত্ত্বাবধানে কতকগুলি বিষয় পড়াতে শুরু করেন। তিনি বলেন, “নিজাম। তোমাকে কিছু কিতাব আমার থেকেও পড়তে হবে।” অতঃপর শায়খগণের ইমাম হযরত শিহাবুদ্দীন সুহরাওয়ার্দী (র)-এর তাসাওউফ সম্পর্কিত প্রসিদ্ধ কিতাব ‘আওয়ারিফুল মা‘আরিফ’-এর দরুস দেওয়া শুরু করেন এবং ছয়টি অধ্যায় পড়ান। এ ছাড়াও আবু শাকুর সালেমীর ভূমিকাও প্রথম থেকে শেষ অবধি পৃথক পৃথক পাঠ করে শিক্ষা দেন। অধিকন্তু তিনি ইলমে তাজবীদও শিক্ষা দেন এবং পবিত্র কুরআনুল করীমের ছয় পারা তাজবীদ সহকারে পড়ান।^২

‘দরুস’-এর আনন্দ

হযরত খাজা নিজামুদ্দীন আওলিয়া (র) বহুকাল অতীত হবার পরও উক্ত দরুসের আনন্দ সম্পর্কে স্মৃতিচারণ করতেন। তিনি বলতেন, “আওয়ারিফ-এর দরুস গ্রহণকালে যে সমস্ত হাকীকত ও গোপন রহস্য হযরত শায়খুল কবীর (র)-এর মুখ থেকে শুনেছিলাম তা আর কখনও শুনেতে পারব না। হযরত শায়খ (র)-এর বর্ণনার যাদুকরী ক্ষমতা ও তার বিস্ময়কর প্রভাব-প্রতিক্রিয়া এমনি ছিল যে,

১. সিয়্যরুল আওলিয়া, পৃ. ১০৭।

২. সিয়্যরুল আওলিয়া, পৃষ্ঠা ১০৬।

তিনি যখন ধর্মীয় ভাষণ দিতেন তখন কায়মনে আকাজক্ষা পোষণ করতাম-কত সুন্দর হ'ত যদি আমি এ অবস্থায় মারা যেতাম।^১

আত্মবিলুপ্তির শিক্ষা

'আওয়ারিফ'-এর যে কপি দরুস প্রদানের সময় হযরত শায়খ (র)-এর হাতে থাকত তা ছিল কিছুটা ক্রটিযুক্ত এবং লেখাগুলি ছিল অত্যন্ত সুন্দর। কয়েক সবকের পরই এমন একটি জায়গা এল যেখানে শায়খ (র)-কে বেশ কিছুক্ষণ চিন্তিত থাকতে হয়। হযরত খাজা নিজাম (সরলতা ও তারুণ্যের কারণে) বলে বসেন, "আমি শায়খ নাজীবুদ্দীন মুতাওয়াক্কিলের নিকট অন্য আর একটি কপি দেখেছি। উক্ত কপিটি বিশুদ্ধ ছিল"। শায়খুল কবীর (র) বললেন, "ফকীর-দরবেশদের ভুলক্রটিযুক্ত কপি সংশোধনের ক্ষমতা নেই।" কয়েকবারই তিনি কথাটি আওড়াতে থাকেন। হযরত খাজা নিজাম (র) বলেন, প্রথমদিকে তো খেয়ালই করতে পারিনি। কিন্তু বারবার আওড়ানোর ফলে সহপাঠী মাওলানা বদরুদ্দীন ইসহাক আমাকে বললেন, "শায়খুল কবীর (র)-এর কথার লক্ষ্যস্থল তো তুমি।" হযরত খাজা নিজামুদ্দীনের তো তখন হুঁশ হারাবার উপক্রম। তিনি বলে ওঠেন, "না উয়ুবিল্লাহ! এর দ্বারা হযরত শায়খুল কবীর (র)-এর ওপর আপত্তি উত্থাপন করা আমার মোটেই উদ্দেশ্য ছিল না।" হযরত খাজা নিজাম (র) বলেন, "আমি বারবার ওয়রখাহী করলাম, কিন্তু তাঁর বিমর্ষ ভাব দূর হবার কোন লক্ষণ দেখা গেল না।" তিনি বলেন, "অবশেষে আমি সেখান থেকে উঠে গেলাম। আমি বুঝতে পারছিলাম না আমার কি করা উচিত। সে দিন দুঃখ ও বিষাদের যে পাহাড় আমার ওপর ভেঙে পড়েছিল এবং সমস্ত দিনটা যেভাবে কেটেছিল, সম্ভবত আর কারও জীবনে তেমন দিন আসেনি। দুঃখ ও বিমর্ষচিত্তে বাইরে বেরিয়ে আসলাম। একবার এমনও মনে হয়েছিল যে, কুয়ায় কাঁপিয়ে পড়ে জীবনটাই শেষ করে দেই। কিন্তু শান্তভাবে চিন্তা-ভাবনার পর সে কল্পনা পরিত্যাগ করলাম। এরপর পেরেশান ও হযরান অবস্থায় আমি জঙ্গলের দিকে চললাম এবং বহুক্ষণ কেঁদে কাটালাম।"

শিহাবুদ্দীন নামে শায়খুল কবীর (র)-এর জনৈক সাহেবযাদা যার সাথে খাজা নিজাম (র)-এর অত্যন্ত অন্তরঙ্গ ও হৃদয়তাপূর্ণ সম্পর্ক বিদ্যমান ছিল; তিনি শায়খুল কবীর (র)-এর নিকট খাজা নিজাম (র)-এর উপরিউক্ত অবস্থার বর্ণনা দেন। মনের আকাজক্ষা পূর্ণ হল। শায়খুল কবীর (র)-এর খিদমতে উপস্থিত হবার অনুমতি তাঁর মিলে গেল।

দ্বিতীয় দিনে তিনি নিজেই ডেকে পাঠালেন। বললেন, “এ সবই তো তোমার পূর্ণতা প্রাপ্তির স্তরে উপনীত হবার জন্যই করা হয়েছে। পীর মুরীদের কল্যাণকামী ও সংশোধন অভিলাষী হয়ে থাকেন।”

চুড়ান্ত মুহূর্ত

হযরত খাজা নিজামুদ্দীন আওলিয়া (র)-এর জন্য সে মুহূর্তটি—যখন শায়খুল কবীর (র) তাঁর “আমি শায়খ নাজীবুদ্দীনের নিকট একটি উত্তম কপি দেখেছি” শুনে অসন্তুষ্টি প্রকাশ করেছিলেন— অত্যন্ত কঠিন ও নায়ুক মুহূর্ত ছিল। বাহ্যত এরূপ একটি নির্দোষ ও নিষ্পাপ বাক্য বলাতে এবং এই সংবাদ জ্ঞাত করাতে যে, আমি আপনার ভাইয়ের নিকট উত্তম একটি কপি দেখেছি— এমন পরিমাণ অসন্তুষ্টি ও প্রতিবাদ প্রকাশের প্রয়োজন ছিল না। কিন্তু কামিল শায়খ এমন একজন ছাত্র থেকে, যিনি ভাবী জীবনে তাঁরই স্থলাভিষিক্ত হতে যাচ্ছেন এবং যাঁকে গণমানুষকে আত্মশুদ্ধির ভরবিত্য দিতে হবে— এতটুকু অহমিকা থাকা পসন্দ করেন নি। তদুপরি আল্লাহর পথের নবীন এই পথিককে হালতের যে পূর্ণতম স্থানে পৌঁছতে হবে তজ্জন্য তার অস্থিরতা ও অভাববোধ জাপ্ত করা এবং তাঁর অন্তর-মানসকে দ্রবীভূত করার প্রয়োজন ছিল। কিন্তু একজন ধীমান, যোগ্যতা ও প্রতিভাসম্পন্ন যুবকের পক্ষে— যে জ্ঞানের সর্বোচ্চ ধাপ অতিক্রম করেছে— এ সময়টি ছিল অত্যন্ত নায়ুক আর এরই ওপর তাঁর গোটা ভবিষ্যত নির্ভর করছিল। মাওলানা সাযি়াদ মানাযির আহসান গিলানী ঠিকই লিখেছেন :

প্রার্থীর মধ্যে কে সত্যবাদী আর কে মিথ্যুক তার পার্থক্য ও যাচাই-বাছাই করার মুহূর্ত সমাগত। দুনিয়া দেখছিল— এখন মাওলানা নিজামুদ্দীনের সিদ্ধান্ত কি হয়? মাওলানা কি ‘বাহুহাছ’ (তর্ক-বিতর্ককারী, তর্কিক, debator) অথবা ‘মাহফিল শিক্ন’ (আলোচনা বৈঠক চূর্ণ-বিচূর্ণকারী)-এর উপাধি নিয়েই দুনিয়া থেকে বিদায় নেন যেমনটি আরও লাখো ‘বাহুহাছ’ ও ‘মাহফিল শিক্ন’ দুনিয়ার এ রঙ্গমঞ্চে এসেছে, আবার চিরাচরিত নিয়মে বিদায় নিয়ে চলেও গেছে, অথবা মাশায়িখে কিরামের নেতৃত্বের যে সিংহাসন শূন্য পড়ে আছে তার ওপর আসীন হবার যোগ্যতা অর্জন করেন।

হিম্মত ও দৃঢ় মনোবলের দিক দিয়ে ঘাটতি হলে তিনি বলতে পারতেন— ‘ভালো! আমার কি অপরাধ? আমি কি অন্যায়াটাই বা এমন করেছি? একটা ভাল কপির সন্ধান জানতাম সেটাই প্রকাশ করেছি, আর এর জন্য এত রোষ ও উত্তা প্রকাশের অর্থ কি?’ এই ছোট্ট ঘটনাটিই যদি সামনে যেত, তবে

এটাই লম্বা ফিরিস্তিতে রূপ নিতে পারত- এত লম্বা যে, শয়তানের ভূড়িও তার তুলনায় ছোট বলে প্রমাণিত হত। কিন্তু এটা তো জানা কথা যে, তিনি নিজের আত্মার চিকিৎসার্থে এসেছিলেন, শায়খুল কবীরের কমযোরী ও দুর্বলতার চিকিৎসা করানোই আজ্জুদহন আসবার তাঁর একমাত্র উদ্দেশ্য ছিল না। তিনি পরিষ্কারভাবে সিদ্ধান্ত নিয়ে ফেলেছিলেন যে, এটা চিকিৎসকের প্রতিবেদক মাত্র। এরপর সমালোচনার সুযোগ ও অধিকারই বা তাঁর ছিল কোথায়!²

বন্ধুর ভর্ৎসনা

হযরত খাজা নিজামুদ্দীন আওলিয়া (র) বলেন, “আমি শায়খুল কবীর (র)-এর খিদমতে আজ্জুদহনে অবস্থান করছিলাম। জনৈক ‘আলিম যিনি আমার দোস্ত ও সহপাঠী ছিলেন-তখন আজ্জুদহন আসেন। তিনি আমাকে ছেড়া-ফাঁটা পুরনো কুর্তা গায়ে দেখে অত্যন্ত উদ্বেগ ও আফসোসের সাথে বললেন, ‘মাওলানা নিজামুদ্দীন! তুমি নিজের এ কি অবস্থা করেছ? তুমি যদি কোন শহরে গিয়ে পঠন-পাঠনে লিপ্ত থাকতে তাহলে তুমি এ যুগের মুজতাহিদ হতে পারতে এবং বিরাট শান-শওকতের সাথে জীবন-যাপন করতে পারতে। আমি আমার দোস্তের এ সব কথাই শুনলাম এবং নানাবিধ ওয়রখাহী করে বিদায় দিলাম। এরপর যখন আমি শায়খুল কবীর (র)-এর খিদমতে হাযির হলাম তখন তিনি স্বতঃপ্রবৃত্ত হয়েই বলতে শুরু করলেন, ‘নিজাম! যদি তোমার কোন দোস্ত তোমার সাথে সাক্ষাত করতে আসে আর তোমাকে তোমার অবস্থা সম্পর্কে জিজ্ঞেস করে এবং বলে, কেন তুমি পঠন-পাঠনের সে পেশা ছেড়ে দিলে যা তোমার অবস্থার পরিবর্তন ও সৌভাগ্য লাভের কারণ ঘটত; তাহলে তুমি তার কি উত্তর দেবে?’ আমি আরয় করলাম, ‘শায়খ আমাকে যা বলার নির্দেশ দেবেন আমি তাই বলব।’ এতে তিনি বললেন, যদি কখনও আর কেউ তোমাকে অনুরূপ প্রশ্ন করে তবে তুমি এই কবিতাটি তাকে শুনিয়ে দেবে :

نه بمرهی تو مرا راه خویش گیر وبرد

ترا سلامتی باد امر انگو نساری

আমার এমন কোন সাথী নেই যে আমাকে আমার রাস্তায় পরিচালিত করবে; তুমি নিরাপদে থাক আর আমি আমার দীনতা নিয়েই ভৃগু থাকি।

১. ভারতবর্ষে মুসলমানদের শিক্ষা ও প্রশিক্ষণ ব্যবস্থা, পৃ. ৯৪-৯৫ (হিন্দুস্তান মেন্ মুসলমানোঁ কা নিজামে ডালীম ও তরবিয়ত)।

“এরপর হুকুম হল যে, খানকাহ্নর বাবুর্চিখানা থেকে নানাবিধ খানাভর্তি একটি পাত্র মাথায় করে উক্ত বন্ধুর নিকট নিয়ে যাও। আমি হুকুম তামিল করলাম। আমার দোস্ত যখন এ দৃশ্য দেখলেন তখন কাঁদতে কাঁদতে দৌড়ে এসে পাত্রটি মাথা থেকে নামিয়ে নিলেন এবং বললেন, ‘এ তুমি কি করেছ?’ আমি সমস্ত ঘটনা খুলে বললাম। সে সমস্ত শুনে তিনি বললেন, ‘তোমাদের শায়খ এমন যে, তিনি তোমাকে আত্মশুদ্ধি ও বিনয়ের এত উচ্চ স্থানে পৌঁছে দিয়েছেন। তুমি আমাকেও তাঁর খিদমতে নিয়ে চল।’ বন্ধুটির খাবার খাওয়া সমাপ্ত হলে স্বীয় চাকরকে লক্ষ্য করে বলল, ‘এই পাত্রটি উঠিয়ে আমাদের সাথে চল।’ আমি বললাম, না, তা হয় না। এ পাত্র যেভাবে আমি মাথায় উঠিয়ে এনেছি, ঠিক তেমনিভাবে আমি মাথায় উঠিয়ে ফিরে যাব।’ মোটকথা, আমরা উভয়েই শায়খুল কবীর (র)-এর পবিত্র খিদমতে উপস্থিত হলাম। অতঃপর আমার দোস্ত হযরত শায়খ (র)-এর হাতে হাত দিয়ে বায়‘আত নেন এবং ভক্তদের অন্তর্ভুক্ত হয়ে যান।”

উপস্থিতি কতবার?

হযরত খাজা নিজামুদ্দীন (র) হযরত শায়খুল কবীর (র)-এর জীবদ্দশায় তিনবার আজুদহন গিয়ে হাযির হন। প্রথমবারে, না কোন্ বারে খিলাফত লাভের সৌভাগ্য ঘটে, কোন জীবনী গ্রন্থেই তার স্পষ্ট উল্লেখ নেই।

শায়খুল কবীর (র)-এর অনুগ্রহ

কোন এক ২৫শে জমাদিউল আওয়াল সালাতুল জুম‘আ বাদ ডাক এল। শায়খুল কবীর (র) নিজের মুখের থুথু হযরত খাজা শায়খ নিজামুদ্দীন (র)-এর মুখে দিলেন এবং কুরআন মজীদ হিফয করার ওসীয়াত করলেন। তিনি বললেন, “আল্লাহ্ পাক তোমাকে দীন ও দুনিয়া উভয়ই দান করলেন।”

বিদায় ও ওসীয়াত

অতঃপর তিনি তাঁকে দিল্লীর দিকে রওয়ানা করে দেন। বিদায়কালে বললেনঃ “দিল্লী গিয়ে মুজাহাদায় মশগুল থাকবে। বেকার থাকা বাঞ্ছনীয় নয়। নফল রোযা আল্লাহ্নর পথে অর্ধেক এগিয়ে দেয়। আর সালাত ও হজ্জ (নফল) বাকী অর্ধেক।”

সিয়ারুল আওলিয়া গ্রন্থে উল্লিখিত আছে যে, তিনি তাঁকে খিলাফতনামা লিখিত দেন এবং হিদায়াত করেন যেন তা মাওলানা জামালুদ্দীনকে হাঁসিতে এবং

কাযী মুনতাজিবকে দিল্লীতে দেখানো হয়। তিনি আরও ইরশাদ করেনঃ “তুমি একটি ছায়াযুক্ত বৃক্ষের ন্যায়। তোমার ছায়ায় আল্লাহর মাখলুক আরাম পাবে, আশ্রয় পাবে। যোগ্যতা ও উপযুক্ততা বাড়তে হলে এবং উন্নতি করতে হলে মুজাহাদা করতে থাকবে।”

হযরত খাজা নিজাম (র) বলেন, “ফিরতি পথে হাঁসিতে আমি শায়খ জামালুদ্দীনকে খিলাফতনামা দেখালাম। তিনি তাতে অত্যন্ত সন্তুষ্টি প্রকাশ করলেন।”

একটি দু‘আর আবেদন

একদা ১লা শা‘বান হযরত খাজা নিজাম (র)-এর তরফ থেকে শায়খুল কবীর (র)-এর খিদমতে এই মর্মে দু‘আ‘র আবেদন পেশ করা হয় যেন সৃষ্টির পেছনে তাকে ঘুরতে না হয়। তাঁর আবেদনটি কবুল করা হয় এবং তিনি তাঁর জন্য দু‘আ‘ করেন।^১

একবার তিনি বললেন, “আমি আল্লাহর নিকট তোমাদের জন্য অল্প কিছু দুনিয়াও চেয়ে নিয়েছি।” হযরত খাজা (র) বলেন, “আমি একথা শুনেই চিন্তিত হয়ে পড়লাম যে, যেখানে বড় বড় ও মহান ব্যক্তির অবাধি দুনিয়ার কারণে ফিতনা ও দুর্বিপাকে নিক্ষিপ্ত হয়েছেন, সেখানে আমার মত লোকের কি অবস্থা হবে।” শায়খ তৎক্ষণাৎ বললেন, “তুমি ফিতনায় পড়বে না। ধ্যান ও বিনয় গচ্ছিত ও জমা রাখবে।” এরপর আমি দুর্ভাবনামুক্ত হলাম।^২

আজুদহন থেকে দিল্লী

হযরত খাজা নিজামুদ্দীন আওলিয়া (র) স্বীয় মুরশিদ ও মুরব্বী থেকে বিদায় নিয়ে ভারতবর্ষকে আধ্যাত্মিক তথা রূহানীভাবে বিজয়, আল্লাহর সৃষ্টি মানুষকে সত্য পথ প্রদর্শন ও আল্লাহর বিধান মাফিক প্রশিক্ষণ দান এবং ইসলামের প্রচার-প্রসার, তবলীগ ও হিদায়াতের মহান ও পবিত্রতম অভিযানে বের হলেন। একজন নিঃস্ব ও সহায়-সম্বলহীন ফকীর ভারতবর্ষেরই নয়, বরং হিজরী সপ্তম শতাব্দীর গোটা মুসলিম জাহানের সর্বাপেক্ষা সুদৃঢ় ও স্ংহত ইসলামী সাম্রাজ্যের রাজধানীর দিকে চলেছেন। শুধু ইখলাস, আল্লাহর প্রতি নির্ভরশীলতা এবং আল্লাহর সৃষ্টি তামাম মাখলুকাত থেকে বিমুখতা ব্যতীত আর কোন পাথেয় কিংবা হাতিয়ার তাঁর ছিল না। মাওলানা সাযি়দ মানাযির আহসান গিলানী কী সুন্দরই না লিখেছেন!

১. সিয়রুল আওলিয়া, পৃ. ১১৬।

২. সিয়রুল আওলিয়া, পৃ. ১২৩।

(তিনি) ভারত বিজয় অভিযানে আজুদহন থেকে ভারতবর্ষের রাজধানী দিল্লীর দিকে রওয়ানা হচ্ছেন যেখানে নীচু পর্যায় থেকে উঁচু পর্যায় পর্যন্ত বেস্তমার মিথ্যা 'ইলাহ' আসর জাঁকিয়ে বসে আছে। এর মধ্যে তাঁরাও আছেন যাঁদের সামান্য অগ্নুলী হেলনে মানুষের ধড় থেকে মাথা বিচ্ছিন্ন হয়ে যায়। এদের মধ্যে তাঁরাও আছেন যাঁদের সামান্যতম করুণা ও অনুগ্রহ মানুষকে মাটির আসন থেকে উঠিয়ে নেতৃত্ব ও সম্পদের আসমানে পৌঁছিয়ে দিতে পারে। অলিতে গলিতে 'ইয্যত-আব্র' বিক্রি হচ্ছে, রাষ্ট্রীয় গুরুত্বপূর্ণ পদগুলি ভাগ-বণ্টিত হচ্ছে; চারদিকে টাকা-পয়সা ছড়ানো হচ্ছে। আর যে সমস্ত মাধ্যমে এসব অর্জিত হচ্ছে, সুলতানুল মাশায়িখ সে সবগুলিরই অধিকারী। তিনি পড়া-শোনা করেছেন। আজুদহন যাবার আগে দিল্লীর জ্ঞানী ও গুণীজনের সভায় 'সভামঞ্চের নায়ক' হিসেবে সাধারণ ও ব্যাপক প্রসিদ্ধি লাভ করেছেন। আর কিছু না হোক, অন্তত বিচার বিভাগের কোন একটি পদ থেকে গুরু করে শায়খুল ইসলাম ও রাষ্ট্রীয় সর্বোচ্চ আসনের খিদমত পর্যন্ত সকল রাস্তাই তাঁর সামনে উন্মুক্ত ছিল। কিন্তু স্রষ্টার আকৃতিতে যে 'ইলাহুর' সন্ধান তিনি পেয়েছিলেন তাতে তাঁর বুক এমন পরিপূর্ণ ছিল যে, সেখানে কোন মাখলূকের পক্ষেই স্থান সংকুলানের অবকাশ ছিল না।

ন্যায্য অধিকার প্রত্যর্পণ

শায়খুল কবীর (র) মুরীদী ও খিলাফত প্রদানের সাথে সাথে কয়েকবারই তাকিদ দেন যে, বিরুদ্ধবাদীদের খুশি ও সন্তুষ্ট করার সম্ভাব্য সকল প্রচেষ্টা যেন গ্রহণ করা হয় এবং হকদারদের যেভাবেই হোক সন্তুষ্ট ও রাখী করাতে চেষ্টার কোন ক্রটিই যেন না করা হয়। খাজা (র) বলেন, "আমি যখন দিল্লী চললাম তখন আমার স্মরণ হ'ল যে, জনৈক ব্যক্তির নিকট আমি বিশ 'জিতল' (অথবা চিতল)^১ দেনা আছি এবং কোন এক ব্যক্তির নিকট থেকে একটি কিতাব ধার নিয়ে এসেছিলাম। সেটা পরে হারিয়ে যায়। বদায়ুনে থাকাকালীন আমি দৃঢ় ইচ্ছা পোষণ করেছিলাম যে, যখনই দিল্লী পৌঁছব তখন ঐ সমস্ত পাওনাদারকে সন্তুষ্ট ও রাখী করতে চেষ্টা করব। এরপর আমি আজুদহন থেকে দিল্লী ফিরে এলাম। আমি যে ব্যক্তির নিকট বিশ জিতল ঋণী ছিলাম সে ছিল একজন কাপড় বিক্রেতা। আমি তার থেকে কাপড় খরিদ করেছিলাম। আমার কাছে কোন সময়েই বিশ জিতল সংগৃহীত হয়নি যে আমি ঋণ পরিশোধ করতে পারি।

১. জিতল অথবা চিতল—তামার মুদ্রা যা সে যুগে প্রচলিত ছিল।

জীবিকার ক্ষেত্রে আমি ছিলাম অত্যন্ত অনটনের ভেতর। কখনও পাঁচ জিতল হাতে আসে, কখনও-বা দশ জিতল। একবার দশ জিতল হাতে আসতেই আমি উক্ত কাপড় বিক্রেতার দরজায় গিয়ে হাথির। আওয়ায দিতে সে বাইরে বেরিয়ে এল। আমি তখন বললাম যে, তোমার বিশ জিতল আমার যিখায় আছে। একবারে দেবার সামর্থ্য আমার নেই। দশ জিতল সাথে এনেছি, এটা নিয়ে নাও; বাকী দশ জিতল ইনশাআল্লাহ এর পরে পৌঁছিয়ে দেব। লোকটি বলল, মনে হচ্ছে তুমি মুসলমানদের নিকট থেকে এসেছ। লোকটি উক্ত দশ জিতল নিয়ে নিল আর বলল, আমি বাকী দশ জিতল মাফ করে দিলাম।

“এরপর সেই লোকটির নিকট গেলাম, যার নিকট থেকে কিতাব ধার নিয়ে ছিলাম। লোকটি আমাকে চিনতে পারেনি। আমি বললাম, একবার আমি একটি কিতাব আপনার নিকট থেকে ধার নিয়েছিলাম যেটা পরে হারিয়ে গেছে। এখন আমি উক্ত কিতাবের একটা কপি করে আপনাকে দিয়ে দেব। আমি কিতাবটি যেভাবে লেখা ছিল ঠিক সেভাবেই লিখে আপনাকে পৌঁছিয়ে দেব। লোকটি বলল : তুমি যেখান থেকে এসেছ সেখানকার পরিণাম এরূপই হয়ে থাকে। এরপর সে বলল, আমি উক্ত কিতাবটি তোমাকে দিয়ে দিলাম।”

দিল্লীর অবস্থানস্থল

খাজা সাহেব (র) যখন দিল্লীবাসীদের তথা ভারতবাসীদের খিদমতের জন্য দিল্লী পৌঁছলেন তখন, যদিও দিল্লীর প্রত্যন্ত অঞ্চলসমূহও শাহী মহল ও প্রাসাদোপম উট্টালিকা দ্বারা আবদ্ধ ছিল এবং যত্রতত্র নিত্য-নতুন ইমারত নির্মিত হচ্ছিল, তবু খাজা সাহেব (র)-এর কোন অবস্থানের ঠিক ছিল না। অবস্থানস্থল হিসেবে গিয়াছপুরে যতদিন ছিলেন, ততদিন তিনি এত ঘন ঘন আবাস পাল-টিয়েছেন যে, মনে হচ্ছিল যেন গোটা শহরে এই ফকীরের নিজের দরবেশী সাজ-সামান রাখবার এবং চাটাই বিছাবার মত একফোঁটা জায়গাও নেই। সিয়াকুল আওলিয়া প্রণেতা মীর খোরুদ স্বীয় ওয়ালিদ সায়্যিদ মুবারক মুহাম্মাদ কিরমানীর ভাষায়, যিনি খাজা (র)-এর দোস্ত এবং বন্ধু ছিলেন-বাসগৃহ পরিবর্তনের বিস্তারিত বিবরণ দিয়েছেন তা পাঠকদের উপদেশ গ্রহণের জন্য এখানে উদ্ধৃত করা হলো। সায়্যিদ. মুবারক মুহাম্মাদ-কিরবানী বলেন :

যতদিন সুলতানুল মাশায়িখ [খাজা নিজামুদ্দীন আওলিয়া (র)] দিল্লী শহরে ছিলেন ততদিন তাঁর এমন কোন বাসা-বাড়ি ছিল না যা তাঁর মালিকানাধীন।

তিনি সারা জীবন নিজস্ব ইখতিয়ারে নিজের জন্য কোন স্থানও নির্বাচন করেন নি। যখন তিনি বদায়ুন থেকে আসেন তখন মিংগ্রা বাজার সরাইয়ে যাকে নেমকের সরাইও বলা হত-অবতরণ করেন। ওয়ালিদা সাহেবা ও বোনকে সেখানেই রাখেন এবং স্বয়ং নিজে একটি কামানগীরের দরবারে-যা উল্লিখিত সরাইয়ের সামনে ছিল-স্থায়ী বসতি স্থাপন করেন। আমীর খসরু (র)-এর বাসাও ছিল উক্ত মহল্লাতেই। কিছুদিন পর বীর আরযের বাসা খালি হয়। তাঁর পুত্র নিজের এলাকায় চলে গিয়েছিল। আমীর খসরুর মাধ্যমে, যিনি বীর আরয-এর দৌহিত্র ছিলেন, সুলতানুল মাশায়িখের আবাসের জন্য বাড়িটি পাওয়া গেল। এই বাড়িতে তিনি দু'বছর বাস করেন। বাড়িটি শহরের নিকটবর্তী হিন্দুস্তান দরজা এবং মন্কপুলের কাছেই ছিল। বাড়ির মহল ও রোয়াক ছিল উঁচু ও অত্যন্ত শানদার। ইতিমধ্যেই বীর আরয-এর ছেলে এসে যায়। তাই সুলতানুল মাশায়িখকে উক্ত বাড়ি থেকে স্থানান্তরে গমন করতে হয়। নিজস্ব কিতাবাদি- যা ব্যক্তিরেকে আর কোন সামান তাঁর ছিল না-সমকক্ষীয় লোকদের মাধ্যমে ছাপড়াওয়ালী মসজিদে (যা সিরাজ বাক্কালের সামনে অবস্থিত ছিল) নিয়ে আসেন। দ্বিতীয় দিনে শায়খ সদরুদ্দীনের অন্যতম মুরীদ সা'দ কাগজী এ কাহিনী শোনে এবং সুলতানুল মাশায়িখ-এর নিকটে এসে অত্যন্ত সম্মান ও মর্যাদা এবং অনুরোধ-উপরোধ সহকারে তাঁকে নিজের বাড়িতে নিয়ে যান। বালাখানার ওপর একটি উত্তম ও সুন্দর কক্ষ নির্মিত হয়েছিল। সেখানেই তাঁর থাকার জায়গা করে দেওয়া হয়। সুলতানুল মাশায়িখ এখানে এক মাস অবস্থান করেন। এরপর এখান থেকেও বিদায় নেন এবং কায়সার পুলের সল্লিকটবর্তী মিষ্টি বিক্রেতা ও বাবুর্চির সরাইয়ে-সরাইয়ের মাঝখানে একটি বাড়িও ছিল-সেখানেই অবস্থান গ্রহণ করেন। কিছুকাল পর সেখান থেকেও স্থানান্তরিত হয়ে মুহাম্মাদ নামক ফল বিক্রেতার বাড়ির মাঝখানে অবস্থিত শাদী গোলাবীর ঘরে অবস্থান নেন। এখানে অবস্থানকালীন শামসুদ্দীন শরাবদারের পুত্র ও আত্মীয়-স্বজন-যারা তাঁর ভক্ত ও অনুরক্ত ছিলেন-হযরত খাজা নিজামুদ্দীন (র)-কে অত্যন্ত সম্মান ও শ্রদ্ধার সাথে শামসুদ্দীন শরাবদারের বাড়িতে নিয়ে আসেন। কয়েক বছর যাবত সুলতানুল মাশায়িখ এ বাড়িতেই থাকেন। এ বাড়িতে থাকাকালীন তাঁর গোটা সময়টাই অত্যন্ত আরাম ও শান্তির মধ্যে কাটে।”^২

১. বাদশাহর পানি পান করানোর পদ।

২. সিয়রুল আওলিয়া, পৃ. ১০৮।

দারিদ্র্য ও অনাহার

হযরত খাজা নিজামুদ্দীন আওলিয়া (র)-এর দিল্লীতে আসার পর থেকেই বিবিধ পরীক্ষা ও প্রশিক্ষণের পালা শুরু হয় যা ডিজিয়ে এ পথের পথিকদের গোটা সৃষ্টি জগতের প্রত্যাবর্তনস্থল ও রূহানী ফয়েয লাভের উৎসমূলে পরিণত হতে হয়। আর তা আসে অত্যন্ত স্বাভাবিক নিয়মেই। এটা ছিল সেই সময় যখন সারা ভারতবর্ষের ধন-দৌলত, সোনা-রূপা ও বিবিধ জওয়াহেরাত প্লাবনের বেগে এসে দিল্লীতে জমা হচ্ছিল। প্রাচুর্যের অবস্থা এমনই ছিল যে, এক জিতলে দুই সের মজাদার রুটি পাওয়া যেত, আর দুই জিতলে মিলত এক মণ খরবুয়া। কিন্তু এতদসত্ত্বেও খাজা সাহেবের দারিদ্র্য ও অনটনের অবস্থা ছিল এমন যে, তিনি বলেন, “অনেক সময় আমার কাছে একটি কপর্দকও থাকত না যা দিয়ে রুটি কিনে আমি নিজে খাই এবং মা-বোন ও দায়িত্বাধীন ঘরের লোকদের খাওয়াই। খরবুয়ার প্রাচুর্য ও প্রচুর আমদানী সত্ত্বেও গোটা মৌসুম চলে যেত, কিন্তু আমাদের পক্ষে খরবুয়ার স্বাদ গ্রহণ সম্ভব হত না। তথাপি আমি আমার অবস্থার প্রতি তুষ্ট ছিলাম আর কামনা করতাম— মৌসুমের বাকী সময়টাও যেন অতিক্রান্ত হয়ে যায় এবং আমরা আগের অবস্থায়ই থাকি।”^১

অন্যের মাধ্যম ব্যতিরেকে

একবার তিনি শহরের প্রান্তসীমায় মন্ড দরজার সন্নিকটে অবস্থিত একটি বুরুজে অবস্থান করছিলেন। কয়েক দিন কেটে যাওয়ার পরও খাবার মত কোন কিছুই সংস্থান সম্ভব হয়নি। জনৈক ছাত্র কোনভাবে জানতে পায়, কয়েক দিন যাবত হযরত (র) অনাহারে ও চরম অনটনের মাঝে দিন কাটাচ্ছেন। তখন সে এ সম্পর্কে প্রতিবেশী কোন জোলাকে অবহিত করে। লোকটি খানা পাকিয়ে আনে। খানা খাওয়ার প্রাক্কালে হাত ধোয়ার সময় খানা আনয়নকারীদের ভিতর কেউ বলে বসে, ‘আল্লাহ পাক ছাত্রটির মঙ্গল করুন যে সময়মত আমাদের এ খবর পৌঁছিয়েছে।’ খাজা (র) একথা শোনা মাত্রই হাত গুটিয়ে নেন এবং জিজ্ঞাসা করেন, ‘কি খবর দিয়েছিল?’ লোকটি বলে, ‘অমুক ছাত্র আপনি যে কয়েক দিন যাবত অনাহারে আছেন তা আমাদের জানিয়েছিল। এরপর আমরা খাবার রান্না করে নিয়ে আসি।’ এতে তিনি বলেন, ‘আমাকে মাফ কর।’ এরপর লোকেরা বহু অনুরোধ-উপরোধ করা সত্ত্বেও তিনি সে খাবার আর গ্রহণ করেন নি।^২

১. সিয়রুল আওলিয়া, পৃ. ১১৩।

২. জাওয়ামিউল কিনাম খাজা সায়িদ মুহাম্মাদ গেসু দরাজ (র)-এর মলফুযাত।

শায়খুল কবীর (র)-এর ওফাত

শেষবার তিনি শায়খুল কবীর (র)-এর খিদমতে ওফাতের তিন-চার মাস পূর্বে গিয়েছিলেন। তিনি বলেন যে, ৫ই মুহাররাম^১ শায়খুল কবীর (র) ওফাত পান এবং শাওয়াল মাসেই হযরত খাজা গঞ্জ শকর (র) আমাকে দিল্লী পাঠিয়ে দেন। অসুখ-বিসুখ আগেই শুরু হয়েছিল। রমযান মাস। রোগ-যন্ত্রণার কারণে তিনি সিয়াম পালনে ছিলেন অপারগ ও অক্ষম। একদিন আমি খরবুয়া কেটে শায়খ (র)-এর সামনে রাখলাম। শায়খ নিজে গ্রহণ করলেন এবং কাটা এক টুকরা আমাকেও দিলেন। সে মুহূর্তে আমার মনে হয়েছিল যে, জানি না এরূপ সম্পদ আবার কখন মিলবে যা আজ তিনি নিজের পবিত্র হাতে আমাকে দিলেন। ইচ্ছে হয়েছিল এটা আমি খেয়ে নিই এবং ধারাবাহিকভাবে দু'মাস সিয়াম পালন করে তার কাফফারা আদায় করি। তিনি বললেন, 'কথখনো নয়, এ হতে পারে না। আমার জন্য এমতাবস্থায় শরীয়তের অনুমতি থাকলেও তোমার জন্য তা কখনোই জায়েয হবে না।'^২

তিনি বলেন : ইত্তিকালের সময় তিনি [শায়খ ফরীদ (র)] আমাকে স্মরণ করেন এবং বলেন : নিজামুদ্দীন তো এখন দিল্লীতে। তিনি এও বলেন, আমিও আমার শায়খ কুতবুদ্দীন বখতিয়ার কাকী (র)-এর অন্তিম মুহূর্তে হাযির ছিলাম না; আমি ছিলাম তখন হাঁসিতে। 'ফাওয়ায়েদুল ফুওয়াদ' গ্রন্থে বর্ণিত আছে, এ কথার বর্ণনা দিতে গিয়ে তিনি এমন কান্না কেঁদেছিলেন যে, উপস্থিত সবার অন্তর এতে দ্রবীভূত না হয়ে পারেনি।^৩

ওফাতের পর তিনি আজুদহন উপস্থিত হন। মাওলানা বদরুদ্দীন ইসহাক শায়খুল কবীর (র)-এর ওসীয়ত মুতাবিক জাম্মা, মুসাল্লা (জায়নামায) ও লাঠি সোপর্দ করেন যা হযরত খাজা নিজামুদ্দীন আওলিয়া (র)-কে দেবার জন্য শায়খুল কবীর (র) মাওলানার হাতে সোপর্দ করেছিলেন।^৪

গিয়াহপুরে অবস্থান

'ফাওয়ায়েদুল ফুওয়াদ' নামক গ্রন্থে বলা হয়েছে যে, একদিন তিনি শহরের শোরগোল সম্পর্কে বলতে গিয়ে বলেন, প্রথম থেকেই শহরে কোনদিনই আমার

১. হিজরী ৬৬৪।

২. ফাওয়ায়েদুল ফুওয়াদ।

৩. ঐ, পৃ. ৫৩।

৪. সিয়াকুল আওলিয়া, পৃ. ১২২।

মন বসেনি। একদিন কেত্লাম্বাথেনের হাওয়ের ওপর ছিলাম। সে সময় আমি পবিত্র কুরআন মজীদ মুখস্থ করছিলাম। সেখানেই একজন দরবেশ আল্লাহুর ধ্যানে ছিলেন। আমি তাঁর কাছে গেলাম এবং জিজ্ঞাসা করলাম, “আপনি কি এই শহরেই থাকেন?” তিনি উত্তর দিলেন, হ্যাঁ। আমি বললাম, “আপনি নিজের মর্জি মাক্ফিক এই শহরে থাকেন?” তিনি বললেন, “কথা তো তা নয়।” এরপর উক্ত দরবেশ একটি ঘটনার বর্ণনা দেন : “একবার আমি অত্যন্ত সজ্জন এক দরবেশের সাক্ষাত পেলাম। কামাল দরজার বাইরে সেই বেটনীর মাঝে যেখানে একটি উঁচু জমি আছে এবং যার উপর শহীদগণের চার পার্শ্বের পাঁচিল নির্মিত, সেখানেই উক্ত দরবেশ উপবিষ্ট ছিলেন। উক্ত দরবেশ আমাকে বললেন, ‘যদি ঈমান-আমানের মঙ্গল চাও তো এ শহর ছেড়ে চলে যাও।’ আমি সেই মুহূর্ত থেকেই শহর ছেড়ে চলে যাবার দৃঢ় ইচ্ছা পোষণ করে আসছি। কিন্তু ঘটনা এমনভাবে মোড় নিচ্ছে যে, পঁচিশ বছর হয়ে যাচ্ছে তবু আমি যাবার সুযোগ পাচ্ছি না।” হযরত খাজা এ কাহিনী বর্ণনার পর বলেন যে, আমি যখন উক্ত দরবেশের এ কথা শুনলাম তখন মনে মনে সিদ্ধান্ত নিলাম যে, আমি এ শহরে থাকব না। কয়েকটি জায়গা সম্পর্কে আমার ধারণায় আসত বটে যে আমি সেখানে চলে যাই, কখনও-বা মনে ভাবতাম যে, পিটয়ালী^১ শহরে চলে যাই। সে সময় সেখানে একজন তুর্ক ছিল। কখনও মনে করতাম যে, বিশালা চলে যাব। সেটা একটি পরিষ্কার-পরিচ্ছন্ন জায়গা। এরপর আমি সেখানেই চলে যাই এবং তিনদিন সেখানে থাকি। কিন্তু সেখানে ভাড়ায় কিংবা নগদ মূল্যে কোন বাড়িই পাওয়া যায়নি। উক্ত তিন দিনের প্রতি দিনই কারো না কারো মেহমান হিসেবেই কাটাই। একদিন সেখানকার একটি বাগানে-যাকে ‘বাগে হায়রাত’ বলা হয়, গিয়ে মুনাযাত করতে মনে সাধ জাগে। আমি আরম্ভ করলাম, খোদাওয়ান্দ। আমি এই শহর ছেড়ে চলে যেতে চাচ্ছি। তবে কোন জায়গাই নিজস্ব মর্জি মুতাবিক এখতিয়ার করব না। সেখানেই তোমার মর্জি, সেখানেই আমি চলে যেতে চাই। আকস্মিকভাবে এক গায়েরী আওয়ায শোনা গেল- যার ভেতর গিয়াছপুরের নাম ভেসে আসল। আমি গিয়াছপুর কখনও দেখিনি। আর এটাও জানতাম না যে, গিয়াছপুর কোথায়! আমি আওয়ায শোনার পর আমার একজন দোস্তের নিকট যাই। উক্ত দোস্ত ছিলেন নিশাপুরের অধিবাসী একজন নকীব। আমি তাঁর বাড়ি যাই এবং সেখানে জিজ্ঞাসা করে জানতে পারি যে, তিনি গিয়াছপুর গেছেন। আমি মনে মনেই ভাবি যে, তাহলে সেটাই গিয়াছপুর। মোটকথা, আমি

১. আশ জেলার একটি ছোট শহর।

গিয়াছপুর আসলাম। সে জায়গায় তখন আজকের মত আবাদী ও লোকবসতি গড়ে ওঠেনি। জায়গাটা ছিল অখ্যাত ও অজ্ঞাত। লোকজনও ছিল কম। আমি আসলাম ও বসবাস করতে শুরু করলাম। যখন সুলতান কায়কোবাদ^১ কিলোখ-ড়িকে^২ নিজস্ব আবাস হিসেবে মনোনীত করেন তখন থেকেই লোক সমাগম সেখানে বাড়তে থাকে। আমীর-উমারা, সাম্রাজ্যের বিশিষ্ট ও গণ্যমান্য ব্যক্তিদের এবং তৎসহ সাম্রাজ্যের গুরুত্বপূর্ণ পদাধিকারী ও সম্পর্কিত ব্যক্তিবর্গের আনাগোনা শুরু হয়ে যায়। আমি যখন লোকজনের এরূপ ভীড় লক্ষ্য করলাম, তখন মনে মনেই ভাবলাম— এখন দেখছি এখানে থেকেও চলে যেতে হবে। আমি যখন এরূপ ধারণায় মগ্ন ছিলাম, ঠিক সে মুহূর্তে একজন বুয়র্গ ও শ্রদ্ধেয় ব্যক্তি যিনি আমার উস্তাদও ছিলেন—শহরে ইত্তিকাল করেন। নিজের মনেই বললাম, আগামীকাল আমি যখন তাঁর ফাতেহাখানিতে যাব, তখনই কোন দিকে বেরিয়ে পড়ার কথা চিন্তা করা যাবে। আপন মনেই এমত সিদ্ধান্ত আমি গ্রহণ করি। সেদিনই সালাতুল আসর বাদ একজন যুবক আমার নিকট আসল। যুবকটি অত্যন্ত সুন্দর, কিন্তু দুর্বল ও হালকা-পাতলা ধরনের। আল্লাহ্‌ই জানেন—সে আধ্যাত্মিক পথের কোন পথিকই ছিল অথবা অন্য কেউ। সে আসামাত্রই আমাকে লক্ষ্য করে নিম্নোক্ত কবিতা আবৃত্তি করল :

أرروز که به شییدی نمی دانستی -

که انگشت نمائے جہاں خواہی شد

যেদিন আল্লাহ্ তোমাকে চাঁদ বানিয়েছিলেন সেদিনই তোমার বোঝা উচিত ছিল যে, তোমার দিকে সারা দুনিয়ার মানুষ অঙ্গুলী সংকেত করবে।

হযরত খাজা নিজাম (র) বলেন যে, যুবকটি আমাকে আরও কিছু বলেছিল যা আমি লিখে নিয়েছিলাম। এরপর সে বলল, প্রাথমিক অবস্থায় মানুষের পক্ষে মশহুর হয়ে যাওয়া ঠিক নয়। আর যখন কোন ব্যক্তি মশহুর হয়েই যায়, তখন এমন হওয়া উচিত যেন কিয়ামতের দিন রাসূল পাক (স)-এর সামনে তাকে লজ্জিত হতে না হয়।

১. সুলতান মু'ঈযুদ্দীন কায়কোবাদ (হিজরী ৬৮৬ থেকে ৬৮৮ পর্যন্ত) বাগরা খানের পুত্র এবং সুলতান গিয়াসুদ্দীন বুলবনের পৌত্র ছিলেন। রাজত্বকাল তিন বছর।

২. স্যার সায়্যিদ আহমাদ খান 'আছারুস্ সানাদীদ' নামক গ্রন্থে লিখেন যে, মু'ঈযুদ্দীন কায়কোবাদ ৬৮৩ হিজরীতে একটি কেল্লা নির্মাণ করেন এবং কিলোখড়ি তার নাম রাখেন। যদিও বর্তমানে উক্ত কেল্লার নাম-নিশানাও নেই, কিন্তু সম্রাট হুয়াম্বনের সমাধি সৌধের পাশেই কিলোখড়ি এবং দশ পাঁচটা সুপাড়িও সেখানে বিদ্যমান। চতুর্থ অধ্যায়, পৃষ্ঠা ৪।

এরপর সে বলল যে, এটা কি ধরনের হিম্মত ও মনোবল যে, আল্লাহর সৃষ্টি থেকে পালিয়ে গিয়ে নির্জনবাস গ্রহণ করা হবে? তার লক্ষ্য ও উদ্দেশ্য এটাই ছিল যে, শক্তি-সাহস ও মনোবলের অধিকারী হলে আল্লাহর সৃষ্টি মাখলূকের মধ্যেও আল্লাহর ধ্যানে ও স্মরণে মশগুল থাকা সম্ভব। সে কথা শেষ করতেই আমি কিছু খাবার তার সামনে এনে রাখলাম। কিন্তু সে হাত বাড়াল না। তখনই আমি অন্তরে নিয়ত করে ফেলি যে, আমি এখানেই থাকব। যখন আমি এরূপ নিয়ত করে ফেললাম তখন সে অল্প খাবার খেয়ে চলে গেল।^১

জনশ্রোত

গিয়াছপুরে অবস্থানকালীন সময়ে আল্লাহর বান্দারা হযরত খাজা নিজাম (র)-এর দিকে শ্রোতের বেগে আসতে শুরু করে এবং এখান থেকেই তাঁর আধ্যাত্মিক ও আদর্শিক বিজয়ের দরজা খুলে যায়।

তাবকিরা গ্রন্থসমূহ থেকে এটা জানা যায় না যে, কতদিন গিয়াছপুর অবস্থানের পর তাঁর পবিত্র ও বরকতময় সত্তা জনতার দৃষ্টি ও লক্ষ্যবস্তুতে পরিণত হয়েছিল এবং গিয়াছপুরের খানকাহর প্রসিদ্ধি ও খ্যাতি সাধারণ্যে ছড়িয়ে পড়েছিল। তবে এতটুকু জানা যায় যে, গিয়াছপুরে অবস্থান গ্রহণের পরেও তিনি দীর্ঘকাল সংকট ও অভাব-অনটনের ভিতর দিয়েই অতিবাহিত করেন। এমন কি বেশ কিছুকাল তিনি ভীষণ গরম ও লু-হাওয়া চলাকালীন সময়েও বেশ দূরে অবস্থিত জামে মসজিদে জুম'আর দিন পায়ে হেঁটে যেতেন। এরূপ সংকট ও অনটনের পর স্রষ্টার স্বাভাবিক নিয়মেই কিছুটা সুখ-শান্তি ও স্বস্তির যুগ ফিরে আসে^২ এবং জনশ্রোত এমনভাবে খানকাহরমুখী হতে শুরু করে যে, তার সামনে দিল্লীর সুলতানের দরবারী মর্যাদাও নিষ্পত্ত হয়ে পড়ে।

অনুগ্রহ বিতরণকারী ফকীর

সিয়ারুল আওলিয়া প্রণেতা বলেন, পুরাতন অভ্যাগত ও মেহমান, নবাগতের মধ্যে পরদেশী অথবা শহরবাসী যেই তাঁর কাছে আসত, সন্দর্শন ও কদমবুসির সৌভাগ্য লাভে সক্ষম হত; তিনি কাউকেই বঞ্চিত করতেন না। পোশাক-আশাক, নগদ অর্থ এবং হাদিয়া-তোহফা যাই আল্লাহর তরফ থেকে আসত, সবকিছুই আগত ও বিদারী লোকজনের জন্য ব্যয় করা হত এবং যেই আসুক না কেন, কখনই খালি হাতে ফিরে যেত না।^৩

১. সিয়ারুল আওলিয়া, পৃ. ১২৯।

২. দুঃখের পর সুখ অবধারিত, নিশ্চয়ই দুঃখের পর সুখ অবধারিতভাবেই আসে। (আল-কুরআন)।

৩. সিয়ারুল আওলিয়া।

হযরত খাজা নাসীরুদ্দীন চেরাগে দিল্লী (র) বলেন,

বিজয় অভিযানের অবস্থা ও নমুনা এমনই ছিল যে, ধন-দৌলতের সমুদ্র যেন দরজার সামনে চেউ খেলত। সকাল থেকে সন্ধ্যা পর্যন্তই নয়, বরং 'ইশা পর্যন্ত লোকজনের আসার বিরাম ছিল না। কিন্তু আনয়নকারীর চেয়ে গ্রহণকারীর সংখ্যা ছিল অনেক বেশি। লোকে যাই কিছু আনত, তার চেয়ে বেশি পরিমাণেই হযরত খাজা (র)-এর অনুগ্রহ পেত।^১

জাগ্রত হবার পর প্রথম প্রহ্ন

হযরত খাজা নিজামুদ্দীন আওলিয়া (র)-এর পবিত্র অভ্যাস ছিল, দুপুরের আহার গ্রহণের পর কিছুক্ষণ ঘুমিয়ে উঠেই সর্বপ্রথম দু'টি সওয়াল জিজ্ঞেস করতেন। প্রথমত, 'বেলা কি চলে গেছে?' এবং দ্বিতীয়ত, 'কেউ আসেনি তো?' এটা এজন্য জিজ্ঞেস করতেন যেন কাউকে তাঁর জন্য অপেক্ষা করতে না হয়।^২

দুনিয়ার প্রতি বিতৃষ্ণা এবং বিনিময় ও দান

দুনিয়া তাঁর দিকে যে পরিমাণে ঝুঁকছিল তার প্রকৃতি ও মানসিকতাও সে পরিমাণ দুনিয়ার প্রতি বিতৃষ্ণায় ভরে উঠেছিল। অধিকাংশ সময়ই তিনি কাঁদতেন। সাফল্য ও জয়যাত্রা যে পরিমাণে বৃদ্ধি পেত, ঠিক সম-পরিমাণে তিনি কাঁদতেন এবং অনুরূপভাবেই তিনি প্রয়াস চালাতেন যেন তাঁর খিদমতে আনীত দ্রব্য ও সম্পদসমূহ তাৎক্ষণিকভাবে বিলি-বণ্টিত হয়ে যায়। কিছুক্ষণ পরপরই লোক পাঠিয়ে হিদায়াত দিতেন, যা কিছুই আসুক না কেন, সঙ্গে সঙ্গেই যেন তা বিলি-বণ্টিন করে দেওয়া হয়। যখন সব কিছুই বণ্টিত হয়ে যেত এবং অভাবী ও দুঃস্থ লোকদের নিকট তাদের প্রাপ্য পৌঁছে যেত, তখন তিনি তৃপ্তি ও আরাম বোধ করতেন। প্রতি জুম'আর দিনে হুজরা ও ভাণ্ডার ঘর এমন করে খালি করে দিতেন যেন তিনি ঘর বাডু দিয়ে জঞ্জাল পরিষ্কার করে ফেলছেন। এরপর তিনি মসজিদে যেতেন। যদি বাদশাহ কিংবা শাহযাদাদের মধ্যে কেউ তখন আস্তানায় হাযির হত এবং তাদের নযর-নেয়ায ও আগমন খবর পৌঁছত, তাহলে নির্লিপ্ততার সুরে ঠাণ্ডা নিশ্বাস ফেলে তিনি বলতেন, কোথায় এসেছে? ফকীরের সময় নষ্ট করতে এসেছে!^৩

১. সিরাজুল মাজালিস (খায়রুল মাজালিসের অনুবাদ); হযরত খাজা নাসীরুদ্দীন চেরাগে দিল্লী (র)-এর মালফুযাত।

২. সিয়াকুল আওলিয়া, পৃ. ১২৬।

৩. সিয়াকুল আওলিয়া, পৃ. ১২০।

জমি-জায়গা ও অভিরিক্ত ধন-সম্পদ থেকে বিরত থাকা

আমীর হাসান আলা সিজযী বলেন যে, একবার আমি উপস্থিত ছিলাম। সে সময় একজন আমীর বাগান, অনেক জায়গা-জমি এবং অন্যান্য আসবাবপত্রের দলীল-দস্তাবেজ হযরত খাজা নিজামুদ্দীন (র)-এর খিদমতে পাঠিয়েছিল এবং এভাবে স্বীয় একনিষ্ঠ ভক্তি ও শ্রদ্ধা প্রকাশ করেছিল। হযরত খাজা (র) তা কবুল করলেন না বরং মুচকি হেসে বললেন, “যদি আমি এটাকে কবুল করি তবে এরপর লোকে বলাবলি শুরু করবে যে, শায়খ বাগান ভ্রমণে গেছেন এবং নিজ জায়গা-জমি ও ক্ষেত-খামার দেখতে গেছেন। এসব কাজের সাথে আমার কি সম্পর্ক? আমাদের কোন শায়খ ও বুযর্গ কেউই জায়গা-জমি কবুল করেন নি।”^১

ফকীরের শাহী দস্তুরখান

তিনি নিজে সারা বছর সিয়াম পালন করতেন। কিন্তু শাহী দস্তুরখান দু'বেলাই বিছানো হত এবং বিভিন্ন প্রকারের খাদ্যদ্রব্য প্রচুর পরিমাণে এতে রাখা হত। আমীর-গরীব, বাদশাহ-ফকীর, শহরের নাগরিক ও পরদেশী, নেককার এবং বদকার কারুরই এতে বাছ-বিচার ছিল না। সর্বশ্রেণীর ও সর্বস্তরের মানুষ এক জায়গায় বসে এবং একই সাথে খাবার খেত। নিয়ে যাবারও অনুমতি ছিল। কেউ কেউ খেত এবং বেঁধেও নিয়ে যেত। এই শাহী দস্তুরখান নিজস্ব বৈশিষ্ট্যে ছিল অনন্য। এই দস্তুরখানে বসে শত শত হাজার হাজার দরিদ্র মানুষের সেসব খাবার খাওয়ার সৌভাগ্য হত যারা সেগুলোর নামও শোনেনি। শাহী দরবারে বড় বড় আমীর-উমারা এবং সাম্রাজ্যের বিশেষ গণ্যমান্য ব্যক্তিবর্গেরও উক্ত দস্তুরখানে শরীক হবার ইচ্ছে হত এবং খাবারের স্বাদ ও গন্ধের কথা স্মরণ করত। লোকদের হিদায়াত তথা সৎপথ প্রদর্শন, সুলুক ও তরবিয়তের সাধারণ ফয়েয ছাড়াও (যার দরজা সব সময় খোলাই থাকত) হযরত খাজা নিজামুদ্দীন আওলিয়া (র)-এর এটাও একটি ফয়েয ছিল যা দিল্লীতে পূর্ণ প্রাচুর্যের সাথে অব্যাহত ছিল এবং তিনি লাখে আল্লাহর বান্দার লালন-পালনের মাধ্যম ছিলেন। মাওলানা মানাযির আহসান গিলানী দরবেশের শাহী দস্তুরখানের বর্ণনা দিতে গিয়ে কি সুন্দরই না বলেছেন।

আজ রাজপ্রাসাদের প্রাচুর্যের কাহিনীর সাথে নিঃস্ব ও গরীবদের জন্যও কুন্তীরাশ্র বর্ষণ করা হয়। অথচ ইসলামের ইতিহাসে গরীব ও আমীরের মাঝখানে যোগসূত্র রক্ষা করত-ইসলামের এই সব সূফীর খানকাহ। এ

সমস্ত বুযর্গের দরবার সেই দরবার ছিল যেখানে সুলতানও খাজনা পাঠাতেন। স্বয়ং সাম্রাজ্যের যুবরাজ খিযির খান পর্যন্ত উক্ত দরবারের ভক্ত ও অনুরক্তদের অন্তর্গত ছিলেন। সুলতান 'আলাউদ্দীন যিনি সারা ভারতবর্ষ থেকে রাজস্ব আদায় করতেন- তাঁকেও রাজস্বের একটি অংশ এই বুযর্গদেরকে প্রদান করতে হত।' এই খানকারই মাধ্যমে দেশের গরীব ও দরিদ্র শ্রেণীর কাছে তাদের ন্যায্য হিস্যা পৌঁছে যেত।

প্রকৃত ঘটনা এই যে, ইসলামী রাজত্বের কোন একটি যুগ এবং সে সময়ে ভারতবর্ষের কোন একটি প্রদেশ ও অঞ্চল খুঁজে পাওয়া যাবে না, যেখানে রাসুলুল্লাহ (সা)-এর নির্দেশ-

تو خذمن اغنياهم وترد على فقرائهم-

অর্থাৎ 'ধনাঢ্য ব্যক্তিদের নিকট থেকে গ্রহণ কর এবং দরিদ্র ও অভাবী লোকদের মধ্যে তা বণ্টন করে দাও' কার্যকরী করতে সত্যাশ্রমী ও সূফীদের এ সম্প্রদায় মশগুল ছিল না। বিশেষ করে যখন কোন বুযর্গের কোন বিশেষ বৈশিষ্ট্যের কারণে আমীর-উমারা ও ধনাঢ্য ব্যক্তিদের ওপর তাঁর প্রভাব-প্রতিপত্তি কায়ম হয়ে যেত, তখন গরীব ও দুঃস্থ জনগণের ভাগ্য অত্যন্ত সুপ্রসন্ন হয়ে যেত।^২ ইসলামের এই সমস্ত মনীষীর অবস্থা সম্পর্কে জানুন ও একবার চিন্তা করুন, দেখবেন, আমীর ও গরীবদের মাঝখানে ঐ সমস্ত মনীষী ও বুযর্গের অস্তিত্ব এবং পবিত্র সত্তা এক সেতুবন্ধন হিসেবে বিরাজ করছে। দেশের ও রাষ্ট্রের গরীব নিরাশ্রয় ও সহায়-সম্বলহীন মুসলমানদের এটা একটা আশ্রয় শিবির হিসেবেই পরিগণিত হয়ে আসছিল; বরং এ সমস্ত খানকাহর মাধ্যমেই গরীব ও নিঃস্বদের কাছেও ঐ সমস্ত নিয়ামত পৌঁছে যেত যেগুলোর নাম তারা সম্ভবত শোনেওনি।^৩

শায়খ (র)-এর খোরাক

শায়খ নিজেও খানায় শরীক হতেন, কিন্তু সেই শাহী-দস্তুরখান যার ওপর বিবিধ প্রকারের খাদ্যদ্রব্য ও নিয়ামত ছড়ানো থাকত, তাতে শরীক হতেন না। বরং তাঁর খোরাক ছিল সাধারণভাবে এক আধখানা রুটি, কিছু করেলা ইত্যাদি সবজি অথবা কিছু ভাত।^৪

১. নিজামে ভা'লীম, পৃ. ২১৪।

২. নিজামে ভা'লীম, পৃ. ২২০।

৩. নিজামে ভা'লীম, পৃ. ২২৮।

৪. সিয়ারুল আওলিয়া, পৃ. ১২৫।

নিয়ম-প্রণালী

দস্তরখানে বসবার কয়েকটি কানুন ও নিয়ম-প্রণালী এরূপ ছিল যে, সবার আগে মুরশিদ (র)-এর নিকটাত্মীয় হতেন; এরপর 'উলামায়ে কিরাম, নেতৃস্থানীয় ব্যক্তিবর্গ এবং শেষদিকে অভিজাত মহল আসন নিতেন।'

সমকালীন সুলতানের সাথে সম্পর্কহীনতা

চিশতিয়া সিলসিলার বুনয়াদ ভারতবর্ষের গোটা সাম্রাজ্যের ধর্মীয় নেতৃত্ব ও পথ প্রদর্শনই নয়, বরং ইসলামী সাম্রাজ্যের ভিত্তি প্রতিষ্ঠা, মুসলিম সমাজ জীবনের সংস্কার ও সংশোধন এবং তন্মধ্যে রূহানিয়াত (আধ্যাত্মিকতা) ও আল্লাহর সাথে নৈকট্যপূর্ণ সম্পর্কে প্রাণ সঞ্চারের সাথে সাথে সে যুগের সুলতানদের সাথে সম্পর্কহীনতার মূলনীতির ওপর প্রতিষ্ঠিত ছিল এবং এটা এ সিলসিলার একটি প্রতীক চিহ্ন ও চিশতিয়া তরীকার মাশায়িখে কিরামের পবিত্র উত্তরাধিকার ও আমানত হিসেবে পরিগণিত হত। চিশতিয়া সিলসিলার মাশায়িখে কিরাম সীসার ন্যায় ময়বুত, সুদৃঢ় ও দুর্ভেদ্য দুর্গ জয় করার ব্যাপারে নিজেদের যোগ্যতা ও প্রতিভার পূর্ণ পরিচয় দেন। একদিকে তাঁরা শাহী দরবারের ভুল ও ত্রুটিপূর্ণ প্রবণতা এবং যুগের বিভিন্ন ফিতনা-ফাসাদের উৎখাত সাধন করেন, অপরদিকে নীতি, আদর্শ এবং 'আকীদার দিক দিয়ে এরূপ সিদ্ধান্তও নেন যে, শাহী কিংবা রাজদরবারের সাথে তাদের সরাসরি কোন সম্পর্ক থাকবে না।

হযরত খাজা মুঈনুদ্দীন চিশতী (র) থেকে আরম্ভ করে হযরত খাজা নিজামুদ্দীন আওলিয়া (র) পর্যন্ত এই নিয়মই ছিল যে, শাহী দরবারে যাওয়া যেমন চলবে না, ঠিক তেমনি যুগের যিনি সুলতান-তঁার সাথে মূল্যাকাত করতে যাওয়াও চলবে না। সবাই এ নীতি দৃঢ়ভাবে আঁকড়ে ছিলেন। এর পরিণতি এই হয়েছিল যে, রাজনীতির তিক্ত কাঁটা তাঁদের আঁচলে জড়িয়ে কখনও তাঁদেরকে বিব্রত করতে পারেনি এবং সাম্রাজ্যের বিভিন্নমুখী বিপ্লব ও রাজবংশের উত্থান-পতন তাঁদের কেন্দ্রগুলিতে ও তৎপরতার মধ্যে কোনরূপ প্রভাব-প্রতিক্রিয়া সৃষ্টি করতে পারেনি। তাঁদের একনিষ্ঠতা, ঐকান্তিকতা ও নিঃস্বার্থপরতা সকল প্রকার রাজনৈতিক বিভেদ ও বৈপরীত্য সত্ত্বেও সঠিক ও অব্যাহত থাকে এবং এরই কারণে ভারতবর্ষে সর্বাপেক্ষা দীর্ঘকালব্যাপী এ সিলসিলার পক্ষে তাঁদের মিশন অব্যাহত রাখা এবং উপমহাদেশে নিজেদের প্রভাব-প্রতিপত্তি কায়ম করার নিরবচ্ছিন্ন সুযোগ মিলেছিল। সম্ভবত এরই পরিণতিতে এ সিলসিলা সাধারণ লোকসমাজে জনপ্রিয়তা ও চিরন্তনতা লাভে সক্ষম হয়েছিল।

হযরত শায়খ নিজামুদ্দীন (র) যখন থেকে শায়খুল কবীর (র)-কর্তৃক ভারতবর্ষকে আধ্যাত্মিক শক্তিতে জয় করতে এবং তবলীগ ও হিদায়াতের জন্য আদিষ্ট হয়ে এসেছিলেন, তারপর থেকে দিল্লীর সিংহাসনে একের পর এক পাঁচজন বাদশাহ অধিষ্ঠিত হন এবং তাঁরা অত্যন্ত জাঁকজমক ও দৌর্দণ্ড প্রতাপে রাজত্ব করেন। কিন্তু মাত্র একবার ছাড়া এবং তাও ধর্মীয় প্রয়োজন হেতু (সামা' হালাল অথবা হারাম সম্পর্কিত বাহাছে) আর কখনও শাহী দরবারে যান নি অথবা তৎকালীন বাদশাহদেরও কাউকে নিজ দরবারে আসবার অনুমতি দেন নি। গিয়াছুদ্দীন বলবনের রাজত্বকালে তাঁর [শায়খ নিজাম (র)] খ্যাতির দীপ্ত সূর্য ও ব্যাপক জনপ্রিয়তা মধ্যাকাশে উপনীত হয় নাই বিধায় সুলতান গিয়াছুদ্দীনের নজর তাঁর ওপর পড়ে নাই। সুলতান মুঈযুদ্দীন কায়কোবাদ খেলাধুলা, ভ্রীড়া-কৌতুক, শিকার ও ভ্রমণেই বেশীর ভাগ সময় কাটাতেন।

জালালুদ্দীন খিলজীই প্রথম বাদশাহ ছিলেন যিনি জ্ঞানী, দৃঢ়চেতা, সহিষ্ণু, প্রতিভা ও মনীষার সন্ধান লাভে সক্ষম এবং গুণীজনের একান্ত ভক্ত ও অনুরক্ত ছিলেন। এ সময় হযরত খাজা নিজামুদ্দীন আওলিয়া (র)-এর খ্যাতি ও প্রসিদ্ধি চারদিকে ছড়িয়ে পড়েছিল এবং তা সর্বোচ্চ সীমায় উপনীত হয়েছিল। সুলতান জালালুদ্দীন কয়েকবার তাঁর দরবারে উপস্থিত হবার অনুমতি প্রার্থনা করেন। কিন্তু কখনও তা মঞ্জুরী লাভে সক্ষম হয় নি। শেষ পর্যন্ত সুলতান আমীর খসরু (র)-এর সাথে (যিনি সুলতানের সভাকবি ও সেক্রেটারী ছিলেন) এমত পরিকল্পনা করেন যে, একবার আগমন সংবাদ না জানিয়েই হযরত শায়খ (র)-এর খিদমতে উপস্থিত হবেন। আমীর খসরু (র) সমীচীন মনে করেন যে, স্বীয় মুরশিদকে এ সম্পর্কে অবগত করানো হবে। কেননা তিনি তাঁকে বাদশাহর আগমন সংবাদ না দিলে সম্ভবত তা তার জন্য মঙ্গলজনক হবে না। যদিও এ ব্যাপারে বাদশাহ আমীর খসরু (র)-কে স্বীয় গোপন অভিসন্ধির অংশীদার বানিয়েছিলেন, তথাপি শায়খ ও মুরশিদের নিকট এ পরিকল্পনা ও অভিসন্ধি গোপন রাখা তার নিকট সমীচীন মনে হয়নি। আমীর খসরু (র) শায়খ খাজা নিজাম (র)-এর নিকট গিয়ে আরম্ভ জানান যে, আগামীকাল বাদশাহ আগনার খিদমতে হাযির হবেন। হযরত খাজা নিজামুদ্দীন (র) একথা শোনামাত্রই স্বীয় মুরশিদ শায়খুল কবীর (র)-এর কবর যিয়ারতের নিয়তে আজুদহন অভিমুখে রওয়ানা হয়ে যান। বাদশাহ যখন এ সংবাদ অবগত হলেন তখন আমীর খসরু (র)-এর ওপর তিনি অত্যন্ত অসন্তুষ্ট হন, যেহেতু আমীর খসরু (র) তাঁর গোপন পরিকল্পনা ফাঁস করে দিয়েছেন এবং খাজা (র)-এর কদমবুসির সৌভাগ্য থেকে তাঁকে বঞ্চিত করেছেন। জিজ্ঞাসিত

হয়ে আমীর খসরু (র) উত্তর দেন যে, বাদশাহর অসন্তুষ্টিতে জীবন হারাবার ভয় ছিল, কিন্তু মুরশিদ (র)-এর অসন্তুষ্টিতে ছিল ঈমান হারাবার ভয়। বাদশাহ অত্যন্ত ধৈর্যশীল এবং বুদ্ধিমত্তার অধিকারী ছিলেন। তিনি এ উত্তর খুবই পছন্দ করেন এবং নিশ্চুপ হয়ে যান।^১

সুলতান 'আলাউদ্দীনের পরীক্ষা ও শ্রদ্ধা

সুলতান 'আলাউদ্দীন খিলজী যিনি প্রাচীন ভারতের সর্বাপেক্ষা প্রতাপশালী ও সৌভাগ্যবান বাদশাহ- যাকে দ্বিতীয় আলেকজান্ডারও বলা হয়- আপন চাচা সুলতান জালালুদ্দীনের পরে সিংহাসনে অধিষ্ঠিত হন। প্রথমদিকে হযরত খাজা নিজামুদ্দীন আওলিয়া (র)-এর প্রতি তাঁর অনুরাগ ও বীতরাগ বা শ্রদ্ধা ও ঘৃণা কোনটিই ছিল না। কেউ কেউ সুলতানকে হযরত খাজা (র) সম্পর্কে ভুল ধারণা দেবার প্রয়াস পেয়েছিল এবং তাঁর প্রতি ব্যাপক জনস্রোতের গতি ও অসাধারণ জনপ্রিয়তা সাম্রাজ্যের জন্য বিপদজনক-এমত ধারণা সৃষ্টিরও প্রয়াস চালিয়েছিল। সুলতান 'আলাউদ্দীন পরীক্ষার উদ্দেশ্যে হযরত খাজা নিজামুদ্দীন (র)-এর খিদমতে আপন পুত্র ও যুবরাজ খিযির খানের হাতে বিনীতভাবে লিখিত একটি দরখাস্ত পাঠান যার মধ্যে সাম্রাজ্যের ব্যবস্থাপনা সম্পর্কে পরামর্শ ও উপদেশ দেবার জন্য আবেদন জানানো হয়েছিল। যখন খিযির খান এই আবেদন পত্র নিয়ে খাজা (র)-এর খিদমতে উপস্থিত হন, তখন তিনি কাগজখানা হাতে নিয়েই এবং তা না পড়েই মজলিসে উপস্থিত শ্রোতৃবৃন্দকে লক্ষ্য করে বলেন, আমি দু'আ করছি।' এরপর তিনি বলেন, "দরবেশদের বাদশাহর সাথে কি কাজ? আমি একজন ফকীর মানুষ। শহরের এক কোণে পড়ে আছি। বাদশাহ এবং মুসলমানদের জন্য দু'আ' প্রার্থনায় মশগুল। আর এতে যদি বাদশাহর কোনরূপ আপত্তি কিংবা অভিযোগ থেকে থাকে, তাহলে আমি এখান থেকে চলে যাচ্ছি। আল্লাহর যমীন অত্যন্ত প্রশস্ত।" সুলতান 'আলাউদ্দীন এরূপ জবাবে অত্যন্ত প্রীত হন এবং বলেন, আমি জানতাম যে, সাম্রাজ্যের কোন ব্যাপারে কিংবা রাজনীতিতে খাজা হযরত (র)-এর কোনরূপ যোগসূত্র নেই। কিন্তু দুই লোকেরা মনে যে, আল্লাহর বান্দাদের সাথে আমার টক্কর বাধুক এবং এভাবে রাষ্ট্র ও দেশ ধ্বংস হয়ে যাক।^২

১. সিয়্যারুল আওলিয়া, পৃ. ১৩৬।

২. সিয়্যারুল আওলিয়া, পৃ. ১৩৪।

বাদশাহর আগমন সংবাদে 'ওযরশাহী

সুলতান আলাউদ্দীন খিলজী সুলতানুল মাশায়িকের নিকট বহু অনুনয়-বিনয় করেন এবং বলে পাঠান যে, “আমি হযুরেরই একজন ভক্ত ও অনুরক্ত মাত্র; আমার অন্যায় ও বেয়াদবী হয়েছে। আমাকে যেন মাফ করা হয় এবং হাযির হবার এজায়ত দেওয়া হয় যাতে কদমবুসি করবার সৌভাগ্য ঘটে।” হযরত খাজা (র) বলেন যে, “আসবার প্রয়োজন নেই। আমি দূরে থেকেই দু'আ' করছি। আর দূরের দু'আ' অত্যন্ত ফলপ্রসূ ও কার্যকর হয়ে থাকে।”^১

ঘরের দু'টি দরজা

সুলতান এরপরও সাক্ষাত লাভের জন্য পীড়াপীড়ি করতে থাকেন। এতে হযরত বলেন, “এ ফকীরের ঘরে দু'টি দরজা। বাদশাহ এক দরজা দিয়ে প্রবেশ করবেন আর আমি অন্য দরজা দিয়ে বেরিয়ে যাব।”^২

ইসলামের জন্য চিন্তা-ভাবনা

যদিও সুলতান 'আলাউদ্দীনের হযরত খাজা নিজামুদ্দীন (র)-এর খিদমতে উপস্থিত হবার সুযোগ ও সৌভাগ্য হয় নাই, তথাপি তাঁর প্রতি সুলতানের ভক্তি-শ্রদ্ধা বরাবর অক্ষুণ্ণ ছিল এবং তিনি সাম্রাজ্যের গুরুত্বপূর্ণ ব্যাপারে তথা উদ্বেগ ও উৎকণ্ঠার ক্ষেত্রে হযরত খাজা (র)-এর মুখাপেক্ষী হতেন। এক্ষেত্রে সুলতান দু'আ'র দরখাস্ত পেশ করতেন এবং তিনি আরোজান ও ব্যবস্থাপনার সাথে দু'আ' করতেন।

কাযী যিয়াউদ্দীন বারনী বলেন যে, যখন মালিক নায়েব (মালিক কাফুর) বিরঙ্গীলের অবরোধে ব্যস্ত তখন তেলেঙ্গানার রাস্তা বিপদপূর্ণ হয়ে যায়। রাস্তায় অবস্থিত থানা ও ফাঁড়িগুলিও উঠে যায়। চল্লিশ দিনেরও বেশি হয়ে গিয়েছিল কিন্তু সৈন্যবাহিনীর নিরাপত্তা ও মঙ্গলজনক কোন খবরই সুলতানের নিকট পৌঁছোচ্ছিল না। সুলতান ছিলেন অত্যন্ত উদ্দিগ্ন ও উৎকণ্ঠিত। দরবারের আমীর-উমারা ও অমাত্যবর্গ আশংকা প্রকাশ করছিল হযরত-বা সৈন্যবাহিনী কোন দৈব-দুর্বিপাকের শিকারে পরিণত হয়েছে, ফলে রসদপত্র ও চিঠিপত্রাদির যোগাযোগ ছিন্ন হয়ে গেছে। এরূপ চিন্তা-ভাবনা ও উদ্বেগ-উৎকণ্ঠার কালেই একদিন সুলতান মালিক কারা বেগ এবং কাযী মুগীছুদ্দীন বিয়ানুবীকে হযরত খাজা (র)-এর খিদমতে পাঠান এবং বলে দেন যে, মুসলিম সৈন্যবাহিনীর

১. সিয়াকুল আওলিয়া, পৃ. ১৩৫।

২. সিয়াকুল আওলিয়া, পৃ. ১৩৫।

মঙ্গলামঙ্গলের কোন খবর না পেয়ে সুলতান অত্যন্ত উদ্ভিগ্ন ও উৎকণ্ঠিত। ইসলামের জন্য চিন্তা-ভাবনা ও দরদ-অনুভূতি সুলতানের চেয়েও তাঁর অনেক বেশী। অতএব তিনি যদি বাতেনী চোখের সাহায্যে সৈন্যবাহিনীর কোনরূপ অবস্থা অবগত হন তাহলে তিনি যেন তা জানিয়ে নিশ্চিত ও খুশী করেন। সুলতান পয়গামবাহীদের হিদায়াত করে দেন যে, ঐ মুহূর্তে হযরতের মুখ দিয়ে যাই বের হবে তা সঙ্গে সঙ্গেই হিফায়ত করবে এবং এর মধ্যে যেন কোন কম-বেশি না করা হয় এবং সুলতানের প্রেরিত পয়গাম তারা পৌঁছায়। তিনি পয়গাম শোনামাত্রই বাদশাহর বিজয়ের বর্ণনা দিতে শুরু করেন এবং বলেন, “এটা তো সামান্য ও নগণ্য বিজয়। আমরা আরও বড় বিজয়ের আশা রাখি।” একথা শুনে মালিক কারা বেগ এবং কাযী মুগীছুদ্দীন অত্যন্ত খুশী মনে ফিরে আসেন এবং সুলতানকে ঐ সুসংবাদ দেন। সুলতান তা শুনে অত্যন্ত খুশী হন। তিনি স্থির নিশ্চিত হন যে, বিরঙ্গীলের বিজয় হয়ে গেছে। ঐ দিন সালাতুল ‘আসর সম্পন্ন করার অব্যবহিত পরই মালিক কাফুরের দূত এসে পৌঁছে এবং বিরঙ্গীলের বিজয় সংবাদ ব্যক্ত করে। জুম‘আর দিন বিজয়-পত্র মসজিদের মিঘর থেকে পড়ে শোনানো হয়। প্রাঙ্গণে খুশীর কাড়া-নাকাড়া বাজতে থাকে এবং আনন্দ-উৎসবের ধুম লেগে যায়।^১

আরও একবার যখন মোগলরা দিল্লী আক্রমণোদ্যত হয়েছিল তখন সুলতান স্বয়ং যুদ্ধে যোগ দিয়েছিলেন। তিনি হযরত খাজা (র)-এর খিদমতে আরম্ভ করেন, “এটা অত্যন্ত গুরুত্বপূর্ণ ও নাযুক মুহূর্ত। আপনি একটু খেয়াল রাখবেন।” এরপর হযরত খাজা নিজাম (র) সমস্ত খানকাহবাসীদের লক্ষ করে বলেন, “আল্লাহর দিকে মনোনিবেশ কর এবং তাঁরই দরগাহে মুসলমানদের জয়লাভের জন্য দু‘আ করতে থাক।” এরপর সবাই দু‘আ ও মুনাজাতে মগ্ন হয়ে যায় এবং অল্প কিছু পরেই বিজয়ের খবর এসে পৌঁছে। মোগলরা এ যুদ্ধে সম্পূর্ণরূপে পরাজিত হয়।^২

কাযী যিয়াউদ্দীন সুলতান ‘আলাউদ্দীন খিলজীর রাজদরবারের অন্যতম সভাসদ ছিলেন। তিনি বলেন যে, সুলতানের গোটা রাজত্বকালে তাঁর মুখ দিয়ে হযরত খাজা (র)-এর শানে কোন অমর্যাদাকর উক্তি কখনই বের হয়নি। যদিও দুশমন ও হিংসুটে স্বভাবের লোকেরা শায়খ (র)-এর শাহী জাঁকজমক ও খানকাহমুখী জনস্রোত এবং শাহী লঙ্গরখানার মত ব্যাপক ও বিস্তৃত

১. ভারীখে ফীরোশাহী, পৃ. ৩৩৩।

২. দিয়ারুল আওলিয়া, পৃ. ১৬০।

কাণ্ডকারখানাকে সুলতানের চোখে উদ্দেশ্যপূর্ণ করে তুলতে কল্পনার রঙ মিশ্রিত এমন সব পস্থা-পদ্ধতি এখতিয়ার করত যাতে সুলতানের মনে শায়খ (র)-এর প্রতি বিরূপ মনোভাবের সৃষ্টি হয়। সুলতান কিন্তু কখনও সেদিকে দ্রুক্ষেপই করেন নি। বিশেষ করে রাজত্বের শেষদিকে তিনি হযরতের প্রতি মাত্ৰাধিক পরিমাণে একনিষ্ঠ ও শ্রদ্ধাশীল হয়ে ওঠেন।

সুলতান কুত্বুদ্দীনের বিরোধিতা ও হত্যা

সুলতান 'আলাউদ্দীনের পর সুলতানের দ্বিতীয় পুত্র কুত্বুদ্দীন মুবারক শাহ সাম্রাজ্যের যুবরাজ খিযির খানকে বঞ্চিত করে জোরপূর্বক সিংহাসনে আরোহণ করেন।

খিযির খান যেহেতু হযরত খাজা নিজামুদ্দীন আওলিয়ার মুরীদ ছিলেন এবং তিনিই (খিযির খান) মরহুম সুলতান 'আলাউদ্দীনের সিংহাসনের ন্যায্য ও প্রকৃত উত্তরাধিকারী ছিলেন-যাঁর কাছে থেকে কুত্বুদ্দীন মুবারক শাহ ক্ষমতার মসনদ ছিনিয়ে নিয়েছিলেন-সেহেতু কুত্বুদ্দীন হযরত খাজা নিজামুদ্দীন (র)-এর প্রতি সর্বদাই অসন্তুষ্ট থাকতেন। সুলতান জামে' মীরি নামে একটি নতুন মসজিদ নির্মাণ করেছিলেন এবং সকল বুয়র্গ ও 'উলামায়ের কিরামের ওপর নির্দেশ ছিল যেন তাঁরা সেখানে গিয়ে সালাতুল জুম'আ আদায় করেন। সুলতানুল মাশায়িখ বলে পাঠান : "আমাদের কাছেই একটি মসজিদ আছে। তার হক বেশী বিধায় আমরা সেখানেই সালাত আদায় করব।" তিনি অতঃপর জামে' মীরিতে সালাত আদায় থেকে বিরত থাকেন। এতে বাদশাহ্ ভীষণভাবে ক্ষেপে যান। উপরন্তু প্রতি চান্দমাসের প্রথম দিনে আত্মীয়-বান্ধব এবং শহরের গণ্যমান্য ব্যক্তিবর্গ শাহী দরবারে উপস্থিত হয়ে বাদশাহ্‌র খিদমতে নযরানা পেশ করত। সুলতানুল মাশায়িখ এ অনুষ্ঠানেও শরীক হতেন না; প্রথামাফিক রসম পালনের উদ্দেশ্যে স্বীয় খাদিম ইকবালকে পাঠিয়ে দিতেন। এতে সুলতান আরো বিগড়ে যান। তিনি তাঁর সমস্ত উম্মীর ও আমীর-উম্মারাকে নির্দেশ দেন কেউ যেন হযরত খাজা নিজামুদ্দীনের যিয়ারত লাভের উদ্দেশ্যে গিয়াছপুর না যায়।

আমীর খসরু (র) লিখেছেন যে, বাদশাহ্‌র নির্দেশ ছিল, যে ব্যক্তি শায়খের মাথা আনবে, তাকে হাবার তংকা বখশিশ দেওয়া হবে। একদিন শায়খ যিলাউদ্দীন রুমীর দরবারে সুলতান কুত্বুদ্দীন এবং হযরত খাজা নিজামুদ্দীন (র) সামনাসামনি হয়ে যান। শায়খ একজন মুসলমান হিসেবে সুলতানকে সালাম জানান। সুলতান কুত্বুদ্দীন জবাবদানে বিরত থাকেন। এ ধরনের ঘটনাবলী চার

বছরের শাসনামলে পর্যায়ক্রমে ঘটতে থাকে।^১ চান্দ্রমাসের প্রথম তারিখের অনুষ্ঠানে উপস্থিতির ব্যাপারে গীড়াপীড়ির ঘটনা সবশেষে ঘটেছিল। যাই হোক, অবশেষে সুলতান তাঁর রাজনৈতিক প্রতিদ্বন্দ্বী খসরু খান কর্তৃক নিহত হবার পর এই বিরোধিতার অবসান ঘটে।

গায়েবী লঙ্ঘনখানা

ঐ যুগেই সুলতান কুতুবুদ্দীনের তরফ থেকে এ ব্যাপারে অত্যন্ত কড়াকড়িভাবে বাধা-নিষেধ আরোপ করা হয়েছিল যে, দরবারের কোন আমীর-উমারা এবং সাম্রাজ্যের বিশিষ্ট ব্যক্তিবর্গের পক্ষ থেকে যেন কোনরূপ নযরানা হযরত খাজা (র)-এর খিদমতে পেশ করা না হয়। হযরত খাজা নিজামুদ্দীন আওলিয়া এটা জানবার পর বিশেষভাবে তাকিদ দেন যেন পূর্বের তুলনায় বেশী করে খানা পাকানো হয় এবং দস্তুরখানের পরিধি আরও অধিক প্রসারিত করা করা হয়। হযরত শায়খ নাসীরুদ্দীন চেরাগে দিল্লী (র) বলেন :

একবার সুলতান কুতুবুদ্দীনকে কোন হিংসুটে বলে যে, শায়খ আমাদের হাদিয়া-নযরানা কবুল করেন না, অথচ আমীর-উমারা ও সরদারদের আনীত নযরানা কবুল করেন। সুলতান কুতুবুদ্দীন এর সত্যতা অবহিত হবার পর নির্দেশ পাঠান যে, কোন আমীর অথবা সরদার শায়খ (র)-এর ওখানে যাবে না। দেখা যাক, তিনি এত পরিমাণ লোকের দাওয়াত কোথা থেকে করেন। অধিকতর তিনি গোয়েন্দা নিযুক্ত করেন। তাদের ওপর দায়িত্ব চাপানো হয়েছিল যেন তারা কোন আমীর খাজা (র)-এর দরবারে গেলে লক্ষ্য রাখে এবং যথাসময়ে গিয়ে বাদশাহকে তা অবহিত করে। হযরত শায়খ (র) একথা শোনার পর বলেন : আজ থেকে খাবার বেশী করে পাক করা হোক। বেশ কিছুকাল অতিক্রান্ত হবার পর একদিন বাদশাহর লোকজনকে জিজ্ঞাসা করেন : শায়খের খানকাহর অবস্থা কি? তারা বলল যে, আগে যে পরিমাণ পাক করা হত বর্তমানে তার দ্বিগুণ পাক করা হয়ে থাকে। একথা শোনার পর বাদশাহ অত্যন্ত লজ্জিত হন এবং বলেন, আমিই ভুলের মধ্যে ছিলাম। তাঁর গোটা কারবারই তো গায়েবী জগতের।^২

গিয়াছুদ্দীন তুগলকের রাজত্বকাল এবং সরকারী বিতর্ক সভা

কুতুবুদ্দীন মুবারক শাহর পর কয়েক মাস খসরু খান অন্যায় ও যবরদস্তিমূলকভাবে রাজত্ব করেন এবং ইসলামী প্রথা-পদ্ধতিকে হেয় করে

১. নিজামে তালাম, পৃ. ২২০।

২. খায়রুল মাজালিস, পৃ. ২০৩।

ইসলামেরই অবমাননা করেন। ৭২১ হিজরীতে গিয়াছুদ্দীন তুগলক (মালিক গাযী) খসরু খানকে হত্যা করে তুগলক বংশের রাজত্বের ভিত্তি স্থাপন করেন। সুলতান গিয়াছুদ্দীন যদিও তেমন বিদ্যাবত্তার অধিকারী ছিলেন না, কিন্তু 'আলিম-উলামা ও শরীয়তের প্রতি অভ্যন্ত শ্রদ্ধাশীল ছিলেন। হযরত খাজা নিজামুদ্দীন আওলিয়া (র) সামা' গুনতেন। একারণে দিল্লীর সাধারণ নাগরিকদের মধ্যে এর ব্যাপক প্রসার ঘটতে থাকে এবং জনগণের আশ্রয় এর প্রতি বৃদ্ধি পায়।^১ শায়খযাদা হুস্‌সামুদ্দীন ফারজাম নামের এক ব্যক্তি দীর্ঘ দিন যাবত হযরত নিজামুদ্দীন (র)-এর স্নেহস্বায়্য প্রতিপালিত হয়েছিল, তথাপি মুজাহাদার গভীর আশ্রয়-উদ্দীপনা এবং ইশকের অমূল্য নিয়ামত ও সম্পদ থেকে সে লাভবান হতে পারে নি। অধিকন্তু সাম্রাজ্যের উপ-শাসক কাযী জালালুদ্দীন আলুয়ালজীরও আহলে দর্দ ও ইশক (মা'রিফতপন্থী)দের প্রতি এক ধরনের বিদ্বিষ্ট মনোভাব ছিল। কাযী সাহেব এবং অন্যান্য 'উলামায়ে কিরাম শায়খযাদা হুস্‌সামুদ্দীনকে নিজেদের মতের প্রতি উদ্বুদ্ধ করল এবং বাদশাহর দৃষ্টি আকর্ষণ করল এই বলে যে, খাজা নিজামুদ্দীন এ যুগের ইমাম। অথচ তিনি সামা' শোনেন যা ইমাম আযম আবু হানীফার মাযহাব মতে হারাম। তাঁরই কারণে হাযার হাযার আল্লাহর বান্দাহ এই অপ্রিয় ও নিষিদ্ধ কাজে লিপ্ত হচ্ছে। এ মাসয়লা সম্পর্কে সুলতান ছিলেন সম্পূর্ণ বেখবর। তাঁর আশ্চর্য লাগছিল এই ভেবে যে, এতবড় একজন ইমাম এরূপ শরীয়ত বিগর্হিত কর্মে লিপ্ত! লোকেরা সামা' হালাল হবার ফতওয়া এবং শরীয়তের কিভাবেসমূহের বিভিন্ন রিওয়াত বাদশাহর সামনে পেশ করে। বাদশাহ বললেন যে, যেহেতু 'উলামায়ে দীন সামা'র হারাম হবার সপক্ষে ফতওয়া দিয়েছেন এবং তাঁরা একে নিষেধ করে থাকেন, সেহেতু হযরত খাজা (র) এবং শহরের সমস্ত 'উলামায়ে কিরাম ও নেতৃস্থানীয় ব্যক্তিবর্গকে আহ্বান করা হোক; অতঃপর একটি জলসা অনুষ্ঠানের মাধ্যমে এ ব্যাপারে একটি ফয়সালা করা হোক প্রকৃত সত্য কোন্টি। মীর খোরদের ভাষায় গুনুন :

শাহী-প্রাসাদে হযরত খাজা (র)-কে আহ্বান জানানো হল। হযরত খাজা নিজামুদ্দীন (র) কাযী মুহীউদ্দীন কাশানী এবং মাওলানা ফখরুদ্দীন নামক দু'জন শীর্ষস্থানীয় 'আলিম ও যুগশিক্ষক সমভিব্যাহারে শাহী প্রাসাদে তশরীফ আনেন। সর্বপ্রথম উপ-শাসক কাযী জালালুদ্দীন হযরত খাজা নিজামুদ্দীন আওলিয়া (র)-কে সম্বোধন করে ওয়ায-নসীহত শুরু করেন এবং

১. সামা'র হাকীকত, উদ্দেশ্য ও লক্ষ্য এবং এর আদব ও আহকাম সম্পর্কিত বাহাছ চতুর্থ অধ্যায়ে 'স্বাদ ও বিভিন্ন অবস্থা' শীর্ষক শিরোগাম দেখুন।

কিছু অশোভনমূলক উক্তি করেন। এমন কি এও বলেন যে, যদি এরপরও আপনি সামা'র হালাল হবার দাবি অব্যাহত রাখেন এবং তা শুনতে থাকেন তাহলে মনে রাখবেন, শরা'র হাকীম হিসেবে আমি আপনাকে শাস্তি দেব। একথা শুনতেই হযরত খাজা (র) বলে ওঠেন : যে পদের গর্বে গর্বিত হয়ে তুমি আজ এই কথা বলছ, তা থেকে তুমি অপসারিত হবে। অতঃপর এর ঠিক বার দিন পর কাযী স্বীয় পদ থেকে অপসারিত হয়ে দিল্লী থেকে বিদায় নেন। সংক্ষেপে ঘটনা এই যে, উক্ত বিতর্ক মজলিসে সমস্ত 'উলামায়ে কিরাম, নেতৃস্থানীয় ব্যক্তি, আমীর-উমারা এবং পদস্থ সরকারী কর্মচারী উপস্থিত ছিলেন। বাদশাহ এবং উপস্থিত সকলেরই হযরত খাজা (র)-এর ওপরই দৃষ্টি নিবদ্ধ ছিল এবং সকলেই তাঁকে ভক্তি ও শ্রদ্ধা জানাচ্ছিল। শায়খযাদা হুসাম তখন বললেন : আপনার মজলিসে সামা' হয়ে থাকে, লোকেরা নৃত্য করে এবং আহ্ উহ্ ধ্বনি উচ্চারণ করে থাকে। তিনি এ ধরনের অনেক কথা বললেন। হযরত খাজা নিজামুদ্দীন (র) তাকে লক্ষ্য করে বললেন : চোঁচিও না, বেশি কথা বলার দরকার নেই। আগে বল যে, সামার সংজ্ঞা কি? প্রত্যুত্তরে শায়খযাদা হুসাম বললেন : আমি জানি না। অবশ্য এতটুকু জানি যে, 'উলামায়ে কিরাম সামা'কে হারাম বলে থাকেন। হযরত খাজা (র) বললেন : সামা'র অর্থ যখন তোমার জানা নেই তখন তোমাকে আমার বলার কিছু নেই, আর বলাও উচিত নয়। এতে শায়খযাদা হুসাম লজ্জিত হন। বাদশাহ গভীর আগ্রহের সাথে তাঁর তাকরীর (বক্তৃতা) শুনছিলেন। যখনই কেউ জোরে কথা বলতে চেষ্টা করত তখনই তিনি বলতেন, চোঁচিও না। শোন, শায়খ (র) কি বলছেন। মজলিসে উপস্থিত উলামায়ে কিরামের মধ্যে মাওলানা হামীদুদ্দীন এবং মাওলানা শিহাবুদ্দীন মুলতানী নিশ্চুপ ছিলেন। মাওলানা হামীদুদ্দীন এতটুকু বললেন যে, বাদী হযরত খাজা (র)-এর মজলিসের অবস্থা সম্পর্কে যে বর্ণনা দিলেন তা ঘটনার বিপরীত এবং সত্যের অপলাপ মাত্র। আমি নিজে দেখেছি এবং বহু বুয়র্গ ও দরবেশকেও আমি সেখানে দেখেছি। ঠিক সেই মুহূর্তে শায়খুল ইসলাম শায়খ বাহাউদ্দীন যাকারিয়া মুলতানী (র)-এর দৌহিত্র মাওলানা 'আলামুদ্দীন এসে উপস্থিত হন। বাদশাহ তাঁকে বললেন : "আপনিও একজন 'আলিম এবং পর্যটকও বটেন। এক্ষণে সামা' নিয়ে বাহাছ হচ্ছে। আমি আপনাকে জিজ্ঞেস করি সামা' শ্রবণ হালাল, না হারাম?" মাওলানা 'আলামুদ্দীন বললেন : আমি এ সম্পর্কে একখানা পুস্তিকা প্রণয়ন করেছি এবং সেখানে এর হারাম ও হালাল হওয়া সম্পর্কে দলীল-প্রমাণও পেশ

করেছি। আমরা গভীর পর্যবেক্ষণের ফলাফল এই যে, যে হৃদয় দিয়ে শোনে তার জন্য সামা' হালাল, আর যে ব্যক্তি নফস (রিপু, প্রবৃত্তি) -এর সাহায্যে শোনে, তার জন্য এটা হারাম। এরপর বাদশাহ মাওলানা 'আলামুদ্দীনকে জিজ্ঞেস করেন : আপনি বাগদাদ, শাম (সিরিয়া), তুরস্ক প্রভৃতি শহরসহ প্রায় সর্বত্রই ভ্রমণ করেছেন। সেখানকার বুযর্গ ও মাশায়িখে কিরাম সামা' শোনের কিনা? সেখানে কি কেউ কাউকে তা শুনতে মানা করে? মাওলানা আলামুদ্দীন উত্তরে বললেন যে, ঐ সমস্ত শহরে বুযর্গ ও মাশায়িখে কিরাম সামা' শুনে থাকেন আর কেউ কেউ তা দফ এবং শাবানা সহকারে তা শুনেন, কেউ মানা করে না। আর সামা' তো মাশায়িখে কিরামের মধ্যে হযরত জুনায়েদ (র), হযরত শিবলী (র)-এর সময় থেকেই প্রচলিত হয়ে আসছে। বাদশাহ মাওলানা 'আলামুদ্দীনের মুখের এমত বর্ণনা শোনার পর নিশ্চুপ হয়ে যান এবং আর কিছুই বলেন নি। মাওলানা জালালুদ্দীন আরম্ভ করেন যে, বাদশাহ যেন সামা' হারাম হবার ফরমান জারি করেন এবং ইমাম আযম আবু হানীফা (র)-এর মাযহাবের প্রতি আনুকূল্য প্রদর্শন করেন। এতে হযরত খাজা নিজামুদ্দীন (র) বাদশাহকে বললেন, আমি চাই যে, আপনি এ ব্যাপারে কোন ফরমান যেন জারি না করেন এবং এ ব্যাপারে কোনরূপ ফয়সালা পেশ করতে বিরত থাকেন। মাওলানা ফখরুদ্দীন (যিনি মজলিসে উপস্থিত ছিলেন)-এর বর্ণনা এই যে, চাশতের প্রথম ওয়াজ থেকে সূর্য পশ্চিমাকাশে চলে পড়া পর্যন্ত বাহাহ অব্যাহত থাকে। মজলিসে উপস্থিত কোন ব্যক্তিই এর হারাম হবার সপক্ষে দলীল পেশ করতে পারে নি। অপর আর একটি বর্ণনায় অবগত হওয়া যায় যে, বাদশাহ ফয়সালা করেন, হযরত খাজা (র) সামা' শুনতে পারেন। কেউ এ থেকে তাঁকে নিষেধ করতে পারবে না। কিন্তু এ বর্ণনাটি পরিত্যক্ত। ঐ দিনগুলিতে কেউ হযরত খাজা (র) কে বললেন যে, এখন তো সামা'র সপক্ষে বাদশাহর ফরমানই মিলে গেছে। যে সময় যে মুহূর্তে চাইবেন, সামা' শুনবেন। এটা তো এখন হালাল হয়ে গেছে। হযরত খাজা (র) বললেন, যদি তা হারাম হয় তবে কারো বলায় তা হালাল হতে পারে না। আর যদি হালাল হয় তবে কারো বলায় তা হারাম হতে পারে না। মজলিস সমাপ্তির পর বাদশাহ হযরত খাজা (র) কে অত্যন্ত ভাষীম ও ভাকরীমের সঙ্গে বিদায় দেন।^১

হযরত খাজা (র)-এর যবানীতে বিতর্ক সভার অবস্থা

কাযী গিয়াউদ্দীন বারনী স্বীয় গ্রন্থ 'হাসরতনামায়' লিখেন যে, হযরত খাজা (র) উক্ত মজলিস থেকে বিদায় নিয়ে ঘরে তশরীফ আনেন এবং যোহরের ওয়াক্তে মাওলানা মুহীউদ্দীন কাশানী এবং আমীর খসরুকে ডেকে পাঠান। তিনি ইরশাদ করেন যে, দিল্লীর আলিমদের অন্তর হিংসা ও দুশমনিতে ভরা। তাঁরা প্রশস্ত ও উনুক্ত ময়দান পেয়েছে এবং শত্রুতামূলক বহু কথাবার্তা বলেছে। সব চেয়ে এটাই আশ্চর্যের ব্যাপার দেখলাম যে, সহীহ হাদীছ শোনাটা পর্যন্ত এরা মেনে নিতে পারছে না। এর জবাবে তারা এটাই বলে যে, আমাদের শহরে হাদীসের তুলনায় ফিকহই অগ্রাধিকার পেয়ে থাকে। এ কথা শুধু সেই বলতে পারে যার হাদীসে নববী (সা)-এর ওপর আদৌ কোন ভক্তি-শ্রদ্ধা নেই। আমি যখনই কোন সহীহ হাদীছ পড়তে থাকি, তখনই তারা নারায হয়ে থাকে যে, এ হাদীস দ্বারা ইমাম শাফি'ঈ দলীল দিয়ে থাকেন এবং তিনি আমাদের আলিমদের দুশমন বিধায় আমরা তা শুনব না। জানি না এদের আদৌ কোন 'আকীদা আছে কিনা। এরা শাসকের (উলুল আমর) সামনে এরূপ যবরদস্তিমূলকভাবে কাজ-কারবার করে এবং সহীহ হাদীছ পাঠকে খামিয়ে দেয়। এমন 'আলিম আমি দেখিও নি আর এ ধরনের আলিমের কথা শুনিওনি যে, তার সামনে সহীহ হাদীছ পাঠ করা হয় অথচ সে বলে যে, আমি শুনব না। আমি বুঝতে পারি না যে, আসলে রহস্যটা কি। আর যে শহরে এরূপ ধৃষ্টতা ও যবরদস্তি দেখানো হয়, সে শহর কি করে টিকে থাকতে পারে? এর প্রতিটি দালান-কোঠার ইট-কাঠ চূর্ণ-বিচূর্ণ হয়ে গেলেও তা মোটেই তাজ্জবের ব্যাপার হবে না। এরপর বাদশাহ, আমীর-উমারা এবং সাধারণ জনগণ শহরের কাযী ও আলিমদের থেকে এটা শুনবে যে, এই শহরে হাদীসের ওপর 'আমল করা হয় না। তা'হলে হাদীছে নববী (সা)-এর ওপর ভক্তি-শ্রদ্ধা কী করে থাকবে? আমার ভয় হয় যে, না জানি আলিমদের এ ধরনের অশ্রদ্ধা ও বেয়াদবীর কারণে আসমান থেকে কোন বাল-মুসীবত, দুর্ভিক্ষ ও মহামারী অবতীর্ণ হয়।^১

দিল্লীর ধ্বংস

এই ঘটনার ঠিক ষষ্ঠ বছরে হযরত খাজা নিজামুদ্দীন আওলিয়া (র)-এর ওফাতের পর সুলতান গিয়াছুদ্দীন তুগলকের পুত্র ও উত্তরাধিকারী মুহাম্মদ তুগলক দিল্লী খালি করার এবং দেবগীরে (দৌলতাবাদ) রাজধানী স্থানান্তরের ফরমান

জারি করেন এবং এ ব্যাপারে এরূপ জিদ ও ক্ষিপ্ততার আশ্রয় নেন যে, বাস্তবে শহরের প্রতিটি ইট বানঝনিয়ে উঠে এবং দিল্লীর মত কোলাহলমুখর একটি শহর ঘনবসতির কারণে যেখানে লোকের থাকার জায়গা পাওয়া যেত না- এমনভাবে জনশূন্য হয়ে পড়ে যে, বন্য পশু ও হিংস্র প্রাণী ব্যতিরেকে কোন জীবিত প্রাণীর চেহারা পর্যন্ত সেখানে দৃষ্টিগোচর হত না।

মুহাম্মদ কাসিম তারীখে ফিরিশতায় লিখেন যে, সরকারী কর্মকর্তারা একটি লোককেও দিল্লীর আলো-বাতাসে তিষ্ঠাতে দেয়নি; সবাইকে জড়ে-মূলে দৌলতাবাদ (দেবগীর) পাঠিয়ে দেয়। ফলে দিল্লী এমনভাবে বিরান ও জনশূন্য হয়ে পড়ে যে, একমাত্র শকুন, শিয়াল ও বন্য জন্তু ছাড়া আর কোন জীবজন্তু কিংবা জনপ্রাণীর সাড়া-শব্দও সেখানে পাওয়া যেত না।^১

যে সমস্ত আলিম উক্ত মসজিদে উপস্থিত ছিলেন, তাঁরা ছাড়া অন্যান্যরাও তাদের বদৌলতে দৌলতাবাদে নির্বাসিত হয়। দৌলতাবাদ পৌছার পর সেখানকার দুর্ভিক্ষ ও মহামারীর মুকাবিলা তাদের করতে হয়। হাযার হাযার নর-নারী তো রাস্তাতেই মারা যায়। হাযার হাযার লোক সেখানে পৌছামাত্র দুর্ভিক্ষ ও মহামারীর শিকারে পরিণত হয়। আর এভাবে হযরত খাজা (র)-এর ভবিষ্যদ্বাণী অক্ষরে অক্ষরে সত্যে পরিণত হয়।

সময়ের ব্যবস্থাপনা

আমীর খোরদ হযরত খাজা (র)-এর সময়ের ব্যবস্থাপনা সম্পর্কে লিখেছেনঃ প্রতিদিন ইফতারের পর (যা আহলে জামা'আতের সাথেই হত) তিনি স্বীয় বালাখানার বিশ্রামস্থলে তশরীফ নিতেন। বন্ধু-বান্ধব ও সেবকবৃন্দকে যারা সাধারণত শহরের বিভিন্ন প্রান্ত থেকে আসত-মাগরিব ও 'ইশার মধ্যবর্তী সময়ে প্রাসাদের ওপরেই ডেকে পাঠানো হ'ত। প্রায় এক ঘণ্টাকাল সময় তাদের পারস্পরিক সহাবস্থান, সান্নিধ্য ও সন্দর্শনের সৌভাগ্য লাভ ঘটত। বিভিন্ন রকমের শুকনো ও তাজা ফল-মূলাদি, সুস্বাদু ও রুচিকর খাবার এবং নানা প্রকার পানীয় দ্রব্যাদি হাযির করা হ'ত। মজলিসে উপস্থিত ব্যক্তিবর্গ এসব গ্রহণ করত। তিনি প্রত্যেকের মনস্তুষ্টির চেষ্টা করতেন এবং প্রত্যেকের গুণগুণ অবস্থাাদি সম্পর্কে জিজ্ঞাসাবাদ করতেন।^২

১. তারীখে ফিরিশতা, ১ম খন্ড, পৃ. ২৪৩।

২. দিয়ারুল আওলিয়া, পৃ. ১২৫।

আমীর খসরুর বৈশিষ্ট্য

হযরত খাজা নিজামুদ্দীন আওলিয়া (র) ইশার সালাত আদায়ের জন্য অতঃপর নীচে অবতরণ করতেন। জামা'আতের সাথে সালাত আদায়ের পর পুনরায় প্রাসাদে তশরীফ রাখতেন। কিছুক্ষণ ব্যস্ত থাকতেন, অতঃপর আরাম ও বিশ্রাম সুখ ভোগ করবার জন্য চারপায়ীর ওপর শরীর এলিয়ে দিতেন। সে সময় খাদিম তসবীহ্ এনে হযরত খাজা (র)-এর হাতে উঠিয়ে দিত। এই সময়ে একমাত্র আমীর খসরু ব্যতীত অন্য কেউ তাঁর সান্নিধ্যে আসতে সাহস পেত না।^১ তিনি হযরত খাজা (র)-এর সামনে বসে নানা ধরনের কাহিনী ও বিভিন্ন প্রশঙ্গ নিয়ে আলাপ-আলোচনা করতেন। তিনি খোশমেযাজে থাকা অবস্থায় মাথা নেড়ে দিতেন। সময়ে অসময়ে জিজ্ঞেস করতেন যে, তুর্ক! কি খবর? আমীর খসরু এতটুকু শোনাশ্রমই দীর্ঘ আলাপ-আলোচনার মওকা বের করে নিতেন। তিনি একটু সূত্রের উল্লেখ করতেই আমীর খসরু গোটা ফিরিস্তিই পেশ করে দিতেন।

রাত্রে প্রভুতি

যখন আমীর খসরু এবং সাহেববাদাগণ অনুমতি নেবার পর বিদায় হতেন তখন খাদিম ইকবাল এসে পানিভর্তি কয়েকটি পাত্র ওয়ূর জন্য রেখে দিয়ে বাইরে চলে যেত। এরপর হযরত খাজা (র) স্বয়ং উঠতেন এবং দরজায় শেকল লাগিয়ে দিতেন। তারপর সেখানকার খবর একমাত্র আল্লাহ্ পাক ছাড়া আর কেউ জানত না। আল্লাহ্ জানেন যে, সারারাত ধরে একান্তে ও নিভূতে কি সব গোপন আলাপ হত এবং স্বীয় মহান প্রভু-প্রতিপালকের সাথে কি গভীর আকুতি ও অনুরাগের কথা হত।

সাহরী

সাহরীর ওয়াক্ত হলে খাদিম এসে হাযির হত এবং বাইরে থেকে দরজায় নক্ (দস্তক) করত। হযরত খাজা (র) দরজা খুলে দিতেন। সাহরী-যার ভিতর বিভিন্ন রকমারী খাদ্যদ্রব্য থাকত-সামনে রাখা হত। তিনি এ থেকে খুব অল্প

১. হযরত খাজা নিজামুদ্দীন (র)-এর সঙ্গে আমীর খসরুর যে গভীর আন্তরিক ঘনিষ্ঠতা ও হৃদয়ভাণ্ডার সম্পর্ক বিদ্যমান ছিল তা তাঁর জীবন-চরিত ও দীওয়ান পাঠে অবগত হওয়া যায়। ফুলের সাথে বুলবুলের যে সম্পর্ক এবং আঙনের সাথে পতঙ্গের যে সম্পর্ক সৃষ্টি হয়ে থাকে, ঠিক তেমনি সম্পর্ক ছিল আমীর খসরুর স্বীয় মুরশিদ হযরত খাজা (র)-এর সঙ্গে। হযরত খাজা (র)-এরও এই সত্যিকার ও খাঁটি 'আশিকের সাথে এতখানি হৃদয়ভাণ্ডার সম্পর্ক ছিল যে, তিনি বলতেন **من الهمه تنك** অর্থাৎ কখনো কোন মুহূর্তে উদাস, নিঃসঙ্গ ও বিরক্তি বোধ করি, কিন্তু এমতাবস্থায়ও তোমার সাথে তা হয় না। আরও একবার তিনি বলেছিলেন : কখনও কখনও নিজেকেও নিজের কাছে বিরক্তিকর ও অসহ্য লাগে, কিন্তু তোমার ক্ষেত্রে তা মনে হয় না।" সিয়ারুল আওলিয়া, পৃ. ৩০২।

পরিমাণেই গ্রহণ করতেন। অবশিষ্ট অংশটুকুর জন্য বলতেন যে, এগুলি বাচ্চাদের জন্য হিফায়তে রেখে দাও। খাজা 'আবদুর রহীম যিনি সাহুরী নিয়ে যাবার দায়িত্বে ছিলেন, বলেন : অধিকাংশ সময়ই এমন হত যে, তিনি সাহুরী গ্রহণ করতেন না। আমি আরম্ভ করতাম : হযরত! এমনিতেই ইফতারীর মুহূর্তেও আপনি খুব কমই খান। যদি সাহুরীও কিছু গ্রহণ না করেন তবে শারীরিক দুর্বলতা অত্যন্ত বেড়ে যাবে। একথা শোনামাত্রই তিনি কাঁদতে থাকতেন এবং বলতেন : “কত গরীব ও অসহায় মানুষ মসজিদের কোণায় ও চত্বরে ক্ষুধার্ত অবস্থায় পড়ে আছে, অনাহারে তারা রাত কাটিয়ে দেয়। এমনতাবস্থায় এ খানা আমি কিভাবে গলাধঃকরণ করতে পারি!” অধিকাংশ সময় তাই দেখা গেছে যে, সাহুরীর সময় যা এনেছি তাই আবার ফিরিয়ে নিয়ে গেছি।

ভোর বেলায়

দিনের বেলায় যারই দৃষ্টি তাঁর চেহারা মুবারকের ওপর পড়ত, সে-ই দেখতে পেত প্রস্ফুটিত ফুলের পাপড়িসদৃশ একটি চেহারা আর চোখ সারা রাত বিন্দ্র যাপনের কারণে লাল। এরূপ কঠোর মুজাহাদার কারণেও তাঁর ভিতর কখনো দুর্বলতা পরিলক্ষিত হ'ত না কিংবা তাঁর স্বাভাবিক আচার-আচরণে কোনরূপ পরিবর্তনও পরিলক্ষিত হত না। কেউ বলতেও পারত না যে, তিনি চার শ' অথবা পাঁচশ' রাকাত সালাত আদায় করতেন কিংবা তিনি এই পরিমাণ তসবীহ পাঠে অভ্যস্ত। তাঁর জীবন ও যিন্দেগী এভাবে কাটত যে সম্পর্কে একমাত্র আল্লাহ পাক ছাড়া আর কেউ অবহিত ছিল না।

দিনের বেলায়

প্রত্যহ দিনের বেলা তিনি স্বীয় মাশায়িখের মুসাল্লার (জায়নামায) ওপর কিবলামুখী হয়ে গভীর আত্মনিমগ্নতার ভেতর অতিবাহিত করতেন যেন তিনি আল্লাহকে দেখছেন। সাক্ষাতপ্রার্থীদের ভিতর বিভিন্ন শ্রেণীর লোকই থাকত। 'উলামায়ে কিরাম, মাশায়িখ, শ্রদ্ধেয় ও নেতৃস্থানীয় ব্যক্তি, ইতর-ভদ্র, প্রত্যেকের বিদ্যা-বুদ্ধি ও মর্যাদা মুতাবিক যার যে বিষয়, সেই বিষয়েই তিনি তার সাথে কথা বলতেন এবং তার সন্তুষ্টি সাধন করতেন। বাহ্যত তিনি তাকে নিয়ে ব্যস্ত থাকতেন বটে, কিন্তু বাস্তবে তিনি মশগুল থাকতেন স্বীয় পরম আরাধ্য প্রেমাস্পদকে নিয়ে।^১

মনস্তুষ্টি সাধন ও প্রশিক্ষণ

যোহরের ওয়াক্ত হত। সালাত আদায়ের পর যে সমস্ত আত্মীয়-বান্ধব কদমবুসির জন্য আসত, তাদেরকে আহ্বান করা হত এবং তাদের মনস্তুষ্টি সাধনের কথাবার্তায় তিনি কিছু সময় অতিবাহিত করতেন। 'ইবাদত-বন্দেগী, সলুক ও আল্লাহর মুহব্বত সম্পর্কে তাদের প্রয়োজনীয় হিদায়াত করতেন। যবরদস্ত 'আলিম ও বুয়র্গ ব্যক্তিরও (যারা সে মজলিসে উপস্থিত থাকতেন) সাহস হত না যে, মাথা উঁচিয়ে তাঁর চেহারা মুবারকের প্রতি লক্ষ্য করে। এটাই ছিল আল্লাহু-প্রদত্ত তাঁর বিরাট ব্যক্তিত্ব ও মর্যাদার প্রকাশ।

ওফাত নিকটবর্তী হলে

বয়স আশি বছর অতিক্রান্ত হতেই তাঁর মধ্যে পরলোক যাত্রার সমূহ লক্ষণ প্রকাশ পেতে থাকে। একদিন তিনি বললেন, আমি স্বপ্নে রাসূলে মকবুল (সা)-কে দেখলাম। হুযুর (স) বললেন, "নিজাম! তোমার সান্নিধ্য আমি গভীরভাবে কামনা করছি।"^১

মর্যাদাশীল খলীফাদের এজায়তনামা প্রদান মুহব্বত ও পারম্পরিক ভ্রাতৃত্বের উপদেশ দান

রোগাক্রান্ত অবস্থায় তিনি কতিপয় হযরতকে খিলাফতনামা প্রদান করেন এবং এজায়তনামা লিখে দেন। মাওলানা ফখরুদ্দীন যরাবী মযমূন তৈরী করেন এবং সায়্যিদ হুসায়ন কিরমানী তা লিপিবদ্ধ করেন। হযরত খাজা নিজামুদ্দীন আওলিয়া (র) এর ওপর দস্তখত করেন। দস্তখতের ভাষা ছিল নিম্নরূপ :

من الفقير محمد بن علي البداؤني البخاري

'দীনাতিদীন মুহাম্মদ ইবনে আহমদ ইবনে 'আলী আল-বাদায়ুনী আল-বুখারীর পক্ষ থেকে।' এই এজায়তনামার ওপর ৭২৪ হিজরীর ২০ শে যিলহজ্জ তারিখের উল্লেখ ছিল। এ থেকে জানা যায় যে, এটা ওফাতের তিন মাস সাতাশ দিন পূর্বে লেখা হয়েছিল।^২

যে সমস্ত বুয়র্গের জন্য এসব এজায়তনামা প্রস্তুত করা হয়েছিল তা তাঁদের নিকট পাঠিয়ে দেওয়া হয়। আর যে সমস্ত বুয়র্গ সেখানে উপস্থিত ছিলেন তাঁদের হাতে তা প্রদান করা হয়। প্রথমে শায়খ কুতুবুদ্দীন মুনাওয়ারকে আহ্বান

৩. সিয়রুল আওলিয়া, পৃ. ১৪১।

২. হযরত খাজা (র)-এর ওফাত হয় ৭২৫ হিজরীর ১৮ই রবিউল-ছানী মাসে।

করা হয়। সুলতানুল মাশায়িখ (র) তাঁকে খিলাফতনামা প্রদান করেন। ইরশাদ হল, যাও! এর শুকরিয়া স্বরূপ দু'রাকাত শোকরানা সালাত আদায় কর। বন্ধু-বান্ধব তাঁকে মুবারকবাদ জানান। এ সময়েই শায়খ নাসিরুদ্দীন মাহমুদ চেরাগে দিল্লীকে তিনি স্মরণ করেন। তাঁকেও খিরকা, খিলাফত ও এজায়তনামা প্রদান করেন এবং ওসীয়ত করেন। শায়খ নাসিরুদ্দীন মাহমুদ চেরাগে দিল্লী কেবলই দাঁড়িয়েছেন এমন সময় শায়খ কুতবুদ্দীন মুনাওয়ারকে পুনরায় ডাকা হয়। তিনি এলে হযরত খাজা (র) ইরশাদ করেন, শায়খ নাসিরুদ্দীন মাহমুদের খিলাফত প্রাপ্তিতে তাঁকে মুবারকবাদ জানাও। অনুরূপ আদেশ শায়খ নাসিরুদ্দীন মাহমুদের প্রতিও করা হয়। অতঃপর উভয়েই উভয়ের খিলাফত প্রাপ্তিতে পরস্পরকে মুবারকবাদ জানান এবং একে অপরে কোলাকুলি করার আদেশ প্রাপ্ত হন। হযরত খাজা নিজামুদ্দীন আওলিয়া (র) অতঃপর বললেন : তোমরা উভয়ে পরস্পরের ভাই। কে আগে খিলাফত পেলে আর কে পরে পেলে, এ নিয়ে মনে কিছু করবে না।^১

ওফাতের অবস্থা

ওফাতের ৪০ দিন পূর্বে ইস্তিগরাক ও আশ্চর্যজনক এক অবস্থার সৃষ্টি হয়। আমীর খোরদ ওফাতের অবস্থা বিস্তারিতভাবে লিখেছেন। তাঁর বর্ণনা নিম্নরূপ :

সেদিন ছিল শুক্রবার। জুম'আর দিন। সুলতানুল মাশায়িখ (র)-এর ওপর এক অত্যাশ্চর্য অবস্থা বিরাজ করছিল। নূরে তাজাল্লী দ্বারা তাঁর অভ্যন্তরীণ ভাগ উজ্জ্বল ও আলোকিত মনে হচ্ছিল। সালাতের ভিতর বারবার সিজদা দিচ্ছিলেন। এরূপ অদ্ভুত আশ্চর্যজনক অবস্থার ভিতর দিয়ে তিনি ঘরে তশরীফ লেন। কান্নার বেগ বাড়তে থাকে। প্রত্যহ বার কয়েক বেহঁশ ও ইস্তিগরাকের হালতে পৌঁছে যান। আবার তিনি প্রকৃতিস্থ হন। বলতে থাকেন যে, আজ জুম'আর দিন; দোস্ত তার দোস্তের ওয়াদার কথা স্মরণে আনছে। এরপরই তিনি আপন ভুবনে ডুবে যাচ্ছিলেন। এমতাবস্থায়ও তিনি জিজ্ঞাসা করছিলেন—'সালাতের ওয়াজ্ব কি হয়ে গেছে? আমি কি সালাত আদায় করেছি?' যদি জওয়াব দেওয়া হ'ত যে, আপনি সালাত আদায় করেছেন, তখন বলতেন : আবারও পড়ে নিই। এভাবেই প্রতিটি ওয়াজ্বের সালাতই তিনি দু'বার পড়তেন। যতদিন তিনি এরূপ অবস্থায় ছিলেন ততদিন এই দু'টি কথারই পুনরাবৃত্তি করতেন, 'আজ জুম'আর দিন'—'আমি কি সালাত আদায় করেছি?'

এ সময়েই একদিন তিনি সমস্ত খাদিম ও মুরীদ, যারা তখন উপস্থিত ছিলেন, সবাইকে ডেকে পাঠান এবং তাদেরকে লক্ষ্য করে বলেন : “তোমরা সাক্ষী থাক যে, যদি ইকবাল (খাদেম) ঘরের আসবাব-পত্রাদির ভেতর থেকে কোন একটি জিনিসও অতিরিক্ত সঞ্চয় করে থাকে তবে আগামীকাল কিয়ামতের দিন আল্লাহর দরবারে তাকে এজন্য অবশ্যই জবাবদিহি হতে হবে। খাদেম ইকবাল আরম্ভ করল যে, আমি কোন কিছুই সঞ্চয়ের জন্য মওজুদ করি নাই, ঘরেও রাখি নাই, বরং সব কিছুই সদকা করে দিয়েছি। প্রকৃতই উক্ত নওজোয়ান এরূপই করেছিল। কয়েকদিনের প্রয়োজনোপযোগী সামান্য কিছু খাদ্যশস্য খানকাহর ফকীর ও দীন-দরিদ্রের জন্য রেখে বাদবাকী সব কিছুই বণ্টন করে দিয়েছিল। আমার চাচা সায়্যিদ হুসায়ন আমাকে অবহিত করেন যে, খাদ্যশস্য ছাড়া আর সব কিছুই অভাবী ও প্রার্থীদের মধ্যে পৌঁছে গেছে। এ তথ্য অবগত হয়ে সুলতানুল মাশায়িখ হযরত খাজা নিজামুদ্দীন আওলিয়া (র) স্বীয় খাদেম ইকবালের উপর নারায় হন। তাকে ডাকা হয় এবং তাকে তিনি বলেন যে, এই নাপাক ধূলিকণাকে কেন রেখেছ? ইকবাল আরম্ভ করল যে, খাদ্যশস্য ছাড়া অন্য আর যা কিছু ছিল সব কিছুই বণ্টিত হয়ে গেছে। তিনি বললেন : যেখানে যে আছে তাদের সবাইকে ডাক। লোকজন উপস্থিত হলে তিনি বললেন : খাদ্যশস্যের ভাগর ভেঙে দাও এবং সমস্ত খাদ্যশস্য নির্বিঘ্নে উঠিয়ে নিয়ে যাও। এরপর বাঁড়ু দিয়ে জায়গাটা পরিষ্কার করে ফেল। কিছুক্ষণের মধ্যেই লোকজন সমবেত হয় এবং খাদ্যশস্য দেখতে না দেখতে নিঃশেষে উঠিয়ে নিয়ে যায়। রোগাক্রান্ত থাকাকালীন কতিপয় বন্ধু-বান্ধব ও খিদমতগার এসে হাবির হয় এবং তারা জিজ্ঞেস করে যে, গরীবদের বর্তমান আশ্রয়স্থলের অবর্তমানে আমাদের ন্যায় হতভাগা মিসকীনদের অবস্থা কি হবে? তিনি বললেন, ‘এখানে এত পরিমাণ পাবে যা দিয়ে তোমাদের গ্রাসাচ্ছাদন বেশ ভালভাবেই চলে যাবে।’ আমি কতক বিশ্বস্ত বুয়র্গের মুখ থেকে শুনেছি যে, লোকেরা আরম্ভ জানায়, আমাদের মধ্যে ভাগ্যবান ব্যক্তিটি কে হবেন?’ তিনি বলেছিলেন, -‘যার ভাগ্য তাকে মদদ করবে।’ কতক দোস্ত ও খাদেম আমার নানা মাওলানা শামসুদ্দীন ওয়ামেগানীর নিকট আরম্ভ জানায় যেন

তিনি সুলতানুল মাশায়িখকে জিজ্ঞেস করেন যে, সকলেই আপন আপন 'আকীদা অনুযায়ী নিজ আয়াতুলখীন এলাকার মধ্যে বড় বড় ইমারত বানিয়ে ফেলেছে এবং সবারই নিয়ত এই যে, আপনি তার ইমারতে আরাম করবেন (অর্থাৎ উক্ত ইমারত আপনার দাফনগাহ হবে)। যদি উক্ত অনিবার্য অবস্থা এসে যায় তবে কোন্ ইমারতে আপনাকে দাফন করা হবে? মাওলানা শামসুদ্দীন এই পয়গাম হযরত খাজা নিজামুদ্দীন আওলিয়া (র)-এর শিদ্দমতে পৌছালে তিনি বলেন : আমি কোন ইমারতের নিচেই দাফন হতে চাই না। জঙ্গলের নিরিবিলিতেই আমি মাটির খোরাকে পরিণত হতে চাই। অতঃপর এমনটিই হয়েছিল। তাঁকে ময়দানের বাইরে দাফন করা হয়। পরবর্তীতে সুলতান মুহাম্মদ ভুগলক তাঁর কবরের ওপর গুম্বজ নির্মাণ করেন।

ওফাতের ৪০ দিন পূর্ব থেকেই তিনি খাদ্য গ্রহণ একেবারেই ছেড়ে দিয়ে ছিলেন। এমন কি খাদ্যের স্রাণ পাওয়াকেও তিনি সহ্য করতেন না। কান্নার বেগ এত বেশী ছিল যে, ক্ষণিকের ভরেও অশ্রু বিসর্জনে বিরতি ছিল না।

এই সময়েই একদিন আখী মুবারক মাছের গুরুয়া নিয়ে হাযির। ভক্তবৃন্দ বহু চেষ্টা করল যেন তিনি এ থেকে কিছু অন্তত গ্রহণ করেন। সুলতানুল মাশায়িখ জিজ্ঞেস করেন, 'এটা কি?' বলা হ'ল যে, এটা মাছের অল্প কিছু গুরুয়া। একথা শোনার পর তিনি বললেন, 'প্রবাহিত পানিতে এটা নিক্ষেপ কর'। এ থেকে এতটুকু পরিমাণও তিনি গ্রহণ করলেন না। আমার চাচা সায়্যিদ হুসায়ন আরম্ভ করলেন : আজ কয়েক দিন অতিবাহিত হতে চলল, হুযূর খানাপিনা একদম ছেড়ে দিয়েছেন। শেষ অবধি এর ফলাফল কি দাঁড়াবে? তিনি বললেন, 'সায়্যিদ। যে হুযূর আকরাম (স)-এর মুলাকাতের গভীর আত্মহী, তার পক্ষে দুনিয়ায় পুনরায় খাবার গ্রহণ আদৌ কি সম্ভব?' মোট কথা চল্লিশ দিন পর্যন্ত এভাবেই তিনি খানাপিনা থেকে বিরত থাকেন। এক দানাও তিনি গ্রহণ করেন নি। এরপর তিনি কথাও খুব কম বলেছেন। ওফাতের দিন বুধবার পর্যন্ত এরূপ অবস্থায়ই কাটে।

১৮ ই রবিউছ-ছানী ৭২৫ হিজরী বেলা উঠার পর যূহুদ ও ইবাদত, হাকীকত ও মারিফত এবং হিদায়াত ও সত্যের উজ্জ্বল আলোকবর্তিকা অন্তর্মিত হয়ে যায়।

জানাযা পড়ান শায়খুল ইসলাম বাহাউদ্দীন যাকারিয়া মুলতানীর দৌহিত্র শায়খুল ইসলাম রুকনুদ্দীন। জানাযার পর শায়খুল ইসলাম রুকনুদ্দীন বলেন :

এখন আমি জানতে পারলাম যে, আমাকে চার বছর পর্যন্ত দিল্লীতে এজন্যই রাখা হয়েছিল যেন আমি এই জানাযার ইমামতি দ্বারা সৌভাগ্য হাসিল করি।^১

সারাটা জীবন একাকীত্বের মধ্যে কেটেছিল বিধায় তাঁর কোন সন্তান-সন্ততি ছিল না। রূহানী সিলসিলা ছিল সারা হিন্দুস্তানে পরিব্যাপ্ত এবং এখনও তা অব্যাহত আছে।

তৃতীয় অধ্যায়

চরিত্র ও গুণাবলী

সামগ্রিক গুণাবলী

হযরত খাজা নিজামুদ্দীন আওলিয়া (র)-এর গুণাবলী ও বৈশিষ্ট্যের সংক্ষিপ্ত, সামগ্রিক ও সঠিকতম পরিচিতি সেই শব্দসমষ্টির ভিতর নিহিত য খিলাফত প্রদানের মুহুর্তে তাঁর বহুদর্শী শায়খ ও মুরশিদ (শায়খুল কবীর হযরত খাজা ফরীদুদ্দীন গঞ্জ শকর রহমাতুল্লাহি 'আলায়হি)-এর পবিত্র যবান থেকে উচ্চারিত হয়েছিল। তিনি বলেছিলেন :

بارى تعالى تراعلم وعقل وعشق داره ست وهر بدين صفت
موصوف باشداز وخلافت مشائخ نيكو ايد به

আল্লাহু তা'আলা তোমাকে ইল্ম ও আকল এবং ইশকের ন্যায় মূল্যবান সম্পদ দান করেছেন। আর এ সমস্ত গুণের যিনি আঁধার হবেন তিনি মাশায়িখে কিরামের তরফ থেকে খিলাফতের অপিত যিম্মাদারী অতি উত্তমভাবে পালনে সক্ষম।

হযরত খাজা (র)-এর জীবন ও চরিত্র উপরিউক্ত গুণাবলীর সামগ্রিকতা দ্বারা সুসজ্জিত। তাঁর চরিত্রে 'ইল্ম, 'আকল ও 'ইশক—এই তিনটি দিকই পরিদৃষ্ট হয়। মুহুব্বত, প্রকৃত মা'রিফাত এবং শ্রেষ্ঠ বুয়র্গগণের তরবিয়ত (প্রশিক্ষণ) ও সোহবত (সাহচর্য) যা উৎকৃষ্টতম প্রভাব-প্রতিক্রিয়া ও সুফল দান করতে পারে এবং যার উৎকৃষ্টতম সমষ্টির নাম শেষ যুগে তাসাওউফের উপর গিয়ে পড়েছে, অর্থাৎ ইখলাস ও আখলাক (বিশুদ্ধচিত্ততা ও চরিত্র-ব্যবহার)-এর উৎকৃষ্টতম নমুনা তাঁর জীবনে পরিদৃষ্ট হয়।

ইখলাস

হযরত খাজা নিজামুদ্দীন আওলিয়া (র)-এর জীবনে মহামূল্যবান সম্পদ যা তাঁকে সমসাময়িকদের ওপর শুধু নয়, বরং ইসলামের মনীষীবৃন্দের মধ্যেও একটি সম্মুন্নত মর্যাদা, শুধু স্বীয় যমানারই নয়, বরং ইসলামী ইতিহাসের বিভিন্ন যুগেও,

সাধারণ স্বীকৃতি ও চিরন্তন স্থায়িত্ব লাভ করেছে এবং তাঁকে জনপ্রিয়তার বিশিষ্ট পুরস্কার দ্বারা পুরস্কৃত করেছে, তা তাওহীদ ও ইখলাসের সেই বিশিষ্ট অবস্থা ও স্বাদ যার মধ্যে মুহব্বত (ঐশী-শ্রেম) ও রিযায়ে ইলাহী (আল্লাহর সন্তুষ্টি) ব্যতীত অন্য কোন বস্তুই আর কাম্য ও লক্ষ্য থাকে না। মুহব্বত ও ইয়াকীনের প্রেমাগ্নি সকল প্রকারের কষ্টকময় প্রতিবন্ধকতাকে জ্বালিয়ে দিয়েছিল। দুনিয়া-প্রীতি, জৌলুসপ্রীতি এবং এ ধরনের সকল প্রেমের কামনা-বাসনার মূল উৎপাটিত হয়ে গিয়েছিল।

আমীর হাসান আলী সিজযী বর্ণনা করেন : একবার মজলিসে আলোচনা চলছিল যে, কিছু লোক মসজিদে অবস্থান করে এবং সেখানেই কুরআন মজীদ তিলাওয়াত করে ও নফল আদায় করে। আমি আরয করলাম, যদি নিজের ঘরেই অবস্থান করে তবে তা কেমন হবে। তিনি বললেন, যারা এক পারা কুরআন শরীফ তিলাওয়াত করা মসজিদে একবার সমগ্র কুরআন শরীফ খতম করার চাইতে উত্তম। এ প্রসঙ্গেই এ আলোচনা উত্থাপিত হয় যে, বিগতকালে এক ব্যক্তি দামিশকের জামে মসজিদে সারারাত নফল ইবাদত-বন্দেগীতে মশগুল থাকত এই লোভে যে, এতে তার খ্যাতি ও প্রসিদ্ধি ছড়িয়ে পড়বে এবং এর ফলে শায়খুল ইসলাম পদে (যা শূন্য ছিল) তার নিযুক্তিও মিলে যেতে পারে। এ কথা শোনার পর হযরত খাজা নিজামুদ্দীন আওলিয়া (র)-এর চোখ অশ্রুতে পূর্ণ হয়ে যায় এবং তিনি বলে উঠেন :

بسوز اول شيخ الاسلامی را وپس خانقاه را وبعد ازان

خود را

এমন শায়খুল ইসলামের গদীতে আগে আগুন লাগিয়ে দাও, এরপর আগুন লাগিয়ে দাও তার খানকাহতে; এরপর খোদ শায়খুল ইসলামকেই জ্বালিয়ে দাও।^১

তিনি নিজের সম্পর্কেই শুধু নয়, স্বীয় খলীফা ও স্থলাভিষিক্তদের মধ্যেও (যাদের দ্বারা সত্যতা, আখলাক এবং আত্মগুদ্ধির খিদমত নেওয়াই ছিল মুখ্য উদ্দেশ্য) লক্ষ্য করতেন যে, তারা ইখলাসের এমনতরো মকামে পৌঁছে গিয়েছিল যে, জাঁকজমক ও জৌলুসপ্রীতি তাদের অন্তর-মানস থেকে একদম নিঃশেষ হয়ে গিয়েছিল। মাওলানা ফসীহুদ্দীন প্রশ্ন করেছিলেন যে, বুয়র্গদের খিলাফতের হকদার সাধারণত কারা হয়ে থাকেন? উত্তরে হযরত খাজা (র) বললেন :

كسبے راكه در خا طروتو وقع خلافت بناشد -

“তিনিই খিলাফতের হকদার বলে বিবেচিত হবার যোগ্য হয়ে থাকেন যিনি এর প্রত্যাশী নন এবং নন এর প্রতি সামান্যতম আগ্রহীও।”^১

সিয়রুল আওলিয়া প্রণেতা বলেন যে, একবার তাঁকে তাঁর একজন বিশিষ্ট খাদেম সম্পর্কে—যাকে এজায়ত প্রদান করা হয়েছিল—অবহিত করা হয় যে, সে কয়েকটি কবুল একত্রে ভাঁজ করে গদী বানিয়ে বিছিয়ে তার ওপর বুয়র্গের ন্যায় বসে এবং আমীর-উমারা, জনসাধারণ ও বিশিষ্ট ব্যক্তিবর্গ তার খিদমতে শ্রদ্ধাবনত ও ভক্তি-শ্রদ্ধাসহকারে এসে থাকে। এতে তিনি এত মর্মান্বিত হন যে, সে পরে এলে তিনি তার থেকে মুখ ফিরিয়ে নেন এবং তাকে তাঁর এজায়তনামা থেকে বঞ্চিত করেন। দীর্ঘকাল তার প্রতি হযরত খাজা (র)-এর এই বিরক্তিকর মনোভাব অব্যাহত থাকে। যতদিন পর্যন্ত না তার থেকে কোন ওয়র প্রকাশ পেয়েছে এবং এ ব্যাপারে সে মাফ না চেয়েছে, ততদিন তাঁর ক্ষমাসুলভ ও স্নেহদৃষ্টি তার প্রতি পতিত হয়নি।^২

শত্রুর প্রতি উদারতা

আন্তরিকতা তথা বিশ্বদ্রুতিভতা, আত্মবিসর্জন এবং সব কিছুর প্রতি উপেক্ষা ও নিস্পৃহ মানসিকতার মকামে পৌঁছে সালিক (আধ্যাত্মিক পথের পথিক)-এর অন্তর থেকে দুঃখ-বিস্বাদ, অভিযোগ, প্রতিশোধস্পৃহা এবং অপরকে কষ্ট দেওয়ার ক্ষমতাই নিঃশেষ হয়ে যায়। সে শুধু আত্মীয়-স্বজনের প্রতিই স্নেহপ্রবণ, সদয় ও বন্ধুবৎসল হয় না, বরং দুশমনের প্রতিও কৃতজ্ঞ ও উদার মনোভাব প্রদর্শন এবং দুশমনের অনুকূলে প্রার্থনাকারীতে পরিণত হয় যেন দুশমনীও তার জন্য ইহসান। যে-কোন আহত অন্তরের উপশমের জন্য স্বতঃস্ফূর্তভাবে তার অন্তর থেকে বর্ষিত হয় পুষ্পবৃষ্টি। আমীর ‘আলা সিজযী বর্ণনা করেন যে, একবার হযরত খাজা (র) নিম্নোক্ত চরণটি আবৃত্তি করেন :

هرکه مارانج داده راحتش بسیار باد

“যে আমাকে দুঃখ-যন্ত্রণা দেয়, আল্লাহ তাকে সুখে-শান্তিতে রাখুন।” এরপর তিনি নিম্নোক্ত কবিতার লাইন দুটি আবৃত্তি করেন :

هرکه او خارے نهد در راه من از دشمنی

هرگل کز باغ عمرش بشگفت بی خار باد

যে আমার রাস্তায় কাঁটা বিছায় আল্লাহ করুন তার জীবনের গুলবাগিচায় যে ফুল ফুটবে তা যেন কাঁটাহীন থাকে।

১. সিয়রুল আওলিয়া, পৃ. ৩৪৫।

২. সিয়রুল আওলিয়া গ্রন্থে এর বিস্তারিত বিবরণ পাওয়া যাবে।

সিয়াকুল 'আরিফীন গ্রন্থে বলা হয়েছে যে, হযরত খাজা নাসীরুদ্দীন চেরাগে দিল্লী (র) বলতেন যে, হিসার আন্দরপতে (গিয়াছপুরের নিকট অবস্থিত) ঝাঙ্কু নামে এক ব্যক্তির হযরত খাজা (র)-এর সঙ্গে সীমাহীন দুষমনী ছিল যার সঙ্গত কোন কারণ ছিল না। সে ভাল-মন্দ অনেক কিছুই বলত এবং হযরত খাজা (র)-কে কিভাবে দুঃখ-কষ্ট দেওয়া যায় সেই ফিকিরেই থাকত। একদিন সে মারা যায়। হযরত শায়খ নিজামুদ্দীন আওলিয়া (র) তার জানাযায় শরীক হন এবং দাফন শেষ হবার পর তার শিয়রে দু'রাকাত নফল নামায আদায় করেন ও মুনাজাত করেন, “ হে আল্লাহ! এই ব্যক্তি যা কিছু বলেছে, মন্দ চিন্তা করেছে আমার সম্পর্কে, আমি তা মাফ করেছি। আমার কারণে সে যেন শান্তি না পায়।”^১

একবার মজলিসে উপস্থিত ব্যক্তিবর্গের ভেতর কেউ আলাপ প্রসঙ্গে উল্লেখ করেন যে, কোন কোন লোক জনাবেওয়ালাকে মিস্বর ও অন্যান্য স্থানে মণ্ডকামত ভাল-মন্দ বলে থাকে, আমরা যা শুনতে পারি না। এতে হযরত খাজা (র) বললেন, আমি তাদের সবাইকে মাফ করেছি। তোমরাও তাদেরকে মাফ করে দিও এবং এ ধরনের লোকের সাথে তোমরা এজন্য ঝগড়া-বিবাদে লিপ্ত হয়ে না। এরপর তিনি আরও বললেন, যদি কখনও দু'ব্যক্তির ভেতর মনোমালিন্য দেখা দেয় তবে সে মনোমালিন্য দূরীভূত করবার শ্রেষ্ঠতম পন্থা হ'ল একজন তার মন থেকে তথা অন্তরের নিভৃততম প্রদেশ থেকে শত্রুতার বিষবাপ্প দূর করে দেবে। এতে অপরের মন থেকেও শত্রুতার জোর ও তীব্রতা হ্রাস পাবে।

একদিন তিনি বললেন, দুনিয়ার সাধারণ নীতি এই যে, ভালোর সাথে ভালো এবং মন্দের সাথে মন্দ ব্যবহার করা হবে। কিন্তু আল্লাহর বান্দাদের নীতি এই যে, মন্দের মুকাবিলায়ও ভালো ব্যবহার করবে। তিনি এও বললেন :

কেউ কেউ যদি তোমার পথে কাঁটা বিছায় আর তুমিও তার পথে কাঁটা বিছাও তাহলে তো সারা দুনিয়াটাই কাঁটায় পরিপূর্ণ হয়ে যাবে। সর্বসাধারণের ভেতরও সাধারণ নীতি এই যে, সোজা-সরল লোকের সাথে সোজা-সরল ব্যবহার এবং বাঁকা-টেড়া লোকের সাথে বাঁকা-টেড়া ব্যবহার করা। কিন্তু দরবেশের নীতি হ'ল -সোজা সরল লোকের সঙ্গে সোজা-সরল ব্যবহার তো বটেই, এমন কি বাঁকা-টেড়া লোকদের সঙ্গেও সৎ ও উত্তম ব্যবহার করা।”^২

১. সিয়াকুল 'আরিফীন।

২. ফাওয়ায়েদুল ফুওয়াদ পৃ. ৮৭।

এক্ষেত্রে হযরত খাজা নিজামুদ্দীন (র)-এর মাপকাঠি এত উঁচু ও সম্মুন্নত ছিল যে, মন্দ বলা তো দূরের কথা, মন্দ কামনা করাটাও ছিল তাঁর রুচি ও প্রকৃতির বাইরে। একবার তিনি বলেছিলেন, মন্দ বলাটা নিঃসন্দেহে খারাপ। কিন্তু মন্দ কামনা অধিকতর খারাপ।^১ যখন এ ধরনের ব্যবহার তাঁর সবার সাথে তখন স্বীয় শায়খ, নিয়ামতপ্রাপ্ত ওলী-আওলিয়া, বন্ধু-বান্ধব এবং সম্পর্কিত ব্যক্তিদের সঙ্গে তাঁর ব্যবহার সুন্দর ও শ্রেষ্ঠতম হবেই বা না কেন, যাদের ইহসান দ্বারা তিনি পরিপূর্ণরূপে আপ্ত হয়েছিলেন।

সিয়ারুল 'আরিফীন নামক গ্রন্থে আছে যে, হযরত শায়খ নজীবুদ্দীন মুতাওয়াক্কিলের দৌহিত্র খাজা 'আতাউল্লাহ ছিল একজন বেপরোয়া ও নির্ভীক যুবক। একদিন সে শায়খের দরবারে কাগজ, কালি ও কলম নিয়ে হাবির হল। বলল, আমার জন্য অমুক সর্দারকে একটি সুপারিশপত্র লিখে দিন যাতে স্ত্রী আমাকে উল্লেখযোগ্য একটা অংকের টাকা দিয়ে দেয়। শায়খ (র) বললেন, উক্ত সর্দারের সাথে যেমন আমার কখনো মূলাকাত হয় নি, তেমনি সেও কখনো আমার এখানে আসেনি। যার সঙ্গে আমার আদৌ পরিচয় হয়নি, তাকে আমি এ ধরনের চিরকুট কি করে লিখতে পারি? এতে সে ভীষণ রাগান্বিত হয় এবং বলতে শুরু করে যে, আপনি আমারই নানার মুরীদ আর আমাদেরই খান্দানের দানে লালিত। আর কিনা আজই এতদূর অকৃতজ্ঞ হয়ে গেছেন যে, আপনার দ্বারা আমার জন্য এতটুকু চিরকুট লেখাও চলে না? এ আপনি কী ধরনের পীর-মুরীদীর জাল বিছিয়ে রেখেছেন এবং আল্লাহর মাখলুককে ধোঁকা দিচ্ছেন। এই বলে সে দোয়াত সজোরে যমীনে নিক্ষেপ করে উঠে চলে যেতে উদ্যত হয়। অমনি হযরত খাজা (র) তার জামার প্রান্তদেশ টেনে ধরেন এবং বলেন, অসন্তুষ্ট হয়ে কোথায় যাচ্ছ? খুশী হয়ে যাও। এরপর একটা পরিমাণমত টাকা দিয়ে তাকে খুশী করে বিদায় দেন।^২

দোষ গোপন এবং মহত্ত্ব ও ঔদার্য

সিয়ারুল আওলিয়া গ্রন্থে আছে যে, হযরত খাজা নিজামুদ্দীন আওলিয়া (র)-এর দরবারে আগমনকারীদের সাধারণ নিয়ম ছিল, বাইরে থেকে যখনই কেউ আসত, শিরনী (মিষ্টান্ন দ্রব্য) অথবা কোন তোহফা খরিদ করে সাথে নিয়ে আসত এবং দরবারে পেশ করত। একবার কতকগুলি লোক এইরূপ নিয়তেই আসছিল। জনৈক মৌলভী সাহেবও তাদের সাথে ছিলেন। তিনি ভাবলেন, সব লোকই তো

১. সিয়ারুল আওলিয়া, পৃ. ৫৫৪।

২. সিয়ারুল 'আরিফীন।

বিভিন্ন কিসিমের হাদিয়া-তোহফা পেশ করবে এবং তারা সেগুলি হযরত খাজা (র)-এর সামনে একত্রে রাখবে। এরপর খাদিম সেগুলি উঠিয়ে নিয়ে যাবে। তিনি কি করে জানবেন কে কি এনেছে? অতঃপর তিনি কিছু মাটি রাস্তা থেকে উঠিয়ে নিয়ে কাগজে বেঁধে সুলতানুল মাশায়িখ (র)-এর দরবারে হাথির হন। প্রত্যেকেই যে যার জিনিস সামনে রেখে দেয়। মৌলভী সাহেবও নিজের পুটলিটা যথা নিয়মে সামনে রেখে দেন। খাদিম সবকিছু উঠিয়ে নিয়ে যেতে উদ্যত হয় এবং পুটলিটাও উঠাতে যায়। এতে হযরত খাজা (র) বললেন, “এটাকে এখানেই রেখে যাও। এটা হবে আমার চোখের সুরমা।” হযরত খাজা (র)-এর আমল-আখলাক এবং উদার ও প্রশস্ত হৃদয়ের পরিচয় পেয়ে উক্ত ‘আলিম সাহেব তওবা করেন এবং তাঁর মুরীদ হন।’

স্নেহপ্রবণতা ও আত্মীয়-কুটুম্বিতা

আল্লাহ্ তা‘আলা হযরত খাজা (র)-কে সাধারণ মানবমণ্ডলী এবং ব্যক্তি-বিশেষের সাথে সাথে মুসলমান ও আত্মীয়-কুটুম্বদের সঙ্গে এমনই স্নেহপ্রবণতা ও মুহব্বত দান করেছিলেন যে, যদি তাকে মায়ের স্নেহপ্রবণতার সঙ্গে তুলনা করা হয় কিংবা তা থেকেও অধিকতর গুরুত্ব প্রদান করা হয় তবে বাস্তব ঘটনাবলী দৃষ্টে তাকে আদৌ অতিরঞ্জিত বলে মনে হবে না। মহান ও শ্রেষ্ঠতম বুয়র্গদের এই স্নেহপ্রবণতা প্রকৃতপক্ষে নবীয়ে-আকরাম (স)-এর সেই স্নেহ প্রবণতারই উত্তরাধিকারিত্ব যার হাকীকত কুরআনুল করীমের সূরা তওবাতে বর্ণনা করা হয়েছে :

তোমাদের মধ্য থেকেই তোমাদের নিকট এক রাসূল এসেছেন। তোমাদেরকে যা বিপন্ন করে উহা তার জন্য কষ্টদায়ক। সে তোমাদের মঙ্গলকামী, বিশ্বাসীদিগের প্রতি দয়াদ ও পরম দয়ালু।” [সূরা তওবাহ : ১১৮]

অধিকন্তু এটা সেই হুকুমেরই তামিল যে সম্পর্কে খোদ রাসূলে করীম (স)-কে সম্বোধন করা হয়েছে :

এবং যারা তোমার অনুসরণ করে সেই সমস্ত বিশ্বাসীর প্রতি বিনয়ী হও।

[সূরা শু‘আরা : ২১৫ আয়াত]

এই আত্মীয়তা-কুটুম্বিতা ও স্নেহপ্রবণতা এমনই এক সুদৃঢ় ‘ইত্তিহাদ’ (এক্য) পয়দা করে দিয়েছিল যে, অপরের শারীরিক কষ্টে নিজের কষ্ট এবং অপরের আত্মিক ও মানসিক প্রশান্তিতে নিজের মানসিক ও আত্মিক প্রশান্তি মিলত। আমীর হাসান ‘আলা সিজবী বর্ণনা করেন যে, একবার বৈঠক অনুষ্ঠিত হচ্ছিল

ছায়ায় স্থান সংকুলান না হওয়াতে কেউ কেউ রৌদ্রে বসেছিল। ছায়ায় উপবেশন-কারীদের লক্ষ্য করে হযরত খাজা (র) বললেন, ভাইয়েরা! তোমরা একটু মিলে-মিশে বস যাতে তোমাদের ভাইদেরও স্থান সংকুলান হয় এবং তারাও বসতে পারে। এরা রৌদ্রে বসে আছে আর আমি তাদের অগ্নিদগ্ধ করছি।^১

একবার তিনি জনৈক বুয়র্গের একটি উক্তি উদ্ধৃত করলেন যা ছিল প্রকৃত-পক্ষে তাঁর নিজ অবস্থারই প্রতিনিধিত্ব আর তা ছিল এই যে, “আল্লাহর মাখলুক আমারই সামনে আহ্বার করে থাকে, আর তাদের খানা আমি আমার কণ্ঠনালীতে অনুভব করি। অর্থাৎ তারা নয়, সে খানা যেন আমি খাচ্ছি।”^২

আমীর হাসান ‘আলা সিজযী বলেন যে, আমি একবার অসময়ে গিয়ে হাযির হই এবং আরম্ভ করি যে, আমি এদিকে বন্ধু-বান্ধবের সঙ্গে সাক্ষাতের উদ্দেশ্যে এসেছিলাম। একবার হাযিরা দিতে মন চাইল। কোন কোন দোস্ত বলল যে, যদি কেউ অন্য কোন উদ্দেশ্যে ও কাজে এসে থাকে এবং প্রথম থেকে এখানে আসার আদৌ ইচ্ছা না থাকে, তবে হযরত শায়খ (র)-এর খিদমতে উপস্থিত না হওয়াটাই সমীচীন। আমি মনে মনে ভাবলাম যে, যদিও নিয়মটা এই, কিন্তু অন্তর তো প্রবোধ মানে না, আমি এখানে এসেও হযরত খাজা (র)-এর সঙ্গে একবার সাক্ষাত না করেই ফিরে যাই। আজ আমি সেই নিয়মের খেলাফই করব। যখন দেখা করলাম তখন উত্তর ছিল, এসে ভালই করেছ। এরপর আরও বললেনঃ বুয়র্গদের নিয়ম এটাই যে, কেউ তাদের নিকট ইশরাকের পূর্বে এবং ‘আসরের পরে যায় না। কিন্তু আমার এসব কোন নিয়ম নেই। যখনই মন চাইবে চলে আসবে।^৩

সাধারণের প্রতি সমবেদনা

এই আল্লাহুওয়াল্লা লোকেরা এমনিতে দুনিয়ার প্রতি উদাসীন এবং অন্তর থেকেই এর প্রতি বিমুক্ত, কিন্তু দুনিয়াবাসীর দুঃখ-শোক ও আল্লাহর সৃষ্ট জীবের চিন্তায় তাঁরা থাকেন বিমর্ষ চিন্ত। তাঁরা একদিকে নিজের শোক-দুঃখ ভুলে থাকেন, অপরদিকে সারা দুনিয়ার শোক-ব্যথাকে নিজেদের শোক-ব্যথায় পরিণত করেন। একথা বলবার অধিকারী প্রকৃতপক্ষে তাঁরাই যারা বলেন :

سارے جہاں کا درد ہمارے جگر میںی

সমগ্র দুনিয়ার ব্যথা-বেদনা আমাদের অন্তরে লালিত ও পোষিত।

১. ফাওয়ায়েদুল ফুওয়াদ, পৃ. ৯১।

২. সিয়াকুল আওলিয়া, পৃ. ৭৭।

৩. ফাওয়ায়েদুল ফুওয়াদ, পৃষ্ঠা ৯৮।

খাজা নাসীরুদ্দীন চেরাগে দিল্লী (র)-এর দৌহিত্র খাজা শরফুদ্দীনকে কোন এক মজলিসে জনৈক সূফী বলেছিলেন যে, খাজা নিজামুদ্দীন (র) আশ্চর্য উদাসীন প্রকৃতির মানুষ। একাকী থাকেন, পরিবার-পরিজন কিংবা বাচ্চা-কাচ্চার কোন বাঞ্ছাট-ঝামেলা নেই। এসব থেকে তিনি এমনই মুক্ত যে, একবিন্দু চিন্তা-ভাবনাও তাঁকে স্পর্শ করেনি। হযরত খাজা (র)-এর ভক্ত শরফুদ্দীন উক্ত মজলিস থেকে উঠে হযরত খাজা (র)-এর খিদমতে হাযির হন। ইচ্ছা করেছিলেন যে নিজেই তা বলবেন। এদিকে হযরত খাজা (র) নিজেই বলেন :

মিঞা শরফুদ্দীন ! সময়ে আমার অন্তরে যে দুঃখ-বেদনার সঞ্চার হয়ে থাকে সম্ভবত অপর কোন ব্যক্তির তা থেকে বেশি হয় না। কোন লোক যখন আমার নিকট আসে, নিজেদের হাল-অবস্থা আমাকে ব্যক্ত করে, তখন তারও দ্বিগুণ ব্যথা-বেদনা ও চিন্তা-ভাবনা আমার অন্তরে সঞ্চারিত হয়। অত্যন্ত কঠোরমনা ও নির্মম হৃদয় সে, যার দীনী ভাইয়ের শোক-ব্যথা তার অন্তরে কোনরূপ প্রতিক্রিয়া সৃষ্টিতে ব্যর্থ হয়। এছাড়া আরও বলা হয়েছে :

المخلصون على خطر عظيم -

আল্লাহর মুখলিস বান্দারা সর্বদাই বড় বিপদের মুকাবিলা করে থাকেন।”

হযরত খাজা (র)-এর মতে মুসলমানদের অন্তরকে খুশী করা^১, তাদের অন্তর প্রশান্তি ও আনন্দে ভরে দেওয়া সর্বোৎকৃষ্ট আমল এবং আল্লাহর নৈকট্যলাভের উত্তম মাধ্যম। সিয়াকুল আওলিয়া নামক গ্রন্থে বলা হয়েছে যে, তিনি বলেছেন :

আমাকে স্বপ্নে একটি কিতাব দেওয়া হয়। তাতে লেখা ছিল, যতটুকু সম্ভব মানুষের অন্তর খুশী রাখতে এবং আনন্দ ও তৃপ্তিতে তা ভরে দিতে। কেননা মু'মিনের অন্তর রবুবিয়তের গোপনতম রহস্যের স্থান। জনৈক বুয়র্গ কত সুন্দরই না বলেছেন :

می کوشش که راحت بجانبه برسد

یاد ست شکسته بنانه برسد

চেষ্টা কর যেন মানুষের অন্তর তোমার দ্বারা আরাম পায় অথবা যে গরীব ও দীন-ভিখারী সে যেন তোমার দ্বারা রুটি-রুখীর বন্দোবস্ত করতে পারে।

একবার বলেছিলেন :

কিয়ামতের দিন কোন পণ্যসামগ্রীর এত বেশি দাম হবে না যেসকল দাম হবে অপরের সুখ-সুবিধার প্রতি খেয়াল রাখায় এবং অপরের অন্তর-মনকে আনন্দ ও তৃপ্তিতে ভরে দেওয়ায়।^২

ছোটদের প্রতি স্নেহ

হযরত খাজা (র) স্বীয় মূল্যবান মুহূর্তের হাযারো রকমের ব্যস্ততা সত্ত্বেও এবং অধ্যাত্ম জগতের উন্নত মার্গে বিচরণ করা সত্ত্বেও কচি মা'সুম বাচ্চা ও ছোটদের প্রতি অত্যন্ত স্নেহপ্রবণ ছিলেন এবং নিজের ভীষণ কর্মব্যস্ততা সত্ত্বেও তাদের অন্তর হাসি-খুশী ও মায়ামমতায় ভরে দিতে আলাদা সময় করে নিতেন। এই বিরাট দায়িত্ব এবং আধ্যাত্মিক নিমগ্নতা সত্ত্বেও তিনি বাচ্চা ছেলে-মেয়েদের প্রতি পুরো লক্ষ্য রাখতেন এবং এমনকি তাদের ছোটখাটো কথাবার্তার দিকেও খেয়াল রাখতেন।

খাজা রফী'উদ্দীন ছিল তাঁর আপন ভাতিজার পুত্র। যদি কখনও খাবার সময় হ'ত এবং সে তখন হাযির না থাকত তবে বড় বড় বুয়র্গ দস্তরখানের ওপর উপবিষ্ট থাকা সত্ত্বেও তিনি তার আগমনের অপেক্ষা করতেন। তিনি আপন ছেলের মতই একাকিত্বে ও মজলিসের জনসমাগমে তাকে তরবিয়ত দিতেন ও মন রক্ষা করে চলতেন।^১

খাজা রফী'উদ্দিন তীর-ধনুক এবং সাঁতার খেলা ও কুস্তি লড়ার প্রতি প্রবল আগ্রহী ছিল। হযরত সুলতানুল মাশায়িখ অত্যন্ত আদর-সোহাগের সাথে তার সঙ্গে এসব বিষয়ে কথাবার্তা বলতেন, তাকে উৎসাহ দিতেন ও উদ্দীপ্ত করে তুলতেন। এসব বিষয়ের সূক্ষ্মতিসূক্ষ্ম দিক এবং খুঁটিনাটি বিষয়ে তাকে তা'লীম দিতেন যাতে সে খুশী হয়।^২

যে সমস্ত অভিজাত বংশীয় যুবক এবং অর্থ-কড়ির দিক দিয়ে সামর্থ্যের অধিকারী ব্যক্তি স্বীয় যুগের সৌখিন লোকদের ন্যায় পোশাক-পরিচ্ছদ পরিধান করত, হযরত খাজা (র) তাদেরও খাতির করতেন এবং এটাকে তাদের যৌবন ও তারুণ্যের স্বাভাবিক দাবি মনে করে উপেক্ষা করতেন। অধিকন্তু স্বীয় চরিত্র মাধুর্য, সদ্যবহার এবং স্নেহ ও ভালবাসার দ্বারা তাদেরকে ইসলাহ (সংস্কার-সংশোধন) ও তরবিয়তের অধীন আনয়ন করতে প্রয়াসী হতেন।

সিয়াকুল আওলিয়া প্রণেতা আমীর খোরদ লিখেন যে, আমার চাচা সায়্যিদ হুসায়ন কিরমানী ছিলেন তখন যুবক। সে যুগের স্বাভাবিক প্রবণতা মাফিক যৌবনসুলভ চপল পোশাক-পরিচ্ছদে সজ্জিত হয়ে একদিন তিনি হযরত খাজা (র)-এর দরবারে এসে হাযির। হযরত খাজা (র) তাকে দেখে বলেন, سيد بياد بير بنشين وسعادت بير (সায়্যিদ এসে বস এবং সৌভাগ্যের অংশীদার হও।)

১. ঐ, পৃ. ২০৩।

২. ঐ, পৃ. ২০৩।

আল্লাহুই ভাল জানেন যে, এই আদর-সোহাগ ও স্নেহ-মমতা এবং খাতির-যত্নের ফলে কত যুবকেরই না ইসলাহ ও তরবিয়ত লাভ সম্ভব হয়েছে, আর কত কঠিন বন্য স্বভাবের লোকই না প্রেম ও মুহব্বতের নিগড়ে আবদ্ধ হয়েছে এবং আল্লাহর মকবুল বান্দা ও কামিল বুয়র্গগণের অন্তর্ভুক্ত হয়েছেন।

হযরত খাজা (র)-এর সব আখলাক ও গুণাবলী এবং সূফীয়ায়ে কিরামের ন্যায় জীবনচরিত দেখে ইমাম গায়ালী (র)-এর সেই অভিমত ও সাক্ষ্যের সত্যতা প্রমাণিত হয় যা তিনি 'সত্যের সন্ধানে' দীর্ঘ সফর এবং বিভিন্ন গ্রুপ ও মানুষের নানা শ্রেণী সম্পর্কে গভীর অধ্যয়ন ও পর্যবেক্ষণের পর প্রকাশ করেছিলেন, "আমি নিশ্চিতভাবেই জানতে পেরেছি যে, সূফী সম্প্রদায়ই একমাত্র আল্লাহর পথের পথিক, তাঁদের জীবনচরিতই সর্বোত্তম জীবনচরিত, তাঁদের পথই অত্যধিক মযবুত ও সুদৃঢ় এবং তাঁদের আখলাকই (চরিত্র-ব্যবহার) সর্বোপেক্ষা প্রশিক্ষণপ্রাপ্ত, সঠিক ও বিশুদ্ধ। যদি বুদ্ধিজীবীদের বুদ্ধিবৃত্তি, জ্ঞানীদের জ্ঞান-বুদ্ধি এবং শরীয়তের সূক্ষ্ম-তত্ত্ববিদগণের সূক্ষ্ম জ্ঞান একত্রে মিলেও তাঁদের জীবনচরিত ও আখলাক থেকে উত্তম কোন কিছু আনয়ন করতে চায়, তবে তা সম্ভব হবে না। তাঁদের প্রকাশ্য ও প্রচ্ছন্ন সকল প্রকার গতিবিধি নবুওতের উজ্জ্বল প্রদীপের দীপ্ত আলোকমালা দ্বারা নির্দেশিত ও আলোকপ্রাপ্ত। আর নূরে নবুওত থেকে উজ্জ্বলতর কোন নূর দুনিয়ার বুকে কিই-বা হতে পারে যা থেকে আলো গ্রহণ করা যেতে পারে।"^১

১. আল-মুনকিয় মিনাদ-দালাল (দিশারী ও সত্যের সন্ধানে নামে বাংলায় অনূদিত)।

চতুর্থ অধ্যায়

স্বাদ-আহ্লাদ ও বাস্তব অবস্থাদি

প্রেম-মুহুরত ও স্বাদ-আহ্লাদ

হযরত খাজা (র)-এর জীবন-চরিত এবং জীবনের কেন্দ্রবিন্দু যা তাঁর গোটা আমল-আখলাক ও সামগ্রিক অবস্থাকে ঘিরে আবর্তিত, তা ছিল ঐশী প্রেম যা আল্লাহ প্রদত্ত নিয়ামত এবং যা তাঁর জীবনের প্রথম প্রভাত থেকেই তাঁর ভেতর ছিল প্রতিভাত। প্রেমের স্কুলিঙ্গ যা তাঁর প্রকৃতি ও স্বভাবে আশৈশব একদম মিশে গিয়েছিল, শায়খুল কবীরের সাহচর্য ও চিশতিয়া তরীকার সম্পর্কের কারণে যিনি উত্তম লৌহশলাকায় পরিণত হয়েছিলেন, তাঁর সারাটা জীবন এবং অর্ধ শতাব্দীরও অধিককাল দিল্লী ও তার পারপার্শ্বিক পরিবেশকে উত্তম ও আলোকিত করে রেখেছেন এবং ঐ একই কারণে কয়েক শতাব্দী পর্যন্ত ভারতীয় উপমহাদেশের আবহাওয়া ও পরিবেশ ঐশী প্রেমের (ইশকে ইলাহীর) উত্তাপ দ্বারা উত্তম ও দ্রবীভূত ছিল। তাঁর সমগ্র অবস্থা, কর্মব্যস্ততা, আলাপ-আলোচনা ও বৈঠকাদি, কাব্যচয়ন ও নির্বাচন, সংঘটিত ঘটনাবলী ও তাঁর রেখে যাওয়া শিক্ষামূলক দৃষ্টান্ত— মোটকথা প্রত্যেকটি জিনিস থেকেই সেই আধ্যাত্মিকতার রশ্মি এবং সেই উত্তম ইশকের প্রকাশ ঘটত।

ফাওয়ানেদুল ফুওয়াদ নামক গ্রন্থে লিখিত আছে যে, এক দিন আল্লাহর ওলীদের জীবনের ঘটনাবলীর ওপর আলোচনা হচ্ছিল। উপস্থিত ব্যক্তিদের মধ্যে একজন জনৈক বুয়র্গের কাহিনী বর্ণনা করল, তাঁর ইত্তিকাল হচ্ছিল এবং আস্তে আস্তে আল্লাহর নাম তাঁর মুখ দিয়ে উচ্চারিত হচ্ছিল। একথা শোনার পর হযরত খাজা (র)-এর চোখ অশ্রুসজল হয়ে ওঠে এবং নিম্নোক্ত চতুষ্পদী আবৃত্তি করেনঃ

ایم بسر کوئے تو پویاں پویاں

رخساره با بدیده شویاں شویاں

بیچاره زوصل جویاں جویاں

جان می دهم و نام تو گویاں گویاں

তোমার গলিতে চলে আসছি উত্তম ও স্বচ্ছল গতিতে আর গঞ্জদয় চোখের পানিতে ধুয়ে চলছি। তোমার মিলনের প্রত্যাশায় জীবন দিয়ে দিচ্ছি আর তোমার নাম জপে চলেছি।

এ প্রেমের পরিণতি এই ছিল যে, অন্তরে স্বীয় প্রেমাম্পদের ধ্যান-ধারণা ছাড়া অন্য কোন কিছুর স্থান ছিল না এবং কোন দিকে লক্ষ্য করার মত অবকাশও ছিল না।

আমীর হাসান 'আলা সিজযী বর্ণনা করেন যে, একবার তিনি বলেন, যদি কখনো আকস্মিকভাবে ঐ সমস্ত কিতাব অধ্যয়ন করতে শুরু করি যা আমি পড়েছি, তখন আমার প্রকৃতিতে ভীতিপ্রদ অবস্থার সৃষ্টি হয় এবং নিজের মনেই বলি, 'এ আমি কোথায় এসে পড়েছি।' এক্ষেত্রে তিনি হযরত খাজা (র) আবু সাঈদ আবুল খায়ের (র)-এর ঘটনা বিবৃত করেন। খাজা আবু সাঈদ কামালিয়াতের দরজায় পৌছবার পর যে সকল কিতাব তিনি এককালে পাঠ করেছিলেন এবং যা ঘরের এক কোণে শোভা পাচ্ছিল, একদিন অধ্যয়ন করা শুরু করেন। অমনি গায়েবী আওয়াজ ভেসে আসে, 'হে আবু সাঈদ! আমাদের প্রতিজ্ঞাপত্র ফিরিয়ে দাও। এখন তো তুমি অন্য জিনিসে মশগুল হয়ে গেছ।' হযরত খাজা (র) এই পর্যন্ত পৌছেই কেঁদে ফেলেন। প্রেমের এই বাদশাহুর পরিণতি তো এই ছিল যে, রাতের নির্জন ও গোপন একাকিত্বে অতিবাহিত করবার পর দিনের আলোয় যখন তিনি উপস্থিত হতেন তখন মনে হত -আমীর খোরদের ভাষায়- মত্ততা উপচে পড়ছে। রাত বিনিদ্র কাটবার কারণে চোখ সাধারণত রক্তবর্ণ ধারণ করত এবং প্রেমের এই উত্তাপ এবং মত্ততার এই আমেজের পরিণতি এই ছিল যে, বৃদ্ধ বয়সেও বরাবরই তিনি সিয়াম পালন করে চলতেন। স্বল্প পরিমাণে খাদ্য গ্রহণ, বিনিদ্র রাত্রি যাপন এবং কঠিন মুজাহাদা সত্ত্বেও দুর্বলতা কিংবা শক্তিহীনতার কোন আলামত তাঁর মধ্যে পাওয়া যেত না। আশি বছর বয়স অতিক্রান্ত হওয়া সত্ত্বেও চেহারায় সেই লালচে আভা এবং তারুণ্য ও খুশীর সেই বালকেরই সাক্ষাত মিলত যা সাধারণত যৌবনেই মেলে বরং তা যেন দিন দিন বেড়ে চলছিল।'

সামা^২

প্রেমের এই উত্তাপ, জ্বালা ও অস্থিরতা উপশমের একটি মাত্র মাধ্যম ছিল আর তা হল 'সামা' অর্থাৎ 'ইশ্কে ইলাহীতে ভরপূর কাব্য এবং আধ্যাত্মিক ভাবপূর্ণ শ্লোকমালা শোনা যদ্বারা অন্তর তার তাপ উদ্গীরণের সুযোগ পায় এবং

১. সিয়াকুল আওলিয়া।

২. সামা'র মসলা (বিনা বাদ্যযন্ত্রে-এর পক্ষে-বিপক্ষে, অনুকূলে ও প্রতিকূলে অনেক কিছুই লেখা হয়েছে। এক্ষেত্রে ভারসাম্যময় ও যুক্তিপূর্ণ বিধান এই যে, সামা' আদতে হারাম যেমন নয় তেমনি তা কোন 'ইবাদত-বন্দেগী, আনুগত্য-অনুসরণও নয়-নয় কোন পরম লক্ষ্য, বরং এ একটি ভারসাম্যময় ও নির্দিষ্ট কতিপয় শর্তাধীনে একটি তদবীর ও চিকিৎসা এবং প্রয়োজনের মুখাপেক্ষী ও যোগ্যতার

(পরবর্তী পৃষ্ঠায় দেখুন)

অশ্রুত ঝাণ্টা দ্বারা তার উষ্ণতা হ্রাস করার মওকা মেলে। এরই সঙ্গে মুজাহাদার ফলে ক্লান্ত ও অবসন্ন দেহ-প্রকৃতি এবং আহত দেমাগ নফী'র যিক্রের কারণে যেন সজীবতা ফিরে পায়। মাওলানা রুমীও সামা'র একজন বিশেষ অনুরাগী ছিলেন। স্বয়ং হযরত খাজা নিজামুদ্দীন আওলিয়া (র) নিজ মুখেও 'সামা' সম্পর্কে তথা এর বৈধতা-অবৈধতা সম্পর্কে অনুরূপ কথাই বলেছেন :

'সামা' সত্যবাদী ও বিশ্বস্ত মুরীদ, ভক্তি-শ্রদ্ধার অধিকারী আধ্যাত্মিক পথের কঠোর সাধকের জন্যই সাজে-যখন প্রকৃতি ও দেহ আহত ও বিবশ হয়ে পড়ে (যে সামা' থেকে শক্তি ও সজীবতা লাভ করবে)। হাদীছ পাকে বলা হয়েছে, *ان لنفسك عليك حقا* "তোমাদের ওপর তোমাদের শরীরেরও হক রয়েছে।" একটা বিশেষ সময় পর্যন্ত নফস সামা'র মাধ্যমে আরাম ও শান্তি লাভ করার পর পুনরায় কাজের উপযোগী হয়।^১

মাওলানা কাশানী নামক জৈনিক বুয়র্গ বলেন,

রিয়াযত ও মুজাহাদাকারীদের অন্তঃকরণ ও নফস আধ্যাত্মিক সাধনার বিভিন্ন পর্যায়ে অবস্থার আধিক্যবশত কখনো কখনো বিরক্তি ও বিতৃষ্ণায় ভরে যায় এবং অবসাদগ্রস্ত হয়ে পড়ে এবং এর ওপর সেই ফয়েয ও প্রশস্ততা -যা সকল আমল ও হালতের ক্ষেত্রে টিলেমী ও অলসতার কারণে ঘটে-প্রভাব বিস্তার করে। এজন্য শেষ যুগে বুয়র্গগণ মিষ্টি ও সুমধুর আওয়াজে রুচিশীল ও শোভন এবং গান ও উৎসাহ-উদ্দীপনামূলক কবিতা শ্রবণকে রুহানী চিকিৎসা হিসেবে অনুমোদন করেন, অবশ্য তা যদি শরীয়তের গণ্ডী অতিক্রম না করে।^২

(পূর্ব পৃষ্ঠার পর) অধিকারী ব্যক্তির জন্য জরুরত মাফিক কখনও মুবাহ, আবার কখনও কল্যাণকর। এ ক্ষেত্রে চিশতিয়া তরীকার প্রসিদ্ধ বুয়র্গ কাযী হামীদুদ্দীন নাগোরীর উক্তি গভীর তাৎপর্যপূর্ণ ও ভারসাম্যময় বলে মনে হয়। এক বৈঠকে সামা' হালাল কি হারাম এ সম্পর্কে বাহাছ হ'ছিল। কাযী সাহেব বললেন :

"আমি হামীদুদ্দীন সামা' গুনি এবং একে মুবাহ মনে করি। এর পেছনে ভিত্তি হল-উলামায়ে কিরামের বর্ণিত রিওয়াজেত এবং তা এজন্যও যে, আমি অন্তরের ব্যথার রোগী আর সামা' হল এর দাওয়াই। ইমাম আবু হানীফা (র) মদ দ্বারা চিকিৎসা করানো সেই ক্ষেত্রে জায়েয বলেন যখন রোগ নিরাময়ের আর কোন দাওয়াই মেলে না। এরই ওপর কিয়াস যে, আমার মনের দুরারোগ্য ব্যাধির একমাত্র চিকিৎসা সঙ্গীতলহরী শ্রবণ। অতএব আমার জন্য তা শোনা হালাল হলেও তোমাদের জন্য তা হারাম।" সিয়াকুল আকভাব, কলমী।

১. সিয়াকুল আওলিয়া।

২. মিসবাহুল হিদায়াত, পৃ. ১৮০-১৮২।

অতঃপর 'সামা' হযরত খাজা নিজামুদ্দীন আওলিয়া (র) এবং তাঁর বুয়র্গদের (যাঁরা এমত অবস্থার অধিকারী এবং প্রেমের আশুনে দম্বীভূত হচ্ছিলেন) আরাম ও শান্তির উপকরণ, শক্তির খোরাক এবং আপন প্রেমাস্পদের সান্নিধ্যে উপস্থিত হবার মাধ্যম ছিল— যাকে ঐ সমস্ত বুয়র্গ মানসিক চিকিৎসার্থে ও প্রয়োজনীয়তার তাকীদে অবলম্বন করতেন আর তাও অবলম্বন করতেন চিকিৎসা ও প্রয়োজনের স্বাভাবিক দাবি মাফিক। এটা তাদের না 'ইবাদত-বন্দেগী' ছিল আর না ছিল আল্লাহর নৈকট্যলাভের মাধ্যম। এটা আধ্যাত্মিক সাধন পথে স্থায়ী কোন পদ্ধতি কিংবা রাত্র-দিনের একমাত্র ধ্যান-ধারণাও ছিল না।

এরই সাথে সাথে হযরত খাজা নিজামুদ্দীন (র) শরীয়ত-বিরোধী গর্হিত বিদআত এবং ক্রীড়া-কৌতুকের বিষয়াদি যা অমুসলিমদের প্রভাব থেকে, বিশেষ করে ভারতবর্ষে প্রবৃ্ত্তি ও খেলালী পূজকরা অথবা বিভ্রান্ত সুফীরা সামা'র মধ্যে ঢুকিয়ে দিয়েছিল, নিজেকেও যেমন দূরে রাখেন তেমনই স্বীয় অনুসারীদেরও এসব থেকে মুক্ত ও পবিত্র থাকার কড়া তাকীদ দেন। সামা'র আদব সম্পর্কে তিনি বলেন :

সামা' চার প্রকার। যথা : হালাল, হারাম, মাকরুহ ও মুবাহ। সামা'র ভাবসাগরে উন্মুক্ত ব্যক্তি যদি 'মাহবুবে হাকীকী' তথা প্রকৃত প্রেমাস্পদের অত্যধিক লক্ষ্যাভিসারী হয় তবে 'সামা' মুবাহ। আর 'মাহবুবে মাজাযী' তথা অপ্রকৃত প্রেমাস্পদের দিকে হলে তা হবে মাকরুহ। 'মাহবুবে মাজাযী'র পূর্ণ লক্ষ্যাভিসারী হলে তা হবে হারাম আর 'মাহবুবে হাকীকী'র দিকে পূর্ণ লক্ষ্যাভিসারী হলে তা হবে হালাল। সামার ব্যাপারে যিনি আশ্রয়ী হবেন তিনি যেন এই চারটি বিষয়ে জেনেই এ পথে অগ্রসর হন।

অধিকন্তু তিনি আরও বলেন,

সামা মুবাহ হবার জন্য কয়েকটি বিষয়ে লক্ষ্য রাখা উচিত। সামা' যিনি শোনাবেন তাঁর জন্য শর্ত এই যে, তিনি একজন বয়স্ক ব্যক্তি হবেন; অল্পবয়স্ক কিংবা কোন নারী যেন না হয়। শ্রোতা যা কিছু শোনবেন তা যেন আল্লাহর স্মরণ থেকে মুক্ত না হয়। আর যা কিছু শোনানো হবে তা যেন নির্লজ্জতা ও হাসি-ঠাট্টামূলক কিছু না হয়, আর সামা'র মাধ্যম তবলা, ঢোল, সারেসী ইত্যাদি বাদ্যযন্ত্র যেন না হয়।^১

বাদ্যযন্ত্রের প্রতি ঘৃণা ও অবজ্ঞা এবং এর ওপর নিষেধাজ্ঞা

হযরত খাজা (র) বাদ্যযন্ত্রের ব্যাপারে কঠোরভাবে নিষেধ করতেন এবং এ ব্যাপারে কারো থেকে কোন প্রকার শৈথিল্য প্রকাশ পেতে দেখলে অত্যন্ত নারায় হতেন, আর এক্ষেত্রে কোনরূপ ওয়র-আপত্তি তিনি গ্রহণ করতেন না। সিয়ারুল আওলিয়া নামক গ্রন্থে বলা হয়েছে :

মজলিসে একবার এক ব্যক্তি হযরত সুলতানুল মাশায়িখ (র)-এর খিদমতে আরম্ভ করল, বর্তমানে বেঁচে আছেন এমন কতিপয় দরবেশ এমন একটি মজলিসে- যেখানে বিভিন্ন প্রকার বাদ্যযন্ত্র ছিল-অংশগ্রহণ করেছেন এবং এর সাথে তাঁরা নাচেও অংশ নিয়েছেন। সুলতানুল মাশায়িখ (র) একথা শুনে বললেন, তাঁরা মোটেই ভাল কাজ করেন নি। যে কাজ শরীয়ত বিরোধী তা আদৌ পসন্দনীয় নয়। এতে আরও এক ব্যক্তি আরম্ভ করল, এই সমস্ত দরবেশ যখন উল্লিখিত মজলিস থেকে বের হয়, তখন লোকেরা তাদেরকে জিজ্ঞাসা করে যে, আপনারা একী করলেন? এ মজলিসে তো বাদ্যযন্ত্র ছিল। আপনারা সামা' কিভাবে শুনলেন এবং নাচেই বা অংশ নিলেন কিভাবে? তারা জবাবে বলল, আমরা সামা'র মধ্যে এমনিভাবে মগ্ন ও সমাহিত হয়ে গিয়েছিলাম যে, আমাদের খেয়াল করার আদৌ কোন অবকাশই ছিল না যে, এখানে কোন বাদ্যযন্ত্র আছে। হযরত সুলতানুল মাশায়িখ একথা শুনে বললেন, এটা কোন জবাব হল না। এটা তো প্রতিটি নাফরমানী ও অন্যায কাজের ক্ষেত্রেই বলা চলে।^১

হযরত খাজা (র) বাদ্যযন্ত্র ব্যবহারের ক্ষেত্রে নিষেধাজ্ঞার ব্যাপারে অত্যন্ত কড়াকড়ি করতেন। তিনি বলতেন :

যেখানে একজন মহিলার জন্য ইমামের ভুল শোধরাবার নিমিত্ত সালাতের মধ্যে হাতের শব্দে কিংবা তালি বাজিয়ে ইমামকে সতর্ক করার অনুমতিটুকু পর্যন্ত দেওয়া হয়নি এবং এটাকে অহেতুক ক্রীড়া-কৌতুকের মধ্যে গণ্য করা হয়েছে, যেখানে অহেতুক ক্রীড়া-কৌতুক থেকে পরহেয থাকার ব্যাপারে এতখানি সতর্কতা অবলম্বন করা হয়েছে^২ সেখানে বাদ্যযন্ত্রের ক্ষেত্রে এ নিষেধাজ্ঞা স্বভাবতই অগ্রাধিকার পাওয়া উচিত।

১. সিয়ারুল আওলিয়া, পৃ. ৫২০-৫২১।

২. সিয়ারুল আওলিয়া, পৃ. ৫২২।

সামা'র মধ্যে হযরত খাজা নিজামুদ্দীন (র)-এর অবস্থা
হযরত খাজা (র) বলতেন :

আল্লাহ পাক যাকে ব্যথা-বেদনা ও স্বাদ-উপলব্ধি দান করেছেন তিনি বাদ্যযন্ত্র ব্যতিরেকেই ও একটিমাত্র কলি শ্রবণেই অশ্রু আপ্ত হয়ে ওঠেন। কিন্তু যার স্বাদ ও উপলব্ধির ব্যাপারে আদৌ কোন মাত্রাজ্ঞান নেই, তার সম্মুখে পাঠ আবৃত্তি যতই চলুক না কেন, আর যত বাদ্যযন্ত্রই তার সামনে উপস্থাপিত হোক না কেন, তার ওপর কোনটিরই আছর হবে না। কেননা সে তো বেদনার্তদের কেউ নয়। এ সম্পর্ক তো বেদনা-বিধুরতার সঙ্গে-বাদ্যযন্ত্রের সঙ্গে নয়।^১

বস্তুত হযরত খাজা (র)-এর অবস্থা তো এই ছিল যে, ইশুক-ইলাহী ও আধ্যাত্মিক ভাবধারামণ্ডিত কবিতা শুনতেই তিনি অশ্রু-আপ্ত হয়ে উঠতেন, অথচ লোকে তা জানতে পারত না। খাদিম শুকনো রুমাল দিত আর সে রুমাল অশ্রুসিক্ত হয়ে উঠত। এরপরই শুধু লোকেরা জানতে পারত হযরত খাজা (র) অশ্রু-ভারাক্রান্ত।^২

আমীর খোরদ (যিনি নিজেও শৈশব ও বাল্যে এ ধরনের সামা'র মজলিসে শরীক হতেন এবং অধিকাংশ সময়ই আপন পিতা ও চাচার সঙ্গে এইসব ভাব-গম্ভীর মজলিস ও মন্ততা সৃষ্টিকারী উত্তেজক কবিতা নিয়ে আলোচনা করতেন যা সেখানে পড়া হত) বলেন যে, কখনো কখনো অনেকগুলো কবিতা আবৃত্তি করা হত, কিন্তু কোনরূপ আবেশ-বিহ্বলতা সৃষ্টি হত না। আকস্মিকভাবে কেউ হিন্দী দোহা কিংবা ফারসী প্রেম ও ভক্তিমূলক কবিতা আবৃত্তি করে বসত আর মজলিসে ভাবের জোয়ার সৃষ্টি হত।

কথিত আছে যে, একবার কয়েরবাক নামক বাদশাহর একজন আমীর একটি মাহফিলের আয়োজন করেন। শহরের নেতৃস্থানীয় গণ্যমান্য ব্যক্তিবর্গ ও বুয়র্গ এতে হাযির হন। 'সামা' শুরু হল। কথক অনেক কিছুই শোনাতে থাকল, কিন্তু তাতে কোন প্রতিক্রিয়ার সৃষ্টি হল না। শেষ অবধি হাসান বাহদী কাওয়াল নিম্নোক্ত কবিতা আবৃত্তি করেন :

در کلبه درویشی در محنت بیخویشی

مگذار مرا بامن هر سوئے مکن افسانه

দরবেশীর গৃহে আত্মবিশ্মৃতির সাধনায় আমাকে একা ছেড়ে দিও না; এবং
বিভিন্ন ধরনের গল্প-কাহিনী আমার নিকট বর্ণনা করো না।

কবিতাটি আবৃত্তি করতেই হযরত সুলতানুল মাশায়িখ (র)-এর ওপর কান্না ও আবেগাপ্ত অবস্থা সৃষ্টি হয় এবং এ অবস্থার প্রতিক্রিয়া মজলিসে উপস্থিত সবাইকে অভিভূত ও আচ্ছন্ন করে দেয়।^১

অন্য আর একটি মজলিসের ঘটনা।

বালাখানাতে মজলিস অনুষ্ঠিত হচ্ছিল। আমীর খসরু দাঁড়িয়ে এবং সুলতানুল মাশায়িখ অসুস্থতার কারণে চারপায়ীর ওপর উপবিষ্ট ছিলেন। হাসান বাহদী শায়খ সা'দী (র)-এর নিম্নোক্ত কবিতাটি আবৃত্তি করেন :

سعدی تو کیسی کہ درائی دریں کمند

چندان فتاده اند کہ ماصید لاغریم

“সা'দী, তুমি কেন এই ফাঁদে পা দিচ্ছ?

পতিত অনেক শিকারের মধ্যে আমরা দুর্বল শিকার মাত্র।”

হযরত খাজা (র)-এর তখন অশ্রুসিক্ত অবস্থা এবং এতে তিনি গভীরভাবে সমাহিত হয়ে যান। খাজা ইকবাল রুমাল এগিয়ে দিয়ে চলছিলেন আর তিনি বারবার চোখ মুছে হাসান বাহদীর দিকে তা ঠেলে দিচ্ছিলেন। কিছু বিলম্বে ‘সামা’ সমাপ্ত হল। আমীর খসরুর পুত্র আমীর হাজী তার পিতারই গযল আবৃত্তি করতে শুরু করে যার একটি পংক্তি ছিল এই :

خسرو تو کیستی کہ دزائے دریں شمار

کیں عشق تیغ بر سر مرد ان دین زده است

“খসরু! এ পথে গণ্য করবার মত তুমি কে?

এ হচ্ছে শ্রেমের তরবারি; আল্লাহর মরদে মুজাহিদের মস্তকেই এটি নিক্ষিপ্ত হয়।”

অমনি হযরত খাজা (র)-এর ওপর পূর্বোক্ত অবস্থার সৃষ্টি হল এবং তিনি অনেক বেশী কাঁদলেন।^২

একবার আমীর খসরু গযল পড়েন, যার প্রথম স্তবক ছিল এই :

رخ جمله را نمود مرا گفت تو مبین

زیں ذوق مست بیخبرم کیں سخن چه بود

“সকলকেই তিনি দর্শন দিলেন, কিন্তু আমাকে বলা হল, তুমি দর্শন থেকে বিরত থাক ;

১. সিয়রুল আওলিয়া, পৃষ্ঠা ৫১৪।

২. সিয়রুল আওলিয়া, পৃ. ৫১৫।

এ কী কথা! এর আশ্বাদনেই আমি বিভোর।

তিনি আড় চোখে আমীর খসরাকে একবার দেখলেন। ব্যস! পূর্বোক্ত অবস্থায় তিনি ফিরে গেলেন।^১

সাধারণত যে কবিতাতে হযরত খাজা নিজামুদ্দীন (র)-এর স্বাদ অনুভূত হত ও তিনি আবেগাপ্ত হতেন, দিল্লীর মজলিস-মাহফিল এবং শহরের অলিতে গলিতে বেশ কিছুকাল যাবত তার চর্চা অব্যাহত থাকত। লোকেরা এ থেকে আনন্দ ও স্বাদ উপভোগ করত।^২ সুলতান আলাউদ্দীনও তাঁর দরবারের সভাসদ এবং হযরত (র)-এর দরবারে যাতায়াতকারীদের বিশেষভাবে তাকীদ দিয়ে রেখেছিলেন যে, যে কবিতায় হযরত খাজা (র)-এর স্বাদ ও মত্ততা আসবে তা যেন মনে রাখা হয় এবং বাদশাহকে শোনানো হয়। অধিকাংশ সময় এমন হত যে, বাদশাহ যখন এ রকম কবিতা শুনতেন, যে কবিতা হযরত খাজা (র)-এর মত্ততা ও আবেগ এনেছিল- অত্যন্ত প্রশংসা করতেন এবং বহুক্ষণ ধরে এর স্বাদ গ্রহণ করতেন।

কুরআনুল করীমের স্বাদ

কুরআনুল করীমের স্বাদ গ্রহণ, তাকে হিফয করার ব্যবস্থাকরণ ও তিলাওয়াতের আধিক্য চিশতিয়া তরীকার তথা চিশতিয়া সিলসিলার মাশায়িখে কিরামের চিরন্তন নীতি। হযরত খাজা মুঈনুদ্দীন চিশতী (র) থেকে নিয়ে হযরত খাজা নিজামুদ্দীন (র) পর্যন্ত সবাই কুরআন মজীদ থেকে বিশেষভাবে স্বাদ গ্রহণ করেছেন এবং প্রত্যেকেই তাঁদের নিজ নিজ খাস খলীফা ও বিশিষ্ট মুরীদদিগকে কুরআনুল করীম হিফয করতে এবং এরই মাঝে মগ্ন ও আত্মসমাহিত দেখতে চেয়েছেন আর এ ব্যাপারে বিশেষভাবে তাকীদও করে গেছেন।^৩

খিলাফত প্রদানের মুহূর্তে শায়খুল কবীর (র) হযরত খাজা নিজামুদ্দীন আওলিয়া (র)-কে কুরআনুল করীম হিফয করতে ওসীয়াত করেছিলেন। হযরত খাজা (র) সে ওসীয়াত পূরণ করেছিলেন এবং দিল্লী পৌঁছুতেই এ সিলসিলাও শুরু করে দেন। হযরত খাজা (র) নিজ মুরীদ ও বিশিষ্ট সাধীদেরকেও এ ব্যাপারে উৎসাহিত করতে থাকেন-দিতে থাকেন বিশেষ তাকীদ। আমীর হাসান আলা

১. সিয়াকুল আওলিয়া, পৃ. ৫১৬।

২. সিয়াকুল আওলিয়া, পৃ. ৫১০।

৩. বিস্তারিত জানবার জন্য দেখুন 'মুসলমান্‌কা নিযামে তা'লীম ও তরবিয়াত' ২য় খণ্ড, মাওলানা মানাযির আহসান গীলানীকৃত।

সিজযী যখন হযরত খাজা (র)-এর ভক্তে পরিণত হন, তখন তিনি বৃদ্ধ হয়ে গেছেন। কবিতা রচনা ও কাব্য-চর্চাই ছিল তাঁর সারা জীবনের হবি। হযরত খাজা (র) তাকে দিক-নির্দেশনা দিতে গিয়ে বলেছিলেন যেন সে কাব্য-চর্চার মুকাবিলায় কুরআনুল করীমের সাধনাকেই ওপরে স্থান দেয়। ফাওয়ায়েদুল ফুওয়াদ গ্রন্থে আমীর বলেন :

بارها لفظ مبارك مخدوم شنیده ام می باید که قران خواندن
بر شعر گفتن غالب آید

অর্থাৎ আমি আমার মখদুমের মুখ থেকে এ ধরনের কথা অনেকবারই শুনেছি যে, কবিতা আবৃত্তির তুলনায় কুরআনুল করীমের তিলাওয়াত অধিকতর হওয়া উচিত।^১ অতঃপর তাকে কুরআন মজীদ হিফয করার হিদায়াত দান করেন। তার এক-তৃতীয়াংশ হিফয করতেই তিনি বললেন :

دیگرها اندک یادگیر و یاد گرفته بیشینه مکرر
می کن -

অর্থাৎ অল্প অল্প করে হিফয কর আর হিফযকৃত অংশ বারবার দোহুরাতে থাক।^২

মাওলানা বদরুদ্দীন ইসহাকের সাহেবযাদা খাজা মুহাম্মদ হযরত খাজা (র)-এর পক্ষপুটে লালিত-পালিত হচ্ছিলেন। তাঁকেও তিনি কুরআন মজীদ হিফয করান। খাজা মুহাম্মাদ ইমাম ছিলেন, ছিলেন একজন ভাল হাফিয এবং তাঁর এলহানও (কণ্ঠস্বর) ছিল অত্যন্ত মিষ্ট। তাঁকে তিনি সালাত আদায়ের ইমাম নিযুক্ত করেছিলেন। তাঁর পঠিত কিরাত শুনে তাঁর চোখ অশ্রু-ভারাক্রান্ত হয়ে উঠত, আমেজ অনুভব করতেন তিনি।^৩ তাঁর অপর এক ভাই খাজা মূসাও ছিলেন একজন হাফিয ও কারী। স্বাভাবিক নিয়ম ছিল যে, যখনই তিনি দস্তরখানের ওপর বসতেন তখনই সর্বপ্রথমে খাজা মুহাম্মাদ এবং খাজা মূসা কুরআন মজীদের কিছু অংশ তিলাওয়াত করতেন। একে দু'আয়ে মায়েদা' বলা হত।^৪ এরপর শুরু হত খানাপিনা। স্বীয় দৌহিত্র (ভাগিনার সন্তান) খাজা রফীউদ্দীন প্রমুখকেও কুরআন মজীদ হিফয করিয়েছিলেন। তিনি নিজেও নফল নামাযে কুরআন শরীফ পড়তেন এবং বিশিষ্ট খাদিমদের থেকে জানতে চাইতেন যে, এ ব্যাপারে তাদের অভ্যাস-আচরণ কি?

১. ফাওয়ায়েদুল ফুওয়াদ, পৃ. ২৪৯। ২. ঐ পৃষ্ঠা ৯৩।

৩. সিয়াকুল আওলিয়া, পৃ. ২০০। ৪. সিয়াকুল আওলিয়া, পৃ. ১৯৯।

শায়খ (র)-এর সাথে সম্পর্ক

এমনিতেই কোন ব্যক্তি যদি কারো কাছ থেকে কোনরূপ অনুগ্রহপ্রাপ্ত হয় (যদি তার স্বভাব-প্রকৃতিতে ভদ্রতা ও সৌজন্যবোধের প্রেরণা বিদ্যমান থাকে) তবে তার প্রতি অনুগত হয়ে থাকে এবং তাকে স্বীয় উপকারী বন্ধু মনে করে। কিন্তু হযরত খাজা (র)-এর স্বীয় মুরশিদ-এর সাথে গভীর প্রেমপূর্ণ ও আত্মিক সম্পর্ক ছিল। তাঁর বৈশিষ্ট্য ও আত্মিক উন্নতিতেও মুরশিদের একটা বিশিষ্ট ভূমিকা ছিল। এই মেহনতের ফল এই হয়েছিল যে, যখন কোন মাহবুব (প্রেমাপ্পদ)-এর প্রশংসা কীর্তন করা হত, তখনই তাঁর আপন শায়খ ও মুরশিদ-এর স্মৃতি জাগরুক হয়ে উঠত এবং তাকেই তিনি এর সত্যতার মাপকাঠি মনে করতেন।

জামা'আতের ব্যবস্থাপনা ও দৃঢ় মনোবল

বার্থক্যের শত দুর্বলতা এবং কঠোর কঠিন মুজাহাদা সত্ত্বেও জামা'আতে সালাত আদায়ের ক্ষেত্রে তিনি অত্যন্ত পাবন্দ ছিলেন। সিয়ারুল আওলিয়া' প্রণেতা বলেন :

বয়স আশি বছর অতিক্রান্ত হয়ে গিয়েছিল, তবুও জামা'আতের সাথেই তিনি পাঁচ ওয়াক্ত সালাত আদায় করতেন। এজন্য উঁচু বালাখানা থেকে জামা'আতখানায় অবতরণ করতেন এবং সেখানেই উপস্থিত দরবেশ ও সঙ্গী-সাথীদের সাথে তা আদায় করতেন। বয়সের আধিক্য সত্ত্বেও সর্বদা সিয়াম পালন করতেন। বিনা সিয়ামে খুব কম দিনই অতিবাহিত হত।^১

শরীয়তের পাবন্দী এবং সুলতানের অনুসরণে কর্মপন্থা

হযরত খাজা (র) স্বয়ং সুলতানে রসূল (স)-এর অনুসরণের ক্ষেত্রে নিয়মিত ও কঠোর ছিলেন।

এ ব্যাপারে তিনি স্বীয় সঙ্গী-সাথী ও খাদিমকুলকেও অত্যন্ত তাকীদ দিতেন। সুলতান ছাড়াও মুস্তাহাব ও নফল যাতে ফওত হতে না পারে সেজন্যও তাঁর কঠোর তাকীদ ছিল। সিয়ারুল আওলিয়া নামক গ্রন্থে হযরত খাজা (র) নিম্নরূপ উক্তি করেছেন :

রাসূলুল্লাহ (স)-এর অনুকরণ ও অনুসরণে অত্যন্ত মযবুত ও দৃঢ়তা প্রদর্শন করা উচিত এবং এও দেখা উচিত যেন কোন মুস্তাহাব ও নফলও ফওত হতে না পারে।^২

মাশায়িখে কিরামের জন্য এবং যিনি বায়'আত গ্রহণ করবেন (পীর), তাঁর জন্য শরীয়তের হুকুম-আহকাম এবং তরীকত ও হাকীকতে প্রয়োজনীয় জ্ঞান থাকা দরকার। তাহলে তাঁরা আর শরীয়তের খেলাফ কোন কাজ করার জন্য বলতে পারবেন না।^৩

পঞ্চম অধ্যায়

পরোপকার ও গভীর বিশ্লেষণ

জ্ঞানের মর্যাদা

হযরত খাজা নিজামুদ্দীন আওলিয়া (র) বাতিনী ইলমে কামালিয়াত লাভের সাথে সাথে যাহিরী ইলমেও অত্যন্ত উচ্চ মর্যাদার অধিকারী ছিলেন। সেকালের প্রচলিত জ্ঞান-বিজ্ঞানের সমস্ত শাখাই তিনি দৃঢ় মনোবল, কঠিন অধ্যবসায় ও সুশৃঙ্খলভাবে অধ্যয়ন করেছিলেন। তাঁর শিক্ষকমণ্ডলীর মধ্যে সে যুগের শ্রেষ্ঠতম বুয়র্গ ও মনীষীবৃন্দ রয়েছেন। সাহিত্য ও ধর্মীয় বিষয়ে তিনি প্রখ্যাত অভিটর জেনারেল শামসুল মুল্ক মাওলানা শামসুদ্দীন খারিযমী থেকে শিক্ষা লাভ করেন। মাওলানা কামালুদ্দীন যাহিদ মুহাম্মাদ ইবনে আহমাদ মারিকলী থেকে হাদীছের দরস গ্রহণ করেন—যিনি ছিলেন ‘মাশারিকুল আনওয়ার’ প্রণেতা ইমাম হাসান ইবনে মুহাম্মাদ আস-সাগানীর শাগরিদ। একই মাধ্যমে তিনি ‘হিদায়া’ প্রণেতার শাগরিদও বটেন। তিনি কিছু কিতাব শায়খুল কবীর হযরত শায়খ ফরীদুদ্দীন গঞ্জ শকর (র)-এর নিকটও অধ্যয়ন করে ‘ইলমের ভাণ্ডার পূর্ণ করেন।

জ্ঞান-বিজ্ঞান ও সাহিত্যের সঙ্গে সম্পর্ক

যদিও স্বীয় প্রকৃতিগত মেধা এবং শায়খ-এর বাতিনী নিসবত (সম্পর্ক)-এর প্রভাবে তিনি দিন দিনই শব্দের মুকাবিলায় অর্থ, অর্থের মুকাবিলায় প্রকৃত তাৎপর্য বিশ্লেষণ ও অবস্থা পর্যবেক্ষণ এবং নামের চেয়ে নামকরণের ভেতরেই বেশী নিমজ্জিত হয়ে পড়েন, তথাপিও জ্ঞান ও সাহিত্যের সঙ্গে পারস্পরিক সম্পর্ক এবং জ্ঞানের জন্য তাঁর নিষ্ঠা ও আস্থাদন শেষ অবধি অবিচল থাকে।

সিয়ারুল আওলিয়া গ্রন্থে বলা হয়েছে যে, মাওলানা রুকনুদ্দীন চিগর আল্লামা জারুল্লাহ বামাখশারীর ‘কাশশাফ’ ও ‘মুফাসসাল’ নামক প্রসিদ্ধ গ্রন্থদ্বয় এবং এ দু’টি ব্যতিরেকেও কতিপয় কিতাব হযরত সুলতানুল মাশায়িখ (র)-এর খাতিরে তাঁর খিদমতে নকল করে পৌঁছিয়েছিলেন।^১ এ দু’টি কিতাবই সুপ্রসিদ্ধ মু’তাবিলী

মনীষী আল্লামা মাহমুদ জারুল্লাহ যামাখশারী (মৃত্যু ৫৩৮ হিজরী) রচিত। প্রথমটি তফসীর গ্রন্থ এবং দ্বিতীয়টি আরবী ব্যাকরণ গ্রন্থ। এ থেকেও তাঁর জ্ঞানের প্রতি সীমাহীন নিষ্ঠা ও প্রীতি এবং দৃষ্টিভঙ্গীর উদারতার পরিচয় পাওয়া যায়। উক্ত সিয়ারুল আওলিয়া গ্রন্থেই রয়েছে যে, সায়্যিদ খামুশ ইবনে সায়্যিদ মুহাম্মাদ কিরমানী একান্ত সান্নিধ্যে 'খামসায়ে নিয়ামী' নামক গ্রন্থ হযরত খাজা নিজামুদ্দীন (র)-এর নিকট অধ্যয়ন করতেন।^১ হযরত খাজা (র)-এর সাহিত্যপ্রীতি এত বেশী গভীর ও পবিত্র ছিল যে, আমীর খসরুর মত একজন শীর্ষস্থানীয় নামবাদা কবিকেও (যিনি স্বীয় ক্ষেত্রে তুলনাহীন এবং ফারসী সাহিত্যের প্রথম সারির কবিদের অন্যতম) তাঁর কাব্যের ক্ষেত্রে প্রয়োজনীয় পরামর্শ দিয়েছিলেন—করেছিলেন পথ-নির্দেশনা। সিয়ারুল আওলিয়া গ্রন্থে রয়েছে যে, প্রথমদিকে আমীর খসরু যে সব গয়ল গাইতেন সেগুলিকে হযরত সুলতানুল মাশায়িখ (র)-এর খিদমতে প্রয়োজনীয় সংশোধনের জন্য পেশ করতেন। একবার তিনি আমীর খসরুকে বলেছিলেন যে, গয়ল ইস্পাহানীদের পদ্ধতিতে গাইবে।^২

হাদীছ ও ফিকহর ওপর দৃষ্টি নিক্ষেপ

সুলতান গিয়াছুদ্দীন তুগলকের দরবারে সামা সংক্রান্ত মাসআলা নিয়ে যে বিতর্ক সভা অনুষ্ঠিত হয়েছিল তাতে হযরত খাজা (র) উক্ত মাসআলার ওপর যে বক্তব্য উপস্থাপন করেছিলেন এবং এর ওপর যে সমালোচনা পেশ করেছিলেন তা থেকেও তাঁর জ্ঞানগত মরতবা ও মর্যাদা এবং প্রশস্ত ও উদার দৃষ্টিভঙ্গীর পরিচয় পাওয়া যায়।

ভারতবর্ষে হযরত শায়খ 'আবদুল হক মুহাদ্দিছে দেহলভী (র)-এর পূর্বে 'সিহাহ সিভা' হাদীছ গ্রন্থের তেমন পরিচিতি ও প্রচলন ছিল না এবং মানুষের পরিচিতি ও অবগতির সীমারেখা বুখারী ও মুসলিম শরীফের বাইরে অগ্রসর হতে পারেনি। হাদীছের মধ্যে 'মাশারিকুল আনওয়ার' ও 'মিশকাত শরীফকেই 'ইল্মের পুঁজি এবং হাদীছশাস্ত্রের চূড়ান্ত ও সর্বশেষ ধাপ মনে করা হত।^৩ বিস্তারিত জানার জন্য দেখুন *الثقافة الاسلاميه فى الهند* এর হাদীছ অধ্যায়। সুফীদের মুখে মওযু ও য'সিফ হাদীছের আধিক্য ও ছড়াছড়ি এবং বুয়র্গদের মালফুযাত মজলিসগুলিতে বেদেরেগ বর্ণিত হত। আজগুবি ও মনগড়া এবং মওযু' হাদীছ সম্পর্কে জ্ঞান আল্লামা মুহাম্মাদ তাহির পাটনীর পূর্বে এখানে

১. সিয়ারুল আওলিয়া, পৃ. ২১৯।

২. সিয়ারুল আওলিয়া, পৃ. ৩০১।

পরিদৃষ্ট হয় না। হযরত খাজা (র)-এর মালফুযাত ও জীবন-চরিত থেকে জানা যায় যে, তিনি এমনি ধরনের অনেক ভিত্তিহীন বর্ণনাকে (যা মুখ-নিঃসৃত ও সৃষ্ট) প্রমাণপঞ্জী হিসেবে উপস্থাপন করতেন না এবং তাঁর এ ব্যাপারে পরিচ্ছন্ন দৃষ্টি ছিল যে, সহীহ হাদীছের নির্বাচিত সংকলন হচ্ছে বুখারী ও মুসলিম। ফাওয়াদুল ফুওয়াদ নামক গ্রন্থে বলা হয়েছে, জনৈক ব্যক্তি জিজ্ঞাসা করে যে, এই হাদীছটি কিরূপ - **السُّخَى حَبِيبِ اللَّهِ وَأَنَّ كَانَ كَافِرًا** "দাতা কাকির হলেও আল্লাহর দোস্ত।" তিনি শুনে বললেন, এটা কোন হাদীছ নয়, কোন ব্যক্তির কথিত উক্তি। এক ব্যক্তি আরয করল যে, এটা হাদীছ আরবাদের অন্তর্গত অন্যতম হাদীছ। তিনি বললেন, যা কিছু বুখারী ও মুসলিমে আছে সেগুলিই সহীহ।^১

ইল্মের গুরুত্ব

দ্বীয় মাশায়িখে কিরামতের মতই হযরত খাজা নিজামুদ্দীন (র)-এর দৃষ্টিতেও ইল্মের অত্যন্ত গুরুত্ব ও মর্যাদা ছিল এবং তিনি একে আধ্যাত্মিক পথের

এক্ষেত্রে একটা কথা প্রকাশ করে দেওয়া দরকার যে, হযরত খাজা নিজামুদ্দীন (র) বুখারী ও মুসলিমের মরতবা সম্পর্কে অবহিত থাকা সত্ত্বেও কিন্তু এমন মনে হয় যে, সিহাহু সিভা সাধারণভাবে এবং বুখারী ও মুসলিম বিশেষভাবে ভারতবর্ষে ব্যাপক প্রচলন না হওয়ার কারণে এর সাথে 'উলামায়ে কিরাম ও বুয়র্গ মাশায়িখ সম্পৃক্ত ছিলেন না। স্বয়ং তিনিও (যদি বিতর্ক সভার স্নোয়েদাদ সঠিক হয় তবে) বিতর্ক সভায় যে হাদীছগুলিকে সামা হালাল হবার স্বপক্ষে দলীল হিসেবে পেশ করেছিলেন, সেগুলি কোন সিহাহু সিভা গ্রন্থেই নেই। তদুপরি মুহাদ্দিছগণের নিকটও হাদীছগুলির মান এমন কিছু উঁচু নয়। বিপক্ষীয় উলামায়ে কিরামও-মাদের অধিকাংশই সে যুগের শ্রেষ্ঠ আলিম-উলামা এবং বিচার বিভাগের গুরুত্বপূর্ণ পদে অধিষ্ঠিত ছিলেন-যেভাবে আলোচনা ও দলীল-প্রমাণ পেশ করেছেন তা থেকে ইল্মে হাদীছে তাদের অজ্ঞতাই শুধু প্রকাশ পায় নি, বরং একজন 'আলিমে দীনের এ ব্যাপারে যে ভূমিকা গ্রহণ করা উচিত ছিল সে ক্ষেত্রেও ঘটিত অনুভূত হয়। সহীহ হাদীছ গ্রন্থ, মনগড়া ও আজগুবী হাদীছ এবং হাদীছশাস্ত্রের ন্যায়ানুগ ও আপত্তিকর বিষয়াবলী প্রকাশিত না হবার কারণে খানকাহুলিতে এমন অনেক রসম-রেওয়াজ, এমন কি সিদ্ধান্ত তা'জিমী প্রচলিত ছিল এবং বহুবিধ রিওয়াজেত বিভিন্ন দিন ও মুহূর্তের ফযীলত সম্পর্কে মশহূর ছিল। এগুলি মাশায়িখে কিরামের মালফুযাতগুলিতে অত্যন্ত জোরেশোরে বর্ণনা করা হয়েছে, হাদীছের সহীহ সংকলনগুলিতে যার কোনই অস্তিত্ব নেই এবং মুহাদ্দিছগণ এ ব্যাপারে কঠোর সমালোচনা করেছেন। এসব সামনে রেখেই মুহাদ্দিছকুল ও তাঁদের নিষ্ঠাবান ভক্তবৃন্দের প্রাণান্তকর প্রচেষ্টার মর্যাদা দেওয়া হচ্ছে যারা ভারতবর্ষে হাদীছশাস্ত্র প্রচার এবং সহীহ ও যঈফ হাদীছের মধ্যে পার্থক্য নিরূপণ করেছেন।

পথিকদের সালেকীন-এর জন্য এবং যে সমস্ত লোক হিদায়াত ও তরবিয়তের খিদমত আঞ্জাম দেন তাঁদের জন্য অত্যন্ত জরুরী মনে করতেন।

বাংলার একজন অত্যন্ত প্রতিভাবান যুবক-যিনি পরে আখী সিরাজুদ্দীন নামে মশহুর হয়েছিলেন এবং যিনি পাণ্ডুয়ার মশহুর 'আলিম চিশতিয়া খানকাহর প্রতিষ্ঠাতা ও হালকার মধ্যমণি ছিলেন-লাখনৌতি থেকে মুরীদ হওয়ার নিয়তে দিল্লী আসেন এবং হযরত খাজার মুরীদ হন। তিনি মাওলানা ফখরুদ্দীন যরাবীকে বলেছিলেন, এই যুবক অত্যন্ত যোগ্যতার অধিকারী। যদি কিছু যাহিরী ইল্ম হাসিল করতে পারে তবে দরবেশীতে সে সুদৃঢ় অবদান রাখতে পারবে। এ কথা শুনে মাওলানা ফখরুদ্দীন আরম্ভ করেন যে, আপনি যদি অনুমতি দেন তবে তাকে কিছু দিন আমার সাহচর্যে রেখে জরুরী মাসআলা-মাসায়েল তালীম দিয়ে দিতে পারি। এতে তিনি বললেন, সে আপনার মুহব্বতের সবচেয়ে বড় হকদার। এরপর মাওলানা ফখরুদ্দীন তাকে নিজের সাথে নিয়ে যান এবং অল্প দিনেই দরকারী ইল্মের সঙ্গে পরিচিত ও সম্পৃক্ত করে তোলেন। হযরত খাজা নিজামুদ্দীন (র)-এর ওফাতের পর ইল্মে পরিপূর্ণতা লাভের জন্য উক্ত হযরত কিছু দিন দিল্লীতে অবস্থান করেন। অতঃপর স্বদেশে প্রত্যাবর্তন করেন এবং পূর্ব বাংলায় চিশতিয়া নিজামিয়া সিলসিলার প্রচার ও প্রসারে গুরুত্বপূর্ণ অবদান রাখেন।^১

গভীর জ্ঞানরাজি ও প্রবন্ধাদি

যাহিরী ও বাতিনী ইল্মের ব্যাপকতা, ইখলাস, নিবিষ্ট চিন্তা ও মুজাহাদার ভিত্তিতে তিনি লাভ করেছিলেন গভীর ও বিশুদ্ধ জ্ঞান, বিশ্লেষণাত্মক ও পর্যবেক্ষণমূলক অভিজ্ঞতা-যা সাধারণত কামিল ওলী-আওলিয়া ও মহান একনিষ্ঠ সাধকদের ভাগ্যে জুটে থাকে-যা অভ্যন্তরীণ পরিচ্ছন্নতা, চারিত্রিক পবিত্রতা এবং ইখলাসের অনিবার্য পরিণতি-তাসাওউফপছীরা যাকে ইল্মে লাদুনীর সমার্থক মনে করেন। সিয়াকুল আওলিয়া প্রণেতা বলেন, ইল্ম সম্পর্কিত যখনই কোন আলোচনা হত কিংবা সমস্যা দেখা দিত- তখনই তিনি বাতিনী নূরের আলোকে তার সন্তোষজনক জবাব প্রদান করতেন।

১. সিয়াকুল 'আরিফীন ইত্যাদি।

তিনি উক্ত সমস্যার ওপর এমনই পাণ্ডিত্যপূর্ণ বক্তৃতা দিতেন যে, হাযিরানে মজলিস বিন্মিত হয়ে যেত এবং একে অপরকে বলত যে, এটা তো কোন কিতাবী জবাব নয়, বরং তা রব্বানী ইলহাম এবং ইলমে লাদুন্নীর ফয়েয। এর ভিত্তিতে শহরের শ্রেষ্ঠতম 'উলামায়ে কিরামের মধ্যে যারা 'ইলমে তাসাওউফ অস্বীকার করতেন এবং তাসাওউফপন্থীদের যারা কটুর বিরোধী ছিলেন তাঁরাও হযরত খাজা (র)-এর ভক্তে পরিণত হন এবং লজ্জিত হন নিজেদের জ্ঞানের পরিমাপে ও অহমিকায়।

শরীয়তের বিশুদ্ধ ও সঠিক জ্ঞান

জ্ঞানের এই গভীরতা, সুন্নতের অনুসরণ এবং শরীয়তের বিধি-বিধানের ওপর সুদৃঢ় ও অবিচল আস্থা তাঁর মন-মগজকে এতখানি শান্ত, সুস্থ, সোজা-সরল বানিয়েছিল যে, তাসাওউফপন্থীদের মধ্যে যে সমস্ত বিষয় দীর্ঘকাল থেকে প্রকাশ্য শরীয়তের খেলাফ চলে আসছিল এবং অনেক স্থানেই তা তাসাওউফপন্থীদের রীতি-নীতি ও স্বাভাবিক নিয়মে পরিণত হয়ে গিয়েছিল, হযরত খাজা নিজামুদ্দীন (র) সুস্থ মন-মগজে সে সব গ্রহণ করতেন না। তাঁর রুচি, প্রকৃতি ও পর্যবেক্ষণলব্ধ অভিজ্ঞতা ছিল এর খেলাফ ও পরিপন্থী।

তাসাওউফপন্থী শিবিরে বহু দিন থেকে এ ধারণা চলে আসছিল যে, বিলায়েত নবুওতের তুলনায় সর্বোত্তম এবং আওলিয়ার মর্যাদা আযিয়ায়ে কিরাম থেকে বেশী। কেননা বিলায়েত মা'বুদে হাকীকীর সঙ্গে গভীর সম্পৃক্তি এবং আল্লাহ ব্যতীত সমস্ত কিছুর সঙ্গে সম্পর্কচ্যুতির নাম। অপরদিকে নবুওতে (দা'ওয়াত ও তবলীগের কারণে) সৃষ্টি জগতের সঙ্গে সম্পৃক্ত থাকতে হয়। অতঃপর এর মধ্যেও আরও কয়েকটি দল-উপদল সৃষ্টি হয়ে গেছে। এদের কেউ কেউ আবার মনে করেন যে, আযিয়ায়ে কিরামের বিলায়েত নবুওতের দরজা থেকে উত্তম। হযরত খাজা নিজামুদ্দীন (র) কিন্তু এসব মতবাদ স্বীকার করতেন না। ফাওয়ারেদুল ফুওয়াদ নামক গ্রন্থে বলা হয়েছে যে, হযরত খাজা (র) বলেছেন, এমত মাযহাব বাতিল ও ভ্রান্ত এবং তা এই কারণে যে, যদিও আযিয়ায়ে কিরাম সৃষ্টি জগতের সঙ্গে সম্পৃক্ত থাকেন, কিন্তু যে মুহূর্তে তাঁরা মহাপ্রভুর সঙ্গে মিলিত হন, তার একটি ক্ষুদ্রাতিক্ষুদ্র মুহূর্তও আওলিয়া কিরামের সমস্ত সময়-ক্ষণ থেকে বেশী মর্যাদার দাবি রাখে।^১ ইমাম রব্বানী হযরত মুজাদ্দিদ আলফে ছানী (র) এতটুকু বাড়িয়েছেন যে, আযিয়া কিরাম ঠিক যে

১. ফাওয়ারেদুল ফুওয়াদ, পৃ. ১২০।

মুহূর্তে সৃষ্টি জগত নিয়ে ব্যস্ত ও সম্পৃক্ত থাকেন, সে অবস্থায়ও তারা ওলীদের আল্লাহর সঙ্গে সম্পৃক্ত থাকার মুহূর্ত থেকেও আল্লাহর প্রতি অধিক নিবিষ্ট ও সম্পৃক্ত থাকেন। সৃষ্টির প্রতি তাদের সম্পৃক্ততা যেহেতু আল্লাহর হুকুমই হয়ে থাকে সেহেতু আল্লাহর সম্পৃক্ততা ঐশী আদেশের সমার্থক হয়ে থাকে।

হালাল বস্তু আল্লাহর পথের প্রতিবন্ধক নয়

তাসাওউফ সম্পর্কে সাধারণভাবে এটাই বুঝানো হয়েছে ও মশহুর করে দেওয়া হয়েছে যে, তাসাওউফ মানেই নিঃসঙ্গ, বেকার তথা কর্মহীন জীবন, আর কর্মব্যস্ততা হচ্ছে আল্লাহর মিলনপথের প্রতিবন্ধক তথা আধ্যাত্মিক সাধন পথের জন্য বিষবৎ। হযরত খাজা (র) 'ইলমে মা'রিফাত ও হাকীকতের যেই মকামে অধিষ্ঠিত ছিলেন এবং উপায়-উপকরণ ও রসম- রেওয়াজ তথা আচার-অনুষ্ঠানের উর্ধ্বে উঠে পরম লক্ষ্য ও আরাধ্যের প্রতি যেরূপ দৃষ্টি নিবদ্ধ রেখেছিলেন তার অর্থ এটাই ছিল যে, তিনি সে পর্যায়কে পেছনে ফেলে বহুদূর সামনে অগ্রসর হয়েছিলেন এবং বৈধ ও শরাসম্মত কার্যকলাপের আলোকোজ্জ্বলতা ও তার মাধ্যমে আল্লাহর নৈকট্যে উপনীত হওয়া তাঁর দৃষ্টির আওতায় ছিল। হযরত খাজা সায়্যিদ মুহাম্মদ গেসূ দরায়-এর মলফূযাত 'জাওয়ামি'উল কালিম'-এ বলা হয়েছে যে, হযরত খাজা নিজামুদ্দীন (র) বলেছেন, কোন জিনিস যা বৈধ তা আল্লাহর পথে নিষিদ্ধ ও অধ্যাত্ম্য সাধনার পথে প্রতিবন্ধক নয়। অন্যথায় তা কখনই শরীয়তে বিধেয় ও বৈধ হত না।^১

কলব (আত্মা) আল্লাহর দিকে নিবিষ্ট হলে কোন বস্তুই ক্ষতিকর নয়

একবার হযরত খাজা নিজামুদ্দীন (র) বললেন, আল্লাহর দিকে নিবিষ্টচিত্তে এবং পবিত্র আত্মার দরকার। এরপর যে কাজেই থাক, তোমার কোন ক্ষতি হবে না।^২

দুনিয়া পরিত্যাগের হাকীকত

দুনিয়া পরিত্যাগ এবং প্রকৃত যুহুদ ও দরবেশীর হাকীকত বর্ণনা করতে গিয়ে একবার তিনি বলেন :

দুনিয়া পরিত্যাগের অর্থ এটা নয় যে, কেউ নিজেকে নগ্ন করে দেবে অর্থাৎ নেংটি পরে বসে যাবে ধ্যানে; বরং এর সঠিক অর্থ এই যে, সে কাপড়ও পরবে, খানাও খাবে এবং যখনই যা কিছু জুটবে, তাকে কাজে লাগাবে,

১. জাওয়ামি'উল কালিম, পৃ. ১৬০।

২. অর্থাৎ শরাসম্মত জীবনোপকরণ এবং প্রকাশ্য কাজ-কর্ম ইত্যাদি।

কিন্তু তা কখনই পূঞ্জীভূত করবে না এবং নিজের অন্তর মানসকে কোন বস্তুর মধ্যে আবদ্ধ রাখবে না। আর এটাই দুনিয়া পরিত্যাগের অর্থ।^১

বাধ্যতামূলক ও ইচ্ছাধীন আনুগত্য

তিনি আরও বলেন, আনুগত্য দুই প্রকার : বাধ্যতামূলক ও ইচ্ছাধীন। বাধ্যতামূলক আনুগত্য বলতে বোঝায় তাকেই যার উপকারিতা আনুগত্য পোষণকারীর ওপর গিয়ে বর্তায় ; যেমন সালাত, সিয়াম, হজ্জ ও তাসবীহ-তাহলীল ইত্যাদি। ইচ্ছাধীন আনুগত্য বলতে তাকেই বুঝায় যার উপকারিতা, শান্তি ও কল্যাণ অন্যেরা লাভ করে ; যেমন মুসলমানদের মধ্যে ঐক্য স্থাপন করা, স্নেহ-প্রীতি, অন্যের সঙ্গে সদয় ব্যবহার ইত্যাদি। এগুলিকে ইচ্ছাধীন আনুগত্য বলা হয়ে থাকে এবং এর ছওয়াবও অসীম ও অপরিমেয়।

বাধ্যতামূলক আনুগত্য গ্রহণীয় হবার জন্য বেশি প্রয়োজন ইখলাসের এবং ইচ্ছাধীন আনুগত্য যেভাবেই করবে, ছওয়াব মিলবে।^২

কাশ্ফ ও কারামত আল্লাহর পথের অন্তরায়

হযরত খাজা নিজামুদ্দীন (র) আরও বলেছেন যে, ওলী-আওলিয়া থেকে যা কিছু প্রকাশ পায় তা তাঁদের নেশা ও মত্ততারই পরিণতি। তা এই জন্য যে, তাঁরা নেশাধারী। অপরদিকে আখিয়ায়ে কিরাম সহীহ্ ও সঠিক বিবেক-বুদ্ধির অধিকারী। সালিক (আধ্যাত্মিক পথের পথিক)-এর জন্য কাশ্ফ ও কারামত অধ্যাত্ম সাধনা পথের অন্তরায়স্বরূপ। মুহব্বত দ্বারাই দূরতা সৃষ্টি হয়।^২

আওলিয়া ও আখিয়ায়ে কিরামের জ্ঞান

তিনি আরও বলেন : মরতবার স্তর তিনটি : তন্মধ্যে প্রথম মরতবা যাকে অনুভূতির পরিমাপ বলা হয়; দ্বিতীয়টিকে বুদ্ধির পরিমাপ এবং তৃতীয়টিকে পবিত্রতার পরিমাপ বলা হয়। অনুভূতির পরিমাপের অন্তর্গত বিষয়াদির মধ্যে খানাপিনার যাবতীয় দ্রব্য, গন্ধদ্রব্য ইত্যাদি অনুভবযোগ্য বিষয়াদি পরিগণিত। এরপর 'আকল তথা বুদ্ধিগত পরিমাপ যার সম্পর্কে দুটি 'ইলমের সঙ্গে-একটি অর্জিত এবং অপরটি সর্বজনস্বীকৃত বিষয়। কিন্তু 'আলমে কুদুসে পৌঁছে বুদ্ধির সাহায্যে লক্ষ যে কোন ইল্মই সর্বজনস্বীকৃত বলে মালুম হতে থাকে।

১. ফাওয়ায়েদুল ফুওয়াদ, পৃ. ১৪।

২. ফাওয়ায়েদুল ফুওয়াদ, পৃ. ৭।

৩. ঐ, পৃ. ৩৩।

অতঃপর তিনি আরও বলেন যে, যার ওপর 'আলমে কুদসের দরওয়াজা খুলে যায় তার 'আলামত কি হতে পারে? যে ব্যক্তি বুদ্ধিবৃত্তিক জগতে ('আলমে 'আকল) থাকেন এবং যিনি কোন কোন মাসআলাকে সর্বজনস্বীকৃত অথবা অর্জিত জ্ঞানের সাহায্যে সমাধান করেন এবং এর থেকে তিনি একপ্রকার আনন্দ ও তৃপ্তি লাভ করে থাকেন, তিনি আলমে কুদসে রাস্তা পান না। এ ক্ষেত্রে তিনি জনৈক বুযর্গের ঘটনা বর্ণনা করেন। তিনি বলতেন, অদৃশ্য জগৎ থেকে কিছু জ্ঞান ও ঘটনা মনের ওপর দিয়ে বয়ে যায়। আল্লাহ্ চাহে তো আমি সেসব লিখব। এরপর তিনি অনেক কিছুই লিখলেন। অতঃপর বললেন, অনেক কিছুই লেখা হয়েছে, কিন্তু যা ছিল আসল উদ্দেশ্য তা লিপিবদ্ধ করা গেল না।^১

দুনিয়ার মুহব্বত ও দুশমনী

একদিন আলোচনা হচ্ছিল যে, কারও দুনিয়ার প্রতি মুহব্বত সৃষ্টি হয়ে থাকে আর কারও হয়ে থাকে ঘৃণা। তিনি বললেন : তিন ধরনের লোক রয়েছে। কিছু লোক রয়েছে যারা দুনিয়ার সঙ্গে মুহব্বত রাখে এবং দিন-রাত এর চিন্তা-ভাবনায় ও স্বরণে থাকে। এদের সংখ্যা বহু। কিছু লোক এমনও আছে যারা দুনিয়াকে ঘৃণা করে এবং ঘৃণা ও অবজ্ঞাভরে এর নাম উচ্চারণ করে এবং সর্বদাই এর দুশমনীতে লিপ্ত থাকে। তৃতীয় প্রকার লোক যারা না দুনিয়ার সাথে মুহব্বতের সম্পর্ক রাখে আর না রাখে ঘৃণার সম্পর্ক এবং দুনিয়া প্রসঙ্গে আলোচনা করতে গিয়ে না মুহব্বতের সঙ্গে তার নাম উচ্চারণ করে, আর না ঘৃণা ও অবজ্ঞাভরে। এরা প্রথমোক্ত দুই প্রকারের চেয়ে ভাল। এর পর তিনি একটি কাহিনী শোনালেন : জনৈক ব্যক্তি হযরত রাবিয়া বসরী (র)-এর খিদমতে উপস্থিত হয়ে দুনিয়াকে ভীষণ নিন্দাবাদ করতে লাগল। হযরত রাবিয়া বসরী (র) তাকে বললেন : মেহেরবানী করে এরপর আর এখানে আসবেন না। মনে হচ্ছে আপনি দুনিয়াকে অত্যন্ত ভালবাসেন, এজন্য বারবার দুনিয়ার আলোচনায় মুখর হয়ে উঠেছেন।^২

তिलाওয়াতে কালামে পাকের মরতবা

একবার তিনি তিলাওয়াতে কুরআন পাকের মরতবা বর্ণনা করতে গিয়ে বললেন, প্রথম মরতবা এই যে, যা কিছু পড়বে তার অর্থ হৃদয়ে অনুভূত হবে।

দ্বিতীয় মরতবা এই যে, তিলাওয়াতকালীন মুহূর্তে আল্লাহ্ 'আজমত ও শান ও শওকত মনের ওপর দিয়ে প্রবাহিত হবে এবং তৃতীয় মরতবা, তিলাওয়াতকারীর অন্তর-মানস আল্লাহকে নিয়ে মশগুল ও সম্পৃক্ত হবে।

১. ফাওয়ায়েদুল ফুওয়াদ, পৃ. ৬৯।

২. ঐ, পৃ. ১৮৯।

তিনি বললেন : কুরআন পাঠকালীন নিদেনপক্ষে এতটুকু বোধশক্তি তো প্রতিটি ব্যক্তিরই থাকা উচিত, 'আমি এই নিয়ামতের কতখানি হকদার ছিলাম, আর এই মূল্যবান সম্পদ লাভের এমন ভাগ্যই বা আমার ছিল কোথায়?' যদি এসব হাসিল না হয় তবে তিলাওয়াতকালীন যে ছওয়াব ও পুরস্কারের ওয়াদা প্রদত্ত হয়েছে তা স্মৃতিপটে জীবন্ত ও ভাস্বর করে ধরে রাখা দরকার।^১

যদিও হযরত খাজা (র), যেমন তিনি কয়েকবারই বলেছেন, কোন লিখিত গ্রন্থ রেখে যান নি,^২ কিন্তু তাঁর সবচেয়ে বড় গ্রন্থরাজি তাঁরই হাতে প্রশিক্ষণ প্রাপ্ত এবং তাঁরই সাহচর্যে ধন্য ও গৌরবান্বিত সেই সমস্ত মহান খলীফা ও নামযাদা সঙ্গী-সাথীবৃন্দ যারা বিশুদ্ধ আমল ও সঠিক নির্ভেজাল 'ইল্মের বাস্তব উপলব্ধির পরিপক্বতা কুরআনুল করীমে বর্ণিত *راسخين في العلم* শানের অনুরূপ ছিল। আমীর হাসান 'আলা সিজবীর ফাওয়ায়েদুল ফুওয়াদ এবং আমীর খোরদ -এর সিয়াকুল আওলিয়া গ্রন্থে হযরত খাজা নিজামুদ্দীন আওলিয়া (র)-এর বহু বাণী ও মলফুয়াত বর্ণিত হয়েছে যার মধ্যে তাঁর শান-শওকতের প্রকাশ ঘটেছে।

১. ফাওয়ায়েদুল ফুওয়াদ, পৃ. ৭১।

২. ঐ পৃ. ৪৫; এবং খায়রুল মাজালিস, পৃ. ২৫।

ষষ্ঠ অধ্যায় ফয়েয ও বরকত

ঈমানের নব জাগরণ এবং ব্যাপক ও সাধারণ তওবা

ঐ সমস্ত ফয়েয ও বরকত সম্বন্ধে বর্ণনা করার পূর্বে যা হযরত খাজা নিজামুদ্দীন (র)-এর সঙ্গে সম্পর্কিত এবং তাঁর হাতে বায়'আত গ্রহণ ও তওবা করার মাধ্যমে লাখ লাখ মুসলমান লাভ করেছিল এবং এমন এক যুগে যখন মুস-লিম হুকুমত সৌভাগ্যের স্বর্ণ শিখরে আসীন এবং গাফিলতী, আল্লাহ্-বিমুখতা, আত্মপূজার উপায়-উপকরণের ছিল পূর্ণ যৌবন- এমন একটি নতুন ধর্মীয় ও আধ্যাত্মিক (রূহানী) প্রবাহ সৃষ্টি হয়েছে যাকে প্রতিটি অনুভবকারী ব্যক্তিই অনুভব করেছেন, সমীচীন মনে হচ্ছে যে, তরীকতের ব্যুৎপত্তির সাধারণ বায়'আত, জনগণকে সৎপথ প্রদর্শন, ইসলামের উপদেশ প্রদান, তওবার হিকমত ও প্রয়োজনীয়তা বর্ণনা করে দেওয়া যাক যেন জানা যায় যে, কোন্ অবস্থা ও অনিবার্যতার কারণে এমন তরীকা ও পদ্ধতি এখতিয়ার করা হয়েছিল এবং এর দ্বারা কী ধর্মীয় কল্যাণ ও উপকারিতা লাভ করা গেছে। বর্তমান লেখক 'তারীখে দাও'য়াত ওয়া 'আযীমত'-এর প্রথম খণ্ডে হযরত সায়্যিদুনা 'আবদুল কাদির জিলানী (র) সম্পর্কে আলোচনা করতে গিয়ে যা কিছু লিখেছিলেন প্রথমে সেটাকেই কিছুটা সংক্ষিপ্ত ও ছাঁট-কাট করে উদ্ধৃত করছি।

শ্রেষ্ঠ যুগসমূহ অতিক্রান্ত হওয়ার পর জনবসতির বিস্তৃতি, জীবনের দায়িত্ব এবং জীবিকার চিন্তা-ভাবনা এত বেড়ে গিয়েছিল যে, বিশিষ্ট শিক্ষা ও প্রশিক্ষণের মাধ্যমে সাধারণ শুদ্ধি ও সংস্কার এবং প্রশিক্ষণের কাজ নেয়া সম্ভব ছিল না এবং বৃহৎ পরিমাপের কোন ধর্মীয় ও আত্মিক বিপ্লবের আশা-ভরসাও করা যেত না। অতএব তখন সামনে কোন্ পস্থা-পদ্ধতিই বা খোলা ছিল যার মাধ্যমে মুসলমানরা বিরাট সংখ্যায় নিজেদের ঈমানের পুনর্জাগরণ ঘটাবে, ধর্মীয় দায়িত্ব ও বাধ্যবাধকতাসমূহকে পূর্ণ দায়িত্বানুভূতি ও উপলব্ধির সঙ্গে পুনরায় কবুল করবে যাতে করে তাদের মধ্যে নিজেদের ঈমানী চেতনা ও ধর্মীয় উদ্দীপনা সৃষ্টি হয়, বিমর্ষ ও মৃত অন্তর-মারো পুনরায়

শ্রেমের উত্তাপ সৃষ্টি হয়, তাদের ক্লাস্ত ও দুর্বল দেখে পুনরায় চলার শক্তি ও প্রাণপ্রবাহ সৃষ্টি হয়, কোন একনিষ্ঠ আল্লাহ্‌ভীরু বান্দার প্রতি তাদের আস্থা দৃঢ় হয় এবং তাঁর থেকে আত্মিক ও শ্রবৃত্তিজাত রোগ-ব্যাদিতে সুচিকিৎসা ও ধর্মীয় ক্ষেত্রে সঠিক আলো ও পথ-নির্দেশনা লাভ সম্ভব হয়। পাঠকরা নিশ্চয়ই ধারণা লাভে সক্ষম হয়েছেন যে, যেই ইসলামী হুকুমতের মৌলিক দায়িত্ব ও কর্তব্য ছিল হিদায়াতের পথ দেখাবার, সেই হুকুমত তার দায়িত্ব পালনে শুধু উদাসীন হয়েই যায় নি, বরং তাঁর রাষ্ট্রপ্রধান ও রাষ্ট্রীয় কর্মচারীদের আমল ও কৃতকর্মও সে কাজের জন্য ক্ষতিকর এবং সে-পথের অন্তরায় ও প্রতিবন্ধক হয়ে দাঁড়িয়েছিল। অপরদিকে তারা এমন বদগুমান, খেয়াল-খুশীর পূজারী ও সন্দেহপ্রবণ হয়ে উঠেছিল যে, নতুন কোন সংগঠন এবং নতুন কোন দাওয়াত কিংবা আহ্বান যার ভেতর নেতৃত্ব ও কর্তৃত্বের সামান্য মাত্র গন্ধও পাওয়া যেত, তারা সেটাকে বরদাশত করতে পারত না, সঙ্গে সঙ্গেই তা নির্মূল করে দিত। এমতাবস্থায় মুসলমানদের মধ্যে নতুন ধর্মীয় জীবন, নতুন নিয়ম-শৃঙ্খলা এবং একেবারে গোড়া থেকে নতুনভাবে উৎসাহ-উদ্দীপনা ও কর্মতৎপরতা সৃষ্টি করবার জন্য এছাড়া আর কোন পন্থা অবশিষ্ট ছিল যে, আল্লাহর কোন ভক্ত ও একনিষ্ঠ বান্দা হযূর আকরাম (সা)-এর প্রবর্তিত তরীকার ওপর ঈমান ও আমল তথা শরীয়ত অনুসরণের বায়'আত নেবেন এবং মুসলমান তাঁর হাতের ওপর হাত রেখে নিজেদের পূর্ব অলসতা ও জাহিলিয়াতের জীবন থেকে তওবা করবে-করবে ঈমানী চেতনার পুনরুজ্জীবন। অতঃপর সেই নায়েবে রসূল তাদেরকে ধর্মীয় বিষয়সমূহে প্রশিক্ষণ দেবেন, নিজের মূল্যবান প্রভাবমণ্ডিত সাহচর্য, স্বীয় শ্রেমের অগ্নিস্ফুলিঙ্গ, দৃঢ়তা ও স্বীয় প্রাণের উষ্ণতা থেকে পুনরায় ঈমানী উত্তপ্ততা, উষ্ণ প্রেম, একনিষ্ঠতা ও একমাত্র আল্লাহর উদ্দেশ্যে সকল কিছু করবার মানসিকতা, সুন্নতে নববী অনুসরণে আবেগ-উদ্দীপনা এবং পারলৌকিক জীবনের প্রতি আগ্রহ সৃষ্টির পরিবেশ সৃষ্টি করবেন। তাদের এই নতুন সম্পর্ক থেকে অনুভূত হোক যে, তারা একটি জীবন থেকে তওবা করেছে এবং সম্পূর্ণ নতুন আর এক জীবনে পদার্পণ করেছে এবং আল্লাহর শ্রিয় এমন এক বান্দার হাতের ওপর হাত রেখে দিয়েছে যিনি অনুভব করেন যে, ঐ সমস্ত বায়'আতকারীর সংশোধন, নৈতিক ও ধর্মীয় প্রশিক্ষণ এবং তাদের দীনী খিদমত আল্লাহ পাক আমার উপর সোপর্দ করেছেন, আর এই মুহূর্ত ও আস্থার কারণে আমার ওপর এক নয়া দায়িত্ব বর্তেছে। অতঃপর

তিনি স্বীয় অভিজ্ঞতা ও গবেষণা এবং কুরআনুল করীম ও সুন্নতে নববী (সা)-এর মূলনীতি ও শিক্ষা মুতাবিক তাদের ভেতর রুহানী ভাবধারা ও তাকওয়া এবং তাদের জীবনে ঈমান, গভীর প্রত্যয়, ইখলাস তথা একনিষ্ঠতা এবং তাদের আমল ও অবস্থার ভেতর ঈমানী ভাবধারা ও প্রাণপ্রবাহ সঞ্চারণ করতে প্রচেষ্টা চালাবেন। এটাই প্রকৃত হাকীকত সে সব বায়'আত ও প্রশিক্ষণের যা ধর্মের একনিষ্ঠ মুবাল্লিগগণ যুগে যুগে ধর্মের পুনরুজ্জীবন ও পুনর্জাগরণ এবং মুসলমানদের সংস্কার ও সংশোধনের কাজে পরিচালনা করেছেন এবং আল্লাহর লাখ লাখ বান্দাকে ঈমানের হাকীকত ও ইহসানের মর্যাদায় পৌছিয়ে দিয়েছেন।^১

বায়'আত একটি অঙ্গীকার ও পারম্পরিক ওয়াদা পালনের নাম

বায়'আত পেছনের সমস্ত গুনাহ থেকে তওবা এবং আল্লাহ ও তদীয় রসূল (সা)-এর বিধি-বিধান প্রতিপালন এবং সুন্নতে নববীর পূর্ণ অনুসরণ করবার পারম্পরিক প্রতিশ্রুতিরই নাম। সুলতানুল মাশায়িখ (র) বায়'আত গ্রহণ করার সময় বায়'আতকারীদের থেকে কী শপথ উচ্চারণ করতেন এবং ভবিষ্যতের জন্য কী অঙ্গীকারই বা নিতেন কোন জীবনী গ্রন্থেই তার সঠিক বিবরণ পাওয়া যায় না। কিন্তু হযরত খাজা নিজামুদ্দীন (র) স্বয়ং স্বীয় শায়খ ও মুরশিদ শায়খুল কবীর হযরত খাজা ফরীদুদ্দীন গঞ্জ শকর (র)-এর বায়'আত নেবার তরীকা এবং তাঁর উপদেশাবলীর আলোচনা করেছেন এবং স্বীয় শায়খ-এর সাথে তার যে হৃদয়তাপূর্ণ সম্পর্ক ছিল-তাঁকে অনুসরণের যে আবেগ ও প্রেরণা ছিল-তার থেকে এ ধারণাই করা চলে যে, তিনিও তেমনই স্বীয় মুরীদবর্গকে শিক্ষা ও উপদেশ প্রদান করে থাকবেন।

তিনি বলেন, “যখন কোন ব্যক্তি শায়খুল 'আলম শায়খ ফরীদুদ্দীন-এর খিদমতে মুরীদ হবার নিয়তে আসত, তিনি তাকে বলতেন, একবার সূরা ফাতিহা ও সূরা ইখলাস পড়। এরপর সূরা বাকারার শেষ রুকু *امن الرسول* থেকে শেষ পর্যন্ত পড়াতেন। অতঃপর *انه شهد الله ان الدين عند الله الاسلام* পর্যন্ত পড়াতেন। এরপর বলতেন : তোমরা এই দুর্বলের হাতের ওপর বায়'আত করে তাঁর শায়খ-এর হাতের ওপর এবং (এই ধারাক্রম অনুসারে) হযরত পয়গম্বর (সা)-এর মুবারক হাতের ওপর ও আল্লাহ পাক পরওয়ারদিগারে 'আলম-এর সঙ্গে প্রতিজ্ঞা করলে যে, নিজেদের হাত, পা ও চোখকে হিফাযত করবে এবং শরীয়ত-নির্দেশিত পথ ও পন্থাসমূহে কায়ম থাকবে।”

বায়'আতের এই শিক্ষা ও উপদেশাবলীতে ইসলামের বুনিয়াদী 'আকীদাসমূহ যেমন এসে গেছে-তেমনি এসে গেছে "শুনব ও অনুসরণ করব"-এর ওয়াদা ও অভিপ্রায়ের কথাও। একথাও এসে গেছে যে, আল্লাহ্ পাকের দরবারে একমাত্র মনোনীত ও গৃহীত ধর্ম হচ্ছে ইসলাম। এর দ্বারা এ অনুভূতিও জাগ্রত করে দেওয়া হত যে, এই বায়'আত প্রকৃতপক্ষে রসূলুল্লাহ্ (সা)-এর পবিত্র হাতের ওপরই করা হয়েছে এবং শায়খ-এর হাত সেই মুবারক হাতেরই প্রতিনিধিত্ব করেছে। এর দ্বারা আল্লাহ্ রাব্বুল 'আলামীন-এর সঙ্গে অঙ্গীকার করা হয়েছে যে, বায়'আতকারী তার হাত-পা ও চোখকে পাপরাশি থেকে হিফায়তে রাখবে এবং শরীয়ত-নির্দেশিত পথের ওপর নিজেকে কায়েম রাখবে। ঈমানের পুনর্জাগরণ এবং আল্লাহ্ ও তদীয় রসূল (সা)-এর সঙ্গে নিজের অঙ্গীকার প্রতিপালনের এর চাইতে উত্তম বোধগম্য তরীকা আর কী হতে পারে? এটা তো বলা যায় না যে, বায়'আতকারীদের শতকরা একশ'ভাগ এ প্রতিজ্ঞার ওপর কায়েম থাকত। তবে এ ব্যাপারে কোন সন্দেহের অবকাশ নেই যে, বায়'আতকারীদের একটি বিরাট অংশ এই স্বীকারোক্তি ও অঙ্গীকার রক্ষা করত এবং আল্লাহ্ হাযার হাযার লাখ লাখ বান্দা এই ঈমানী পুনর্জাগরণ ও বিপুবাস্ত্রক অবস্থার মাধ্যমে নিজেদের শুধরে নিত।

সাধারণ ও ব্যাপক বায়'আত-এর হিকমত

সাধারণ গণমানুষকে বায়'আত ও হিদায়াতের লক্ষ্যে পরিণত করার ক্ষেত্রে ঐ সমস্ত বুয়র্গ খোলাখুলি ও সাধারণ অনুমতি দিয়ে রেখেছিলেন এবং সেভাবে কোনরূপ পরীক্ষা-নিরীক্ষা, বাহাই-মনোনয়ন ছাড়াই লোকদের অনুমতি ছিল যে, তারা বায়'আত গ্রহণ করুক এবং মুরীদ দলভুক্তদের কাভারে শামিল হোক। বিশেষ করে হযরত খাজা (র)-এর দরবারে এ অধ্যায়ে যে প্রশস্ত ও উদার সুযোগ-সুবিধা ছিল, তাতে কারও কারও খটকা সৃষ্টি হতে পারে যে, বায়'আত যখন একটি অঙ্গীকারের নাম এবং এর সম্পর্ক যখন গোটা জীবনের সঙ্গে জড়িত, তখন এতে এত খোলামেলা ও উদারতার সুযোগ রাখা হল কেন? হযরত খাজা (র) একবার নিজেই এর উত্তর দিয়েছিলেন এবং এরূপ সাধারণ অনুমতির হিকমত বর্ণনা করেছিলেন।

মাওলানা যিয়াউদ্দীন বারনী (তারীখে ফীরোযশাহীর প্রণেতা) বলেন যে, আমি একদিন সুলতানুল মাশায়িখের খিদমতে হাযির ছিলাম। ইশরাক থেকে চাশত পর্যন্ত আমি তাঁর হৃদয়গ্রাহী ও চিন্তাকর্ষক আলোচনা শুনতে থাকি। ঐ দিন বিশেষ করে অনেক লোকই বায়'আত গ্রহণ করে। এ দৃশ্য দেখে আমার মনে এ

ধারণার সৃষ্টি হল যে, পূর্ব যমানার বুয়র্গগণ মুরীদ করবার ব্যাপারে অত্যন্ত সতর্কতা অবলম্বন করতেন, কিন্তু সুলতানুল মাশায়িখ (র) স্বীয় বদান্যতা ও করুণার কারণে এক্ষেত্রে সাধারণ অনুমতি দিয়ে দিয়েছেন এবং তিনি সাধারণ মানুষ ও বিশিষ্ট ব্যক্তি সবাইকে মুরীদ বানিয়ে নিচ্ছেন। আমি চাইলাম যে, এ ব্যাপারে তাঁকে প্রশ্ন করি। সুলতানুল মাশায়িখ স্বীয় কাশ্ফ দ্বারা আমার জিজ্ঞাসা সম্পর্কে অবহিত হয়ে বললেন :

মাওলানা যিয়াউদ্দীন। সব ধরনের কথাই তুমি আমাকে জিজ্ঞাসা করে থাক। কিন্তু এটা তো জানতে চাও না যে, কোনরূপ পরীক্ষা-নিরীক্ষা ও পর্যবেক্ষণ ছাড়াই যে কোন আগত ব্যক্তিকেই কেন আমি মুরীদ করি।

একথা শোনার পর আমার শরীর কম্পিত ও রোমাঞ্চিত হ'ল আর আমি তাঁর পা আঁকড়ে আরম্ভ করলাম যে, বেশ কিছুকাল থেকে আমার অন্তরে এই সমস্যা তোলপাড় করে ফিরছিল এবং আজও এ ওয়াসওয়াসা আমার মনে এসেছিল। আল্লাহ পাক আপনার মনে একথার উদয় ঘটিয়েছেন। এরপর তিনি বললেন :

আল্লাহ তা'আলা প্রত্যেক যুগে স্বীয় অপার ও পরিপূর্ণ হিকমত-এর একটি বৈশিষ্ট্য রেখেছেন। এর পরিণাম এই যে, প্রতিটি যুগের লোকজনের জীবন-যাপন পদ্ধতি ও আচার-আচরণ ভিন্ন ভিন্ন হয়ে থাকে এবং তাদের মেযাজ ও প্রকৃতি অতীত যুগের লোকদের প্রকৃতি ও চরিত্রের সঙ্গে মিল খায় না। অল্প লোকের মধ্যেই এর ব্যতিক্রম লক্ষ্য করা যায়। আর এটা অভিজ্ঞতারই ফসল। মুরীদ হবার আসল উদ্দেশ্য তো এটাই যে, মুরীদ আল্লাহ ব্যতীত আর সমস্ত কিছুর সঙ্গেই সম্পর্ক ছিন্ন করবে এবং একমাত্র আল্লাহর সঙ্গেই নিজেকে সম্পৃক্ত ও তাঁরই প্রতি সমর্পিত করবে, যেমনটি তাসাওউফের কিতাবগুলিতে লিপিবদ্ধ রয়েছে। পূর্ব যমানার বুয়র্গগণ যতক্ষণ পর্যন্ত মুরীদের মধ্যে আল্লাহ ব্যতীত অপর সকল কিছুর সঙ্গেই এই সম্পর্কচ্যুতি লক্ষ্য না করতেন, বায়'আতের জন্য হস্ত প্রসারিত করতেন না। কিন্তু সুলতান আবু সাঈদ আবুল খায়ের-এর রাজত্বকাল থেকে বুয়র্গ শ্রেষ্ঠ শায়খ ফরীদুল হক ওয়াদ্দীন (কু.স.)-এর সময়কাল পর্যন্ত এ সমস্ত মহান বুয়র্গ ছিলেন দুনিয়ার বৃক্কে আল্লাহর নিদর্শনাবলীর অন্যতম। আল্লাহর বান্দাদের ভীড় এঁদের দরওয়াজায় লেগেই থাকত এবং উঁচু-নীচু প্রতিটি শ্রেণীর লোকই সেখানে সমবেত হত। ঐ সমস্ত আল্লাহর বান্দা পারলৌকিক দায়িত্বানুভূতির কথা স্মরণ করে ভীত হয়ে এইসব আল্লাহু প্রেমিক লোকদের আশ্রয় আঁকড়ে ধরতে চাইল। তখন ঐসব মহান বুয়র্গও সাধারণ ও বিশিষ্ট সর্বশ্রেণীর লোকদেরই বায়'আত কবুল করেছেন এবং খিরকায়ে তওবা ও তাবারুক দান করেছেন।

এখন আমি তোমার সওয়ালের জওয়াব দিচ্ছি, আমি কেন মুরীদ করবার ক্ষেত্রে অধিক সতর্কতা অবলম্বন করি না এবং নিজেকে নিশ্চিত্ত করি না। এর একটি কারণ এই যে, আমি ধারা-পরম্পরা শুনে আসছি, বহু লোক মুরীদ হবার পর অন্যান্য ও পাপ কাজ থেকে তওবা করে প্রত্যহ নিয়মিত জামা'আতে সালাত আদায় করতে থাকে এবং অন্যান্য নফল ইবাদত-বন্দেগীতেও নিজেকে নিয়োজিত রাখে। এখন আমিও যদি শুরু থেকেই এ ব্যাপারে শর্ত আরোপ করি যে, তার ভেতর মুরীদ হবার হাকীকত (প্রকৃত তাৎপর্য) অর্থাৎ আল্লাহ্ ভিন্ন যাবতীয় বস্তু থেকে সম্পর্কচ্যুতির নবীর পাওয়া যাচ্ছে কিনা এবং তাকে তওবা ও পবিত্রতার খিরকা না দেই, তবে তারা কল্যাণের এ পরিমাণটুকুও—যা ঐ সমস্ত বান্দার কারণে তাদের ভেতর আসছে—তা থেকেও তারা বঞ্চিত হয়ে যাবে। দ্বিতীয় কারণ এই যে, আমি দেখছি, একজন মুসলমান অত্যন্ত কাকুতি-মিনতি সহকারে ও বিনয়-নম্রভাবে আমার নিকট আসে এবং বলতে থাকে যে, সে সমস্ত গুনাহ থেকে তওবা করেছে। আমি তার কথা সত্য মনে করে তাকে বায়'আত করে নিই। বিশেষ করে এজন্য যে, বহু বিশ্বস্ত লোকের মুখে শুনি, অনেক বায়'আতকারীই এ বায়'আতের কারণে পাপ ও অন্যান্য কাজ থেকে ফিরে আসে।”

জনজীবনে এর প্রভাব

এই বায়'আত ও সম্পর্ক, যদ্বারা মুসলমানদের প্রতিটি শ্রেণী সমভাবে উপকৃত ও কল্যাণমণ্ডিত হ'ল, সাধারণ জীবন-যিন্দেগী ও সামাজিক জীবন, জনগণের চরিত্র, অভ্যাস, কাজ-কর্ম ও সময়ের পতিধারার ওপর এবং শাসকশ্রেণী থেকে শুরু করে শ্রমজীবী শ্রেণী পর্যন্ত মানুষের সামগ্রিক অবস্থার ওপর এর কি প্রভাব পড়ল এবং রাজধানী দিল্লীতে যেখানে সারা ভারতবর্ষের যুদ্ধলব্ধ সম্পদ—আর শত শত নয়, হাজার হাজার বছরের ধনভাণ্ডারের সোনা-দানা ও হীরা-জহরত, শিল্পী ও কারিগরদের শিল্পজাত দ্রব্যাদি এবং সমগ্র দেশের প্রত্যন্ত বিভিন্ন কোণ থেকে উপহার-উপটোকন, দুর্ঘূল্য ও দুপ্রাপ্য দ্রব্যাদি প্লাবনের ন্যায় আছড়ে পড়ছিল, সেখানে দীনদারী, আল্লাহ-সন্ধানী, ঐশী প্রেম, তওবা ও আল্লাহর নৈকট্য, পারস্পরিক লেন-দেনে পরিচ্ছন্নতা, স্পষ্ট ভাষণ এবং আমানতদারী তথা বিশ্বস্ততার ক্ষেত্রে কেমনতরো অবস্থার সৃষ্টি হয়েছিল

১. সিয়রুল আওলিয়া, পৃ. ৩৪৬-৩৪৮ মাওলানা মিয়াউদ্দীন বারনীর 'হাসরতনামার' বরাত দিয়ে উদ্ধৃত।

তার বিস্তারিত বিবরণ সে যুগের বিজ্ঞ, দূরদর্শী ও বিশ্বস্ত ঐতিহাসিক শিয়াউদ্দীন বারনীর মুখেই শুনুন। তিনি সুলতান 'আলাউদ্দীন খিলজীর রাজত্বকালের আলোচনা করতে গিয়ে লিখেছেনঃ'

সুলতান 'আলাউদ্দীনের রাজত্বকালের বুয়ুর্গগণের মধ্য থেকে তাসাওউফের পদ শায়খুল ইসলাম হযরত নিজামুদ্দীন, শায়খুল ইসলাম 'আলাউদ্দীন এবং শায়খুল ইসলাম রুকনুদ্দীন দ্বারা অলংকৃত ছিল। দুনিয়ার একটি উল্লেখযোগ্য অংশ ঐ সমস্ত পবিত্র আত্মার দ্বারা বরকতময় ও সমৃদ্ধিশালী হয় এবং তাঁদের হাতে বায়'আত করে, তাঁদের সাহায্যে ও সহযোগিতায় পাপী ও গুনাহগার লোকেরা তওবা করে, হাযার হাযার পাপাচারী ও বদকার এবং বেনামাযী তাদের অন্যায় ও পাপাচার থেকে নিজেদের ফিরিয়ে রাখে এবং চিরদিনের জন্য তাঁরা সালাতের পাবন্দ হয়ে যায় এবং গোপনীয়তার সঙ্গে ধর্মীয় কার্যকলাপের প্রতি আবেগ-উদ্দীপনা প্রকাশ করে। তাদের তওবা হয়েছিল সহীহ ও বিশুদ্ধ। বাধ্যতামূলক ও ইচ্ছাধীন তথা ফরয ও নফল ইবাদত-বন্দেগী তাদের স্বাভাবিক অভ্যাসে পরিণত হয়েছিল এবং বস্তুরূপের প্রতি মানুষের স্বাভাবিক লোভ ও আকর্ষণ যা মানুষের কল্যাণ ও আনুগত্যের বুনিয়াদ-ঐ সমস্ত বুয়ুর্গের উন্নত ও প্রশংসনীয় চরিত্র এবং দুনিয়াবী স্বার্থের প্রতি নির্লোভ ও নিস্পৃহ মন-মানসিকতা দৃষ্টে এদের মন থেকে কমে যায়। আধ্যাত্মিক পথের পথিক (সালিক)-দের নফল 'ইবাদত ও ওযীফা পাঠের আধিক্য এবং বান্দাহসুলভ গুণাবলীর অব্যাহত অনুশীলনী দ্বারা তাদের অন্তরে কাশফ ও কারামত লাভের আরযু পয়দা হতে থাকে। সে সব মহান বুয়ুর্গের 'ইবাদত-বন্দেগী ও কার্যকলাপ এবং পারস্পরিক আদান-প্রদানের বরকতের কারণে জনগণের পারস্পরিক আদান-প্রদানের মধ্যেও সততা ও ঈমানদারীর সৃষ্টি হয়। তাঁদের উন্নত চরিত্র, দীনের জন্য কঠোর-কঠিন মুজাহাদা ও রিয়াযত পরিদৃষ্টে আল্লাহুওয়াল্লা লোকদের মন-মানসে নিজেদের আমল-আখলাকেও পরিবর্তনের খাহেশ সৃষ্টি হয় এবং ঐ সব দীনি বাদশাহদের মুহব্বত ও আমল-আখলাকের প্রভাবে আল্লাহু তা'আলার ফয়েযের বারিধারা দুনিয়ার বুকে বর্ষিত হতে থাকে, আর আসমানী বালা-মুসীবতের দরওয়াজা বন্ধ হয়ে যায়। তাঁদের যামানার লোকজন দুর্ভিক্ষ ও মহামারীর মুসীবত থেকে রক্ষা পায় এবং তাঁদের

১. তারিখে ফীরোযশাহীর উদ্ধৃত অংশের এ অনুবাদ সায়্যিদ সাবাহুদ্দীন রাহমান এম.এ. (রফীক, দারুল মুসাল্লিফীন)-এর গ্রন্থ 'বয়মে সুফিয়া' থেকে কাটছাঁট করে উদ্ধৃত করা হয়েছে। পৃ. ১০৯-২০২।

একনিষ্ঠ ও ভালবাসামগ্নিত ইবাদত-বন্দেগীর বরকতে মোগলদের ক্ষিতনা বিলুপ্ত হয় এবং তারাও বিনষ্ট হয়ে যাযাবরে পরিণত হয়। ঐ তিনজন বুয়র্গের অস্তিত্বের কারণে সমসাময়িক কালের শরীয়ত ও তরীকতের সকল বিধি-বিধানের বিন্ময়কর শ্রীবৃদ্ধি ও গৌরব লাভ ঘটে। কত না আশ্চর্য ছিল সে যুগ যা সুলতান 'আলাউদ্দীন খিলজীর রাজত্বকালের শেষ দশ বছরে পরিদৃষ্ট হয়েছিল। একদিকে সুলতান 'আলাউদ্দীন রাষ্ট্রের সার্বিক কল্যাণের জন্য সমস্ত নেশা জাতীয় ও নিষিদ্ধ দ্রব্য এবং পাপাচার ও অন্যায় বিভিন্ন প্রকার কঠোর শাস্তির মাধ্যমে বন্ধ করে দেন। অপরদিকে সে যুগেই শায়খুল ইসলাম নিজামুদ্দীন বায়'আতের দরওয়াজা সাধারণের জন্য খুলে দেন। গুলাহগার ও পাপীদের খিরকা পরিধান করান এবং তাদেরকে পাপাচার ও অন্যায় থেকে তওবা করিয়ে মুরীদ বানান। সাধারণ মানুষ ও বিশিষ্ট ব্যক্তিবর্গ, ধনী-গরীব, বাদশাহ-ফকীর, নিরক্ষর ও শিক্ষিত, আশরাফ ও আতরাফ, শহুরে ও গ্রামবাসী, যুদ্ধ বিজয়ী বীর (গাযী) ও মুজাহিদ, স্বাধীন ও গোলাম সবাইকে তাকওয়া ও পাক-পবিত্রতার তালীম দেন। নারী-পুরুষ, বৃদ্ধ-যুবা ও সাধারণ মানুষ, চাকর-বাকর সবাই সালাত আদায় করত এবং অধিকাংশ মুরীদ চাশত ও সালাতুল ইশরাকেরও পাবন্দ হয়ে গিয়েছিল। স্বাধীন ও সৎকর্মশীল লোকেরা শহর থেকে গিয়াছপুর পর্যন্ত কতিপয় অবসর বিনোদন কেন্দ্রে চবুতরা কায়েম করে দিয়েছিল, ছাঞ্চড় ফেলে দিয়েছিল, কুয়া খনন করে দিয়েছিল, পানি ভরতি ঘড়া এবং মাটির লোটা রেখে দিয়েছিল, দিয়েছিল চাটাই বিছিয়ে। প্রতিটি চবুতরা ও প্রতিটি ছাপড়াতে একজন করে চৌকিদার ও একজন কর্মচারী নিযুক্ত করে দিয়েছিল যেন মুরীদ ও তওবাকারী সৎলোকদের শায়খ নিজামুদ্দীন (র)-এর আন্তানা পর্যন্ত আসা-যাওয়া করতে ও সালাত আদায় করতে কোন বাধাবিঘ্নের সম্মুখীন হতে না হয়। চবুতরা ও ছাপড়াতে নফল পাঠকারী মুসল্লীদের ভীড় দেখা যেত। অধিকাংশ লোকের মাঝে চাশত, ইশরাক, সালাতুল আওয়াবীন, তাহাজ্জুদ ও বেলা গড়িয়ে যাবার মুহূর্তের নামাযের প্রচলন হয়ে গিয়েছিল। ঐ সব নফল সালাত প্রতিটি ওয়াক্তে কে কত রাকাত আদায় করেছে এবং প্রতি রাকাতে কালামে পাকের কোন্ সূরা এবং কোন্ কোন্ আয়াত পড়েছে, তা নিয়ে আলাপ-আলোচনা হত। অধিকাংশ নতুন মুরীদ শায়খ (র)-এর পুরানো মুরীদদের থেকে গিয়াছপুর যাতায়াতের মুহূর্তে জিজ্ঞেস করত, শায়খ (র) রাতের বেলায় কত রাকাত সালাত আদায় করেন এবং প্রতিটি রাকাতে কি পড়েন, 'ইশার সালাতের পর রসূলুল্লাহ (সা.)-এর উপর কতবার

দরুদ পাঠান এবং শায়খ ফরীদ (র) ও শায়খ বখতিয়ার কাকী (র) দিনে-রাতে কতবার দরুদ পাঠিয়ে থাকেন আর সূরা ইখলাস কতবার পড়েন। নতুন মুরীদেরা পুরানো মুরীদেরকে এবশ্বিধ প্রশ্নই জিজ্ঞেস করত। তারা সিয়াম, নফল এবং কম আহার সম্পর্কেও জিজ্ঞেস করত। গুণ্যের ঐ যুগে অধিকাংশ লোকেরই কুরআন পাক হিফয করার গভীর আখহ সৃষ্টি হয়ে গিয়েছিল। নতুন মুরীদ শায়খ হযরত খাজা নিজামুদ্দীন (র)-এর পুরানো মুরীদের সাহচর্যে থাকত। পুরানো মুরীদের আনুগত্য, 'ইবাদত-বন্দেগী, দুনিয়ার সঙ্গে সম্পর্কচ্যুতি, তাসাওউফের গ্রন্থাদি পাঠ, মাশায়িখে কিরামের প্রশংসনীয় গুণাবলী ও তাঁদের কার্যকলাপ তথা পারস্পরিক লেনদেন বর্ণনা করা ব্যতীত আর কোন কাজ ছিল না। দুনিয়া এবং দুনিয়াদার লোকদের সম্পর্কে কোন আলোচনা তাদের মুখেই আসত না। দুনিয়া এবং দুনিয়াবাসীর মেলামেশার কাহিনীর প্রতি তাদের কোন আকর্ষণ ছিল না, সেটাকে তারা দূষণীয় ও পাপ বলে মনে করত। নফল 'ইবাদত-বন্দেগীর আধিক্য ও পাবন্দির ব্যাপারগুলো ঐ বরকতময় যুগে এমত পরমাণে বেড়ে গিয়েছিল যে, বাদশাহী মহলের অনেক আমীর-উমারা, সেনাধ্যক্ষ, শাহী ফৌজ ও নওকর শায়খ (র)-এর মুরীদ হতেন এবং চাশ্ত ও সালাতুল ইশরাক আদায় করতেন। আইয়াম বিজ'-এর সিয়াম ও যিলহজ্জ মাসের প্রথম দশ দিনের সিয়ামও পালন করতেন। আর এমন কোন মহল্লাও ছিল না যেখানে এক মাস বিশ দিন পর নেক্কার লোকদের সম্মেলন হত না কিংবা সূফীদের সামার মহফিল হত না এবং তারা পারস্পরিক কান্নাকাটি করতেন না। শায়খ (র)-এর কতিপয় মুরীদ তারাবীহের নামাযে এবং ঘরেও খতমে কুরআন করতেন। যে সমস্ত লোক এ বিষয়ে একটি স্থিতি অবস্থায় উপনীত হতে সক্ষম হয়েছিল। তারা রমযান মাসে, জুম'আর দিনে এবং ধর্মীয় আনন্দ-উৎসবের রজনীগুলিতে ভোর পর্যন্ত জেগে কাটাত, দুই চোখের পাতা কখনও এক করত না। শায়খ (র)-এর মুরীদের মধ্যে যারা উচ্চস্তরের ছিলেন তাঁরা সারা বছর ধরেই রাত্রির এক বা দুই-তৃতীয়াংশ তাহাজ্জুদ পাঠে কাটিয়ে দিতেন। কোন কোন 'ইবাদত-গুয়ার ব্যক্তি 'ইশার সময়কার ওযু দিয়েই ফজর আদায় করতেন। শায়খ (র)-এর মুরীদের ভেতর থেকে কতিপয় ব্যক্তিকে আমি জানি যে, শায়খ নিজামুদ্দীন (র)-এর ফয়েয ও অনুগ্রহ দৃষ্টিলাভে কাশ্ফ ও কারামতের অধিকারী হয়েছিলেন। শায়খ (র)-এর পবিত্র অস্তিত্ব, তাঁর নিশ্বাসের বরকত এবং তাঁর মকবুল দু'আর কারণে এদেশের অধিকাংশ মুসলমান 'ইবাদত-বন্দেগী, তাসাওউফ ও

যুহুদ-এর দিকে ঝুঁকে পড়া এবং শায়খ (র)-এর মুরীদ হবার দিকেই অগ্রগামী হয়েছিল। সুলতান 'আলাউদ্দীন গোটা পরিবারসহ শায়খ নিজামুদ্দীন (র)-এর একনিষ্ঠ ভক্ত ও অনুরক্তে পরিণত হয়ে গিয়েছিলেন। ব্যক্তি বিশেষ ও সাধারণ মানুষ নির্বিশেষে সবার অন্তরেই সততা ও নেককাজের প্রতি আশ্রয় সৃষ্টি হয়েছিল। আলাউদ্দীনের রাজত্ব কালের শেষ কয়েক বছরে প্রেমের দালালী, অন্যায় ও পাপাচার, মদ জুয়া ও অশ্লীলতা ইত্যাদির নামও উচ্চারিত হত না অধিকাংশ লোকের মুখে। বড় গুনাহ জনগণের নিকট কুফরীর সমার্থক বলে প্রতীয়মান হত। মুসলমানরা লজ্জাবশত সুদখোরী ও মজুদদারীতে খোলাখুলি লিপ্ত হতে পারত না। দোকানদারদের মধ্যে মিথ্যা বলা, ওষনে কম দেওয়া ও ভেজাল মেশানোর রেওয়াজ উঠে গিয়েছিল। অধিকাংশ ছাত্র ও বড় বড় লোক যারা শায়খ (র)-এর খিদমতে থাকত, তাসাওউফ ও তরীকতের হুকুম-আহকাম সম্পর্কিত কিতাবাদি অধ্যয়নের দিকেই ঝুঁকে পড়েছিল। কৃতুল কুলুব, ইয়াহুইয়াউল 'উলুম, তরজমা ইয়াহুইয়াউল উলুম, 'আওয়ারিফ, কাশফুল মাহজুব, শরাহ তা'আররুফ, রিসালা কুশায়রী, মিরসাদুল 'ইবাদাত, মকতুবাতে আয়নুল কুযাত, কাবী হামীদুদ্দীন নাগোরীর লাওয়ামেহ ও লাওয়ামেহ এবং ফাওয়ারিদুল ফুওয়াদ-এর বহু ক্রেতা ও পাঠক সৃষ্টি হয়ে গিয়েছিল। বেশীর ভাগ লোক পুস্তক বিক্রেতাদের কাছে মারিফত ও হাকীকত সম্পর্কিত কিতাবাদি সম্পর্কে জিজ্ঞাসাবাদ করত। এমন কোন পাগড়ী পরিহিত ব্যক্তি ছিল না যার পাগড়ীতে মিসওয়াক ও চিরুণী দৃষ্টিগোচর হত না। সুফী-দরবেশদের অতিরিক্ত ক্রয়ের কারণে লোটা ও চামড়ার পাত্রের অভাব দেখা দিয়েছিল। মোদ্দা কথা, আল্লাহ তা'আলা হযরত শায়খ নিজামুদ্দীন আওলিয়া (র)-কে অতীত যুগের হযরত শায়খ জুলায়দ বাগদাদী (র) এবং শায়খ বায়েযীদ বিস্তামী (র)-এর জীবন্ত প্রতিচ্ছবি করেই পয়দা করেছিলেন।^১

প্রেমের বাজার

তওবা, ঈমানী পুনরুজ্জীবন এবং অবস্থার সংস্কার দ্বারা দিল্লীর প্রতিটি অলি-গলি প্রভাবিত হচ্ছিল এবং শাহী দরবার ও শাহী মহলসহ "বামে হাযার সতুন" পর্যন্ত তার ঢেউ গিয়ে পৌঁছেছিল। একটি নতুন পরিবর্তন এই ছিল যে,

১. ভারীখে ফীরোযশাহী, যিয়াউদ্দীন বারনীকৃত, পৃ. ৩৪১-৪৬।

মস্তিষ্ক-উদ্ভূত অহংকার ও আত্মিক বিমর্ষতার এই জগতে- যেখানে বাঁশরী ও চিত্রহারী বস্তু ব্যতিরেকে দীর্ঘকাল অন্য কিছুই অস্তিত্ব ছিল না, সেখানে ঐশী আবেগ-উদ্দীপনার একটি মলয় সমীরণ প্রবাহিত হতে শুরু করে এবং প্রেমের সওদার ব্যাপক লেনদেন ঘটে। প্রতিটি স্থানে প্রেমের আলোচনা, হাকীকত ও মা'রিফতের কথাবার্তা এবং আধ্যাত্মিক ভাবধারা-পূর্ণ ও প্রেম সম্বলিত কবিতাবলী গুঞ্জরিত হতে থাকে। সিয়াকুল আওলিয়া প্রণেতা আমীর খোরদ কি সুন্দর লিখেছেন :

মুহব্বত ও 'ইশকের কারবারের যুগে একটি বাজার লেগেছে। সামা'র কাহিনী, ইখলাস ও আনুগত্য, প্রীতি ও নম্রতা, অন্তরের প্রশান্তি ও প্রেমিকের পায়ের ওপর মাথা রেখে দেওয়া ব্যতিরেকে আর কোন কিছুতেই জনসাধারণের শান্তিলাভ ঘটত না।^১

খলীফাদের তরবিয়ত

ইরশাদ ও তরবিয়তের এই সিলসিলা এবং 'ইশক ও মুহব্বতের এই তরীকা-পদ্ধতিকে হিন্দুস্তানের দূর-দূরান্তর এলাকা পর্যন্ত ছড়িয়ে দেওয়া এবং বহুদিন পর্যন্ত এই সিলসিলা ও পদ্ধতিকে কায়েম ও বহাল রাখবার জন্য তিনি উচ্চ মনোবলসম্পন্ন ও যোগ্যতার অধিকারী আপাদমস্তক একনিষ্ঠ খলীফাদের গড়ে তোলার ব্যবস্থা করেন। তাদের ভেতর সে সব গুণ ও পরিপূর্ণতা সৃষ্টির প্রয়াস চালান যে সব কামিল বুয়র্গদের জন্য অপরিহার্য। তাদের দিয়ে মুজাহাদা (আধ্যাত্মিক পথের কঠোর-কঠিন সাধনা) করান, তাদের কলব (আত্মা)-এর দেখাশোনা করেন, তাঁদের মধ্যে যিনি উচ্চতর যোগ্যতার অধিকারী ছিলেন এবং 'ইলুম-এর অলংকার থেকেও ছিলেন মাহরুম, তিনি তাদের পরিপূর্ণ 'ইলুম হাসিলের বন্দোবস্ত করেন। তাঁদের মধ্যে যাঁদের অন্তর থেকে এখন পর্যন্ত বাহাছ-বিতর্কের নেশা কাটে নি, তাঁদের তিনি গুধরে দেন। যাঁরা আল্লাহর সৃষ্টি জগতকে পথ-প্রদর্শন ও সামাজিক নেতৃত্ব দেবার যোগ্যতা রাখেন কিন্তু তাদের নির্জনবাস, লোকালয় বর্জন, একক ও নিঃসঙ্গ 'ইবাদত-বন্দেগী ও মুজাহাদায় আগ্রহ ছিল তাঁদেরকে তিনি সামাজিক জীবন এখতিয়ার করতে ও আল্লাহর মাখলুকের যুলুম-অত্যাচার বরদাশ্ত করতে বাধ্য করেন। সংস্কার ও তরবিয়তের যে দুনিয়াব্যাপী কর্মকাণ্ডের নীলনকশা তাঁর সামনে ছিল এবং আপন বিশিষ্ট সাথীদের থেকে দীনের দাওয়াত ও তবলীগের যে খিদমত নেবার ছিল, সে পথের অন্তরায় ও প্রতিবন্ধকতা সৃষ্টিকারী সব কিছুই তিনি বিদূরিত করেন।

সিয়াকুল আওলিয়া গ্রন্থে বর্ণিত আছে যে, একদিন অযোধ্যার অধিবাসী, উচ্চ মর্যাদাসম্পন্ন দোস্ত ও খাদিমবৃন্দ নিজেদের মধ্যে সিদ্ধান্ত গ্রহণ করে যে, সুলতানুল মাশায়িখ (র)-এর নিকট থেকে পঠন-পাঠন ও বাহাছ-বিতর্কের জন্য অনুমতি প্রার্থনা করা হবে। যদিও ঐ সব দোস্তের মধ্যে প্রত্যেকেই প্রজ্ঞা ও পাণ্ডিত্যের অধিকারী 'আলিম ছিলেন এবং সুলতানুল মাশায়িখের সোহবত ও সাহচর্যের ফয়েয ও বরকতে আল্লাহর স্মরণে ছিলেন নিরন্তর মশগুল, তথাপি যে কর্মে তাঁরা জীবন কাটিয়েছেন তার প্রতি তাঁরা স্বাভাবিকভাবে তখনও কিছুটা আকৃষ্ট ছিলেন। মাওলানা জালালুদ্দীনের নেতৃত্বে সবাই তাঁর খিদমতে হাযির হলেন। হযরত সুলতানুল মাশায়িখ (র)-এর ওপর যিকরে ইলাহীর কারণে এমনি এক নূরে তাজাল্লী ছিল যে, লোকেরা তাঁর সামনে কথা বলার সাহস পেত না। এ ব্যাপারে মাওলানা জালালুদ্দীনের সাহসের কিছুটা সুনাম ছিল। তিনি বললেন যে, যদি এজায়ত দেন তবে সাথী দোস্তরা কোন সময় বাহাছ-আলোচনা করতে পারে। সুলতানুল মাশায়িখ (র) বুঝতে পারলেন যে, এটা এখানে উপস্থিত সমস্ত 'উলামায়ে কিরামের সম্মিলিত ইচ্ছাও বটে এবং মাওলানা জালালুদ্দীন এদের সবার প্রতিনিধিত্ব করছেন। তিনি বললেন, আমি কি করব, ওদের দিয়ে অন্য কোন খিদমত নেওয়াই তো আমার আন্তরিক ইচ্ছা ছিল।^১

মাওলানা সায়্যিদ নাসীরুদ্দীন মাহমুদ, যিনি পরে হযরত খাজা (র)-এর সর্বশ্রেষ্ঠ খলীফা ও প্রকৃত স্থলাভিষিক্ত হয়েছিলেন এবং চেরাগে দিল্লী নামেই যিনি সারা দুনিয়াব্যাপী খ্যাতিমান ছিলেন, অত্যন্ত আগ্রহী হয়ে ওঠেন কোথাও কোন জঙ্গল অথবা পাহাড়ে গিয়ে যিকরে ইলাহীতে মগ্ন হতে। একদিন তিনি আমীর খসরুর মাধ্যমে বলে পাঠান যে, অধম অযোধ্যায় বসবাস করে। লোকজনের ভীড়ে আমার সাধনার পথে বিঘ্ন সৃষ্টি হয়। যদি এজায়ত দেন তবে আমি কোন বিয়াবান ময়দানে কিংবা কোন পাহাড়ে গিয়ে বাঞ্জুগট-বামেলোমুক্ত হয়ে আল্লাহর ইবাদত করি। আমীর খসরু যখন এ পয়গাম পৌঁছালেন, তিনি বললেন :

তাকে বলে দিও, তোমাকে জনসমাজে থাকতে হবে এবং মানুষের অমানবিক ও অমানুষসুলভ আচার-আচরণকে বরদাশত করতে হবে, আর বদান্যতা ও ত্যাগের দ্বারাই এর উত্তর দিতে হবে।^২

মাওলানা হুসসামুদ্দীন মুলতানী খিলাফত প্রাপ্তির পর আরম্ভ করেছিলেন যে, আপনি যদি অনুমতি দেন তবে শহর ছেড়ে দেই এবং কোন ঝর্ণাধারার ধারে

১. সিয়াকুল আওলিয়া, পৃ. ৩০৬।

২. সিয়াকুল আওলিয়া, পৃ. ২৩৭।

গিয়ে অবস্থান গ্রহণ করি। কেননা শহরে যে পানি মেলে তা কুয়ার আর সে পানিতে ওয়ূ করলে অন্তরের প্রশান্তি লাভ ঘটে না।^১ এতে তিনি বললেন, “না, তুমি শহরেই থাকবে, থাকবে সাধারণ একজন মানুষের মত। মন চাচ্ছে তোমাকে আরামের জায়গায় নিয়ে যেতে এবং এমন জায়গায় রাখতে যেখানে সামাজিকতার কোন বালাই নেই। যখনই তুমি শহরের বাইরে গিয়ে পড়বে এবং কোন ঝর্ণাধারার কিনারে বসবাস করতে শুরু করবে, তখন বিদেশী ও শহুরে লোকজন খুঁজে তোমাকে বের করবে, চারদিকে মশহুর হয়ে পড়বে, যে অমুক জায়গায় অমুক দরবেশ অবস্থান করছেন। ফলে জনসাধারণ তোমার সময় নষ্ট করবে। তাছাড়া কুয়ার পানির ব্যাপারে আলিমদের মধ্যে মতভেদ থাকলেও শরীয়তের দৃষ্টি এ ব্যাপারে অত্যন্ত উদার।”

চিশতী খানকাহ

আল্লাহ্ তা‘আলা হযরত খাজা (র)-কে অত্যন্ত মর্যাদাবান খলীফা (প্রতিনিধি) দান করেছিলেন। তন্মধ্যে নিম্নোক্ত কয়েকজন বিশেষভাবে প্রসিদ্ধ ছিলেন :

১. মাওলানা শামসুদ্দীন ইয়াহুইয়া, ২. শায়খ নাসীরুদ্দীন মাহমুদ, ৩. শায়খ কুতুবুদ্দীন মুনাওয়ার হাঁসভী, ৪. শায়খ হুসামুদ্দীন মুলতানী, ৫. মাওলানা ফখরুদ্দীন যব্বরাবী, ৬. মাওলানা আলাউদ্দীন নীলি, ৭. মাওলানা বুরহান উদ্দীন গরীব, ৮. মাওলানা ইউসুফ চুন্দিরী, ৯. মাওলানা সিরাজুদ্দীন আখী সিরাজ, ১০. মাওলানা শিহাবুদ্দীন।

বিশিষ্ট মুরীদবর্গ

১. খাজা আবু বকর, ২. মাওলানা মুহীউদ্দীন কাশানী, ৩. মাওলানা ওয়াজীহুদ্দীন পায়েলী, ৪. মাওলানা ফখরুদ্দীন মরোযী, ৫. মাওলানা ফসীহুদ্দীন, ৬. আমীর খসরু, ৭. মাওলানা জ্বালালুদ্দীন, ৮. খাজা করীমুদ্দীন সমরকন্দী, ৯. আমীর হাসান ‘আলা সিজযী, ১০. কাযী শরফুদ্দীন, ১১. মাওলানা বাহাউদ্দীন আদহামী, ১২. শায়খ মুবারক গোপামভী, ১৩. খাজা মুওয়াইয়িদুদ্দীন কারভী, ১৪. খাজা তাজুদ্দীন দওরী, ১৫. খাজা যিয়াউদ্দীন বারনী, ১৬. খাজা মুওয়াইয়িদুদ্দীন আনসারী, ১৭. খাজা শামসুদ্দীন খওয়াহিরযাদা, ১৮. মাওলানা নিজামুদ্দীন শিরায়ী, ১৯. খাজা সালার, ২০. মাওলানা ফখরুদ্দীন মিরাবী।

১. পানি ভর্তিকারীদের অসতর্কতার দরুন এবং কোন কিছুর এতে পতিত হবার আশংকায়।

এদের মধ্যে হযরত শায়খ নাসীরুদ্দীন চেরাগে দিল্লী (র)-কে তিনি খাস খিলাফতনামা প্রদান করেন এবং নিজের স্থলাভিষিক্ত বানিয়ে যান। তিনি (হযরত নাসীরুদ্দীন চেরাগে দিল্লী) ছিলেন তাঁর শায়খ (র)-এর পূর্ণ অনুসরণকারী। তিনি অত্যন্ত নায়ক ও সঙ্গী অবস্থাতে এবং কঠিন রাজনৈতিক সংকটেও জনগণের হিদায়াতের বাসনায় ইরশাদ ও হিদায়াতের প্রদীপ উজ্জ্বল রেখেছিলেন।

ফীরোয ভুগলকের সিংহাসনারোহণ এবং এ থেকে ভারতবর্ষের যে ফয়েয ও বরকত পৌছেছিল তার ভেতর হযরত সায়্যিদ নাসীরুদ্দীন (র)-এরই হাত ছিল।^১ পুরো বত্রিশ বছর পর্যন্ত তিনি চিশতিয়া সিলসিলার কেন্দ্রীয় ব্যবস্থাপনা রাজধানী দিল্লীতে বসে অত্যন্ত সাফল্য ও কামিয়াবীর সাথে পরিচালনা করেন। অতঃপর আলোর এই প্রদীপ থেকে অন্য প্রদীপ আলোকিত হল যিনি দক্ষিণ ভারতেই শুধু নয়, বরং সমগ্র ভারতীয় উপমহাদেশকে 'ইশক ও মুহব্বতের উত্তাপ দিয়ে উত্তপ্ত এবং তাঁর খোশবু দ্বারা সুগন্ধিযুক্ত করে তুলেছিলেন অর্থাৎ হযরত সায়্যিদ মুহাম্মাদ গেসু দরায়-যিনি গুলবার্গে^২ সমাহিত (ওফাত ৮২৫ হিজরী) আছেন।

হযরত সায়্যিদ নাসীরুদ্দীন চেরাগে দিল্লী (র)-এর অপর খলীফা 'আল্লামা কামালুদ্দীন (ওফাত ৭৫৬ হিজরী) যাঁর বংশধর ও খলীফাবৃন্দ এই সিলসিলাকে এই শতাব্দী পর্যন্ত অত্যন্ত জোরেশোরে কায়ম রাখেন। এই সিলসিলায় হযরত ইয়াহইয়া মাদানী, শাহ কলীমুল্লাহ জাহানাবাদী, মাওলানা শাহ ফখরুদ্দীন দেহলভী, খাজা নূর মুহাম্মাদ মাহারভী, শাহ নিয়ায আহমদ বেরেলভী এবং খাজা সুলায়মান তৌনসভীর ন্যায মহান বুয়র্গ রয়েছে যাঁরা 'ইশকে ইলাহী তথা ঐশী প্রেমের বাজার রেখেছিলেন গরম ও উত্তপ্ত এবং যাঁরা আল্লাহর লাখ লাখ বান্দার অন্তরমানসকে আল্লাহর মুহব্বত ও কামনায় ভরপুর করে দিয়েছিলেন।^৩

হযরত চেরাগে দিল্লীর খলীফাদের মধ্যে শায়খ আবদুল মুকতাদির কুন্দী, শায়খ থানেশ্বরী এবং শায়খ মখদুম জাহানিয়া জাঁহাগাশত নামে পরিচিত, জালালুদ্দীন হুসায়ন বুখারী বিশেষভাবে স্মরণীয়। এঁদের প্রত্যেকেই নিজ নিজ যুগের বুয়র্গ এবং আল্লাহর বান্দাদের লক্ষ্যস্থল ছিলেন।

১. দেখুন তারীখে ফীরুযশাহী, সিরাজ আফীফ কৃত।

২. হযরত খাজা সায়্যিদ মুহাম্মাদ গেসু দরায়ের জীবন-বৃত্তান্ত ও কামালিয়াত সম্পর্কে জানতে হলে স্বতন্ত্র পুস্তক প্রণয়ন প্রয়োজন।

৩. এসব বুয়র্গের বিস্তারিত জীবন-বৃত্তান্ত জানতে হলে দেখুন "তারীখে মাশায়িখে চিশ্ত" -অধ্যাপক খালীক আহমদ নিযামীকৃত।

দিল্লীর কেন্দ্রীয় খানকাহর পর দা'ওয়াত ও হিদায়াতের মসনদে ধারাবাহিকভাবে পরপর হযরত খাজা নিজামুদ্দীন (র) ও হযরত সায়্যিদ নাসীরুদ্দীন চেরাগে দিল্লী (র)-এর ন্যায় মহান দুই বুয়ুর্গ সমাসীন ছিলেন। ভারতবর্ষের পাণ্ডুয়া, লখনৌতি, দৌলতাবাদ, গুলবর্গা, বুরহানপুর, যয়েনাবাদ, মাধো, আহমদাবাদ, সফীপুর, মানিকপুর, সলোন নামক বিভিন্ন জায়গায় চিশতিয়া খানকাহ কায়েম হয়, যাঁরা শতাব্দীর পর শতাব্দী এক প্রদীপ থেকে অন্য প্রদীপ আলোকিত করার ন্যায় দা'ওয়াত ও তবলীগের সিলসিলা কায়েম রাখেন এবং 'ইশক ও মুহব্বত, সততা ও ইখলাস, উচ্চ মনোবল ও অটুট সংকল্প, খিদমতে খাল্ক তথা সৃষ্টির সেবা, কুরবানী ও আত্মত্যাগ, বদান্যতা ও দানশীলতা, দারিদ্র্য ও যুহুদ, 'ইলম ও মা'রিফতের প্রদীপ আলোকিত রাখেন। এ সবার মধ্যে প্রতিটি খানকাহ এবং তার ধর্মীয় ও সংস্কারমূলক কার্যাবলীর জন্য একটি বিরাট পুস্তকের দরকার— বিশেষ করে বাংলাদেশে শায়খ 'আলাউল হক পাণ্ডবী', হযরত নূর কুতবুল 'আলম পাণ্ডবী', দক্ষিণাত্যে শায়খ বুরহানুদ্দীন গরীব-তাঁর খলীফাদের মধ্যে শায়খ যয়নুদ্দীন, শায়ক ইয়াকুব, শায়খ কামালুদ্দীন নাগোরী ফিতানী, অতঃপর তাঁর খলীফা কুতবে 'আলম 'আবদুল্লাহ ইবন মাহমূদ ইবন আল-হুসায়ন (ওফাত ৮৫৭ হিজরী) এবং তাঁর ফরযন্দ ও খলীফা শাহ 'আলম গুজরাটি দারিদ্র্যের চাঁটাই-এর আসনে বসে নিজ নিজ যুগে রাজত্ব করেছেন।

১. শায়খ 'আলাউদ্দীন 'আলাউল হক পাণ্ডবীর আসল নাম ওমর। পিতা আস'আদ লাহোরী বাংলার উখীর পদে সমাসীন ছিলেন। শায়খ 'আলাউল হক হযরত মাহবুবে ইলাহীর মশহুর খলীফা আখী সিরাজ নামে পরিচিত মাওলানা সিরাজুদ্দীন 'উছমানী আউধী (ওফাত ৭৫৮ হিজরী)-এর খলীফা এবং পাণ্ডুর মশহুর 'আলিম ও চিশতী খানকাহর প্রতিষ্ঠাতা। সায়্যিদ আশরাফ জাহাঙ্গীর সিমনানী (ওফাত ৮০৮ হিজরী) তাঁরই খলীফা। ৮০০ হিজরীতে তিনি ইত্তিকাল করেন।
২. নাম নূরুদ্দীন, উপাধি নূরুল হক ও কুতবে 'আলম; পিতা শায়খ 'আলাউল হক পাণ্ডবীর খলীফা ও স্থলাভিষিক্ত ছিলেন। আদ্বাহ তা'আলা তাঁকে অত্যন্ত জনপ্রিয়তা দান করেছিলেন। তাঁর যুগে পাণ্ডুর খানকাহ ছিল তদানীন্তন ভারতবর্ষের সর্বশ্রেষ্ঠ চিশতী খানকাহ। মুজাহাদা, খিদমতে খাল্ক, বহুগত স্বার্থের প্রতি নিষ্পৃহতা ও আত্মোৎসর্গ এবং 'ইলমে হাকীকতে অত্যন্ত উচ্চ মরতবার অধিকারী ছিলেন। খলীফার ভেতর হযরত শায়খ হুসামুদ্দীন হুসামুল হক মানিকপুরী (ওফাত ৮৫৩ হিজরী) বিশেষভাবে উল্লেখযোগ্য—যাঁদের পবিত্র সত্তার প্রভাবে বিহার ও অযোধ্যায় চিশতিয়া নিজামিয়া সিলসিলার ব্যাপক প্রচার ঘটে। ৮১৮ হিজরীতে তিনি ইত্তিকাল করেন। কিতাবাদির মধ্যে "মুনিসুল ফুকারা", 'আনিসুল গুরাবা', 'মাকাতীব কা মাজু'আ' স্মরণীয়। মলফুযাত ও মকতুবাতে গণ্যবের সরলতা ও প্রজব বিদ্যমান। নুযহাতুল খাওয়াতির, ৩য় জিলদ দ্রষ্টব্য।

মালবে শায়খ ওয়াহীদুদ্দীন ইউসুফ, শায়খ কামালুদ্দীন, মাওলানা মুগীছুদ্দীন প্রমুখ, অধ্যায় হযরত শায়খ মুহাম্মদ মীনা লাখনবী, শায়খ সা'দুদ্দীন কুদওয়াই খায়রাবাদী, শায়খ 'আবদুস সামাদ ওরফে সফীউদ্দীন সফীপুরী, শায়খ হুসামুল হক মানিকপুরী, শায়খ 'আবদুল করীম মানিকপুরী এবং শাহ পীর মুহাম্মদ সলোনি ও শাহ পীর মুহাম্মাদ লাখনবী বিশেষভাবে উল্লেখযোগ্য। এঁরা সবাই নিজামিয়া সিলসিলার মহান বুয়র্গ যাঁরা স্ব-স্ব স্থানে হিদায়াত ও তবলীগ এবং তালীম ও তরবিয়তের সিলসিলা অত্যন্ত জোরেশোরেই অব্যাহত রেখেছিলেন। এঁদের থেকে ফয়েযপ্রাপ্তদের সংখ্যা একমাত্র আল্লাহ্ ব্যতিরেকে আর কেউ বলতে পারবে না।

এসব খালেস চিশতী খানকাহ্ ব্যতিরেকেও ভারতবর্ষের স্থানে স্থানে এমন সব নামকরা খানকাহ্ও কায়ম ছিল যার মহান বুয়র্গ ও সিলসিলার প্রতিষ্ঠাতাদের সিলসিলায়ে নিজামিয়ার চিশতী বুয়র্গদের সঙ্গে বিশেষ সম্পর্ক ছিল এবং যাঁরা চিশতিয়া তরীকার ব্যাপারে গভীর আত্মহী ও সম্পৃক্ততার অধিকারী ছিলেন। এর ভেতর জৌনপুরের খানকায়ে রশীদী এবং ফুলওয়ারী শরীফের খানকায়ে মুজীবী বিশেষভাবে উল্লেখযোগ্য। খানকায়ে রশীদীর প্রতিষ্ঠাতা হযরত 'আল্লামা মুহাম্মাদ রশীদ জৌনপুরী (ওফাত ১০৮৩ হিজরী)-এর শায়খ তৈয়ব বেনারসী এবং সায়িদ আহম্মদ হালীম হুসায়নী মানিকপুরী থেকে চিশতিয়া নিজামিয়া সিলসিলার এজাযত হাসিল করেছিলেন। খানকায়ে মুজিবীর প্রতিষ্ঠাতা তাজুল 'আরিফীন হযরত শাহ মুহাম্মাদ মুজীবুল্লাহ কাদিরী ফুলওয়ারীর (ওফাত ১১৯১ হিজরী) সিলসিলায়ে চিশতিয়া নিজামিয়া স্বীয় পীর হযরত খাজা ইমামুদ্দীন কলন্দর এবং হযরত শাহ মু'ঈনুদ্দীন কারজুবীর মাধ্যমে পৌঁছেছিল। শাহ মু'ঈনুদ্দীন কারজুবী হযরত শায়খ পীর মুহাম্মাদ সলোনির খলীফা ছিলেন।

পরিশেষে হযরত হাজী ইমদাদুল্লাহ মুহাজিরে মক্কী (র)-এর পবিত্র সত্তা নিজামিয়া ও সাবিরিয়া সিলসিলার এবং তার বৈশিষ্ট্য ও বরকতের সমষ্টি ছিল। হযরত হাজী সাহেব নিজামিয়া সিলসিলার নিসবত হযরত শায়খ 'আবদুল কুদ্দুস গঙ্গোহীর মাধ্যমে লাভ করেছিলেন, যিনি অযোধ্যার হযরত দরবেশ ইবন মুহাম্মাদ ইবন কাসিম থেকে নিজামিয়া সিলসিলার এজাযত লাভ করেছিলেন। হযরত দরবেশ তিন তরীকা (সূত্র) থেকে নিজামিয়া সিলসিলা পেয়েছিলেন।^১

সপ্তম অধ্যায়

হযরত খাজা (র)-এর তা'লীম ও তরবিয়তের প্রভাব এবং তাঁর

খলীফাদের ধর্মীয় ও সংস্কারমূলক খিদমত

হযরত সুলতানুল মাশায়িখ স্বীয় খলীফা ও মুরীদদের অত্যন্ত যত্ন-তদবীর ও অভিনিবেশ সহকারে প্রয়োজনীয় প্রশিক্ষণ দান করেছিলেন। সুলতান 'আলাউদ্দীন খিলজীর দরবারের আমীর-উমারা ও রাষ্ট্রীয় প্রশাসনের গুরুত্বপূর্ণ ব্যক্তিদের মধ্যে খাজা মুওয়াইয়িদুদ্দীন ছিলেন একজন উচ্চ পদাধিকারী ব্যক্তি। হযরত খাজা (র)-এর সঙ্গে তাঁর সম্পর্ক স্থাপিত হয় এবং এ সম্পর্ক দিনে দিনে এত বৃদ্ধি পায় যে, তার মন-মিযাজ রাজদরবারের প্রতি বিরূপ ও বিতৃষ্ণ হয়ে ওঠে এবং হযরত খাজা (র)-এর খিদমতেই এসে তিনি অবস্থান করতে শুরু করেন। সুলতান তাঁর যোগ্যতা ও কর্ম-ক্ষমতায় ছিলেন মুগ্ধ এবং তিনি তাঁর প্রয়োজন অহরহ অনুভব করতেন। একদা সুলতান তাঁর জনৈক পাহারাদারের মাধ্যমে হযরত খাজা (র)-এর নিকট অভিযোগ পেশ করেন এবং বলেন যে, হযরত সবাইকেই তাঁর নিজের মত বানাতে চান। হযরত খাজা (র) এর জবাবে বলেছিলেন, নিজের মত কী, আমার চেয়েও উত্তমই বানাতে চাই।

হযরত খাজা (র)-এর সাহচর্য ও সংসর্গ) ও তরবিয়ত দ্বারা শুধু ইবাদত-বন্দেগী ও রিয়াযত-মুজাহাদার গভীর আত্মহা এবং নিজের সংস্কারশক্তি ও উন্নতির চিন্তাই সৃষ্টি হত না, দাওয়াত ও তবলীগের উৎসাহ ও অনুপ্রেরণা, "আমরু বিল মা'রুফ ওয়ানাহী 'আনিল মুনকার" তথা সৎকাজের আদেশ ও অসৎকাজ থেকে নিষেধে হিন্মত ও উচ্চ মনোবল, তৎকালীন যুগের সুলতানদের সামনে কালেমায়ে হক তথা হক-কথা বলার সাহসিকতা ও নির্ভীকতাও সৃষ্টি হত। এটা ছিল আল্লাহর নাম এবং আল্লাহর বান্দাদের সাহচর্যের অনিবার্য সুফল। যে অন্তরে একবার আল্লাহর ভয় অনুপ্রবিষ্ট হবে, তাঁর অন্তর থেকে গায়রুল্লাহর ভয় স্বাভাবিকভাবেই বিদায় নেবে এবং যে অন্তর দুনিয়ার প্রতি লোভ-লালসা থেকে

মুক্ত ও স্বাধীন-তার ওপর কারও ভীতি যেমন কার্যকর হয় না, তেমনি তারও কাউকে ভয় পাবার কোন কারণ থাকে না। যার সামনে স্রষ্টার মহান মর্যাদা এবং সৃষ্টি জগতের যথার্থ অবস্থান ও স্থান প্রকাশিত হয়ে গেছে- সে দুনিয়ার রাজা-বাদশাহদের শান-শওকত এবং তাঁদের দরবারের জাঁকজমক, তাঁদের গোলাম-নফর ও রাজকর্মচারীদের কাতারবন্দী, সম্মুখ দৃষ্টি ও হাঁকডাককে বাচ্চাদের খেলাধুলা ও ডাঙা-গড়ার মিছামিছি কৌতুকের বেশী এতটুকু গুরুত্ব দেয় না এবং জাঁকজমকপূর্ণ কোন প্রদর্শনীর স্থলে সত্য কখনে ও হক-কথা উচ্চারণে তাঁদেরকে কখনও বিরত রাখতে পারে না। এটাই তাওহীদবাদিতা ও নির্জনতার স্বাভাবিক পরিণতি, প্রকৃত তাসাওউফের বৈশিষ্ট্য এবং আল্লাহর বান্দা ও কামিল দরবেশের রীতি।

হযরত খাজা (র)-এর প্রশিক্ষণপ্রাপ্ত খাদিম ও মুরীদবৃন্দ ঐশী প্রেম, সত্য কথন ও নির্ভীকতার এমন সব নমুনা পেশ করে গেছেন যার নযীর মেলা খুবই কঠিন।

তৎকালীন সুলতানদের সঙ্গে নির্ভীকতা ও স্পষ্টবাদিতার নমুনা

সুলতান মুহাম্মাদ তুগলকের শান-শওকত ও জাঁকজমক সম্পর্কে ইতিহাসের ছাত্র মাত্রেই অবহিত। সুলতানকে একবার হাঁসীর কাছ দিয়ে অতিক্রম করতে হয়। সেখান থেকে চার ক্রোশ দূরে অবস্থিত বংশী নামক স্থানে শাহী তাঁবু স্থাপিত হয়। সুলতান মুখলেসুল মুলুক নিজামুদ্দীন মুজিরবারীকে, যুলুম-যবরদস্তি, হৃদয়হীনতা ও নিষ্ঠুরতার জন্য যে ছিল বিখ্যাত- সে সময় হাঁসীর কেন্দ্রা পরিদর্শনের জন্য পাঠান। সে যখন হযরত শায়খ কুতুবুদ্দীন মুনাওয়ার (হযরত শায়খ জামালুদ্দীন হাঁসোভীর পৌত্র এবং হযরত সুলতানুল মাশায়িখের খলীফা) এর বাড়ির নিকটে গিয়ে উপস্থিত হয় তখন জিজ্ঞাসা করে যে, এ বাড়ী কার? লোকজন বলল, এটা সুলতানুল মাশায়িখের খলীফা শায়খ কুতুবুদ্দীন মুনাওয়ারের বাড়ি। এতে সে বলল, অত্যন্ত আশ্চর্যের কথা যে, বাদশাহ এতদ অঞ্চলে পদার্পণ করেছেন, অথচ শায়খজী তাঁকে সালাম করবার জন্য একবারও হাযির হলেন না। মুখলেসুল মুলুক বাদশাহর কাছে ফিরে গিয়ে সব কিছু বিবৃত করল এবং এও বলল যে, হাঁসীতে সুলতানুল মাশায়িখের একজন খলীফা আছেন যিনি জাঁহাপনাকে সালাম দিতে হাযির হন নাই। বাদশাহ একথা শুনে রেগে যান এবং তক্ষুণি হাসান সার বুরহানাকে যে ছিল একজন অহংকারী ও জাঁকজমকপ্রিয় লোক, শায়খ কুতুবুদ্দীনকে আনবার জন্য পাঠান। হাসান সার বুরহানা বাড়ির কাছে গিয়ে একাকী পায়ে হেঁটে শায়খজীর দহলিজে এসে অত্যন্ত বিনীতভাবে

উপবেশন করেন। শায়খজী তাঁকে ডেকে পাঠান। হাসান সার বুরহানা গিয়ে আরম্ভ করলেন যে, বাদশাহ আপনাকে ডেকে পাঠিয়েছেন। তিনি বললেন, এতে কি আমার কোন এখতিয়ার আছে? হাসান বললেন : আমার ওপর বাদশাহী হুকুম যে কোনভাবেই হোক না কেন, আমি যেন আপনাকে নিয়ে যাই। শায়খ বললেন, আলহামদুলিল্লাহ, আমি নিজ এখতিয়ারে যাচ্ছি না। অতঃপর গৃহবাসীদের উদ্দেশ্য করে বললেন, “আমি তোমাদেরকে আল্লাহর হাতে সোপর্দ করলাম।” এই বলেই মুসাল্লা কাঁধের ওপর ফেলে এবং লাঠি হাতে পদব্রজেই রওয়ানা হয়ে পড়েন। হাসান সার বুরহানা সওয়ারির কথা বলতেই তিনি অস্বীকৃতি জানিয়ে বললেন, আমার শক্তি আছে, আমি পায়ে হেঁটে যেতে পারি। বংশী পৌছতে সুলতান খবর পেলেন এবং শায়খকে দিল্লী যাবার নির্দেশ দিলেন। দিল্লী পৌছে শাহী দরবারে ডেকে পাঠালেন। শায়খ তৎকালীন নায়েবে বারবাক ফীরোয শাহকে বললেন যে, আমরা ফকীর মানুষ, শাহী দরবারের আদব-কায়দা সম্পর্কে কিছু জানি না। আপনি যেভাবে পরামর্শ দেবেন সেভাবেই তা পালিত হবে। ফীরোয শাহ ছিলেন বিশুদ্ধ ‘আকীদার অধিকারী ও ফকীর প্রিয় মানুষ। তিনি বললেন যে, লোকে আপনার সম্পর্কে অনেক কিছুই বাদশাহর কানে লাগিয়েছে। আপনি যদি কিছুটা বিনয় ও তাজীমের সাথে কাজ করেন তবে উত্তম হবে। তিনি শাহী মহলের দহলিজে পা রাখতেই রাজ্যের আমীর-উমারা, ঘোষক (নকীব) সবাইকে দাঁড়িয়ে থাকতে দেখতে পান। সাহেবযাদা নূরুদ্দীন হাঁসি থেকে একই সঙ্গে এসেছিলেন। তাঁর বয়স ছিল কম এবং তিনি ইতোপূর্বে রাজা-বাদশাহদের দরবার দেখেন নি বিধায় ভীত হয়ে পড়েন। শায়খ কুতুবুদ্দীন মুনাওয়ার তাকে ডেকে বললেন, বাবা নূরুদ্দীন! العظمة والكبرياء لله “শ্রেষ্ঠত্ব ও মর্যাদা আল্লাহর জন্য।” সাহেবযাদা নূরুদ্দীন বলেন যে, একথা শুনেই আমার ভেতরে একটি শক্তির সঞ্চার হল, সমস্ত ভয়-ভীতি দূর হতে লাগল। রাজ্যের যে সমস্ত আমীর-উমারা সেখানে দাঁড়িয়েছিল, তারা আমার নিকট একদম বকরীবৎ মনে হতে লাগল। সুলতান যখন জানতে পারলেন যে, শায়খজী আসছেন তখনই তিনি দাঁড়িয়ে গেলেন এবং তীর-ধনুক হাতে নিয়ে তীরন্দাষীতে মশগুল হয়ে পড়লেন। শায়খ কাছে আসতেই স্বাভাবিক নিয়মের খেলাফ তাঁকে তা’জীম ও মুসাফাহা করলেন। শায়খ অত্যন্ত শক্তভাবে বাদশাহর হাত আঁকড়ে ধরেন। বাদশাহ বলেন, আমি আপনার এলাকায় গিয়েছিলাম। আপনি আমাকে অভ্যর্থনাও জানান নি, এমনকি আমার সাথে একবার সাক্ষাতও করেন নি। শায়খজী বললেন, এ দরবেশ নিজেই কে এতখানি যোগ্য মনে করে না যে, বাদশাহর সঙ্গে মূলাকাত

করবে। এক কোণে পড়ে বাদশাহ ও মুসলিম জনসাধারণের জন্য দু'আ-খায়েরে মশগুল আছি। অক্ষম মনে করে রেহাই দিলে খুশী হই। বাদশাহ এতে অত্যন্ত প্রভাবিত হন। আপন ভ্রাতা ফীরোয শাহকে বলেন, শায়খজীর যেমনটি মর্ষি তেমনটিই কর। শায়খ মুনাওয়ার বললেন, বাপ-দাদার ভিটে-মাটিতে গিয়ে এক কোণে পড়ে থাকতে পারাটাই আমার মত ফকীরের লক্ষ্য-উদ্দেশ্য। ফীরোয শাহ এ আকাজক্ষা তৎক্ষণাৎ পূরণ করলেন। শায়খজীর প্রত্যাবর্তনের পর বাদশাহ একজন আমীরকে বললেন যে, যে সমস্ত বুয়র্গের সঙ্গে মুসাফাহা করার সুযোগ আমার হয়েছে তাদের মধ্যে যারাই আমার সঙ্গে হাত মিলিয়েছেন তাদেরই হাতে আমি কাঁপুনি লক্ষ্য করেছি। কিন্তু শায়খ মুনাওয়ার এতখানি শক্তভাবে মুসাফাহা করলেন যে, তার ওপর আমার কোন প্রভাব পড়েছে বলে মনে হচ্ছিল না।

বাদশাহ ফীরোয শাহ এবং মাওলানা যিয়াউদ্দীন বারনীকে তৎকালীন এক লাখ তংকা^১ সমেত শেখ মুনাওয়ারের খিদমতে পাঠান। (তংকা দর্শনে) শায়খ বললেন, এই দরবেশ এক লাখ তংকা গ্রহণ থেকে আল্লাহর দরবারে আশ্রয় প্রার্থনা করছে। প্রেরিত শাহী প্রতিনিধিদ্বয় ফিরে এসে সুলতানকে সব কিছু অবহিত করেন। সুলতান বললেন, এক লাখ যদি কবুল না করেন তবে পঞ্চাশ হাজারই তাঁর খিদমতে পেশ কর। কিন্তু শায়খ তাও কবুল করলেন না। সুলতান এতে বললেন, যদি শায়খ এটাও কবুল না করেন তবে লোকে আমাকে কি বলবে! শেষ পর্যন্ত তংকার অংক দু'হাজারে এসে দাঁড়ায়। ফীরোয শাহ ও মাওলানা যিয়াউদ্দীন শেখাবধি আরম্ভ করলেন যে, এর কম অংকের কথা আমরা বাদশাহর সামনে কিছুতেই আলোচনা করতে পারি না। শায়খ বললেন, সুবহানাল্লাহ! দরবেশের তো দু'সের চাল-ডাল এবং এক রত্তি ঘি-ই যথেষ্ট। সে এই হাজার হাজার টাকা দিয়ে কি করবে! অবশেষে অনেক চেষ্টা-তদবীর ও তালবাহানার আশ্রয় গ্রহণ করে এবং এই কথা বলে যে, শাহী উপহার গ্রহণে একেবারে অস্বীকৃতি জানানোর ফলে বাদশাহ নিজেকে অসন্তুষ্ট ও অপমানিত বোধ করবেন—তাঁকে মাত্র দু'হাজার তংকা গ্রহণ করতে রাখী করানো হয় এবং তিনি সে তংকা আধ্যাত্মিক পথের সাধকবৃন্দ ও অভাবী লোকদের মাঝে বিলিয়ে দিয়ে হাঁসি ফিরে যান।^২

যে সময় সুলতান মুহাম্মাদ তুগলক দিল্লীর অধিবাসীদেরকে দেবগীরে স্থানান্তরের নির্দেশ দেন—তখন তিনি দৃঢ় সংকল্পবদ্ধ হন যে, তিনি তুর্কিস্তান ও খুরাসানকে স্বীয় সাম্রাজ্যভুক্ত করবেন এবং চেঙ্গীয খানের বংশধরদের ভিত্তি

১. তংকা বা তঙ্গা ছিল সে যুগের ভারতবর্ষীয় মুদ্রা। এতে এক তোলা রৌপ্য থাকত, তুর্কী শব্দ যার অর্থ সাদা-শুভ্র অর্থাৎ রৌপ্য মুদ্রা।

২. সিয়াকুল আওলিয়া, পৃ. ২৫৩, ৩৫৫।

উপড়ে দেবেন। সে সময়েই হুকুম হয় যে, দিল্লী ও তৎসন্নিহিত এলাকার জনসাধারণ শ্রেণী-নির্বিশেষে যেন হাযির হয়, বড় বড় তাঁবু সংস্থাপিত হয়, ঐ সমস্ত তাঁবুতে মিন্বর স্থাপন করা হয় এবং উক্ত মিন্বরে উঠে শ্রদ্ধেয় 'আলিমবন্দ' যেন ভাষণ দেন ও জিহাদের উৎসাহ প্রদান করেন। ঐদিন হযরত খাজা নিজামুদ্দীন (র)-এর খাস খলীফা মাওলানা ফখরুদ্দীন যাররাবী, মাওলানা শামসুদ্দীন ইয়াহুইয়া এবং শায়খ নাসীরুদ্দীন মাহমুদকে ডেকে পাঠানো হয়। শায়খ কুতুবুদ্দীন দবীর ছিলেন হযরত সুলতানুল মাশায়িখের একজন দৃঢ় বিশ্বাসী ভক্ত ও মুরীদ এবং মাওলানা ফখরুদ্দীন যাররাবীর শাগরিদ। মাওলানা ফখরুদ্দীনকে সর্বপ্রথমে শাহী দরবারে আনা হয়। সুলতানের সঙ্গে মুলাকাতে মাওলানা অত্যন্ত অনিচ্ছুক ছিলেন। কয়েকবারই তিনি বলেন যে, আমি আমার মাথাকে ঐ ব্যক্তির দরবারে কর্তিত ও পতিত অবস্থায় দেখতে পাচ্ছি। অর্থাৎ আমি হক-কথা বলতে বিরত হব না যেমন, তেমনি এ লোকও আমাকে মাক করবে না। মাওলানা যখন শাহী দরবারে প্রবেশ করেন তখন শায়খ কুতুবুদ্দীন দবীর মাওলানার জুতা উঠিয়ে নেন এবং খাদিমের ন্যায় বগলে চেপে দাঁড়িয়ে পড়েন। সুলতান এতে কিছু বলেন না এবং মাওলানা ফখরুদ্দীনের সঙ্গে কথাবার্তায় মশগুল হয়ে পড়েন। সুলতান বলেনঃ আমার ধারণা যে, আমি চেঙ্গীষ খানের বংশধরদের সমূলে উৎপাটন করি। আপনারা কি আমাকে এ ব্যাপারে সহযোগিতা দেবেন? মাওলানা জবাবে 'ইনশাআল্লাহ' বললেন অর্থাৎ আল্লাহ যদি ইচ্ছে করেন তবেই সহযোগিতা করতে পারি। সুলতান বললেন, এটা তো সন্দেহমূলক কথা। মাওলানা বললেন, ভবিষ্যত সংক্রান্ত ব্যাপারে এমনটিই বলা হয়ে থাকে। সুলতান এ কথা শুনে হেঁচট খেলেন এবং বললেন, আমাকে কিছু নসীহত করুন। মাওলানা বললেন, ক্রোধ দমন করুন। সুলতান বললেন, কোন ধরনের ক্রোধ? মাওলানা বললেন, হিংস্র প্রাণীর ক্রোধ। এবার সুলতান এতখানি ক্রোধান্বিত হন যে, তাঁর চেহারায় তা প্রকাশ পাচ্ছিল, কিন্তু এর বাহ্যিক প্রকাশ থেকে তিনি বিরত থাকেন। এরপর সুলতান খাবার নিয়ে আসার জন্য আদেশ করেন। খাবার আনা হল। সুলতান এবং মাওলানা দু'জনেই একই পাত্রে খাচ্ছিলেন। মাওলানা এত অনিচ্ছা ও বিরক্তির সঙ্গে খাবার খাচ্ছিলেন যেন মনে হচ্ছিল যে, তিনি সুলতানের সঙ্গে একই পাত্রে খাবার গ্রহণ পসন্দ করছেন না। সুলতান অধিকতর ঘনিষ্ঠতা প্রকাশের নিমিত্ত হাড্ডি থেকে গোশত আলাদা করে করে মাওলানার সামনে রাখছিলেন আর মাওলানা অত্যন্ত বিরক্তি ও বিতৃষ্ণার সঙ্গে অল্প-স্বল্প খাচ্ছিলেন। অতঃপর দস্তরখানা বিস্তৃত করা হয় এবং সুলতান মাওলানাকে বিদায় দেন। বিদায় মুহূর্তে একটি পশমী পোশাক এবং টাকার

একটি খলে পেশ করেন। কিন্তু মাওলানার হাতে এ সব খেলাত ও টাকার খলে আসবার আগেই শায়খ কুতুবুদ্দীন দবীর (র)^১ হাত বাড়িয়ে সেটাকে নিয়ে নেন। মাওলানা বিদায় হবার পর সুলতান শায়খ কুতুবুদ্দীন দবীরকে বলেন, ওহে ধোঁকাবাজ! তুমি এসব কী করলে? প্রথমে ফখরুদ্দীনের জুতা নিজের বগলে নিলে, অতঃপর তাঁর খেলাত ও টাকার খলেও নিজে সামলে নিলে এবং তাকে আমার তলোয়ারের হাত থেকে বাঁচিয়ে দিলে, আর সে বিপদ নিজের মাথায় বরণ করে নিলে। শায়খ কুতুবুদ্দীন দবীর বললেন যে, মাওলানা ফখরুদ্দীন আমার উস্তাদ এবং আমার মুরশিদের খলীফাও বটেন। আমার জন্য এটাই সমীচীন ছিল যে, তাঁর জুতা শ্রদ্ধাভরে আমি মাথায় তুলে নিই—বগলে নেয়া তো অত্যন্ত ছোট ব্যাপার। আর এসব খেলাত ও টাকার খলে এমন কিইবা গুরুত্ব রাখে! সুলতান বললেন, এসব কুফরী 'আকীদা ছেড়ে দাও, অন্যথায় আমি তোমাকে কতল করব। শেষে যখনই মাওলানা ফখরুদ্দীন যাররাবী (র)-এর আলোচনা সুলতানের দরবারে উঠত, তখনই সুলতান হাত কচলিয়ে বলতেন, আফসোস! ফখরুদ্দীন আমার রক্তলোলুপ তলোয়ারের হাত থেকে বেঁচে গেল।

ইসলামী সালতানাভের পথপ্রদর্শন ও তত্ত্বাবধান

চিশতিয়া তরীকার মহান বুয়র্গগণ যদিও যুগের সুলতান-বাদশাহদের সংশ্রব বর্জন এবং শাহী দরবার থেকে দূরত্বে থাকবার সিদ্ধান্ত নিয়েছিলেন এবং এটাকেই নিজের ও নিজেদের গোটা সিলসিলার চিরন্তন উসূল তথা মূলনীতি বানিয়ে নিয়েছিলেন, কিন্তু যুগের সুলতান ও বাদশাহদের সত্য-সঠিক পথপ্রদর্শন এবং তত্ত্বাবধানের দায়িত্ব পালনে তাঁরা আদৌ গাফিল ছিলেন না এবং যখনই কোন সঠিক পরামর্শ অথবা কোন নির্বাচন, মনোনয়ন কিংবা নিজের রুহানী প্রভাব ব্যবহার করবার মওকা মিলত, তখনই তাঁরা এই সুবর্ণ সুযোগকে কিছুতেই হাতছাড়া করতেন না। ভারতবর্ষের কেন্দ্রীয় সাম্রাজ্যের কয়েকজন শাসক এবং প্রদেশ ও স্বায়ত্তসাসিত রাজ্যগুলির কয়েকজন প্রশাসক এসব চিশতিয়া সিলসিলার বুয়র্গগণের সঙ্গে ভক্তি-শ্রদ্ধা ও প্রীতির সম্পর্ক রাখতেন। এই সম্পর্ক থেকে অনেক অনাসৃষ্টি ও ফিতনা-ফাসাদ দূরীভূত হয় এবং অনেক নিষিদ্ধ ও অনাচারমূলক কার্যকলাপের মুলোৎপাটন এবং বহু আহকামে শরীয়তের প্রচলন ঘটে।

ভারতবর্ষের সুলতানদের মধ্যে সুলতান ফীরোয তুগলক স্বীয় উত্তম চরিত্র, প্রজাবাৎসল্য, দয়া প্রদর্শন, শান্তিপ্ৰিয়তা, জনকল্যাণ, যুলুম-অত্যাচারের মুলোৎপাটন, ইসলাম প্রচারের আগ্রহ, মাদরাসা কায়ম ইত্যাদি বিষয়ে যে বিশেষ

১. সিয়াকুল আওলিয়া, পৃ. ২৭ ও ১৭৩।

বৈশিষ্ট্যের দাবিদার ছিলেন, সম্ভবত অপর কোন শাসকই তেমনটি ছিলেন না। 'সিরাজ আফীফ' এবং 'তারীখে ফীরোযশাহী'তে এই বাদশাহুর গঠনমূলক কার্যাবলী এবং সে যুগের কল্যাণ ও বরকত, শান্তি ও নিরাপত্তা সম্পর্কে কিছুটা আলোচনা করা হয়েছে।

তারীখে ফিরিশতার লেখক লিখেছেন :

তিনি একজন মহান ন্যায়বিচারক, ভদ্র ও দয়ালু, পরোপকারী ও ধৈর্যশীল বাদশাহ ছিলেন। প্রজাবন্দ ও সৈন্যবাহিনী সবাই তাঁর ওপর সন্তুষ্ট ছিল। তাঁর শাসনামলে কেউ যুলুম করতে সাহস পেত না।^১

লেখক তাঁর শাসননীতির তিনটি বড় বৈশিষ্ট্যের কথা উল্লেখ করেছেন :

১. তিনি কোন মুসলমান কিংবা কোন যিম্মীকে বন্দী অথবা শাস্তি দেন নি। পুরস্কার ও বিভিন্ন প্রকার উপহার-উপঢৌকন প্রদান এবং এ জাতীয় কাজের মাধ্যমে তিনি জনগণের আত্মিক প্রশান্তি প্রদান করায় কাউকে বন্দী করা কিংবা শাস্তি দেবার দরকার হয়নি।

২. খাজনা, ট্যাক্স ইত্যাদি যা কিছুই প্রজাদের কাছে থেকে আদায় করা হত তা তাদের সাধ্য অনুযায়ী আদায় করা হত। অতীত সুলতানগণ যে সব অতিরিক্ত ট্যাক্স আদায় করার নিয়ম চালু করেছিলেন, সে সব তিনি মওকুফ করে দেন। প্রজাদের সম্পর্কে অশান্তি উৎপাদনকারী এবং ফিতনা-ফাসাদ সৃষ্টিকারীদের কোন অভিযোগই তিনি কানে তোলেন নি, বরং তাঁর বদৌলতে দেশের জনগণ ও প্রজাবন্দ অত্যন্ত সুখে-শান্তিতে ও খোশহালে ছিল।^২

৩. রাষ্ট্রীয় বিভিন্ন পদে এবং বিভিন্ন প্রদেশের শাসন কর্তৃত্বে তিনি দীনদার ও আল্লাহ-ভীরু লোকদের নিযুক্ত করেন। যারা ছিল অশান্তি উৎপাদনকারী ও ফিতনা-ফাসাদ সৃষ্টিকারী এবং অসৎ প্রকৃতির, সুলতান তাঁদের কোন পদই দেননি। কেননা তিনি জানতেন *الناس على دين ملوكهم* অর্থাৎ জনগণ তাদের রাজা-বাদশাহদের অনুসৃত নীতি-নিয়মেরই অনুসারী হয়ে থাকে।^৩

কিন্তু অনেক লোকই জানেন না যে, ফীরোয শাহ তুগলকের সিংহাসনারোহণ ও তাঁর মনোনয়নের পেছনে হযরত খাজা নাসীরুদ্দীন চেরাগে দিল্লী (র)-এর বিশেষ হাত এবং তাঁর কামিয়াবী ও সৌভাগ্যের মূলে তাঁর দু'আ ও তাওয়াজ্জুহর ভূমিকা ছিল অনেক বেশী। সিরাজে 'আফীফ-এ বর্ণিত আছে :

১. তারীখে ফিরিশতা, ১ম খণ্ড, পৃ. ২৭৮।

২. শান্তি দানের যে সব নতুন তরীকা সাবেক সাবেক সুলতানগণ আবিষ্কার করেছিলেন।

৩. তারীখে ফিরিশতা, ১ম খণ্ড, পৃ. ২৭১।

সুলতান মুহাম্মাদ তুগলক ঠাঠ মালিক তুগার বিদ্রোহ দমনের উদ্দেশ্যে যখন গমন করেছিলেন, তখন তিনি হযরত শায়খ নাসীরুদ্দীনকেও সাথে নিয়ে গিয়েছিলেন। সেখানে সুলতানের ইস্তিকাল হলে এবং সুলতান ফীরোয শাহ শাহী তখতে উপবেশন করলে হযরত শায়খ নাসীরুদ্দীন ফীরোয শাহকে পয়গাম পাঠিয়েছিলেন যে, তুমি আল্লাহর সৃষ্টি জগতের সঙ্গে ইনসাফ ও সুবিচার করবে, নাকি আমি এসব গরীব ও অসহায় মানুষের জন্য আল্লাহর নিকট অপর কোন শাসনকর্তা চাইব? সুলতান ফীরোয জবাব দিয়েছিলেন :

بابند گان خدائے تعالیٰ حلم و رزم و اتفاق كنم

অর্থাৎ আমি আল্লাহর বান্দাদের সঙ্গে সদয় ব্যবহার, ধৈর্যশীলতা ও ঐক্যের জন্য কাজ করব। হযরত শায়খ এ উত্তর শোনার পর বলে পাঠিয়েছিলেন, যদি তুমি আল্লাহর মাখলুকের সঙ্গে এ রকম ব্যবহার কর তবে আমি আল্লাহ পাকের নিকট থেকে তোমার জন্য চল্লিশ বছর চেয়ে নিয়েছি (অর্থাৎ তুমি চল্লিশ বছর রাজত্ব করতে পারবে)। আর প্রকৃত ঘটনাও এই যে, সুলতান ফীরোয শাহ চল্লিশ বছরই রাজত্ব করেছিলেন।^১

সুলতান মুহাম্মাদ শাহ বাহমনী (৭৫৯-৭৭৬)-কে দাক্ষিণাত্যের সমস্ত বুয়র্গই বাদশাহ হিসেবে মেনে নিয়েছিলেন এবং তাঁর হাতে বায়'আতও হয়েছিলেন। কিন্তু হযরত শায়খ বুরহানুদ্দীন গরীব (র)-এর খলীফা ও স্থলাভিষিক্ত হযরত শায়খ যয়নুদ্দীন (ওফাত ৮০১ হিজরী) এই ভিত্তিতে বায়'আত হতে অস্বীকৃতি জানিয়েছিলেন যে, বাদশাহ মদ্যপান ও শরীয়ত নিষিদ্ধ কর্মে লিপ্ত। তিনি বলেছিলেন :

আল্লাহর সৃষ্টি জগতের ওপর হুকুমত করার যোগ্য ও অধিকারী একমাত্র সেই ব্যক্তি যিনি ইসলামী বিধি-বিধান তথা এর নিদর্শনাবলীর হিফায়ত করার চেষ্টা করবেন এবং প্রকাশ্যে ও অপ্রকাশ্যে কোন অবস্থাতেই শরীয়ত বিরোধী কার্যাবলীর ধারে-কাছেও যাবেন না।

৭৬৭ হিজরীতে সুলতান যখন দৌলতাবাদে বিজয়ীর বেশে প্রবেশ করেন তখন তিনি হযরত শায়খকে পয়গাম পাঠান যে, হয় আপনি আমার দরবারে হাযির হবেন অথবা নিজ হাতে আমার খিলাফতের বায়'আত লিখে পাঠিয়ে দেবেন। শায়খ এর জবাবে বলেন যে, একবার কোন এক উপলক্ষে একজন 'আলিম, একজন সাইয়েদ ও একজন হিজড়া (নপুংসক) কাফিরদের হাতে বন্দী

হয়। অতঃপর তারা এদের সম্পর্কে সিদ্ধান্ত গ্রহণ করে যে, এদের তিনজনকেই পূজার ঘরে নেয়া হবে। যে মূর্তিকে সিজদা করবে তার জীবন বাঁচবে, আর যে তা করতে অস্বীকার করবে তাকে হত্যা করা হবে। প্রথম 'আলিমকে নেওয়া হল। তিনি কুরআনুল করীমের অব্যাহতির বিধানের^১ ওপর আমল করেন এবং মূর্তির সামনে ম্যাথা নুইয়ে নিজের জান বাঁচিয়ে নেন। সাইয়েদ সাহেব 'আলিমকে অনুসরণ করেন। এরপর যখন হিজড়ার পালা আসল—তখন সে বলল, আমার সারাটা জীবনই তো কেটে গেছে অশালীন কর্মের ভেতর দিয়ে। তাছাড়া আমি 'আলিমও নই—সাইয়েদও নই যে, এগুলির কোন একটি মর্যাদা ও ফযীলতের দোহাই দিয়ে এমন কাজ করতে পারি। সে নিহত হওয়াটাকেই নিজের জন্য মঞ্জুর করে নিল এবং মূর্তিকে সিজদা করল না। আমার ইচ্ছাও উক্ত হিজড়ার কাহিনীরই অনুরূপ। আমি তোমাদের সব রকমের জুলুম বরদাশ্ৰুত করব, কিন্তু তোমাদের দরবারে হাযির হব না আর তোমার হাতে বায়'আতও করব না। একথা জেনে বাদশাহ তো রেগে আশুন। তিনি তক্ষুণি তাঁকে শহর পরিত্যাগ করে চলে যাবার নির্দেশ দিলেন। শায়খও নির্ধিকায় স্বীয় মুসাল্লা কাঁধে ফেলে সোজা শায়খ বুরহানুদ্দীন (র)-এর কবরগাহে গিয়ে তাঁর কবরের শিয়রের দিকে নিজের লাঠি পুঁতে দিলেন এবং মুসাল্লা বিছিয়ে তার ওপর বসে পড়লেন। বললেন যে, এখন কেউ যদি বাপের বেটা হও তবে আমাকে এ জায়গা থেকে উঠাও। বাদশাহ শায়খ-এর এ ধরনের শক্ত মনোভাব ও দৃঢ়তা লক্ষ্য করে লজ্জিত হলেন এবং নিজ হাতে নিম্নোক্ত চরণ দু'টি কাগজে লিখে সদর শরীফের হাত দিয়ে পাঠিয়ে দিলেন—

ر من ان ام تو باش تزار

শায়খ বললেন যে, যদি সুলতান মুহাম্মাদ শাহ গাযী শরীয়তের রীতি-নীতির হিফায়ত ও প্রচলনের প্রয়াস চালান এবং বিজিত এলাকা থেকে সকল পানশালা এক্ষুণি উঠিয়ে দেন, নিজের পিতার সুলতনের ওপর আমল করেন এবং লোকের সামনে শরাব পান না করেন,—কাযী, 'উলামা ও প্রধানদের নির্দেশ দেন যে, তারা 'আমরু বিল মা'রুফ ওয়া নাহী 'আনিল মুনকার' তথা 'সৎকাজে আদেশ ও অসৎ কাজ থেকে নিষেধ'-এর ব্যাপারে জোর প্রচেষ্টা চালাবে তা হলে ফকীর যয়নুদ্দীন থেকে সুলতানের বড় দোস্ত ও কল্যাণকামী অপর কেউ হবে না। অতঃপর নিম্নোক্ত কবিতাটি নিজের কলম দিয়ে নিজ হাতেই লিখে দেন :

تا من بزیم نکوئش نه کنم
جز نیک دالی وفیک خوئی ند کنم

১. الا ان تتقوا منهم تقاة অর্থাৎ তবে ব্যতিক্রম যদি তোমরা তাদের (কাফিরদের) নিকট থেকে কোন ভয় বা আশংকা কর তবে তোমরা তাদের সম্বন্ধে সতর্কতার সাথে সাবধানে থাকবে। সূরা আলে-ইমরান, ৩য় রুকু'।

أنها که بجائے مابدیها کردند

تلاست رست بجز نکوئی نه کنم -

অর্থাৎ যতক্ষণ আমার ধড়ে প্রাণ আছে ততক্ষণ আমার দ্বারা ভাল, সহৃদয়, উত্তম ব্যবহার ও সদয় আচরণ ছাড়া আর কিছু প্রকাশ পাবে না। যে সমস্ত লোক আমার সঙ্গে অসদ্ব্যবহার করেছে, যখনই সুযোগ মিলবে আমি তাদের সঙ্গে ভাল ব্যবহারই করব।

সুলতান মুহাম্মাদ শাহ তাঁর নামের সঙ্গে 'গায়ী সন্বোধন দেখে অত্যন্ত খুশী হন এবং ফরমান জারি করেন যে, শাহী উপাধির সঙ্গে এটা যেন অতিরিক্ত যোগ করা হয়। হযরত শায়খ-এর সঙ্গে মুলাকাত হবার আগেই সুলতান মারহাটওয়াড়ার হুকুমত মসনদে 'আলী খান মুহাম্মাদের হাওয়ালা করেন এবং স্বয়ং গুলবার্গা পৌছেন। অতঃপর গোটা রাজ্য থেকে মদের দোকান উৎখাত করে শরীয়তের বিধি-বিধান প্রচলন ও প্রসারে সমগ্র প্রচেষ্টা নিয়োজিত করেন। দাক্ষিণাত্যের চোর-ডাকাত ও দুষ্কৃতিকারীদের-যাদের নাম দূর-দূরান্তরে ছড়িয়ে গিয়েছিল, চুরি-ডাকাতিই ছিল যাদের একমাত্র নেশা ও পেশা-তাদেরকে সমূলে উচ্ছেদ করার ব্যবস্থা করেন। ফলে ছ'-সাত মাসের ভেতরেই গোটা দেশ এদের যুলুম-অত্যাচার থেকে মুক্ত ও পবিত্র হয়ে যায়। একটি বর্ণনা অনুসারে ছয় মাসের ভেতর চোর-ডাকাতদের বিশ হাজার মাথা কেটে বিভিন্ন দিক থেকে গুলবার্গায় আনয়ন করা হয়। সুলতান এই গোটা সময়টা হযরত শায়খ যন্নুদ্দীনের সঙ্গে চিঠিপত্রের মাধ্যমে যোগাযোগ রক্ষা করেন এবং একনিষ্ঠ ভক্তি-শ্রদ্ধা ও প্রীতিপূর্ণ ঘনিষ্ঠ সম্পর্ক বাড়াতে থাকেন। শায়খ (র)-ও সুলতানকে উৎসাহ প্রদান, সম্মান প্রদর্শন এবং দরকারী হিদায়াত ও পরামর্শ প্রদানে কখনও ক্রটি করেন নি।^১

চিশতিয়া তরীকার বুয়র্গদের বিরাট বিরাট খানকাহ ভারতবর্ষের যে সমস্ত অংশে ও প্রদেশে স্থাপিত হয়, সেখানকার ইসলামী হুকুমত ও তৎকালীন সুলতানদের হিদায়াত ও পথ-প্রদর্শন এবং ইসলামী হুকুমতের হিফাযতের ক্ষেত্রে এসব বুয়র্গ কখনই অলসতা প্রদর্শন করেন নি। পাণ্ডুয়াতে স্থাপিত বাংলার জগদ্বিখ্যাত খানকাহ সেখানকার ইসলামী হুকুমতের জন্য শক্তির উৎস ও আশ্রয়লাভের মাধ্যম ছিল। যখন সেখানকার ইসলামী রাজত্ব ও শাসনকর্তৃত্বের ভিত নড়ে উঠল, তখন এসব দরবেশ এ সম্পর্কে গভীরভাবে চিন্তা করেন

এবং তা পূর্নবহালের জন্য সাধ্যমত ও সম্ভাব্য সব উপায়ে প্রয়াস চালান।^১ অধ্যাপক খালীক আহমদ নিযামী 'তারীখে মাশায়িখে চিশ্ত' বা 'চিশতিয়া তরীকার মহান বুয়র্গগণের ইতিহাস' নামক গ্রন্থে লিখেছেন :

হযরত নূর কুতবে 'আলম ছিলেন শায়খ 'আলাওল হকের উপযুক্ত সন্তান। যে যুগে তিনি হিদায়াত ও ইরশাদের মসনদে সমাসীন ছিলেন, সে সময় বাংলার রাজনীতি অত্যন্ত নায়ুক অবস্থার মাঝ দিয়ে অতিক্রম করছিল। রাজা গণেশ (যিনি রাজশাহী জেলার ভাভুড়িয়ার জায়গীরদার ছিলেন) বাংলার সিংহাসন দখল করে বসেন এবং মুসলমানদের শক্তি সমূলে বিনাশ করতে দৃঢ়সংকল্প হন। হযরত নূর কুতবে 'আলম সরাসরি এবং সাইয়েদ আশরাফ জাহাঙ্গীর সিমনানী (র)-এর মাধ্যমে সুলতান ইবরাহীম শারকীকে বাংলাদেশ আক্রমণের দাওয়াত দেন। সাইয়েদ আশরাফ জাহাঙ্গীর (র)-এর সংকলনগুলিতে সেই সব চিন্তাকর্ষক চিঠিপত্র বিশেষভাবে পড়বার মত যার ভেতর উক্ত রাজনৈতিক টানাপোড়েন ও সংঘাতের বিস্তারিত বিবরণ লিপিবদ্ধ রয়েছে। সাইয়েদ আশরাফ জাহাঙ্গীর (র) যে চিঠি হযরত নূর কুতবে 'আলমের চিঠির জবাবে লিখেছেন তা বাংলাদেশের শ্রদ্ধেয় সূফীদের কার্যাবলীর ওপর যথেষ্ট আলোকপাত করেছে।^২

এই কতিপয় ঘটনা থেকেই অনুমান করা যাবে যে, চিশতিয়া সিলসিলার মহান বুয়র্গগণের তাসাওউফ শুধু নির্জনবাস, আত্মহনন ও দুনিয়া বর্জন ছিল না। তাঁরা নিজ নিজ কালে যুগের ধারাকে বদলাতে থাকেন এবং যুগের অবস্থাচক্রের সঙ্গে শক্তি পরীক্ষার চেষ্টাও চালিয়েছেন। অভ্যাচারী ও যালিম সুলতানের মুখোমুখী হক-কথা বলতে, তাদের ভুল ও অন্যায প্রবণতা মুকাবিলা করতে ও রুখে দাঁড়াতে এবং তাদের সলা-পরামর্শ দানেও কোনরূপ ইতস্তত করতেন না এবং যখনই তাঁদের মওকা মিলত, তাঁরা সংস্কার-সংশোধন ও বিপ্লবী প্রয়াস গ্রহণেও দ্বিধা করতেন না।

ইসলামের প্রচার ও প্রসার

চিশতিয়া সিলসিলার বুনিয়াদ ভারতবর্ষের মাটিতে ইসলামের প্রচার ও প্রসারের ওপর পড়েছিল এবং তার উচ্চ মর্যাদাসম্পন্ন প্রতিষ্ঠাতা হযরত খাজা মু'ঈনুদ্দীন চিশতী (র)-এর হাতে এত অধিক সংখ্যায় মানুষ মুসলমান হয়েছিল

১. বিস্তারিত জানতে হলে দেখুন, গুলাম হসেন সলীমকৃত রিয়াজুস-সালাতীন, তারীখে বাঙ্গালা, পৃ.

১১০—১১৬।

২. তারীখে মাশায়িখে চিশ্ত, পৃষ্ঠা ২০২।

যে, ইতিহাসের এই অন্ধকারে তার পরিমাপ করা কঠিন। সাধারণভাবে স্বীকার করা হয় যে, ভারতবর্ষে মুসলমানদের সংখ্যার এই আধিক্য অনেকাংশেই হযরত খাজা চিশতী (র)-এর চেষ্টা-সাধনা ও আধ্যাত্মিকতারই অনিবার্য ফসল। এর মধ্যে একটি বিরাট সংখ্যা হযরত খাজা (র)-এর রূহানী কুওত, উজ্জ্বল কামালিয়াত এবং আল্লাহর নিকট গ্রহণযোগ্য ঘটনাবলীর কারণেই মুসলমান হয়েছিল। সে যুগের ভারতবর্ষ যোগ ও তাত্ত্বিক সাধনার বিরাট কেন্দ্র ছিল। এখানকার অনেক ফকীর ও সন্ন্যাসী তাত্ত্বিক-যোগসাধনা ও আত্মিক শক্তিতে ছিল অভ্যস্ত বলীয়ান। কঠোর কঠিন সাধনা এবং বিভিন্ন প্রকার অনুশীলন ও যোগাভ্যাস দ্বারা তারা কাশফ ও সম্মোহনের বিরাট শক্তি আত্মস্থ করে রেখেছিল। তাদের মধ্য থেকে অনেক লোকই এই নবাগত মুসলমান ফকীরকে পরীক্ষা-নিরীক্ষা এবং তাঁকে তকলীফ দেবার জন্য তাঁর নিকট আসে। কিন্তু তারা সত্বরই জেনে যায় যে, এই বিদেশী মুসাফির দরবেশ তাদের থেকেও আত্মিক ও সম্মোহনী শক্তিতে অনেক বেশী অগ্রসর এবং অবশেষে ফিরআউনের যাদুকরদের মত তারাও পরিমাপ করতে পারে যে, তাঁর কামালিয়াত ও শক্তির উৎসমূল অন্য কিছু। এরই সঙ্গে তাদের চরিত্রের পবিত্রতা, পরিষ্কার-পরিচ্ছন্ন বৈরাগ্যসুলভ নির্লোভ জীবন যাপন, ঈমান ও ইয়াকীনের শক্তি, আল্লাহর সৃষ্ট জীবের প্রতি সমবেদনা ও সহানুভূতি, জাতি-ধর্ম নির্বিশেষে মানুষের প্রতি ভালবাসা এবং মানবতার প্রতি সম্মান ও শ্রদ্ধা দর্শনে বিরুদ্ধবাদীরাও তাদের ভক্ত ও অনুরক্তে পরিণত হয়। তায়কিরা ও তাসাওউফের কিতাবগুলিতে এই সিলসিলায় যোগী ও সন্ন্যাসীদের সঙ্গে মুকাবিলা এবং হযরত খাজা (র)-এর উজ্জ্বলতর আধ্যাত্মিক শক্তি, কাশফ ও সম্মোহনী শক্তির ঘটনাবলী যেসব ব্যাপকতর আধিক্যের সঙ্গে বর্ণনা করা হয়েছে, যদিও ঐতিহাসিক সনদ থেকে ও প্রাচীনতর সমসাময়িক উৎসের মাধ্যমে তা প্রমাণ করা কঠিন, তবুও ভারতবর্ষের সে সময়কার লোকের আগ্রহ ও প্রবণতা এবং আজমীরের ধর্মীয় ও আত্মিক কেন্দ্রিকতা দেখতে গেলে এটা মোটেই যুক্তিবহির্ভূত মনে হয় না। প্রকৃতপক্ষে যে জিনিস জনসাধারণকে হযরত খাজা (র)-এর প্রেমিক এবং ইসলাম গ্রহণে উনুখ করেছিল তা তাঁর একক আত্মিক শক্তি ছিল না, বরং তাঁর আধ্যাত্মিকতা, একনিষ্ঠতা, নিষ্কলুষ চরিত্র এবং সহজ সরল জীবনযাপন পদ্ধতি যা ভারতবর্ষের জ্ঞানী-গুণী ও সাধারণ মানুষ এর পূর্বে আর কখনও পরীক্ষা-নিরীক্ষা করেনি।

হযরত খাজা (র)-এর সিলসিলায় ভেতর হযরত খাজা ফরীদুদ্দীন গঞ্জ শকর (র)-এর প্রচেষ্টা ও তাওয়াজ্জুহ ইসলামের প্রচার ও প্রসারের ক্ষেত্রে বিশেষ

গুরুত্বের অধিকারী। তাঁর মজলিস ও খানকাহতে সকল জাতি-ধর্মের এবং সর্বশ্রেণীর লোকের আগমন ঘটত। হযরত খাজা নিজামুদ্দীন আওলিয়া (র) বলেন :

শায়খুল ইসলাম খাজা ফরীদুদ্দীনের খিদমতে প্রতিটি শ্রেণী ও আত্মিক শক্তি ও বর্ণের এবং জাতি-ধর্মের লোক আসত-আসত দরবেশ ও অ-দরবেশও।

হযরত খাজা (র)-কে আল্লাহ তা'আলা উচ্চতর যোগ্যতা ও আত্মিক শক্তি দান করেছিলেন। তার প্রেক্ষিতে এটা অসম্ভব নয় যে, ইসলাম প্রচারে সেটারও একটা ভূমিকা ছিল এবং নও-মুসলিমদের একটি বিরাট অংশ তাঁর আধ্যাত্মিকতা এবং কাশফ ও কারামত দেখেই মুসলমান হয়েছিল। পাঞ্জাব ও পাক-পত্তনের চতুর্পার্শ্বের বহু জাতি-গোষ্ঠী ও খান্দান তাদের পূর্বপুরুষদের ইসলাম গ্রহণকে হযরত খাজা (র)-এর তাওয়াজ্জুহ ও তবলীগের পরিণতি বলে মনে করেন এবং নিজেদের সম্পর্ক তাঁর দিকে যুক্ত করেন। অধ্যাপক আরনল্ড তাঁর পুস্তক "Preaching of Islam"-এ লিখেছেন :

পাঞ্জাবের পশ্চিম প্রদেশগুলির অধিবাসীবৃন্দ খাজা বাহউল হক মুলতানী এবং বাবা ফরীদ পাক-পত্তনীর তা'লামের কারণে ইসলাম কবুল করে। এ দু'জন মহান বুয়র্গ ত্রয়োদশ শতাব্দীর নিকট শেষপাদে এবং চতুর্দশ শতাব্দীর প্রথমদিকে আগমন করেন। বাবা ফরীদ শকরগঞ্জ (র)-এর জীবনী আলোচনা যিনি করেছেন, তিনি লিখেছেন যে, ষোলটি জাতিগোষ্ঠীকে তিনি তাঁর তালীম ও তালকীন তথা শিক্ষা ও দীক্ষা প্রদান করে ইসলামে দাখিল করেছিলেন। কিন্তু আফসোসের বিষয় এই যে, উক্ত গ্রন্থকার উক্ত জাতিগোষ্ঠীগুলির মুসলমান হবার বিস্তারিত বিবরণ লিখেন নি।^১

হযরত খাজা নিজামুদ্দীন আওলিয়া (র) ভারতবাসীদের ভেতর ইসলামের প্রচার ও প্রসারের ব্যাপারে অত্যন্ত উৎসুক ছিলেন। কিন্তু তিনি মনে করতেন যে, শুধু বক্তৃতা-বিবৃতি ও বাণী শ্রবণে কোন লোকের পক্ষে তার প্রাচীন বিশ্বাস ও ধ্যান-ধারণা থেকে ফিরে আসা এবং নতুন ধর্ম গ্রহণ করা, বিশেষ করে হিন্দু জাতির পক্ষে যারা নিজেদের গোঁড়ামি ও জাতিভেদ প্রথা ও অস্পৃশ্যতা তথা ছুৎমার্গকে কঠোরভাবে মেনে চলত, তাদেরকে শুধু বক্তৃতার চমৎকারিত্বে এবং ওয়ায-নসীহতের মনোহারিত্বে মুসলমান বানিয়ে ফেলা মোটেই সহজ নয়। এর জন্য প্রভাবশীল ও দীর্ঘ সোহবতের প্রয়োজন।

ফাওয়াদেদুল ফুওয়াদ' গ্রন্থে বলা হয়েছে যে, একবার একজন মুসলিম ক্রীতদাস হযরত খাজা (র)-এর মুবারক মজলিসে গিয়ে উপস্থিত হয় এবং তার সাথে তার এক হিন্দু বন্ধুকেও নিয়ে আসে। সে বলল, এ আমার ভাই। হযরত খাজা (র) উক্ত ক্রীতদাসকে বললেন, তোমার এ ভাইটির ইসলামের দিকেও কি কিছু প্রবণতা আছে? ক্রীতদাস বলল, একে হযরতের পবিত্র খিদমতে এজন্যেই নিয়ে এসেছি যেন আপনার কৃপাদৃষ্টির বরকতে সে মুসলমান হয়ে যায়। একথা শোনাশ্রমাত্রই হযরত খাজা (র)-এর চোখ অশ্রুসজল হয়ে উঠল। তিনি বললেন, কারও বলার কারণে এ জাতির মন-মানস ও অন্তর- রাজ্যের পরিবর্তন হয় না। অবশ্য হ্যাঁ! এর যদি আল্লাহর কোন নেক বান্দার সাহচর্য লাভের সৌভাগ্য ঘটে—তবে আশা করা যায় যে, তাঁর পবিত্র সোহবতের বরকতে সে মুসলমান হয়েও যেতে পারে।^১

এতে কোন সন্দেহ নেই যে, এই পঞ্চাশ বছরের দীর্ঘ সময়ে যেখানে হযরত খাজা নিজামুদ্দীন (র) দিল্লীর ন্যায় একটি কেন্দ্রীয় অবস্থানে হিদায়াত ও ইরশাদ-এর আসনে সমাসীন ছিলেন এবং তাঁর খানকাহর দরজা সকল শ্রেণীর মানুষের জন্য খোলা ছিল, আর এটা ছিল সেই যুগ যখন ভারতবর্ষের দূর-দূরান্ত ও প্রত্যন্ত এলাকা থেকে বিভিন্ন প্রয়োজনে ও বিভিন্ন উপলক্ষে লাখ লাখ অমুসলিম দিল্লীতে আগমন করত এবং নিজেদের জাতীয় গুণ ধারণার ভিত্তিতে হযরত খাজা (র)-এর পবিত্র যিয়ারত লাভের উদ্দেশ্যেও হাবির হ'ত -বিরাত সংখ্যায় ইসলাম ধর্ম গ্রহণ করেছে। মেওয়ান্ট এলাকায় যা হযরত খাজা (র)-এর কেন্দ্র গিয়াছপুর থেকে দক্ষিণ দিকের খানিকটা সন্নিকটেই অবস্থিত ছিল এবং সেখানকার অধিবাসীদের রাহাজানী ও অবাধ্য আচরণের কারণে কিছুকাল পূর্বে সুলতান নাসীরুদ্দীন মাহমুদের যমানায় শহরের আশ্রয়-প্রাচীর দিল্লীর দরজা সন্ধ্যা লাগতেই বন্ধ হয়ে যেত-হযরত খাজা (র)-এর ফয়েয ও বরকতে এবং তাঁর তা'লীম ও তরবিয়তের প্রভাবে সেই মেওয়ান্টিরাও উপকৃত হয়ে থাকবে এবং এটা আদৌ আশ্চর্য নয় যে, তারা বিরাত সংখ্যায় তাঁরই যমানায় মুসলমানও হয়ে থাকবে।

চিশতিয়া তরীকার খানকাহগুলি নিজ নিজ প্রভাবাধীনে প্রত্যক্ষ ও পরোক্ষভাবে পার্শ্ববর্তী এলাকার অমুসলিম অধিবাসীদেরকে নিজেদের আমল-আখলাক, রুহানী ভাবধারা, সাম্য ও ভ্রাতৃত্ব দ্বারা-যার পরিবেশ উক্ত খানকাহগুলিতে বিদ্যমান ছিল, অবশ্যই প্রভাবিত করেছে। পাণ্ডুর চিশতিয়া

খানকাহু এবং আহমদাবাদ ও গুলবর্গার চিশতী বুয়র্গদের প্রভাবে অমুসলিম জনগোষ্ঠীর একটি বিরাট অংশের মুসলমান হওয়া আদৌ অমূলক কল্পনা নয়। একাদশ শতাব্দীতে চিশতিয়া সিলসিলার মুজাদ্দিদ হযরত শাহ কলীমুল্লাহ জাহাঁনাবাদী ইসলাম প্রচারে অত্যন্ত উদ্যোগী পুরুষ ছিলেন। তিনি তাঁর খলীফা ও স্থলাভিষিক্ত শায়খ নিজামুদ্দীন আওরঙ্গাবাদীকে যে সব চিঠিপত্র লিখেছেন, তন্মধ্যে বিভিন্ন স্থানে এর জন্য তাকীদ ও হিদায়াত লক্ষ্য করা যায়। এগুলি পাঠে তাঁর চিন্তা-ভাবনা ও উদ্বেগ-অস্থিরতার পরিমাপ করা যায়। একটি চিঠিতে তিনি লিখেছেন :

در آن کو شید که صورت اسلام و وسیع گردد و ذاکرین کثیر -

ইসলামের সীমানার যেন বিস্তৃতি ঘটে এবং এর অনুসারীর সংখ্যা যেন ব্যাপকভাবে বর্ধিত হয় সেজন্য কোশেশ করবে।

অধ্যাপক খালীক আহমদ নিযামী লিখেছেন :

শায়খ নিজামুদ্দীন আওলিয়া (র)-এর তবলীগী চেষ্টা-সাধনার ফল এই হয়েছিল যে, বহু হিন্দুই ইসলামের ভক্ত-অনুরক্তে পরিণত হয়। কতক লোক যদিও আত্মীয়-স্বজনের ভয়ে মুসলমান হবার কথা প্রকাশ করত না, কিন্তু অন্তর থেকে তারাও মুসলমান হয়ে গিয়েছিল।

নিভান্তই আফসোস ও পরিতাপের বিষয় যে, কেউই ভারতবর্ষের মহান বুয়র্গদের, বিশেষ করে চিশতিয়া সিলসিলার বুয়র্গদের তবলীগী প্রয়াসের ইতিহাস ও বিবরণী লিপিবদ্ধ করার শ্রম স্বীকারে রায়ী হন নি। কিন্তু সমস্ত ঐতিহাসিকই এ বিষয়ে একমত-ভারতবর্ষের বুকে ইসলামের প্রচার ও প্রসারের সবচেয়ে বড় মাধ্যম ইসলামের এই সব শ্রদ্ধেয় মহান সূফী ও ফকীর-দরবেশগণই। আর এটাও দিবালোকের ন্যায় সত্য যে, তাসাওউফের এ ধারাবাহিকতায় চিশতিয়া সিলসিলা এবং এর মহান বুয়র্গগণের প্রাধান্য ও গুরুত্ব সর্বজনস্বীকৃত এবং এক্ষেত্রে তাঁদের অংশ তুলনামূলকভাবে অনেক বেশী।

ইলম-এর খিদমত ও প্রচার

হযরত খাজা নিজামুদ্দীন আওলিয়া (র) এবং তাঁর খলীফাগণ তাঁদের অনুসারীবৃন্দের ইলম হাসিল ও তার পূর্ণতা প্রাপ্তির ব্যাপারে কতখানি উৎসুক ছিলেন তার পরিমাপ হযরত খাজা ফরীদুদ্দীন (র)-এর কথিত উক্তি এবং স্বয়ং হযরত খাজা নিজামুদ্দীন (র)-এর শায়খ সিরাজুদ্দীন উছমানী আওদী (আখী

সিরাজ-প্রতিষ্ঠাতা, পাণ্ডুয়া খানকাহ) -এর সঙ্গে কৃত আচরণ থেকে অনুমান করা যাবে। তিনি যতদিন পর্যন্ত 'ইলম্ হাশিল ও তার পূর্ণতা অর্জন না করেছিলেন, ততদিন পর্যন্ত তাঁরা তাকে শর'ঈ ও রুহানী ক্ষেত্রে কোন কিছুই এজায়ত দেন নি। এর সুফল এই হয়েছিল যে, ধর্মীয় শিক্ষাদান ও সৎপথ প্রদর্শন, দরস ও-তাদরীস তথা পঠন-পাঠন এবং 'ইলমের প্রচার ও প্রসার উভয়টিই এই সিলসিলার ইতিহাসে পাশাপাশি হাত ধরাধরি করে চলেছে। এই সহাবস্থান মুসলমানদের অবনতি ও অধঃপতনকাল পর্যন্ত চলেছিল। হযরত খাজা (র)-এর একজন খলীফা মাওলানা শামসুদ্দীন ইয়াহুইয়া ঐ যুগের বহু 'উলামায়ে কিরাম ও মুদাররিসীনের উস্তাদ ছিলেন। শায়খ নাসীরুদ্দীন চেরাগে দিল্লী (র) একটি বিখ্যাত কবিতায় বলেছেন :

سَأَلْتُ الْعِلْمَ مَنْ أَحْيَاكَ حَقًّا - فَقَالَ الْعِلْمُ شَمْسُ الْيَتِيمِ يَحْيَى -

আমি 'ইলমকে জিজ্ঞেস করলাম যে, তোমাকে সত্যিকার জীবন কে দান করেছে; উত্তরে সে মাওলানা শামসুদ্দীন ইয়াহুইয়া (র)-এর নাম উল্লেখ করল।

শায়খ নাসীরুদ্দীন চেরাগে দিল্লী (র)-এর বিশিষ্ট মুরীদ ও ভক্ত-অনুরক্তদের মধ্যে কাযী 'আবদুল মুকতাদির কুন্দী (ওফাত ৭৯১ হিজরী), তাঁর প্রিয় শাগরিদ শায়খ আহমদ খানেশ্বরী (ওফাত ৮২০ হিজরী) এবং মাওলানা খাওয়াজগী দেহলভী (ওফাত ৮০৯ হিজরী) ভারতীয় উপমহাদেশের প্রখ্যাত উলামা, 'উস্তাদকুল শিরোমণি ও ইলমের মুজাদ্দিদবর্গের অন্যতম ছিলেন। কাযী 'আবদুল মুকতাদির এবং মাওলানা খাওয়াজগীরের প্রিয় শাগরিদ শায়খ শিহাবুদ্দীন আহমদ ইবনে ওমর দৌলতাবাদী (ওফাত ৮৪৯ হিজরী) ভারতীয় উপমহাদেশের গৌরব ও মূল্যবান সম্পদ হিসেবে বিবেচিত হতেন। আর মালিকুল 'উলামা কাযী শিহাবুদ্দীনের নাম ভারতবর্ষের জ্ঞানের ইতিহাসে উজ্জ্বলরূপে বিরাজিত ও বিকশিত ছিল। তাঁর শরাহ কাফিয়া ('শরাহ হিন্দী' নামে আরব ও অনারব সর্বত্রই মশহুর)-এর টীকাকারদের মধ্যে 'আল্লামা গায়রুনী এবং মীর গিয়াছুদ্দীন মনসূর শিরাজীর ন্যায় মহান ব্যক্তিও রয়েছেন। ইনিই তিনি, যিনি রোগাক্রান্ত হলে সুলতান ইবরাহীম শারকী পানির পেয়লা ভরে তার পক্ষে সাদ্কা করেন এবং দু'আ করেন যে, মালিকুল 'উলামা আমার সালতানাতের 'ইযযত ও আবরুদ্বরূপ। তাঁর মৃত্যু যদি অবধারিত হয়েই থাকে তবে তাঁর পরিবর্তে আমাকেই যেন কবুল করা হয়।

এই সিলসিলার একজন বুয়র্গ 'আলিম মাওলানা জামালুল আওলিয়া শিবলী লোদী (ওফাত ১০৪৭ হিজরী), যার প্রখ্যাত ও নামকরা শিষ্য-শাগরিদদের মধ্যে মাওলানা লুতফুল্লাহ কুর্দী, শায়খ মুহাম্মাদ তিরমিখী কালপভী, শায়খ মুহাম্মাদ রশীদ জৌনপুরী এবং সায়্যিদ ইয়াসীন বানারসীর মত মহান 'আলিম ও যমানার শ্রেষ্ঠ বুয়র্গ রয়েছেন। মাওলানা লুতফুল্লাহ কুর্দীর শাগরিদ ছিলেন হিন্দুস্তানের মশহুর 'আলিম মাওলানা আহমদ মিঠোভী ওরফে হামীদ আহমদ, কাযী 'আলীমুল্লাহ কুচেন্দোভী এবং মাওলানা 'আলী আসগর কনৌজী যারা দরস ও তাদরীস তথা পঠন-পাঠন-এর তৎপরতা অব্যাহত রাখেন এবং বড় বড় খ্যাতনামা 'আলিম ও মুদাররিস তাঁদের শিক্ষাকেন্দ্র (হালকায়ে দরস) থেকে উপযুক্ততা ও পরিপূর্ণতা হাসিল করে বের হয়ে আসেন। টিলাওয়ালী মসজিদের প্রখ্যাত দারুল 'উলুম, যার দায়িত্বে ছিলেন শাহ পীর মুহাম্মাদ লাখনোভী (ওফাত ১০৮৫ হিজরী)-এই সিলসিলার তা'লীম ও রুহানিয়াতের সাথে সম্পর্কিত ছিলেন। স্বয়ং দরসে নিজামী' (যার বিশ্বব্যাপী খ্যাতি সর্বজনস্বীকৃত)-এর প্রতিষ্ঠিতা মোল্লা নিজামুদ্দীন (ওফাত ১১৬১ হিজরী)-এর বিখ্যাত খলীফা ও বংশধর এই সিলসিলার সঙ্গে রুহানী সম্পর্ক রাখতেন। এছাড়া সাধারণভাবেও চিশতিয়া তরীকার মহান বুয়র্গগণের জ্ঞান-বিজ্ঞান ও সাহিত্যের প্রতি আগ্রহ, গভীর পাণ্ডিত্য ও জ্ঞানপ্রীতি একটি ঐতিহাসিক সত্য যা হযরত নূর কুতবে 'আলম, হযরত জাহাঙ্গীর আশরাফ সিমনানী, হযরত শাহ কলীমুল্লাহ জাহানাবাদীর চিঠিপত্রে এবং পাণ্ডুয়া, গুলবর্গা, মানিকপুর, সলোন ইত্যাদি খানকাহর শিক্ষামূলক তৎপরতা ও এর প্রতি আগ্রহ প্রদর্শন থেকে সহজেই আঁচ করা যায়।

শেষ কথা

চিশতিয়া সিলসিলার ইতিহাসের এই উজ্জ্বল অধ্যায় সমাপ্ত করার পূর্বে একটি তিক্ত সত্য প্রকাশ করে দেওয়া বোধহয় অপ্রাসঙ্গিক হবে না যে, ভাসাওউফ ও রুহানী ভাবধারার ইতিহাস আমাদের বলে দেয় যে, প্রত্যেকটি সিলসিলার প্রারম্ভ জোরালো উৎসাহ-উদ্দীপনা ও প্রবল আবেগ-অনুপ্রেরণা দ্বারাই হয়েছে। অতঃপর তা গতানুগতিকতায় এবং পরিশেষে রসম-রেওয়াজে পরিণত হয়েছে। এখানেও যে সিলসিলার প্রারম্ভ 'ইশক, মুহব্বত, যুহুদ ও আত্মোৎসর্গ, দারিদ্র্য ও পরমুখাপেক্ষিতাহীনতা, রিয়াজত ও মুজাহাদা, দা'ওয়াত ও তবলীগ দিয়ে হয়েছিল, তার ভেতর ক্রমাধিক্রমে এমন সব পরিবর্তন সংঘটিত হয়েছে যে, শেষ পর্যন্ত এর ব্যবস্থাপনায় তিনটি উল্লেখযোগ্য ক্রিয়াশীল বস্তু রয়ে গেছে।

১. মোল্লা নিজামুদ্দীন কর্তৃক উদ্ভাবিত ও প্রবর্তিত শিক্ষা কারিকুলাম অনুযায়ী প্রদত্ত শিক্ষা-পদ্ধতি।

-অনুবাদক।

ক. ওয়াহিদাতুল ওজুদের 'আকীদার ক্ষেত্রে বাড়াবাড়ি, এর প্রচারে সীমাহীন আত্মহ এবং এর সুস্বাস্থ্যসুস্থ অধ্যায়গুলোর ঘোষণা ও অবোধ আলোচনা।

খ. মাহফিলে সামা'র আধিক্য, ভাবাবেগ ও নৃত্যের মাত্রাতিরিক্ততা।

গ. শরীয়তের বাধানিবেদ-বহির্ভূত ওরস অনুষ্ঠানের আয়োজন, তার উজ্জ্বল্য ও দীপ্তি।

যে সমস্ত আমল, রসম-রেওয়াজ ও 'আকীদা-যার সংস্কার ও সংশোধনের জন্য খালিস ও বিশুদ্ধ দীনের এসব দৃঢ়চেতা ও মনোবলসম্পন্ন মুবাল্লিগব্দ ইরান ও তুর্কিস্তানের দূর-দূরান্ত থেকে এসেছিলেন-ক্রমে ক্রমে তাঁদের খানকাহগুলি এমন রূপলাভ করেছিল যে, অমুসলিম জনবসতিগুলির জন্য এটা একটি বিরতকর সমস্যা ও প্রশ্ন হয়ে দাঁড়ায় যে, ইসলাম ও অন্যান্য ধর্মের ভেতর (যে সবেবের সংস্কার ও সংশোধনের নিমিত্ত ইসলামের এসব মুবাল্লিগ জল-স্থল অতিক্রম করে তশরীফ এনেছিলেন) কার্যত পার্থক্য কি? তওহীদ শব্দের ব্যবহার এবং তওহীদের দা'ওয়াত ওয়াহিদাতুল ওজুদের অর্থের ভেতরেই সীমাবদ্ধ হয়ে যায়। সুনত ও শরীয়তের অনুসরণ-যে বিষয়ের ওপর ঐ সমস্ত বুয়র্গ এত বেশী জোর দিয়েছিলেন, জাহিরীপন্থীদের প্রতীক চিহ্ন এবং হাকীকত অজ্ঞ লোকদের আলামত হিসেবে রূপ লাভ করে। শরীয়ত ও তরীকত দু'টি ভিন্ন ভিন্ন পথের নাম হিসেবে মেনে নেওয়া হয়-যার মধ্যে পারস্পরিক বিভিন্নতাই নয়, পারস্পরিক বিরোধও বর্তমান। বাদ্যযন্ত্র ও সামা'র যান্ত্রিক উপকরণসমূহ যেগুলিকে পূর্ববর্তী যুগে বুয়র্গগণ এত কঠোর-কঠিনভাবে নিষিদ্ধ করেছিলেন, তা এই তরীকার অন্তর্ভুক্ত হয়ে যায়। ব্যথা-বেদনা ও 'ইশকের উপাদান যা ছিল চিশতিয়া তরীকার পূঁজি ও মূলধন—আজকের এ বাজারে এর এত দুর্ভিক্ষ দেখা দিয়েছে যে, সত্য-সন্ধানীকে আজ আফসোসের সঙ্গে বলতে শোনা যাচ্ছে যে, দারিদ্র্য যে তরীকার ছিল গর্ব ও অহংকার, আজ তাই আমীরী চাল-চলন ও শাহী ঠাট-বাটে পরিণত হয়েছে

এ সবেবের থেকে বেশী বিপ্লবাত্মক পরিবর্তন এবং ইতিহাসের সক্রমণ পরিণতি এই যে, আল্লাহর যে সমস্ত বান্দার জীবনের লক্ষ্যই ছিল আল্লাহর সকল বান্দাহর মাথাকে দুনিয়ার তামাম আস্তানা থেকে উঠিয়ে একক আল্লাহর আস্তানার দিকে ঝুঁকিয়ে দেয়া এবং আল্লাহ ব্যক্তিরেকে অন্য সব বস্তুতে আটকে পড়া অন্তরকে মুক্ত করে এক আল্লাহর সঙ্গে জুড়ে দেওয়া এবং যাদের দা'ওয়াত ও


জীবন-যিন্দেগী ছিল আশ্বিয়ায়ে কিরাম (আ)-এর জীবন ও যিন্দেগীর প্রতিচ্ছবি আর নিম্নোক্ত আয়াতের তাফসীর :

مَا كَانَ لِبَشَرٍ أَنْ يُؤْتِيَهُ اللَّهُ الْكِتَابَ وَالْحِكْمَ وَالنَّبُوءَةَ ثُمَّ يَقُولُ لِلنَّاسِ كُونُوا عِبَادًا لِي مِنْ دُونِ اللَّهِ وَلَكِنْ كُونُوا رَبَّانِيِّنَ بِمَا كُنْتُمْ تُدْرِسُونَ - وَلَا يَأْتِيَنَّكُمْ أَنْ تَتَّخِذُوا الْمَلَائِكَةَ وَالنَّبِيِّينَ أَوْلِيَاءَ أَيَأْمُرُكُمْ بِالْكَفْرِ بَعْدَ إِذْ أَنْتُمْ مُسْلِمُونَ - (ال عمران ٨)

“কোন ব্যক্তিকে আল্লাহ কিতাব, হিকমত ও নবুওত দান করবার পর সে মানুষকে বলবে যে, ‘আল্লাহর পরিবর্তে তোমরা আমার দাস হয়ে যাও,’ এটা তাঁর জন্য শোভন নয় ; বরং সে বলবে, ‘তোমরা রব্বানী হয়ে যাও, যেহেতু তোমরা কিতাব শিক্ষা দান কর এবং যেহেতু তোমরা অধ্যয়ন কর।’

“ফিরিশতাগণকে ও নবীগণকে প্রতিপালকরূপে গ্রহণ করতে সে তোমাদেরকে নির্দেশ দেবে না। তোমাদের মুসলমান হওয়ার পর সে কি তোমাদেরকে কাফির হতে বলবে?” [সূরা আল-ইমরান : ৮ম ব্লক]

যমানার বিপ্লবাত্মক পরিবর্তনে স্বয়ং তাঁরাই প্রার্থিত বস্তু ও লক্ষ্য এবং তাদের আন্তানাগুলিই সিজদাস্থল ও উপাস্য বস্তুতে পরিণত হয়েছে।



माखदुमल मुलक

हयरत शायख शरफुद्दीन आहमद ईयाहईया मुनायरी (र)

প্রথম অধ্যায়

জীবনের ঘটনাবলী ও বিভিন্ন অবস্থা জন্ম থেকে বায়'আত ও এজায়ত লাভ পর্যন্ত

খান্দান

নাম আহমদ, শরফুদ্দীন উপাধি, মাখদুমুল মুল্ক বিহারী তাঁর খেতাব। পিতার নাম ছিল শায়খ ইয়াহইয়া। ইনি ছিলেন যুবায়র ইবন 'আবদুল মুত্তালিবের অধঃস্তন পুরুষের অন্তর্গত। এদিক থেকে তাঁর খান্দান কুরায়শ বংশের প্রধান শাখা হাশিমী গোত্রের অন্তর্ভুক্ত। হযরত মুনাযরী (র)-এর পিতার পিতামহ মাওলানা মুহাম্মাদ তাজ ফকীহ স্বীয় যুগের বিখ্যাত 'উলামা ও মাশায়িখে কিরামের অন্তর্গত ছিলেন। আল-খালীল (শাম)' থেকে আবাস স্থানান্তর করে বিহারের অন্তর্গত মুনাযর^২ নামক স্থানে বসতি স্থাপন করেন। কতক গ্রন্থকার তাঁকে সুলতান শিহাবুদ্দীন ঘোরীর সমসাময়িক বলেছেন।

মাওলানা মুহাম্মাদ তাজ ফকীহ (র)-এর ব্যক্তিত্বের কারণে মুনাযর এবং তৎপার্শ্ববর্তী এলাকাগুলিতে ইসলামের ব্যাপক প্রচার ও প্রসার ঘটে। কিছুকাল তিনি মুনাযর-এর অবস্থান করে স্বদেশে প্রত্যাবর্তন করেন এবং জীবনের বাকী অংশ খালীলেই অতিবাহিত করেন। তাঁর খান্দান দস্তুরমত মুনাযরেই থেকে যায়।

১. বর্তমানে এ শহর হাশিমী রাষ্ট্র জর্দানের একটি শহর, বায়তুল মুকাদ্দাস থেকে প্রায় ১৫/১৬ মাইল দূরে অবস্থিত এবং হযরত খলীলুল্লাহ (আ)-এর দাফনগাহ হবার সৌভাগ্য লাভে ধন্য। শরীফ ও নেককার লোকদের এটা প্রাচীন বসতি। স্থানটি আবহাওয়ার মিষ্টি আমেজ, অধিবাসীদের বিনয়-নম্র ব্যবহার, মেহমানদারী ও উত্তম চারিত্রিক বৈশিষ্ট্যের জন্য মশহূর।
২. এখন সাধারণভাবে 'মিনায়র' নামে মশহূর। কিন্তু প্রাচীন উৎস ও বর্ণনা থেকে জানা যায় যে, এর আসল উচ্চারণ 'মুনায়র' ছিল। ফারহাসে ইবরাহিমী -খার অপর নাম শরফনামা ইবরাহিমী এবং শরফনামা আহমদ মুনাযরীও, যা ৮৬২ হিজরী থেকে ৮৭৯ হিজরীর মধ্যবর্তীকালের রচনা-এর ভূমিকায় এর লেখক ইবরাহীম কাওয়াম ফারুকী তাঁর কবিতার একটি চরণে কিতাবের নাম এভাবে ছন্দোবদ্ধ করেছেন : شرف نامہ احمد منیری এ চরণটি তখনই ছন্দোবদ্ধ ও সমপাদ্য হতে পারে যখন এটাকে 'মুনায়রী' পড়া হবে। এই কিতাবের আলোচনায় নিম্নে ইঞ্জিয়া অফিস লাইব্রেরীর তালিকা সূচীতে ইংরেজীতেও এভাবেই উল্লেখ করা হয়েছে অর্থাৎ মুনায়রী (Munayari)।

শায়খ আহমদ শরফুদ্দীন (র)-এর নানা শায়খ শিহাবুদ্দীন জগজ্জাত (র) সুহরাওয়ার্দীয়া সিলসিলার মাশায়িখে কিরামের অন্যতম ছিলেন। পিতৃভূমি ছিল কাশগড়। সেখান থেকে তিনি ভারতবর্ষে আসেন এবং জাঠলী নামক স্থানে অবস্থান গ্রহণ করেন। জাঠলী পাটনা থেকে তিন মাইল দূরত্বে অবস্থিত। ইনি শায়খুশ শুযুখ হযরত শায়খ শিহাবুদ্দীন সুহরাওয়ার্দী (র)-এর মুরীদমণ্ডলীর অন্তর্গত ছিলেন। যুহুদ, পরহেযগারী ও দৃঢ়তার ক্ষেত্রে অত্যন্ত উচ্চ মরতবার অধিকারী ছিলেন এবং এ কারণেই 'জগজ্জাত' অর্থাৎ 'দুনিয়ার আলো' উপাধিতে মশহুর হন। তাঁর এক কন্যার গর্ভে শায়খ আহমদ শরফুদ্দীন (র) এবং অপর কন্যার গর্ভে শায়খ আহমদ চরমপোশ (র)-এর মত নামী বুয়র্গ পয়দা হন।^১ তিনি ছিলেন হযরত ইমাম হুসায়নের বংশধর। এদিক দিয়ে শায়খ শরফুদ্দীন (র)-এর মাতৃকুল সায়্যিদ বংশধর।

জন্ম

৬৬১ হিজরীর শা'বান মাসের শেষ জুম'আর দিনে মুনায়র নাম স্থানে তাঁর জন্ম হয়। شرف اگیں ছিল জন্ম তারিখ। শায়খ শরফুদ্দীনের ভাই ছিলেন তিনজন যাঁদের নাম যথাক্রমে শায়খ খলীলুদ্দীন, শায়খ জালালুদ্দীন ও শায়খ হাবীবুদ্দীন।

শিক্ষা

হযরত শায়খ শরফুদ্দীনের পড়াশোনা করার মত বয়স হতেই তাঁকে মকতবে পাঠিয়ে দেওয়া হয়। সে যুগে সবগুলি মুসলিম দেশেই সাধারণত নিয়ম ছিল যে, ছাত্রদেরকে তাদের পাঠ্য পুস্তকের প্রতিটি শব্দাক্ষর মুখস্থ করানো হ'ত এবং অভিধানের সংক্ষিপ্ত কিছু কিতাবও। এর উদ্দেশ্য ছিল ছাত্রের স্মৃতিভাণ্ডার যেন শব্দ-সঞ্জারে সমৃদ্ধ হয়। পরবর্তীকালে হযরত শায়খ এ ধরনের শিক্ষা পদ্ধতিকে তাঁর কতিপয় লেখায় সমালোচনা করেছেন এবং স্মৃতিশক্তি ও সময়ের এ ধরনের অপব্যবহারে আফসোস প্রকাশ করেছেন। তিনি বলেছেন, একমাত্র কুরআনুল করীম ছাড়া এ জাতীয় কিতাবকে এভাবে রফত করানো-যা ধর্মের দৃষ্টিতেও কোন সুফল বহন করে না, অবান্তর প্রচেষ্টা ছাড়া কিছু নয়। মা'দানুল মা'আনী' নামক গ্রন্থের ষষ্ঠ অধ্যায়ে তিনি বলেন :

১. 'সীরাতুশ শরফ' নামক গ্রন্থে বলা হয়েছে যে, মুনায়র নামক কসবাটি ৫৭৭ হিজরীতে মুসলমানদের হাতে বিজিত হয়। গ্রন্থকার একটি ঐতিহাসিক নজীর তুলে ধরেছেন যা নিম্নরূপ :

এর দ্বারা এটা স্বীকার করতে হয় যে, মুনায়র বিজয় ৫৮৮ হিজরীতে শিহাবুদ্দীন খোরীর ভারতবর্ষ বিজয়েরও আগের ঘটনা। মুসলমানরা কি তাহলে গয়নী আমলের পূর্বেই বাংলা-বিহার সীমান্তে প্রবেশ করেছিল এবং তারা ইসলামী উপনিবেশ ও কর্তৃত্ব স্থানে স্থানে প্রতিষ্ঠিত করেছিল? বিষয়টি ঐতিহাসিক দৃষ্টিতে গবেষণার দাবিদার।

শৈশবে আমার উস্তাদ মহোদয়গণ আমাকে অনেক কিতাবই মুখস্থ করিয়েছিলেন। উদাহরণস্বরূপ মাসাদির, মিসফতাহল লুগত ইত্যাদির নাম উল্লেখ করা যেতে পারে। মিসফতাহল লুগাত বিশটি অংশের সমষ্টি একটি গ্রন্থ যার একটি খণ্ডের মত আমাকে মুখস্থ করান। এর পরিবর্তে কুরআন মজীদই আমাকে মুখস্থ করাবার দরকার ছিল।^১

নিতান্তই আফসোসের বিষয় এই যে, কোন 'তায়কিরা' গ্রন্থেই তাঁর প্রাথমিক উস্তাদগণের নাম এবং সেসব কিতাব ও ইল্মের বিস্তারিত বিবরণ নেই যা তিনি দেশে থেকে শিখেছিলেন। এতটুকু অনুমান করা চলে যে, তিনি মুনায়র থেকেই মাঝারী রকমের শিক্ষা লাভ করেন এবং সে যুগের বড় বড় উস্তাদের নিকট শিক্ষা লাভ করার মত গৌরব অর্জন করেন।

মাওলানা শরফুদ্দীন আবু তাওয়ামার শিষ্যত্ব গ্রহণ এবং সোনারগাঁও সফর

দেশে থেকে শিক্ষালাভের যতখানি সুযোগ-সুবিধা লাভ করা সম্ভব ছিল, তা থেকে তিনি সম্পূর্ণ ফায়দা উঠাবার পর আল্লাহ পাক তাঁকে 'ইল্ম হাসিলে পরিপূর্ণতা এবং আরও অধিকতর তরক্কী দানের উদ্দেশ্যে অন্যবিধ ইন্তেজাম করেন। দিল্লীর প্রখ্যাত উস্তাদ মহোদয়গণের মধ্যে মাওলানা শরফুদ্দীন আবু তাওয়ামা যিনি সুলতান শামসুদ্দীন আলতামাশের রাজত্বকালে জ্ঞানমার্গের একজন উজ্জ্বল জ্যোতিষ্কস্বরূপ ছিলেন—সম্ভবত সুলতান গিয়াছুদ্দীন বলবনের রাজত্বকালে^২ তাঁর নিকট ব্যাপক লোক সমাগমের ফলে এবং হিংসুকদের ঈর্ষাকাতরতায় বাদশাহর ইঙ্গিতে তিনি দেশত্যাগে বাধ্য হন এবং সে যুগে ভারতবর্ষের মুসলিম সাম্রাজ্যের শেষ সীমান্ত শহর সোনারগাঁও^৩ অভিমুখে যাত্রা করেন। পশ্চিমধ্যে বিহার প্রদেশের ওপর দিয়ে অতিক্রম করাকালে তিনি

১. মা'দানুল মা'আনী মতবাবে শরফুল আখবার, পৃ. ৪৩।

২. যদি এটা মনেও নেয়া হয় যে, মাওলানা শরফুদ্দীন আবু তাওয়ামার মুনায়র আগমনের সময় শায়খ শরফুদ্দীন আহমদ কমপক্ষে বারো বছর বয়স্ক ছিলেন তাহলে এ সময় হিজরী ৬৭০ সাল সুলতান গিয়াছুদ্দীন বলবনের রাজত্বকাল। ইনি ৬৬৪ হি. থেকে ৬৮৬ হিজরী পর্যন্ত রাজত্ব করেন। এ থেকে জানা যায় যে, মাওলানা আবু তাওয়ামা (র) সুলতান গিয়াছুদ্দীন বলবনের ইঙ্গিতেই হিজরত করেছিলেন।

৩. মুসলিম রাজত্বকালে সোনার গাঁও ছিল পূর্ববঙ্গের রাজধানী। এখন এটা একটি অখ্যাত জায়গা যা অবজ্ঞাত অবস্থায় পড়ে আছে এবং Panam (পন্নাম) নামে ঢাকা (বর্তমানে নারায়ণগঞ্জ) জেলার অন্তর্গত। ব্রহ্মপুত্র নদ এর থেকে দু'ক্রোশ দূর দিয়ে প্রবাহিত। সোনার গাঁওয়ের চারপাশে বহু সংখ্যক মসজিদের নিশানা পাওয়া যায় যা থেকে বুঝা যায়, কোন এককালে এটি একটি বিরাট বড় মুসলিম শহর ছিল। শেরশাহ গ্রাণ্ড ট্রাংক রোড নামে পরিচিত যে শাহী সড়ক তৈরি করেছিলেন এটা তার শেষ মাথা।

কয়েকদিন মুন্সায়রে অবস্থান করেন। সম্ভবত সে সময় দিল্লী থেকে সোনার গাঁও যেতে এটি সরাইখানার ন্যায় কাফেলার বিশ্রামস্থল ও জনবসতি ছিল। অধিবাসীবৃন্দ জানতে পারে যে, দিল্লীর একজন যবরদস্ত ‘আলিম মুন্সায়র আসছেন। “মানাকিবুল আসফিয়া” লেখকের বর্ণনামতে শায়খ শরফুদ্দীন ইয়াহইয়া শায়খ মাওলানা শরফুদ্দীনের প্রগাঢ় পাণ্ডিত্য, নেক আমল ও তাকওয়া দৃষ্টি অত্যন্ত প্রভাবিত হন এবং বলেন যে, ‘ইল্‌মে দীন বা ধর্মীয় শিক্ষায় শিক্ষালাভ এমনি ইল্‌ম ও আমলের অধিকারী ব্যক্তিত্বের কাছ থেকেই করা উচিত। অতএব তিনি তাঁর পিতামাতার নিকট সোনার গাঁও যাবার অনুমতি প্রার্থনা করেন এবং তাঁদের এজায়ত লাভের পর তিনি মাওলানা শরফুদ্দীনের সাহচর্য অবলম্বন করেন এবং সোনার গাঁও গমন করেন। স্বয়ং শায়খ তদীয় গ্রন্থ “খাওয়ানে পুর নে‘মত”-এর ষষ্ঠ মজলিসে উস্তাদ মুহতারাম সম্পর্কে নিজের প্রতিক্রিয়া ও ভক্তি-শ্রদ্ধা প্রকাশ করতে গিয়ে নিম্নরূপ ভাষার আশ্রয় নেন :

مولانا شرف الدين ابو توامه ايس چنين دانشمندی که در تمامه هندوستان مشار آليه بودند وبيچ کسن رادر علم ايشان شبیه نه بود۔

অর্থাৎ “মাওলানা শরফুদ্দীন আবু তাওয়ামা (র) এমন একজন ‘আলিম ছিলেন সমগ্র ভারতবর্ষের দৃষ্টিই ছিল যাঁর প্রতি নিবদ্ধ এবং জ্ঞানের জগতে তাঁর সমকক্ষ তখন কেউ ছিলেন না।”^১ সোনার গাঁও পৌঁছে তিনি ইল্‌ম হাসিলের ভেতর একান্তভাবে নিবিষ্ট হয়ে যান।

‘মানাকিবুল আসফিয়া’ গ্রন্থেতা বলেন যে, জনাব মুন্সায়রী (র) অধ্যয়ন ও পাঠাভ্যাসে এতখানি নিমগ্ন ছিলেন এবং সময়ের এতখানি মূল্য দিতেন যে, ছাত্র ও আগন্তুকদের সাধারণ দস্তুরখানে হাবির হওয়া এবং সবার সঙ্গে খানায় শরীক হওয়া ও সেখানে অধিক সময় অতিবাহিত করা তিনি সহ্য করতে পারতেন না। মাওলানা শরফুদ্দীন আবু তাওয়ামা তাঁর নিবিষ্টতা ও প্রকৃতির এ ধরনের গভীর দাবি দৃষ্টিে তাঁর জন্য স্বতন্ত্র ইন্তেজাম করেন। তাঁর খাবার অতঃপর তাঁর নিজ কক্ষে পাঠিয়ে দেওয়া হ’ত।^২

১. “মানাকিবুল আসফিয়ার” লেখক মাখদুম শাহ শূ‘আয়ব। ইনি হযরত শায়খ শরফুদ্দীন আহমাদ মুন্সায়রী (র)-এর চাচাভো ভাই এবং শায়খ ‘আবদুল’ আযীয ইবনে মাওলানা মুহাম্মাদ তাজ ফকীহ (র)-এর পৌত্র। এদিক দিয়ে এ গ্রন্থ শায়খ শরফুদ্দীন (র)-এর জীবন-বৃত্তান্তের প্রাচীনতম ও খাদ্যনীয় উৎস।

২. খাওয়ানে পুরানে‘মত ১৫ পৃ., মাতবাসে আহমদী।

৩. মানাকিবুল আসফিয়া, পৃ. ১৩১-৩২।

শায়খ শরফুদ্দীনের এ সময়টা গভীর নিবিষ্টতা ও একাকিত্বের মাঝে অতিবাহিত হয়। বলা হয়ে থাকে যে, সোনার গাঁও অবস্থানকালে দেশ থেকে যে সব চিঠিপত্র এসে পৌঁছত তিনি সেগুলিকে একটি বুড়িতে নিক্ষেপ করতেন এবং এগুলি এই ধারণায় পড়তেন না যে, না জানি এর কারণে তাঁর প্রকৃতিতে বিশৃঙ্খল, মানসিক বিপর্যয় ও অশান্তির কারণ ঘটে এবং উদ্দেশ্য হাসিলের পথে তা বাঁধা ও বিঘ্নের সৃষ্টি করে।^১

শায়খ মুনায়রী (র) সোনার গাঁওয়ে মাওলানার খিদমতে প্রচলিত সর্বপ্রকার জ্ঞানে ব্যুৎপত্তি লাভ করেন। ধর্মীয় শিক্ষা ও কল্যাণকর জ্ঞানে পরিপূর্ণতা লাভের পর মহান উস্তাদের মনে খাহেশ সৃষ্টি হয় যেন তিনি (শায়খ মুনায়রী) সে সমস্ত 'ইল্মও' হাসিল করেন যা সে যুগের তরুণ ও উৎসাহী যুবকেরা অত্যন্ত আগ্রহভরে শিক্ষালাভ করত। যেমন, রসায়নশাস্ত্র ইত্যাদি। শায়খ মুনায়রী (র) এতে আগ্রহী করেন এবং বলেন যে আমার জন্য ধর্মীয় শিক্ষাই যথেষ্ট।

বিবাহ

মাওলানা শরফুদ্দীন আবু তাওয়ামা (র) মূল্যবান রত্নসম এই যুবকের উপযুক্ত কদর ও সম্মান প্রদান করতে এতটুকু কুণ্ঠিত হন নি। স্বীয় কন্যাকে শায়খ শরফুদ্দীন আহমদ ইয়াহুইয়া মুনায়রী (র)-এর সঙ্গে বিবাহ দিয়ে তাঁকে জামাতারূপে গ্রহণ করেন। সোনার গাঁওয়ে অবস্থানকালেই শায়খ মুনায়রীর জ্যেষ্ঠ পুত্র শায়খ যাকীউদ্দীন জন্মগ্রহণ করেন।

দেশে প্রত্যাবর্তন

কতক জীবনী-রচয়িতার বর্ণনামতে শিক্ষা সমাপনান্তে যখন তিনি চিঠির বাঁপি খোলেন, তখন প্রথম চিঠি খুলতেই তিনি তাতে শায়খ ইয়াহুইয়া (র)-এর ইত্তিকালের সংবাদ দেখতে পান। এ সংবাদ মিলতেই তাঁর মায়ের কথা মনে পড়ে এবং সন্তানের মনে উছলে ওঠে মাতৃভক্তিরসের ফল্লুধারা। তিনি দেশে ফিরবার জন্য শ্রদ্ধেয় উস্তাদের নিকট এজাযত চাইলেন এবং পুত্র শায়খ যাকীউদ্দীনকে সাথে নিয়ে মুনায়র প্রত্যাবর্তন করেন।^২

শায়খ ইয়াহুইয়া মুনায়রী (র)-এর ইত্তিকাল হয় ঐতিহাসিকদের মতে ৬৯০ হিজরীর ১১ই শাবান তারিখে। এজন্য এটা স্বীকার করতে হয় যে, তাঁর (শায়খ শরফুদ্দীন-এর) দেশে প্রত্যাবর্তনকাল ছিল ৬৯০ হিজরীর কোন এক মাস। এর

১. সীরাতুশ শরফ, পৃ. ৪৬ ও নুহহাতুল খাওয়াতির, ২য় খণ্ড, পৃ. ৯।

২. সীরাতুশ শরফ, পৃ. ৫২।

চেয়ে বেশী বিলম্বের সুযোগ এজন্য নেই যে, শায়খ নাজীবুদ্দীন ফিরদৌসী-যাঁর হাতে তিনি দিল্লী গিয়ে বায়'আত হয়েছিলেন- ইস্তিকাল করেন ৬৯১ হিজরীতে। এ জন্য মুনাযর প্রত্যাবর্তন এবং দিল্লী পৌছা ৬৯০ হিজরীর শেষ কিংবা ৬৯১ হিজরীর প্রথম দিককার ঘটনা বলে স্বীকার করতে হয়। এ যুগে সফরে দুঃখ-কষ্ট-যাতনা এবং সোনার গাঁও থেকে দিল্লী পর্যন্ত দূরত্ব দৃষ্টে এ বর্ণনা স্বীকার করে নিতে কিছুটা কষ্ট হয় এবং এ ঘটনাও সন্দেহ থেকে মুক্ত নয় যে, তিনি ৬৯০ হিজরী পর্যন্ত চিঠি খুলে দেখেন নি আর পিতার ইস্তিকালের পরপরই তাঁর চিঠির ঝাঁপি খোলার সুযোগ হয়, আবার তাও খুলতেই হাতে পড়ে পয়লাতেই তাঁর পিতার মৃত্যু সংবাদ সংক্রান্ত চিঠিটা। কাজেই শায়খ মুনাযরী (র)-এর দেশে ফেরার একমাত্র কারণ শুধু একটি চিঠির আকস্মিক পাঠই বলা ঠিক হবে না, বরং এ থেকে এটা অবশ্যই প্রকাশ পায় যে, তিনি ৬৯০ হিজরীর পূর্বে তাঁর স্বদেশভূমি মুনাযরে প্রত্যাবর্তন করেন নি। কেননা এই প্রত্যাবর্তনকালে কোন জীবনীকারই তাঁর সঙ্গে তাঁর পিতার সাক্ষাতের কোন বর্ণনা উল্লেখ করেন নি। মানাকিবুল আসাফিয়া' গ্রন্থে (যা তাঁর সম্পর্কে জানবার একটি খান্দানী উৎসও বটে) বলা হয়েছে :

সেখান থেকে তিনি মুনাযর প্রত্যাবর্তনের নিয়ত করলেন। মায়ের খিদমতে উপস্থিত হয়ে স্বীয় জ্যেষ্ঠপুত্র (শায়খ যাকীউদ্দীন)-কে তাঁর দাদীর কোলে তুলে দিলেন এবং বললেন যে, একেই আপনার সন্তান মনে করুন। আর আমাকে এজাযত দিন যেন যেখানে ইচ্ছা আমি যেতে পারি এবং মনে করবেন যে, শরফুদ্দীন মারা গেছে। এরপর তিনি দিল্লী রওয়ানা হয়ে যান এবং দিল্লীর মহান বুয়ুর্গগণের খিদমতে হাযির হন।^১

যাই হোক, তাঁর উচ্চ মনোবল, সত্যের প্রতি প্রবল আগ্রহ ও নিষ্ঠা এবং ইশকে ইলাহীর সুপ্ত স্কুলিংগ তাঁকে এর এজাযত দেয়নি যে, তিনি যাহিরী 'ইলমে পরিপূর্ণতা লাভকেই যথেষ্ট মনে করে মুনাযর অবস্থান করবেন এবং যাহিরী 'আলিমদের ন্যায় দর'স ও তাদরীস তথা পঠন ও পাঠনকেই একমাত্র পেশা হিসেবে আঁকড়ে ধরবেন। অল্পবয়স্ক যাকীউদ্দীনকে নিজ মায়ের হাওয়ালা করেন এবং বলেন যে, একেই আমার স্মৃতি ও খান্দানের আশার বাতি জেনে নিজের কাছে রাখুন, অন্তরকে প্রবোধ দিন এবং আমাকে দিল্লী যাবার অনুমতি দিন যেন আমার পরম লক্ষ্য ও আরাধ্যকে আমি লাভ করতে পারি।

দিল্লী সফর ও একজন মহান বুয়র্গের নির্বাচন

যাই হোক, ৬৯০ হিজরীর শেষভাগে কিংবা ৬৯১ হিজরীর প্রথমপাদে তিনি দিল্লী রওয়ানা হন। জ্যেষ্ঠ ভ্রাতা শায়খ জলীলুদ্দীন ছিলেন সফরসঙ্গী। অনুমান করা যায় যে, প্রগাঢ় পাণ্ডিত্যের অধিকারী উস্তাদের তা'লীমের ফয়েয ও বরকতে এবং স্বীয় প্রকৃতিগত সূক্ষ্ম উপলব্ধি থেকে তাঁর মধ্যে সমসাময়িক 'উলামা ও মাশায়িখে কিরামকে তীক্ষ্ণ বিশ্লেষণী দৃষ্টিতে দেখার অভ্যাস এবং যাহিরী ইলমের মানদণ্ডে পরীক্ষা-নিরীক্ষার প্রবৃত্তি গড়ে উঠেছিল। দিল্লী পৌঁছে তিনি যে যুগের বিখ্যাত বুয়র্গদের দরবারে হাযিরা দেন এবং তাঁদেরকে এই দৃষ্টিতে দেখতে থাকেন যে, এঁদের মধ্যে কাকে তাঁর মুরশিদ হিসেবে গ্রহণ করা যায়। কিন্তু জীবনীকারদের বর্ণনানুসারে দিল্লীর বুয়র্গানে দীন ও মাশায়িখে কিরামের মধ্যে কেউই তাঁর দৃষ্টিতে গ্রহণযোগ্য মনে হ'ল না। মানাকিবুল আসফিয়ার বর্ণনা মুতাবিক তিনি সবার দরবারে হাযিরা দেবার পর বলেন, "এটাই যদি হয় পীর-মুরীদী তবে আমিও একজন পীর" ^১ اگر شیخی انیست ماه শুধু হযরত সুলতানুল মাশায়িখ শায়খ নিজামুদ্দীন (র)-এর খিদমতে হাযির হয়ে তিনি প্রভাবান্বিত হয়েছিলেন। শায়খ মুনায়রী (র) ও সুলতানুল মাশায়িখ (র)-এর মাঝে কিছু জ্ঞানগর্ভ আলোচনা হয়। সুলতানুল মাশায়িখ (র) তাঁর বিভিন্ন প্রশ্নের যুক্তিপূর্ণ উত্তরও দিয়েছিলেন। হযরত খাজা (র) তাঁকে ভক্তি ও সম্মান করেন এবং পানের একটি থালা পেশ করেন ও বলেন : ^২ سيمرغیست نصیت "একটি বাজপাখী উচ্ছে উড্ডীয়মান, কিন্তু আমাদের জালের ভাগ্যে নেই তাকে ধরার ও বন্দী করার।"

এরপর তিনি দিল্লী থেকে পানিপথ আসেন এবং শায়খ বু'আলী (শরফুদ্দীন) কলন্দর পানিপথীর খেদমতে হাযির হন। সেখানেও তিনি তাঁর লক্ষ্য ও আরাধ্যের সন্ধানে ব্যর্থ হন। তিনি বলেন :

شیخ است اما مغلوب حال است به تربیت دیگره نمی
پرو ازد-

অর্থাৎ "শায়খ আছে; কিন্তু পরাজিত অবস্থায়, অন্যের তরবিয়ত দিতে তিনি অপারগ ও অক্ষম।"^২

১. এ।

২. মানাকিবুল আসফিয়া, পৃষ্ঠা ১৩২।

শায়খ নাজীবুদ্দীন ফিরদৌসী (র)

দিল্লী ও পানিপথ থেকে নিরাশ হয়ে ফিরে আসার পর জ্যেষ্ঠ ভ্রাতা শায়খ জলীলুদ্দীন খাজা নাজীবুদ্দীন ফিরদৌসী (র) প্রসঙ্গে আলোচনা করেন এবং তাঁর তরীকা ও গুণাবলীর বর্ণনা দেন। শায়খ মুনায়রী (র) বললেন যে, দিল্লীর যিনি কুতুব ছিলেন (অর্থাৎ হযরত নিজামুদ্দীন আওলিয়া) তিনিই যখন একটি পানপাতা দিয়ে ফিরিয়ে দিলেন, তখন আর অন্যের কাছে গিয়ে কী করব? ভাই যখন বেশী পীড়াপীড়ি করতে লাগলেন তখন তিনি সাক্ষাতের জন্য মনস্থির করেন এবং দিল্লীর উদ্দেশ্যে রওয়ানা হন। তিনি এমন শান-শওকতের সঙ্গে দিল্লী পৌঁছেন যে, তাঁর মুখে পান-পোরা ছিল আর কিছু পান ছিল রুমালে বাঁধা অবস্থায়। খাজা নাজীবুদ্দীন ফিরদৌসী (র)-এর দৌলতখানার নিকটে পৌঁছতেই তাঁর এক ধরনের কাঁপুনি দেখা দেয় এবং তিনি ঘর্মান্ত কলেবর হয়ে পড়েন। এতে তিনি আশ্চর্য হন এবং বলেন যে, ইতিপূর্বেও আমি অন্যান্য মাশায়িখে কিরামের দরবারে হাযির হয়েছি, কিন্তু কোথাও এ ধরনের অবস্থার সম্মুখীন হইনি।

তিনি হযরত শায়খ ফিরদৌসী (র)-এর খিদমতে গিয়ে পৌঁছলেন। তাঁর ওপর শায়খের নযর পড়তেই তিনি বললেন যে, মুখে পান, আবার রুমালে পানের পাতা, অথচ দাবি যে, আমিও শায়খ। একথা শুনতেই তিনি মুখ থেকে পান বের করে ফেলেন এবং ভীত-সন্ত্রস্ত অবস্থায় ভদ্র ও বিনীতভাবে উপবেশন করেন। কিছু সময় অতিবাহিত হবার পর তিনি বায়'আতের জন্য দরখাস্ত করেন। হযরত খাজা নাজীবুদ্দীন ফিরদৌসী (র) এ দরখাস্ত কবুল করেন এবং তাঁকে সিলসিলাভুক্ত করে নেন^১ ও এজায়ত প্রদান করে বিদায় দেন।

১. মানাকিবুল আসাফিয়া, পৃ. ১৩২।

দ্বিতীয় অধ্যায়

ভারতবর্ষে ফিরদৌসীয়া সিলসিলা এবং এর মহান বুয়ুর্গগণ

খাজা নাজমুদ্দীন কুবরা (র)

বুয়ুর্গকুল শ্রেষ্ঠ 'আওয়ারিফুল মা'আরিফ' প্রণেতা ও সুহরাওয়ারদিয়া তরীকার ইমাম শায়খ শিহাবুদ্দীন 'উমর সুহরাওয়ারদীর মহান পিতৃব্য শায়খ-ই-তরীকত খাজা শিয়াউদ্দীন আবুন নাজীব 'আবদুল কাহির সুহরাওয়ারদী (র) (ওফাত ৫৬৩ হিজরী)-এর শ্রেষ্ঠতম খলীফাবৃন্দের মধ্যে আবুল জনাব আহমদ ইবনে 'উমর যিনি সাধারণত খাজা নাজমুদ্দীন কুবরা (র)' নামে সমধিক খ্যাতির অধিকারী একজন বুয়ুর্গ ছিলেন। খাওয়ারিফ ছিল তাঁর জন্মভূমি। তিনি তাসাওউফ ও আধ্যাত্মিক তরীকার সাধন-পথের একজন উচ্চ মর্যাদার অধিকারী ছিলেন। বুয়ুর্গকুল শিরোমণি শায়খ শিহাবুদ্দীন সুহরাওয়ারদীও রুহানী সম্পর্কের দিক থেকে নিজের জ্যেষ্ঠ ভ্রাতা মনে করে এবং স্বীয় মুরশিদের স্থলাভিষিক্ত ও গদ্দীনশীন জেনে তাঁর অত্যন্ত আদব ও সম্মান করতেন। 'আওয়ারিফুল মা'আরিফ' (যা এর প্রণেতার যুগের পর থেকে আজ পর্যন্ত তরীকতের আগ্রহী পথিকের জন্য সংবিধান ও সঞ্জীবনী সুধাস্বরূপ) যখন তিনি প্রণয়ন করেন, তারপরই তা শায়খ নাজমুদ্দীন (র)-এর খিদমতে পেশ করেন। তিনি তা পড়ে দেখেন এবং সাধারণ্যে গৃহীত হবার ও চিরস্থায়িত্ব লাভের জন্য দু'আ করেন।

হযরত শায়খ নাজমুদ্দীন (র)-এর ওপর তাওহীদ ও আত্মবিলোপ, মুহব্বত ও 'ইশকে ইলাহীর পরিবেশেরই প্রাবল্য ছিল। তিনি গোপন রহস্য ও সূক্ষ্মাতিসূক্ষ্ম বিষয় বর্ণনার ক্ষেত্রে অত্যন্ত উচ্চ দরজার অধিকারী ছিলেন। মানাকিবুল আসফিয়ার লেখক বলেন :

১. তাঁর উপাধি ছিল কুবরা। যেহেতু ছাত্রাবস্থায় বাহাছ ও বিতর্ক সভায় তিনি প্রতিপক্ষকে সহজেই মায়েল করে দিতেন, ফলে তাঁর উপাধি পড়ে যায় الطامة الكبرى (বড় আপদ)। ব্যবহারের আধিক্যে الطامة বাদ পড়ে গিয়ে শুধু 'কুবরা' থেকে গেছে। দেখুন খাযীনাতুল আসফিয়া, পৃ. ২৫৯।

তিনি তাওহীদ, মা'রিফাত, তরীকত ও হাকীকতের উসূল ও কায়দা-কানূনের ব্যাপারে অত্যন্ত বিরাট ও সূক্ষ্মাতিসূক্ষ্ম বিষয়ে ইশারা-ইঙ্গিত দিতেন। আরবী ও ফারসী ভাষায় গদ্যে ও পদ্যে তাঁর লেখা ছিল প্রচুর। এসব লিখিত গ্রন্থের মধ্যে 'তাবাসির' এবং সলূকের তরীকা বর্ণনামূলক একটি ছোট্ট পুস্তিকা সারা ভারতীয় উপমহাদেশে মশহূর ছিল।

'মানাকিবুল আসফিয়ার' গ্রন্থকার তাঁর কিছু কবিতা এতে উদ্ধৃত করেছেন যার ভেতর 'ইশুক ও মন্ততার আশ্চর্যজনক অবস্থা, দুঃখ-জ্বালা ও দ্রবীভূত হওয়া এবং পাগলপারা ও আত্ম-নিমগ্নতার আশ্চর্য এক বিশ্ব দৃষ্টিগোচর হয়।

তিনি ৬১০ হিজরীর ১০ই জমাদিউল আওয়াল খাওয়ারিয়ুম -এ তাতারীদের বিরুদ্ধে পুরুষসিংহের ন্যায় লড়তে লড়তে শাহাদতবরণ করেন। খলীফাবৃন্দের মধ্যে শায়খ মাজদুদ্দীন বাগদাদী ('মিরসাদুল 'ইবাদ' প্রণেতার শায়খ), শায়খ সা'দুদ্দীন হাম্বিয়া, বাবা কামাল জুনায়েদী, শায়খ রাযীউদ্দীন আলীলানা, শায়খ সাযফুদ্দীন বাখরযী, শায়খ নাজমুদ্দীন রাযী, শায়খ জামালুদ্দীন মক্কী এবং মাওলানা বাহাউদ্দীন বিশেষভাবে উল্লেখযোগ্য। 'মানাকিবুল আসফিয়া'তে বলা হয়েছে যে, খাজা ফরীদুদ্দীন 'আত্তারও তাঁর মুরীদভুক্ত ছিলেন।'

ভারতীয় উপমহাদেশে কুবরোবী সিলসিলায় আগমন

হযরত খাজা নাজমুদ্দীন কুবরা (র)-এর তরীকাকে 'তরীকায়ে কুবরোবিয়া' বলা হয়। তিনটি পথে এ তরীকা ভারতবর্ষে পৌঁছে। তন্মধ্যে একটি আমীর সাযিয়দ 'আলী ইবনুশ শিহাব হামদানী কাশ্মীরি (র) (ওফাত ৭৮৬ হিজরী)-এর মাধ্যমে যিনি শায়খ শরফুদ্দীন মাহমূদ ইবনে 'আবদুল্লাহ আল-মাববেকানীর খলীফা ছিলেন। তিনি আবার শায়খ আলাউদ্দীন সিমনানী (র) থেকে এজাযতপ্রাপ্ত ছিলেন এবং তিনি তিনটি মাধ্যম ও সূত্রে খাজা নাজমুদ্দীন কুবরা (র) থেকে এজাযতপ্রাপ্ত ছিলেন। সাযিয়দ 'আলী হামদানী (র) ৭৭৩ অথবা ৭৮০ হিজরীতে কাশ্মীর আগমন করেন এবং তাঁর ঐকান্তিক তবলীগ ও ফলপ্রসূ চেষ্টা-সাধনার ফলে কাশ্মীরের অধিকাংশ জনবসতি মুসলমান হয়ে যায়। কুবরোবিয়া হামদানিয়ার এ সিলসিলা কাশ্মীরে একাদশ শতাব্দী পর্যন্ত সজীব ও প্রাণবন্ত থাকে। এই সিলসিলায় একজন মহান বুয়র্গ ছিলেন মাওলানা ইয়াকুব সরফী কাশ্মীরি (ওফাত ১০০৩ হিজরী) যিনি স্বীয় যুগে হাদীছ ও তাফসীরশাস্ত্রের একজন বড় 'আলিম 'আল্লামা ইবনে হাজার হায়তামী মক্কীর ছাত্র এবং ইমামে রাব্বানী হযরত মুজাদ্দিদ আলফে-ছানী (র)-এর শিক্ষকদের অন্তর্গত। এ সিলসিলা কাশ্মীরে এখন পর্যন্ত তার অস্তিত্ব টিকিয়ে রেখেছে।

কুবরোবিয়া তরীকা ভারতীয় উপমহাদেশে পৌছবার দ্বিতীয় মাধ্যম ছিল আমীরুল কবীর শায়খুল ইসলাম সায়্যিদ কুতুবুদ্দীন মুহাম্মাদ মাদানী (ওফাত ৬৭৭ হিজরী) যিনি হযরত খাজা নাজমুদ্দীন কুবরা (র)-এর অন্যতম খলীফা ছিলেন। তিনি সুলতান কুতুবুদ্দীন আয়বকের অথবা সুলতান শামসুদ্দীন আলতামাশের যমানায় ভারতবর্ষে আসেন এবং দীর্ঘকাল পর্যন্ত দিল্লীতে শায়খুল ইসলাম পদে সমাসীন ছিলেন। অতঃপর কড়া (মানিকপুর) জয় করে তিনি সেখানেই বসবাস শুরু করেন।^১ তিনি একই মাধ্যমের খলীফা ছিলেন শায়খ “আলাউদ্দীন জুয়ুরী (ওফাত ৭৩৪ হিজরী)-এর। এ সিলসিলা বড় বড় মাশায়িখ সৃষ্টি করেন। এ সিলসিলাই সিলসিলায়ে জুনায়দিয়া নামে দাক্ষিণাত্যের কিছু কিছু অংশে এখনও বিদ্যমান আছে।

ভারতীয় উপমহাদেশে ফিরদৌসীয়া সিলসিলার আগমন

এ সিলসিলারই একটি শাখা ফিরদৌসীয়া নামে পরিচিতি লাভ করে। হযরত খাজা নাজমুদ্দীন কুবরা (র)-এর একজন মহান খলীফা ছিলেন খাজা সায়ফুদ্দীন বাখরবী (র)। এঁরই খলীফা খাজা বদরুদ্দীন সমরকন্দী (র) ফিরদৌসী সিলসিলার মহান বুয়র্গগণের ভেতর সর্বাত্মে ভারতীয় উপমহাদেশে আগমন করেন^২ এবং এখানে অবস্থান ও বসবাস করা শুরু করেন। ফিরদৌসীয়া তরীকার বুনিয়াদ তিনিই প্রতিষ্ঠা করেন।

খাজা বদরুদ্দীন সমরকন্দী (র)

খাজা বদরুদ্দীন (র)-এর তরীকার বৈশিষ্ট্য ফানা (ধ্বংস ও আত্মবিনাশ) ও আত্মবিলোপ, ইচ্ছাশক্তি ও গ্রহণশক্তি পরিত্যাগ এবং কারামত ও অতি অদ্ভুত কার্যকলাপ জনসমক্ষে গোপন রাখা। সে সময় ভারতীয় উপমহাদেশে চিশতিয়া সিলসিলা সর্বজনপ্রিয় ও জনপ্রিয় হতে চলেছিল। হযরত খাজা কুতুবুদ্দীন বখতিয়ার কাকী (র) হিদায়াত ও ইরশাদের মধ্যাহ্ন গগনে প্রদীপ্ত সূর্যের ন্যায়

১. তাঁর বংশে ভারতীয় উপমহাদেশের বড় বড় ‘উলামা, মাশায়িখ ও মুজাহিদ পয়দা হন, যাদের মধ্যে হযরত সায়্যিদ আদম বিনুরী (র)-এর খলীফা হযরত শাহ ‘আলামুজ্জাহ নক্শবন্দী রায়বেলেনবী, হযরত সায়্যিদ আহমাদ শহীদ (র), হযরত মাওলানা খাজা আহমাদ নাসিরাবাদী (র) অত্যন্ত মশহুর ছিলেন। ‘বুহযাতুল খাওয়াতির’-এর লেখক মাওলানা সায়্যিদ ‘আবদুল হাই এ বংশেরই একটি উজ্জ্বল জ্যোতিষ্ক।
২. হযরত শায়খ রুকনুদ্দীন ফিরদৌসীর পূর্বে এই সিলসিলার ‘ফিরদৌসী’ নামকরণ দৃষ্টিগোচর হয় না। সাধারণভাবে এই সিলসিলার মহান বুয়র্গগণ এবং তাঁদের সিলসিলাকে ‘কুবরোবিয়া’ বলা হয়। এর খ্যাতি ছড়িয়ে পড়ে প্রকৃতপক্ষে হযরত শায়খ রুকনুদ্দীন ফিরদৌসীর সময় থেকে। সেই সময় থেকে এই সিলসিলার বুয়র্গগণ ফিরদৌসী নামে কথিত হন।

(পরবর্তী পৃষ্ঠায় দেখুন)

অবস্থান করছিলেন। খাজা বদরুদ্দীন সমরকন্দী (র)-কে এমনই একটি যুগে এবং এমনি এক পরিবেশে এমন একটি তরীকার বুনিয়ে দান স্থাপনের কাজ করতে হয় যার মধ্যে সাধারণ সম্প্রীতির সর্বজনগ্রাহ্যতার উপকরণ কম ছিল এবং যার বুর্গগণ আধ্যাত্মিক অবস্থার গোপনীয়তাকে প্রকাশ্য অবস্থার ওপর আগ্রহভরেই অগ্রাধিকার দিতেন। 'মানাকিবুল আসফিয়া' প্রণেতা যিনি নিজেও ফিরদৌসী তরীকার একজন অনুসারী ছিলেন-লিখেছেন :

তাঁর তরীকা ছিল শত্ভারিয়া 'ইশকিয়া। তিনি প্রায়ই বলতেন : 'ইল্‌মে দীন হাসিল করাকে অবশ্য কর্তব্য বলে মনে করবে এবং তদনুযায়ী আমল করবে, আমল করবে খালেসভাবে একমাত্র আল্লাহর জন্যই। কেননা আমলবিহীন 'ইল্‌ম যেমন কল্যাণবর্জিত, তেমনি ইখলাস (নিষ্ঠা)-বিহীন আমলও ফলপ্রসূ নয়। কারামত (অলৌকিকতা) লাভের প্রত্যাশী হবে না। ইবাদত-বন্দেগীতে দৃঢ়তা ও অবিচল নিষ্ঠাই প্রকৃত কারামত। ভারতীয় উপমহাদেশে ফিরদৌসিয়া তরীকার উসুল ও কায়দা-কানূনের বুনিয়ে প্রতিষ্ঠিত হয়েছিল খাজা বদরুদ্দীন সমরকন্দী (র) এবং তাঁর মহান পীর-মুরশিদগণের হাতে। এর পূর্বে সর্বসাধারণ ও বিশিষ্টজনেরা আল্লাহর ইচ্ছা ব্যতিরেকে অত্যদ্ভুত কার্যকলাপ ও কারামতের ভিত্তিতেই পীর-মুরীদী করতেন। জানা যায় যে, খাজা কুতুবুদ্দীন বখতিয়ার কাকী (র)-এর যমানায় ভারতীয় উপমহাদেশে বহু মুহাফিক তরীকতপন্থী ছিলেন। যেমন শায়খুল ইসলাম শায়খ বাহাউদ্দীন যাকারিয়া (র), শায়খুল ইসলাম শায়খ নাজমুদ্দীন সুগরা (যিনি দিল্লীর শায়খুল ইসলাম ছিলেন), শায়খুল ইসলাম খাজা বদরুদ্দীন সমরকন্দী (র), শায়খুল ইসলাম শায়খ মুঈনুদ্দীন সিজযী (র) যিনি খাজা কুতুবুদ্দীন বখতিয়ার (র)-এর পীর ছিলেন। আল্লাহ পাক এঁদের সবার প্রতি রহমত নাযিল করুন। কিন্তু বিশিষ্ট ও সাধারণ জনগণের ধাবমান গতি যেভাবে হযতর খাজা কুতুবুদ্দীন বখতিয়ার কাকী (র)-এর দিকে ছিল,

(পূর্ব পৃষ্ঠার পর) 'মানাকিবুল আসফিয়া' প্রণেতার বর্ণনা দৃষ্টেও প্রতীয়মান হয়। তিনি বলেন : খাজা বদরুদ্দীন ভারতবর্ষে এক্সপ শান-শওকতে আগমন করেন যে, আরব ও আরব-বহির্ভূত অঞ্চলেও তাঁর ফয়েয ও প্রভাব পৌছে যায়। তিনি স্বীয় তরীকতের পীরদের শাজরার প্রভাব সৃষ্টি করেন এবং 'মাশায়িখে ফিরদৌসী' নামে বিখ্যাত হন। এই শাজরার সঙ্গে জড়িত যাঁরা, তাঁরা নিজেদের সিলসিলাকে এই নামেই ডেকে থাকেন এবং ফিরদৌসী নামে স্মরণ করেন। বহু পুরনো প্রবাদ *اللقاب تنزل من السماء ذلك فضل الله يؤتيه من يشاء* আসমান থেকে নাম অবতীর্ণ হয়। এটা আল্লাহর দান, যাকে ইচ্ছা তিনি দান করেন। মানাকিবুল আসফিয়া, পৃ. ১২৫।

তা ঐ সমস্ত বুয়ুর্গের কারও প্রতিই তেমন ছিল না। এর কারণ হয়রত খাজা কুতুবুদ্দীন (র) থেকে অত্যদ্ভূত কার্যাবলী ও কারামত বহুল পরিমাণে প্রকাশিত হত।

মানাকিবুল আসফিয়া'র লেখক তাঁর মিয়াজ ও প্রকৃতি এবং তাঁর তরীকার বৈশিষ্ট্য বর্ণনা করতে গিয়ে আরও লিখেছেন :

খাজা বদরুদ্দীন সমরকন্দী (র)-এর ধরন-ধারণ ভারতবর্ষের অপরাপর বুয়ুর্গের ধরন-ধারণ থেকে আলাদা ছিল। ভারতবর্ষের বুয়ুর্গগণের অধিকাংশই সংসার-তরণীর কর্ণধার ছিলেন এবং কেউ কেউ রিয়াযত ও মুজাহাদার মধ্যে কাল কাটাতেন। খাজা বদরুদ্দীন সমরকন্দী (র)-এর তরীকা ছিল শত্ভারিয়া 'ইশকিয়া তরীকা। এ তরীকার ভিত্তিভূমি ছিল অবলম্বিত ইচ্ছাধীন 'ফানা'র ওপর এবং এ তরীকার সালিক (আধ্যাত্মিক পথের পথিক)-গণের আমল موتوا قبل ان تموتوا অর্থাৎ "মৃত্যুর পূর্বেই মৃত্যুবরণ কর"-এর ওপর। এটা আল্লাহর রাহের এবং রূহানিয়াত গগনের দ্রুত উড্ডয়নগামী পাখি। এই প্রথম পদক্ষেপেই কলহ-কোন্দল অতিক্রম করে যায় এবং জীবনের ওপর সহজেই বাজী ধরে। সাধকের বিরাত ব্যাস্র-পুরুষ হওয়া আবশ্যিক। যারা এ পথে (আধ্যাত্মিক পথে) পদক্ষেপের অভিসারী তারা যেন নিজেকে 'ফানী' (ধ্বংসশীল)-রূপে পরিগণিত করে।^১

খাজা বদরুদ্দীন সমরকন্দী রাহমাতুল্লাহি 'আলায়হি সামা' গাইতেন এবং আবেশে বিভোর ও বিহ্বল হয়ে যেতেন। তিনি সম্ভবত সপ্তম শতাব্দীর শেষে হয়রত খাজা নিজামুদ্দীন আওলিয়া (র)-এর যুগে ওফাত পান। কোন্ সালে ওফাত পান তার কোন উল্লেখ ভাষিকরা গ্রন্থে মেলেনি।^২

খাজা রুকনুদ্দীন ফিরদৌসী (র.)

খাজা বদরুদ্দীন সমরকন্দী (র)-এর বিশিষ্ট খলীফা ছিলেন খাজা রুকনুদ্দীন ফিরদৌসী (র)। 'মানাকিবুল আসফিয়া' গ্রণেতার বর্ণনা মুতাবিক তাঁর শৈশবেই আপনাপন শায়খের প্রশিক্ষণাধীনে লালিত-পালিত হয়েছিলেন এবং তাঁর থেকেই জাহিরী ও তরীকতের তা'লীম হাসিল করেছিলেন এবং তাঁর থেকে

১. মানাকিবুল আসফিয়া, পৃ. ১২৩।

২. নুযহাতুল আসফিয়ার মতে মৃত্যু সন ৭১৬ হিজরী। 'নুযহাতুল খাওয়াতির লেখকের বিচার-বিশ্লেষণ অনুযায়ী এটা বিশ্বাসযোগ্য নয়। 'খাওয়াতির'-লেখকের মতে, তাঁর ইজ্জিকাল হয়েছিল সপ্তম শতাব্দীর শেষভাগে।

খিলাফতনামা প্রাপ্তির পর তাঁরই স্থলাভিষিক্ত হন। তাঁর যম্মানা থেকেই এ সিলসিলা ফিরদৌসিয়া সিলসিলা নামে অভিহিত হয়।

শায়খ রুকনুদ্দীন ফিরদৌসীও আল্লাহর প্রেমে ও ধ্যানে আবেগ-বিহ্বল হয়ে যেতেন। তাঁর ইত্তিকালও সপ্তম শতাব্দীর শেষে হযরত খাজা নিজামুদ্দীন আওলিয়া (র)-এর যুগেই হয়।^১

খাজা নাজীবুদ্দীন ফিরদৌসী (র)

খাজা নাজীবুদ্দীন ফিরদৌসী শায়খ ইমাদুদ্দীন দেহলভীর সাহেবযাদা এবং খাজা রুকনুদ্দীন ফিরদৌসীর আতুপ্পুত্র ও খলীফা ছিলেন। তিনি সারাটা জীবনই স্বীয় শায়খ ও বুয়র্গ চাচার খেদমতে কাটিয়ে দেন। অতঃপর তাঁর ওফাতের পর তিনি গদীনশীন হন এবং ফিরদৌসী সিলসিলার প্রচার ও প্রতিষ্ঠা এবং তাওহীদ ও ইশকে ইলাহীর ব্যাপক প্রচার ও প্রসারের জন্য এমন একজন মুহাক্কিক, মুজতাহিদ, ইমাম ও তরীকা প্রতিষ্ঠাতাকে তরবিয়ত দান করেন যিনি শুধু যে তাঁর মহান পীরের নামকেই ওজ্জ্বল্যের সঙ্গে জীবিত রেখেছিলেন তা নয়, বরং অর্ধশতাব্দীরও অধিককাল পূর্ব ভারতকে স্বীয় রূহানী ফয়েয ও ইশকের উত্তাপ ও উষ্ণতা দ্বারা জীবন্ত ও সমৃদ্ধ করে রেখেছিলেন এবং স্বীয় উচ্চ বিশ্লেষণী শক্তি, মহান মকাম ও দুর্লভ জ্ঞানের ভিত্তিতে 'আঈনুল কুযাত হামদানী (র), খাজা ফরীদুদ্দীন 'আত্তার (র.) এবং মাওলানা জালালুদ্দীন রুমী (র.)-এর স্মৃতিকেই জাগিয়ে তুলেছিলেন। মানাকিবুল আসফিয়া' প্রণেতা তাঁর সম্পর্কে লিখেছেন :

তিনি লোকচক্ষুর আড়ালে আত্মগোপন করাকেই নিজের জন্য বেছে নিয়েছিলেন। খ্যাতি ও প্রসিদ্ধি লাভ এবং এর সব উপকরণ থেকে তিনি ছিলেন মুক্ত। 'আমার আওলিয়াগণ আমার পোশাকের আড়ালে লুকিয়ে' (অর্থাৎ আল্লাহর ওলীগণ সৃষ্টির চোখে এমনভাবে অবগুপ্তিত থাকেন যে, আল্লাহ ভিন্ন অপর কেউ তার খবর জানতে পারে না)-এর মহান প্রতিভূ

১. 'খাযীনাতুল আসফিয়া'; উল্লিখিত তারিখ ৭২৪ হিজরী সঠিক নয়। তার আরও একটি প্রমাণ-এটাও তাঁর খলীফা শায়খ নাজীবুদ্দীন ফিরদৌসী (র)-এর ওফাত সন সম্বলিত মতে ৬৯১ হিজরী এবং একথা মুক্তিবিরুদ্ধ যে, তিনি তাঁর খলীফা ও গদীনশীন-এর পরেও ৩৩ বছর বেঁচে থাকবেন এবং হযরত শায়খ শরফুদ্দীন আহমদ তাঁকে ছেড়ে দিয়ে তাঁর খলীফার হাতে বায়আত করবেন। এজন্য 'নুহযতুল ঋপ্তয়াতির' প্রণেতার এই বর্ণনা অত্যন্ত সহীহ ও বিস্ময় মনে হচ্ছে যে, তাঁর ইত্তিকাল সপ্তম শতাব্দীর শেষ ভাগে হয়েছিল।

ছিলেন তিনি। তাঁর মুরীদগণের মধ্যে বড় বড় 'আরিফ ও মুহাফ্বিক 'আলিম ছিলেন। 'ফতওয়ায়ে তাতারখানি', প্রণেতা মাওলানা 'আলম আন্দসমী (র)' তাঁর মুরীদ ছিলেন। উচ্চ আধ্যাত্মিক ভাবধারাপুষ্ট কবিতা তাঁর কলম থেকে বেরিয়েছে। খাজা নাজীবুদ্দীন ফিরদৌসী (র)-এর সমস্ত কামালিয়াত অন্তরালে ছিল।^১

১. এর অর্থ মাওলানা ফরীদুদ্দীন 'আলম ইবনুল আলা হানাফী আন্দরপতী। ৭৭৭ হিজরীতে 'ফতওয়ায়ে তাতারখানিয়া' প্রণয়ন করে স্বীয় দোস্ত আমীরে কবীর তাতার খানের নামে নামকরণ করেন। ফীরোয শাহর অভিপ্রায় ছিল যে, সেটা তাঁর নামে নামকরণ করা হবে। কিন্তু তিনি তা কবুল করেন নি। সম্ভবত ৭৮৬ হিজরীতে তাঁর ইত্তিকাল হয়। বিস্তারিত জানার জন্য দেখুন নুযহাতুল খাওয়াতির, ২য় খণ্ড।

২. মানাকিবুল আসফিয়া, পৃ. ১২৬।

তৃতীয় অধ্যায়

মুজাহাদা, নির্জনবাস, লোকালয়ে অবস্থান এবং ইরশাদ ও প্রশিক্ষণ

দিল্লী থেকে প্রত্যাবর্তন

‘মানাকিবুল আসফিয়া’ গ্রন্থে লিখিত আছে যে, খাজা নাজীবুদ্দীন ফিরদৌসী (র) বায়’আত করার পর তাঁকে লিখিত এজায়তনামাও প্রদান করেন। শায়খ শরফুদ্দীন আরয করেন : আমার তো এখনও জনাবের খেদমতে কিছুদিন থাকবার সুযোগ হয়ে ওঠেনি এবং আমি সুলুক (আধ্যাত্মিক সাধনার বিভিন্ন স্তর)-এর তা’লীমাতও এখন পর্যন্ত জনাবের খেদমত থেকে হাসিল করিনি। এ ধরনের গুরুত্ববহ, দায়িত্বপূর্ণ ও নায়ুক কর্ম কিভাবে সম্পাদন করব? খাজা নাজীবুদ্দীন (র) তাঁকে এই বলে সান্ত্বনা দেন যে, এই গোটা কারবারটা তো অদৃশ্য হস্তের ইশারায় সাধিত হয়েছে এবং তাঁর তরবিয়ত নবুওতের তরফ থেকেই হবে। এরপর তিনি তাঁকে বিদায় দেন এবং বলেন :

“পথিমধ্যে যখন কোন খবর শুনতে পাবে, তখন যেন ফিরে না আস।”
অতঃপর দুই-এক মনযিল পথই মাত্র অতিক্রম করেছিলেন, এমন সময়ে তিনি হযরত খাজা সাহেব (র)-এর ওফাতের সংবাদ অবগত হন। তিনি ওসীয়ত মাফিক সফর অব্যাহত রাখেন এবং মুনায়র-এর দিকে রওয়ানা হন।^১

প্রেমের উজ্জ্বাস

তিনি যখন খাজা নাজীবুদ্দীন (র) থেকে বিদায় নিলেন তখন তাঁর অন্তরে বেশ আঘাত লাগে। ইশকে ইলাহী তথা বিভূ প্রেমের উত্তাপ তাঁর অস্থি-মজ্জায় মিশে গিয়েছিল। তিনি বলেন :

আমি যখন খাজা নাজীবুদ্দীন ফিরদৌসীর সঙ্গে মিলিত হলাম তখন থেকেই আমার দিলে একটি ক্রেশ ও ব্যথা এসে আসন গ্রহণ করে যা দিন দিন প্রবল থেকে প্রবলতরভাবে বর্ধিত হতে থাকে।^২

১. মানাকিবুল আসফিয়া, পৃ. ১৩২-৩৩।

২. মানাকিবুল আসফিয়া, পৃ. ১৩৩।

যখন তিনি বেহুয়া^১ নামক স্থানে পৌঁছেন এবং ময়ূরের ঝংকার শোনে, তখন তাঁর দিলের মাঝে একটি ব্যথা মোচড় দিয়ে ওঠে এবং সকল ধৈর্য ও সংযমের বাঁধ ভেঙে যায়। অতঃপর তিনি গিরীবন চক জঙ্গলের পথ ধরেন এবং আত্মগোপন করেন। ভাইসহ সফরের সঙ্গী-সাথীরা অনেক খোঁজাখুঁজি সত্ত্বেও কোনরূপ সন্ধান লাভে ব্যর্থ হয়। অবশেষে তারা এজাযতনামা এবং খাজা নাজীবুদ্দীন (র)-এর ভাবাররূক নিয়ে ফিরে আসেন এবং এসব কিছুই ওয়ালিদা সাহেবার হাওয়ালার করেন।^২

রাজগীরের জঙ্গলে

কথিত আছে যে, তিনি বার বছর পর্যন্ত বেহুয়ার জঙ্গলে কাটান। তখন কেউ তাঁকে জানতেও পারেনি। এরপর তাঁকে রাজগীর^৩-এর জঙ্গলে দেখা গেছে, কিন্তু কারও সাক্ষাত লাভের সুযোগ ঘটেনি। এই পাহাড় ও জঙ্গলটি প্রতিটি ফিরকা এবং প্রতিটি ধর্মের ও জাতিগোষ্ঠীর রিয়াযতে লিপ্ত সাধক ও 'আবেদ শ্রেণীর লোকদের নির্জনবাসের জন্য প্রশিদ্ধ। গৌতম বুদ্ধও বছরের পর বছর ধরে এখানে বসে ধ্যানমগ্ন অবস্থায় কাল কাটান। যে সময় মাখদুম সাহেব (র) এখানে মুজাহাদা ও রিয়াযতে মশগুল ছিলেন সে সময় এখানে স্থানে স্থানে হিন্দু যোগীরাও নির্জনবাস করছিল। বিভিন্ন গ্রন্থে সে সব হিন্দু যোগীর সঙ্গে তাঁর কতিপয় কথোপকথনের বর্ণনাও দৃষ্ট হয়। পাহাড়ের পাদদেশে একটি উষ্ণ প্রস্রবণ সৎলগ্ন হযরত মাখদুম (র)-এর হজরা আজও বর্তমান। 'মাখদুম কুণ্ড' নামেও একটি ঝরণা বিখ্যাত হয়ে আছে।

১. বেহুয়া মুনায়র থেকে প্রায় তিরিশ মাইল দূরে পশ্চিমে শাহআবাদ' (আরা) জেলায় অবস্থিত। বর্তমানে এটি ইন্ডিয়ান রেলওয়ের একটি স্টেশন।
২. মানাকিবুল আসফিয়া, পৃ. ১৩৩।
৩. ডক্টর হাট্টার গেজেটিয়ার এ লিখেছেন, রাজগীরের পাহাড় দুটি কেন্দ্রার সমান্তরাল রেখার আকারে দক্ষিণ ও পশ্চিম দিকে চলে গেছে-যার মাঝে একটি সংকীর্ণ উপত্যকা রয়েছে-যার স্থানে স্থানে নালা ও শুধা কর্তন করছে। এই পাহাড় যা কোথাও হাবার ফুটের অধিক উচ্চ নয়, বিরটাকৃতি প্রস্তরখণ্ড দ্বারা মণ্ডিত এবং ঘন ঝোপঝাড় দ্বারা আবৃত ও সৌন্দর্যমণ্ডিত। প্রাচীনত্বের একটি বিশেষ আকর্ষণ রয়েছে। কেননা এর ওপর অধিকাংশই বৌদ্ধ ধর্মের পুরাতন স্মৃতিচিহ্ন পাওয়া যায়। জেনারেল কানিংহাম বলেন যে, চীনা পরিব্রাজক হিউয়েন সাং (Hiuen Tsiang) যে কপটিকা (Kapotika) পাহাড়ের উল্লেখ করেছেন, তা এটাই। উষ্ণ প্রস্রবণ এখানে বহু। ড. বুকানিন হ্যামিল্টন বলেন যে, এই রাজগীরই সেই রাজগৃহ যেখানে গৌতম বুদ্ধের আবাস ছিল এবং প্রাচীন মগধের রাজধানী ছিল। নতুন রাজগীরের দুই-তৃতীয়াংশ বর্গমাইল পুরাতন শহর থেকে দূরে অবস্থিত। সীরাতুশ-শরফ; পৃ. ৬৫-৬৭, সংক্ষিপ্ত।

এই বারটা বছরের পুরো সময়কাল তিনি রিয়াযত ও মুজাহাদা, নির্জনবাস ও মুরাকাবা, অভ্যাশ্রম ও ভবঘুরে অবস্থা এবং আত্মহারী ও অচৈতন্য অবস্থার মাঝ দিয়ে অতিবাহিত করেন। জঙ্গলের পাতা খাদ্যের কাজ দিত। সে সময়কার কঠোর রিয়াযত সম্পর্কে বর্ণনা দিতে গিয়ে একবার তিনি স্বীয় মুরীদ কাযী যাহিদকে বলেছিলেন, “আমি যে রিয়াযত করেছি সে রিয়াযত যদি পাহাড়ও করত তবে সে গলে পানি হয়ে যেত। কিন্তু শরফুদ্দীন কিছুই হল না।” তাঁর বর্ণিত একটি ঘটনা এবং বলার ধরন থেকে জানা যায় যে, তিনি উক্ত রিয়াযত, কঠোর পরিশ্রম ও সাধনায় খুব বেশি তৃপ্ত ছিলেন না। গোসলের একটি ঘটনার বর্ণনা দিতে গিয়ে তিনি বলেন, তিনি ‘আযীমত-এর খেলাফ মনে করে শরীয়ত প্রদত্ত রুখসতের ওপর আমল করেন নি। একবার ভীষণ শীতে ঠাণ্ডা পানিতে গোসল করার কারণে তিনি বেহুশ হয়ে পড়ে ছিলেন। তিনি বলেছিলেন, এই অপ্রয়োজনীয় কষ্টের পুরস্কার এই মিলেছিল যে, সেদিনের ফজরের সালাত কাযা হয়ে গিয়েছিল।’

বিহারে বসবাস এবং খানকাহ নির্মাণ

সে যুগেই সুলতানুল মাশায়িখ হযরত খাজা নিজামুদ্দীন আওলিয়া (র)-এর একজন খলীফা, যার নামও ছিল মাওলানা নিজামুদ্দীন, বিহারে বসবাস করতেন। তিনি মাওলানা নিজাম মওলা নামে মশহুর ছিলেন। যখন তিনি জানতে পারলেন যে, কেউ কেউ রাজগীরের জঙ্গলে গিয়েছিল এবং মাখদুম সাহেব (র)-এর সঙ্গে তাদের মুলাকাতও হয়েছে, তখন তার মনেও তাঁর সাক্ষাতের আশ্রহ প্রবল হয়ে উঠল। তিনি এবং তাঁর কতিপয় ভক্ত-অনুরক্ত সেখানে গিয়ে তাঁর সাথে মুলাকাত করেন। এরপর তিনি মাঝে মাঝেই জঙ্গলে গিয়ে হযরত মাখদুম (র)-এর সঙ্গে মিলিত হতেন। মাখদুম সাহেব (র) সত্যের প্রতি তার তীব্র অবেশা এবং ইখলাস (একনিষ্ঠতা) দেখে বলেন, এই জঙ্গল অত্যন্ত বিপদসংকুল ও ভয়াবহ। তোমার আগমনে আমি খুবই দৃষ্টিস্তম্ভ হয়ে পড়ি। তোমরা শহরেই থাক। আমি জুম‘আর দিন শহরে আসব এবং জামে‘ মসজিদেই মুলাকাত হবে। লোকজন সবাই এই সিদ্ধান্ত গঞ্জুর করল। মাখদুম সাহেব (র) জুম‘আর দিন শহরে আসতেন এবং এক প্রহর মাওলানা নিজামুদ্দীন ও তাঁর অন্যান্য বন্ধু-বান্ধবের সঙ্গে কাটিয়ে জঙ্গলে ফিরে যেতেন। একটা দীর্ঘ সময় এভাবেই অতিবাহিত হল। পরে সে সব ভক্ত-অনুরক্তের দল পরম্পরের ভেতর পরামর্শ করে সিদ্ধান্ত নেয়

যে, এমন একটি জায়গা নির্মাণ করা উচিত যেখানে তিনি জুম'আর সালাত আদায় করার পর কিছুক্ষণ আরাম করতে পারেন। অতঃপর বীরজুন শহরে— যেখানে এখন তাঁর খানকাহ অবস্থিত— সেখানে দু'টি ছাপড়া ফেলে দেন তারা। তিনি জুম'আর সালাত আদায় শেষ করে উঠতেন এবং সেখানে গিয়ে বন্ধু-বান্ধবদের সঙ্গে বসতেন। আবার কখনও কখনও দু'একদিন অবস্থান করেও যেতেন। এরপর মাওলানা নিজামুদ্দীন বিহার প্রদেশের সুবেদার (গভর্নর) মাজেদুল-মুলক-এর অনুমতি নিয়ে স্বীয় হালাল ও পবিত্র অর্থ-কড়ি দিয়ে একটি পাকাপোক্ত ইমারত তৈরি করে দেন। ইমারত নির্মিত হলে সেখানে তিনি একটি দাওয়াত দেন। হযরত খাজা নিজামুদ্দীন আওলিয়া (র)-এর ভক্ত মুরীদবর্গ এতে শরীক হন এবং তাঁরা মাখদুম সাহেব (র)-কে গদীনশীন হবার জন্য দরখাস্ত পেশ করেন। সবার অনুরোধে তিনি এতে রাযী হন।

এই ঘটনা ৭২১ হিজরী থেকে ৭২৪ হিজরীর মধ্যবর্তী সময়ে সংঘটিত হয়।^১ সময়টা ছিল সুলতান গিয়াছুদ্দীন তুগলকের রাজত্বকাল।

৭২৫ হিজরীতে সুলতান মুহাম্মাদ স্বীয় পিতার স্থলাভিষিক্ত ও রাজকীয় সিংহাসনে সমাসীন হন। তিনি মাশায়খ, সুফিয়ায়ে কিরাম এবং আধ্যাত্মিক সাধনায় লিপ্ত ব্যক্তিদেরকে তাঁদের নির্জনবাস থেকে বাইরের জনজীবনে টেনে আনতে এবং উৎসাহ ও ঔজ্জ্বল্যের সঙ্গে আল্লাহর প্রিয় সৃষ্টির খেদমত ও হিদায়াতে আত্মনিয়োগে উৎসাহিত করতে অত্যন্ত আগ্রহী ছিলেন, আর এ ব্যাপারে প্রয়োজনীয় চেষ্টা-তদবীর চালাতেন। তিনিই হযরত খাজা নিজামুদ্দীন আওলিয়া (র)-এর প্রিয় খলীফা হযরত খাজা নাসীরুদ্দীন চেরাগের দিল্লী (র)-কে শাহী লশকরের সঙ্গে যেতে বাধ্য করেন। হযরত খাজা (র)-এর অপর খলীফা মাওলানা ফখরুদ্দীন যাররাবী (র) ও মাওলানা শামসুদ্দীন ইয়াহুইয়া (র) প্রমুখকে মিসরে উপবেশন করে বক্তৃতাদানে এবং জনগণকে জিহাদে আগ্রহান্বিত করে তুলতে বাধ্য করেন। শায়খ কুতুবুদ্দীন মুনাওয়ার হাঁসোভী (র)-কে তাঁর নির্জন আবাসগৃহ থেকে বের করে দিল্লী ডেকে পাঠান।^২ তিনি যখন গুপ্তচর মারফত খবর পেলে যে, মাখদুম সাহেব (র) বছরের পর বছর জঙ্গলে কাটানো ও বহিঃজগতের সঙ্গে সম্পর্কচ্যুতির পর শহরের বুকে পদার্পণ করেছেন এবং

১. 'সীরাতুশ-শরফ' প্রণেতা মওলবী সায়্যিদ জমীরুদ্দীন আহমদ-বহু কার্যকারণ ও দলীল-প্রমাণ দ্বারা এটা প্রমাণ করতে চেষ্টা করছেন যে, মাখদুম (র)-এর বসবাসের কাল ৭২১ থেকে ৭২৪ হিজরীর মধ্যবর্তীকাল ছিল। বিস্তারিত-সীরাতুশ-শরফ পৃ. ৮১।

২. বিস্তারিত এই গ্রন্থের ষষ্ঠ অধ্যায়ে হযরত খাজা নিজামুদ্দীন আওলিয়া (র)-এর বর্ণনায় গেছে।

লোকজনের সঙ্গে উঠাবসা শুরু করেছেন, তখনই তিনি সুবে বিহারের সুবেদার মাজেদুল মুল্ক-এর নামে ফরমান লিখে পাঠালেন যে, শায়খ (র)-এর জন্য যেন একটি খানকাহ্ নির্মাণ করা হয় এবং রাজগীর পরগণাকে খানকাহ্‌র দরিদ্র মেহমান ও অভ্যাগতদের ব্যয় নির্বাহের জন্য তাঁর হাতে সোপর্দ করা হয়। তিনি যদি তা কবুল না করেন তবে যবরদস্তি করেও যেন কবুল করানো হয়। তিনি এই সঙ্গে একটি বুলগেরীয় মুসাল্লা (জায়নামায) তাঁর খেদমতে পাঠান।

এই শাহী ফরমান মাজেদুল মুল্ক-এর নিকট পৌঁছলে তিনি হযরত মাখদুম (র)-এর খেদমতে হাযির হন এবং আরম্ভ করেন যে, বাদশাহ্‌ যা কিছু লিখেছেন আমার কি সাধ্য যে আমি তা তামিল না করি। কিন্তু আপনি যদি বাদশাহ্‌র এই দান কবুল না করেন তবে বাদশাহ্‌ একে তাঁর নির্দেশের প্রতি ব্যত্যয় ও অবহেলা প্রদর্শন হিসেবে ধরে নেবেন। আর এক্ষেত্রে বাদশাহ্‌র আচরণ কেমন হবে তা তো সবারই জানা। আল্লাহ্‌ই জানেন আমার সঙ্গে কেমন ব্যবহার করা হবে। মাখদুম (র) মাজেদুল মুল্ক-এর মজবুরী ও অসহায় অবস্থার কথা ভেবে এবং তৎকর্তৃক বারবার অনুরুদ্ধ হয়ে অভ্যন্ত ভারাক্রান্ত চিত্তে তা কবুল করেন। কিন্তু সুলতানের ওফাতের পর সুলতান ফীরোয শাহ্‌ তুগলক সিংহাসনে আরোহণ করলে তিনি প্রদত্ত জায়গীরের সঙ্গে সম্পর্ক ছিন্ন করেন।^১ খানকাহ্‌র নির্মাণ শুরু হল এবং অল্প দিনেই এর নির্মাণ সুসম্পন্ন হল। ‘সীরাতুশ-শরফ’ গ্রন্থে উল্লিখিত হয়েছে :

খানকাহ্‌র নির্মাণ শুরু হল এবং অতি অল্পদিনেই তা সম্পন্ন হল। মাজেদুল মুল্ক লঙ্গরখানার সমস্ত দরিদ্র অধিবাসী, সূফী সম্প্রদায় এবং শায়খ নিজামুদ্দীন আওলিয়া (র)-এর মুরীদবর্গকে দাওয়াত করেন। মজলিসের প্রথম থেকে শেষ পর্যন্ত জামাতখানার প্রাঙ্গণে সামা' হতে থাকে। একটি আলাদা জায়গা, যেখানে একটি রোয়াক ছিল, মাখদুম (র)-এর জন্য ঠিকঠাক করা হয় এবং বাদশাহ্‌ প্রেরিত পূর্বোল্লিখিত বুলগেরীয় মুসাল্লা সেখানে বিছানো হয়। মাখদুম (র) তার ওপর উপবেশন করেন। মজলিসে উপস্থিত একজন মুসাফির দরবেশ আপন জায়গা ছেড়ে উঠে মাখদুম (র)-এর হজরায় প্রবেশ করেন। মাখদুম (র) তার দিকে লক্ষ্য করে বলেন : এই মনযিল (স্থান) ও মকাম তোমাদের। আমি তো শুধু মাজেদুল মুল্ক-এর হুকুম তামিল করছি মাত্র। কেননা ‘উলিল-আমর’ (শাসন কর্তৃত্বে সমাসীন ব্যক্তি)-এর আনুগত্য ব্যতিরেকে কোন গত্যন্তর নেই।

এখানে যা কিছু রয়েছে তা ফকীর ও দরিদ্র লোকদের জন্য সাদকা। আমি ইসলামের জন্যই তো উপযুক্ত নই, আর এই মুসাল্লার জন্য তো বহু দূরের কথা।

উক্ত ফকীর বললেন :

মাখদুম! আপনাকে খানকাহু এবং মুসাল্লার কারণে কেই-বা চেনে। আপনাকে যারা চেনে তারা একমাত্র সত্যের কারণেই চেনে। আমরা যারা এখানে এসেছি তারা একমাত্র আপনার বাতিনী শক্তি এবং আপনারই খাতিরে এসেছি। এখানে আপনার বরকতে ইসলাম প্রকাশ পাবে এবং শক্তি সঞ্চয় করবে।

মাখদুম (র) বললেন :

ফকীরদের যবান দিয়ে যা বের হয় সেটাই ঘটে থাকে।

উপদেশ ও হিদায়াত প্রদান

তিনি ৭২৪ হিজরী থেকে ৭৮২ হিজরী পর্যন্ত (যে বছরে তিনি ওফাত পান) কম সে কম অর্ধ শতাব্দীকালেরও অধিক সময় পর্যন্ত আল্লাহর সৃষ্টিকুলকে হিদায়াত ও সংপথ প্রদর্শন এবং শিক্ষার্থীদের তা'লীম ও তরবিয়ত প্রদানে অভিযুক্ত করেন। শায়খ হুসায়ন মু'ঈয্য বলখীর মতে—এই সময়ের মধ্যে এক লক্ষের অধিক মানুষ তাঁর মুরীদ দলভুক্ত হয় যার ভেতর কতিপয়ের মতে—কম-সে-কম তিনশত জন এমন ছিলেন যারা ওলীয়ে কামিল ও 'আরিফ এবং পরম সত্যের সান্নিধ্যে পৌঁছেছিলেন। কতিপয় হিন্দু ফকীর তথা যোগী সন্ন্যাসী ইসলাম কবুল করে তাঁরই হাতে কামালিয়াত ও হাকীকতের দরজা পর্যন্ত পৌঁছে।

জনগণকে সংপথ প্রদর্শন ও প্রশিক্ষণ দানের বিরাট বড় মাধ্যম ও কেন্দ্র ছিল তাঁর সেই সব মজলিস যার মধ্যে মাশায়িখে কিরামের দস্তুর মুতাবিক প্রত্যেক শ্রেণীর লোকজনের হাযির হবার এবং অনুষ্ঠিত মজলিস থেকে উপকৃত হবার এজায়ত ছিল। ভক্ত-অনুরক্ত ও শিক্ষার্থীর দল এসব মজলিসে শরীক হতেন। কোন লোকের কোন কিছু জিজ্ঞাসা করবার থাকলে জিজ্ঞাসা করত এবং সন্তোষজনক জবাবও মিলত। এসব মজলিসে আলাপ-আলোচনার কোন স্থায়ী ও নির্দিষ্ট বিষয়বস্তু ছিল না। যা কিছু আল্লাহ পাক তাঁর অন্তরে উদয় ঘটাতেন, তাই তিনি বলতেন। এই মজলিস গভীর মা'রিফত, হাকীকত ও তাসাওউফ-এর সূক্ষ্মাতিসূক্ষ্ম পয়েন্ট ও চুলচেরা বিশ্লেষণের ওপর নির্ভরশীল হত। যয়েন বদর 'আরাবী "মি'দানুল মা'আনী" নামক তাঁর বাণী-সংকলনের ভূমিকায় লিখেছেন :

প্রতিটি মজলিসে এবং সুযোগ আসামাত্রই সত্য-সন্ধানী, অটল ও দৃঢ় বিশ্বাসী মুরীদবর্গ এবং হাযিরানে মজলিস যারা এর সঙ্গে সম্পর্কিত, তারা তরীকত

সম্পর্কে কোন প্রশ্ন কিংবা শরীয়তের কোন শিক্ষার বিশ্লেষণ করার জন্য দরখাস্ত করত এবং মা'রিফতের গোপন রহস্য কিংবা সূক্ষ্ম ইঙ্গিত গুনতে চাইত। হযরত মাখদূম (র) প্রত্যেক প্রশ্নকারীর সন্তোষজনক জবাব প্রদান করতেন এবং অত্যন্ত চিত্তাকর্ষক পন্থায় তাকে বুঝিয়ে দিতেন। তাঁর উপদেশ ও বাণী বড় বড় সূক্ষ্ম পয়েন্ট এবং অত্যন্ত মূল্যবান উপকারিতা ও সূক্ষ্মাতিসূক্ষ্ম বিষয়াবলীতে সমৃদ্ধ হত। প্রত্যেক প্রশ্নকর্তা ও প্রশ্নের অবস্থা মাফিক তিনি এমন বক্তৃতা দিতেন যাতে আনন্দের আমেজ সৃষ্টি হত যা ভাষায় বর্ণনা করা যায় না এবং এমন সব মকামের সম্মান মিলত যা এই সীমাবদ্ধ অনুভূতির জগতে ধারণযোগ্য নয়।

কখনো কখনো দীনিয়াত কিংবা তাসাওউফ সম্পর্কিত কিতাবাদিও মজলিসে পঠিত হত। মাখদূম (র) এক-একটি মসলার ব্যাখ্যা-বিশ্লেষণ করতেন। ফিক্হ, উসূলে হাদীছ, তাফসীর, তাসাওউফ সব কিছু নিয়েই আলোচনা-আলোচনা হত। হাযিরানে মজলিস, বিশেষ করে 'উলামায়ে কিরাম এথেকে বেশি উপকৃত হতেন। উপদেশ প্রদান ও তরবিয়তের দ্বিতীয় মাধ্যম (বিশেষ করে সে সমস্ত লোকের জন্য যারা অন্য কোন জগতে বিরাজ করতেন) ছিল তাঁর লিখিত মকতূবাত (চিঠিপত্র)। হযরত মুজাদ্দিদ আলফে-ছানী (র.) ভিন্ন (যাঁর মকতূবাত জীবন্ত ও চিরঞ্জীব একটি কীর্তি এবং জ্ঞান-বিজ্ঞান ও 'ইলমে মা'রিফতের একটি মহামূল্যবান ভাণ্ডার) সম্ভবত অপর কেউ স্বীয় কলম ও লেখনী শক্তির সাহায্যে এবং চিঠিপত্র ও বিভিন্ন লেখার মাধ্যমে এতবড় বিরাট আলোড়ন সৃষ্টিকারী সুদূর-প্রসারী সংস্কার ও তরবিয়তের খেদমত দেননি। শুধুমাত্র তাসাওউফের ভাণ্ডারেই নয়, বরং 'ইলম ও মা'রিফত, বিভিন্ন পয়েন্ট ও সূক্ষ্মাতিসূক্ষ্ম বিষয়ের বিশ্বব্যাপী ভাণ্ডারে মকতূবাতের এ সংকলন বিশেষ বৈশিষ্ট্যের অধিকারী। বিভিন্ন বৈশিষ্ট্যের দিক দিয়ে গোটা ফারসী সাহিত্যে খুব কম পুস্তকই উক্ত পুস্তকের সমতুল্য। উক্ত মকতূবাত হযরত মাখদূম (র)-এর আমলেও সংস্কার, নৈতিক পরিপূর্ণতা ও প্রশিক্ষণের বিরাট খেদমত আঞ্জাম দিয়েছে এবং সেই সব সৌভাগ্যবান ব্যক্তি ছাড়াও-যাদের নামে আসলে চিঠিগুলি লেখা হয়েছিল -শত শত ব্যক্তি এথেকে কামিল ও মুহাক্কিক শায়খের 'স্বাস-প্রশ্বাস' ও তাওয়াজ্জুহুর ফায়দা উঠিয়েছে। হযরত মাখদূম (র)-এর ওফাতের পর প্রতিটি শতাব্দীতেই হাযার হাযার মানুষ এথেকে ফায়দা হাসিল করেছে। খানকাহগুলিতে এর দরস দেওয়া হয়েছে, মহান বুয়র্গগণ এর ওপর বক্তৃতা দিয়েছেন, বিশ্লেষণ করেছেন এবং কয়েক শতাব্দী অভিবাহিত হয়ে যাবার পর আজও তার ভেতর এমন তা'ছীর ও স্পন্দন বিদ্যমান যে, মনে হয় লেখক বুঝি এইমাত্র তা লিখেছেন এবং এখনও এর শব্দসমষ্টি ধারালো ফলকের মত অন্তরের এপাশ থেকে ওপাশ বিদীর্ণ করে দেয়।

চতুর্থ অধ্যায়

গুণাবলী ও বৈশিষ্ট্যসমূহ

আত্মবিলুপ্তি

হযরত মাখদুম শায়খ শরফুদ্দীন মুনাযরী (র)-এর সবচেয়ে উজ্জ্বল ও উল্লেখযোগ্য গুণাবলী যা তাঁর মেযাজ ও রুচিতে পরিণত হয়ে গিয়েছিল এবং যে ব্যাপারে তিনি ছিলেন সম্পূর্ণ স্বাভাবিক- তা ছিল অস্তিত্বহীনতা, আত্মবিলুপ্তি যা কঠোর মুজাহাদা ও রিয়াযতের মহোত্তম ফল এবং আধ্যাত্মিক পথের পথিক (সালিক)-এর জন্য উন্নততর কামালিয়াতের প্রতীক। তাঁর মকত্ব্বাতের প্রতিটি শব্দ এবং তাঁর উপদেশ ও বাণীর প্রতিটি হরফ থেকে এর প্রকাশ ঘটেছে।

কুবরোবিয়া সিলসিলার মাশায়িখে কিরামের এই বিশিষ্ট রীতিনীতি এবং ইমামে তরীকা হযরত শায়খ নাজমুদ্দীন কুবরা (র)-এর এই ছিল উত্তরাধিকার যার তিনি পুরোপুরি ওয়ারিছ হন।

‘মানাকিবুল আসফিয়া’ গ্রন্থে রয়েছে যে, এক সময় সে যুগের মাশায়িখে কিরাম একত্রিত হয়েছিলেন। প্রত্যেকেই যার যার দিলের আরযু ব্যক্ত করেন। শায়খ মাখদুম (র)-এর পালা আসলে তিনি বলেন :

আমার আরযু এই যে, এ দুনিয়ার বুকে আমার নাম-নিশানাও যেন অবশিষ্ট না থাকে এবং পর জগতেও।

একটি পত্রে স্বীয় ক্রন্দনমুখর অবস্থার প্রতি বিলাপ ও মাতামের যকররত (প্রয়োজনীয়তা) ও ফযীলত সম্পর্কে যা কিছু লিখেছেন তা ছিল সরাসরি নিজেরই অবস্থা এবং স্বীয় অন্তর্নিহিত স্বরূপেরই প্রতিফলন ও প্রকাশ। তিনি বলেন :

আরিফগণের উক্তি যে, আল্লাহর কসম! পুনরপি আল্লাহর কসম! আল্লাহ তা‘আলার নিকট নিজের জন্য কান্নাকাটির আওয়াজ অপেক্ষা অধিকতর প্রিয় কোন আওয়াজ নেই। অতএব উচিত এই যে, আজ এই পথের যিনি সিদ্দীক এবং দীন ও ধর্মের নেতা; তিনি বিলাপ ও আহাজারী যেন খাজা উয়ায়েস

করনী (র) থেকে শিখেন। হে ভ্রাত! যে প্রতিটি মুহূর্তে নিজের ওপর মাতম ও আহাজারী করে না, সে এমন একজন দাবিদার যে কিয়ামত সম্পর্কে গাফিল এবং একজন মৃত লাশ যার অন্তর দুঃখ ও আফসোস দ্বারা পরিপূর্ণ। এটা কেমনতরো মিথ্যা প্রবৃত্তি যে, আজ সবার মস্তিষ্কেই এরই কেনাবেচা চলছে! প্রত্যেক ব্যক্তিই এটা চাচ্ছে যে, পার্থিব জাঁকজমক হওয়া দরকার এবং আমাদের প্রদত্ত বিধি-বিধানের আদেশ-নিষেধ প্রতিপালিত ও প্রচলিত হওয়া উচিত, উচিত দুনিয়ার সম্পদ, প্রাচুর্য আর মান-ইয়্যতের অধিকারী হওয়া। আবার এসবের সাথে সাথে আল্লাহর সঙ্গেও পরিচয়ের সূত্র নিবিড় হওয়া দরকার। আল্লাহর কসম! এটা অসম্ভব, হতে পারে না।

অপর এক পত্রে তিনি যে আত্মহনন, অস্তিত্বহীনতা ও আত্ম দূশমনীর নসীহত করেছেন, তাও ছিল সরাসরি নিজেরই অবস্থা ও প্রতিচ্ছবি এবং নিশ্চিতভাবেই এ পত্র কামালিয়াতের সেই পর্যায়ে পৌঁছবার পর লেখা হয়েছিল যে অবস্থায় পৌঁছানো ব্যতিরেকে আল্লাহর বান্দাহ ও তরীকতের কামিল ব্যক্তিগণ তার দাওয়াত প্রদানকে মুনাফিকী এবং *لما تقولون ما لا تفعلون* (তোমরা কেন তা বল যা তোমরা নিজে কর না)-এর বাস্তবায়ন বলে মনে করেন।

অপর এক পত্রে কোনরূপ ইশারা-ইঙ্গিত ছাড়াই স্পষ্ট ও পরিষ্কারভাবে নিজের দিকে সম্বন্ধযুক্ত করে স্বীয় দূরবস্থা সম্পর্কে তিনি অভিযোগ ও বিলাপ করছেন :

আমরা দুর্ভাগ্য, দুর্ভোগ ও বিপদে জড়িয়ে রয়েছি। আমরা দুনিয়ার গোলামী করছি। প্রবৃত্তি ও স্বভাবের দাসত্ব বরণ, অলস পথের পৈতা ধারণ এবং স্বভাব ও অভ্যাসের পূজা করা ছাড়া আমাদের কোন কাজ নেই। আর অলস ও গাফিল ব্যক্তিদের খাতায় ছাড়া অন্য কোথাও আমাদের নামও নেই। আল্লাহুওয়লা মানুষের রাস্তায় চলি এবং তওহীদের অনুসারী বলে আমাদের যে দাবি তা তো গালভরা বুলি, বাগাড়ম্বর ও অন্ধত্বপূর্ণতার কারণে ভিন্ন আর কিছু নয়। আমাদের অবস্থা তো এই যে, আমাদের দুর্ভাগ্যে ইয়াহুদী, অগ্নিপূজক, গির্জা ও মন্দিরের অধিবাসীরাও আজ লজ্জা পায়।

হযরত শায়খ মাখদুম (র) থেকে যে মুনাজাত বর্ণিত হয়েছে, তা তাঁর दिलের অবস্থা, আবেগ ও অনুভূতিরই পূর্ণ প্রতিচ্ছবি।

এই অস্তিত্বহীনতা ও অস্তিত্ব বিলুপ্তির স্বাভাবিক ও অপরিহার্য পরিণাম এই ছিল যে, মানুষের নিন্দাবাদ ও প্রশংসা বাক্য তাঁর ক্ষেত্রে ছিল সমান। একটি পত্রে তিনি প্রকৃতপক্ষে তাঁর নিজেরই কাহিনী শোনান :

আল্লাহ্ প্রেমিকগণের সৃষ্টি জগতের প্রশংসা ও স্তুতি কিংবা নিন্দাবাদ ও প্রত্যাখ্যানে কিইবা ক্ষতি? তাদের কাছে তো সৃষ্টি জগতের কুৎসা ও স্তুতি সব সমান। সে ভাল নয় যে সৃষ্টি জগতের সবার নিকট ভাল এবং মন্দ কিংবা খারাপ সে নয় যে সৃষ্টিজগতের সবার নিকট মন্দ কিংবা খারাপ; বরং প্রশংসিত জন তিনিই, যিনি আল্লাহ্ তা'আলার নিকট প্রশংসিত এবং নিন্দিত ও মন্দ সেই যে আল্লাহ্ তা'আলার নিকট নিন্দিত কিংবা মন্দ।

এই অস্তিত্বহীনতা ও আত্মহারা অবস্থার পরিণতি এই ছিল যে, যদিচ আল্লাহ্‌র দরবারের মকবুল বান্দাদের সঙ্গে আল্লাহ্‌র যে কায়-কারবার, তারই ভিত্তিতে হযরত মাখদুম (র) থেকে অধিক সংখ্যায় কারামত ও অন্যান্য আশ্চর্যজনক কার্য সংঘটিত হত, কিন্তু তিনি নিজের এই মেযাজ ও অবস্থার কারণে কারামত প্রকাশের প্রতি অত্যন্ত বিতৃষ্ণা বোধ করতেন এবং এমন কোন জিনিসকেই তিনি পসন্দ করতেন না যদ্বারা তাঁর মর্তবা ও আল্লাহ্‌র দরবারে তাঁর মকবুল বান্দা হওয়ার কথা প্রকাশ পায়। 'মানাকিবুল আসফিয়া' প্রণেতা লিখেন :

যদিও তাঁর সকল কর্মের ভিত্তি ছিল অলৌকিকতা ও কারামতের ওপর, তবু কারামত প্রকাশে তিনি ছিলেন নারায়। তিনি তাঁর দুর্বলতা ও অসহায় অবস্থাই প্রকাশ করতেন। যদি কোন ব্যক্তি কোন কাজ কিংবা কোন প্রয়োজন পূরণের জন্য কোনরূপ সাহায্যের প্রত্যাশী হত তবে তিনি তাকে মীরান জালাল দেওয়ানার কাছে সোপর্দ করে দিতেন।^১

এটা ছিল সেই যুগ যে যুগের বুয়র্গদের কারামত ও অলৌকিকতার আলোচনা চলত ঘরে ঘরে এবং জনসাধারণ একেই আল্লাহপ্রাপ্তি ও তাঁর মনোনীত বান্দাহ হবার আলামত মনে করত।

'মানাকিবুল আসফিয়া' গ্রন্থে রয়েছে যে, একবার কতিপয় লোক কিছু মৃত মাছি নিয়ে হযরত মাখদুম (র)-এর কাছে আসে এবং বলে যে, বিখ্যাত উক্তি যে, الشیخ یحییٰ ویمیت (শায়খ জীবিত করেন এবং মারেন)। আপনি হুকুম দিন যেন এ মাছি গুলি জীবিত হয়ে ওঠে। তিনি বললেন, আমি নিজেই তো মৃতপ্রায় দুর্ভাগা; অন্যকে কী জীবিত করব।

আখলাক ও মহান চরিত্র

সুফিয়ায়ে কিরামের আখলাক ও চরিত্র নবুওতের উজ্জ্বল আলোকমালা ঘারা সমৃদ্ধ ও আলোকিত হয়ে থাকে। এজন্য ঐ সমস্ত হযরতের চরিত্র ও আখলাক

সেই মহান ব্যক্তির চরিত্রের প্রতিবিম্ব যে সম্পর্কে কুরআনুল করীমে স্পষ্ট সাক্ষ্য :
 انك لطفى خلق عظيم (নিশ্চয়ই আপনি মহান চরিত্রের ওপর প্রতিষ্ঠিত)
 বিদ্যমান। 'মানাকিবুল আসফিয়া' প্রণেতা লিখেছেন :

اخلاق شيخ شرف الدين مانند اخلاق نمى بود -

শায়খ শরফুদ্দীনের চরিত্র ও আখলাক নবী (স)-এর চরিত্র ও আখলাকের
 মতই ছিল।

তাঁর মতে নবী (স)-এর চরিত্র দ্বারা ভূষিত হওয়া এবং নবী (স)-এর মহান
 জীবন-চরিত্রের হাঁচে নিজেকে ঢেলে সাজানো কতখানি জরুরী ছিল তা তার
 লিখিত মকতূবাতের উদ্ধৃতি থেকেই পরিষ্কার পরিমাপ করা যাবে। প্রকৃতপক্ষে
 এটা ছিল স্বয়ং তাঁর নিজেরই অবস্থা যেটাকে একটা মূলনীতি হিসেবে এখানে
 বর্ণনা করা যাচ্ছে :

আর প্রকৃত চরিত্র ও আখলাক সেটাই যা তরীকতের জ্ঞানী ও পণ্ডিতগণের
 অভ্যাসে পরিণত হয়ে গেছে। তাঁরা নিজেদের সকল অবস্থায় শরীয়তের
 পায়েরবী করেন এবং নিজেদের আখলাককে রাসূল করীম (স)-এর সুন্নাহ
 (জীবনাদর্শ)-এর কষ্টিপাথরে পরীক্ষা করে দেখেন। আর যিনি শরীয়তকে
 বিশ্লেষণ করেন না, তার তরীকত (তাসাওউফ)-এর কিছুই হাসিল হয় না।^১

অপর এক পত্রে তিনি বলেন :

যিনি যত বেশি শরীয়তের অনুসরণে দৃঢ় হবেন তিনি তত বেশি উত্তম ও
 মহান চরিত্রের অধিকারী হবেন, আর যিনি যত বেশি উন্নত ও মহৎ চরিত্রের
 অধিকারী হবেন তিনি তত বেশি আল্লাহর প্রিয়পাত্র হবেন। উত্তম চরিত্র
 আদম (আ.)-এর উত্তরাধিকার (মীরাহ) এবং আল্লাহ তা'আলা প্রদত্ত
 তুহফা। অতএব অপরিহার্যভাবেই ঈমানদারের পক্ষে উত্তম চরিত্র থেকে
 অধিকতর উত্তম পদ্ধতি এবং অপর কোন সৌন্দর্য ও অলংকারের বস্তু নেই।
 আর উত্তম চরিত্র ও আখলাকের হাকীকত আল্লাহ তা'আলার আহকাম পালন
 এবং তাঁরই প্রেরিত রাসূল (সা.)-এর আনীত শরীয়তের অনুসরণ করা।
 কেননা সারওয়ারে কায়েনাতে (সা.)-এর সমস্ত কার্যকলাপ ও চলাফেরা সব
 সময়ই (স্রষ্টা ও তাঁর সৃষ্টির নিকট) পসন্দনীয় ছিল এবং যে কেউই ছয়ূর
 আকরাম (সা.)-এর অনুসরণ করে তার উচিত সে যেন তার জীবন ও
 যিন্দেগী তেমনভাবে অতিবাহিত করে যেমনভাবে অতিবাহিত করে গেছেন
 স্বয়ং রাসূল করীম (স)।^২

হযরত শায়খ মাখদুম (র)-এর অবস্থা ও জীবন-চরিত্র বলে দেয় যে, তিনি তাঁর চরিত্র ও আখলাককেও নবী করীম (স)-এর পদাংক অনুসরণ করতে পুরোপুরি কৌশল করেছেন এবং তাঁর আখলাক, আল্লাহর সৃষ্টি জগতের সঙ্গে তাঁর ব্যবহার, দয়া ও স্নেহ, মানুষের দোষত্রুটিকে প্রচ্ছন্ন রাখা এবং আল্লাহর বান্দাহুগণের মনকে সান্ত্বনা প্রদান করার ক্ষেত্রে তিনি ছিলেন হযূর আকরাম (স)-এর মহান ও উন্নততর চরিত্রের অনুসারী ও একটি বাস্তব নমুনা।

স্নেহ ও করুণা

তিনি ছিলেন অত্যন্ত কোমলহৃদয়, আল্লাহর বান্দাহুগণের অধিকারের বেলায় অত্যন্ত সদয় ও সহানুভূতিশীল, বন্ধুবৎসল এবং শত্রুর প্রতি দয়ালু। 'আরিফ ও আল্লাহর বান্দাহুদের মকাম ও মর্যাদা এবং জীবন-যাপন পদ্ধতি বর্ণনা করতে গিয়ে তিনি যা কিছু লিখেছেন তা তাঁরই সত্যিকার চিত্র। তিনি বলেন :

তাঁর (সূফীর) রহমত ও স্নেহ-রশ্মি প্রত্যেকটি বস্তুর ওপরই পতিত ও চমকিত হয়। নিজে খান না, মানুষকে খাওয়ান; নিজে পরিধান করেন না, মানুষকে পরিধান করান। মানুষ তাঁকে যে কষ্ট দেয় তার প্রতি তিনি ক্ষমপণও করেন না এবং তাদের কৃত যুলুমের প্রতিও দৃষ্টি ফেরান না। তাঁর প্রতি যারা যুলুম করে তিনি তাদেরই সুপারিশকারী হন। বিশ্বাসঘাতকের প্রতিশোধ নেন বিশ্বস্ততা দিয়ে আর গালির বদলা নেন শুভ কামনা ও প্রশংসাগীতির মাধ্যমে। তুমি কি জান তিনি এসব কেন করেন? এজন্য যে, তিনি সব কিছু থেকেই নিরাপদ। তাঁর দিলের খোলা দিগন্ত রেখা থেকে সৃষ্টির প্রতি প্রশান্তি বায়ু ভিন্ন আর কিছুই প্রবাহিত হয় না। স্নেহ ও করুণার ক্ষেত্রে তিনি সূর্যের ন্যায় উদার। তাঁর রশ্মি দোস্তের ওপর যেমন চমকিত ও প্রতিফলিত হয়, তেমনি প্রতিফলিত হয় দুশমনের ওপরও। বিনয়ের ক্ষেত্রে তিনি হন যমীনের ন্যায়। গোটা সৃষ্টিকুল তাঁর ওপর পা রাখে, করে নিত্য পদদলিত—কিন্তু তিনি কারও সঙ্গে বাগড়া করেন না, বিবাদ করেন না। সৃষ্টির ওপর অত্যাচার চালাতে তাঁর হাত সংকুচিত হয়। গোটা সৃষ্টি জগতটাই তো তার পরিবার বিশেষ, কিন্তু তিনি কারও পরিবারের সদস্য নন। দানশীলতার ক্ষেত্রে তিনি সমুদ্রের ন্যায় অকৃপণ। দুশমনকে ঠিক তেমনি প্রতিপালন করেন যেমন করেন দোস্তকে। প্রাচ্য ও পাশ্চাত্যের গোটা জগতের ওপর করুণা আর স্নেহ করুণা হয়েই তিনি বর্ষিত হন। কেননা তিনি চিরমুক্ত, চির আযাদ। যা কিছু দেখেন একই জায়গা থেকে দেখেন (অর্থাৎ তামাম মাখলুককে তাঁরই পবিত্র সত্তার সঙ্গে সম্বন্ধযুক্ত মনে করেন)। তাঁর চোখ

সামগ্রিকতার অধিকারীর চোখ হয়ে থাকে। আর যে ব্যক্তি এসব গুণ দ্বারা গুণান্বিত না হয়, তার তরীকতে কোন মরতবা ও মকাম হাসিল হয় না।^১

এই করুণা ও স্নেহের পরিণতি এই ছিল যে, আল্লাহর কোন বান্দার অন্তরে আঘাত দেওয়া হযরত মাখদুম (র)-এর নিকট ছিল পাপ।

একবার তিনি নফল সিয়াম পালন করছিলেন। এক ব্যক্তি বেশ তোড়জোড় করে তাঁর খেদমতে একটি তুহফা নিয়ে আসে এবং বলে যে, আমি অত্যন্ত আগ্রহভরে এটা আপনার খেদমতে এনেছি যেন তা আপনি গ্রহণ করেন। তিনি তখনই সেটা গ্রহণ করেন এবং বলেন :

সিয়াম ভঙ্গের কাযা আছে, কিন্তু দিল্ (অন্তর, মন) ভঙ্গের তো কোন কাযা নেই।

এর অনিবার্য ফল এও ছিল যে, তিনি সাধ্যমত প্রাঙ্নতার আড়ালেই আশ্রয় নিতেন এবং কারো সম্পর্কে কোন গুনাহ কিংবা কোন ক্রটি-বিচ্ছৃতি অবগত হলে তার ভিন্নতর ব্যাখ্যা দিতেন।

মানাকিবুল আসফিয়া গ্রন্থে বর্ণিত আছে যে, একদিন এক ব্যক্তি আগে বেড়ে গিয়ে ইমামতি করে এবং তিনি তার পেছনে সালাত আদায় করেন। সালাত শেষে কেউ আরম্ভ করল যে, এই ব্যক্তি শরাবখোর। তিনি বললেন, সব সময় পান করে না। লোকেরা বলল, সব সময়ই পান করে। জবাবে বললেন, রমযান মাসে পান করে না বোধ হয়।^২

দুনিয়ার সাথে সম্পর্কহীনতা

হাকীকী মা'রিফত এবং পরিপূর্ণ 'ইশ্ক'-এর ফল স্বাভাবিকভাবেই উভয় জগতের সঙ্গে অনাসক্তি ও গা বাঁচিয়ে চলা। তিনি মাজেদুল মুলুক -এর সনির্বন্ধ অনুরোধে এবং তাকে মুহাম্মাদ তুগলকের অসন্তোষ ও রোষবহির হাত থেকে বাঁচাবার তাকীদে খানকাহর জন্য যে জায়গীর অসত্ত্বষ্ট চিন্তে কবুল করেছিলেন তা তিনি দরিদ্রের বন্ধু এবং দয়াদ্রাঁচিন্ত বাদশাহ ফীরোয তুগলকের রাজত্বকালে ফিরিয়ে দেন। আর 'সীরাতুশ্ শরফ'-এর সেই বর্ণনা যদি সত্যি হয়, হয় সঠিক যা 'মু'নিসুল কুলুব' নামক গ্রন্থের বরাত দিয়ে লেখা হয়েছে, তাহল তিনি দিল্লী গমন করে জায়গীরের বাবত প্রদত্ত পরোয়ানা বাদশাহকে সোপর্দ করেন। এরপর খানকাহর নির্মাণ ও এর বিস্তৃতির ব্যাপারে আর কোনরূপ সম্পর্ক রক্ষা কিংবা আগ্রহ দেখান নি। যদি কেউ এ ব্যাপারে তাঁকে কোন পরামর্শ দিত, তবে তা তাঁর প্রকৃতিতে বিরূপ ছায়া ফেলত। 'গঞ্জে লা ইয়াখফা' প্রণেতা লিখেছেন :

১. ৬৪তম পত্র।

২. মানাকিবুল আসফিয়া, পৃ. ১৪১; সত্ত্বত ঘটনাটি রমযান মাসের।

শায়খ হামীদুদ্দীন (র) মাখদুম শায়খ (র)-এর দোস্ত ছিলেন। নির্জনেও তাঁর সঙ্গে থাকতেন। একবার অর্ধেক রাত অতিবাহিত হবার পর মাখদুম (র)-এর খেদমতে হাখির হন। চাঁদনী রাত। মাখদুম (র) বাইরে বের হয়ে আসলেন এবং প্রাঙ্গণে প্রাচীরের নিকট বসে পড়লেন। শায়খ হামীদুদ্দীনও এক মুহূর্ত বসে থাকলেন। অল্প কিছুক্ষণ পর তিনি বললেন, যদি এই চবুতরা কিছু বেড়ে যায় তবে প্রাঙ্গণ স্পষ্ট ও পরিষ্কার দৃষ্টিগোচর হবে। মাখদুম (র) উঠে দাঁড়ালেন এবং বলতে লাগলেন : আমি মনে করছিলাম যে, এই আবছা রাতে ধর্মীয় ব্যাপারে সম্ভবত কোন সমস্যা দেখা দিয়ে থাকবে যার সমাধানের জন্য আপনি এখানে তশরীফ এনেছেন। কিন্তু এখন দেখতে পাচ্ছি, আমি ভুল ধারণার ভেতর ছিলাম। আপনি বলেছেন, চবুতরা বাড়াও আর এই ফকীর বলছে, এই পুতুল যরকে বিরান করে দাও।^১

বুলন্দ হিম্মত

হযরত মাখদুম (র)-এর বড় আরও একটি স্বাতন্ত্র্য এবং তরফী ও কামা-লিয়াত হাসিলের গোপন রহস্য তাঁর পাহাড়সম বুলন্দ হিম্মত ও উন্নত মনোবল যা তাঁর জীবনের অবস্থাদিতে এবং লিখিত মকতূবাতের প্রতিটি ছত্রে ছত্রে ফুটে উঠেছে। তিনি তাঁর সঙ্গে সম্পর্কিত ব্যক্তিবর্গ, বন্ধু-বান্ধব ও খাদিমকুলকে হামেশা উচ্চ সাহস ও চাহিদার ব্যাপ্তির জন্য উৎসাহিত করেছেন ও তাকীদ দিয়েছেন। নিশ্চিতই এ ব্যাপারে তাঁর আমলও বেশি হবে। একটি পত্রে অত্যন্ত আশা-উদ্যমময় পদ্ধতিতে তিনি উচ্চ সাহসিকতার যে তা'লীম দেন তা হল :

তুমি যতই ভীরা ও কাপুরুষ হও না কেন, হিম্মত বুলন্দ ও সম্মুন্নত রাখবে। ভ্রাত! পুরুষের হিম্মত কোন বস্তুর সঙ্গেই দুর্বল হয় না। তার হিম্মতের বোঝা আসমান-যমীন, 'আরশ-কুরসী, বেহেশত-দোযখ কেউই উঠাতে পারে না।

ঐসব আল্লাহুওয়ালার হিম্মত এমন পাক-পবিত্র এবং এমন প্রশস্ত যে, তার ভেতর জঞ্জাল ও আবর্জনার নাম-নিশানাও থাকে না যেন এ সমস্ত লোক সেখানে উড়তে পারে এবং কোন দিগন্তই 'রবুবিয়ত-এর দিগন্ত' থেকে অধিকতর পাক এবং কোন ময়দানই ওয়াহদানিয়াত তথা একত্ববাদের ময়দান থেকে অধিকতর প্রশস্ত ও বিস্তৃত নেই। পুরুষের হিম্মত কা'বা শরীফ ও বায়তুল মুকাদ্দাসের আশে-পাশে ঘোরাফেরা করে না এবং আসমান-যমীনও তাওয়াফ করে না। সুবহানাল্লাহ! কতই না অদ্ভুত কাজ! এক ব্যক্তি

নিজ জায়গায় বসেছে, পা দুখানি আঁচলে টেনে নিয়ে এবং মাথাটা উরু প্রান্তে স্থাপন করে আছে। অথচ তার অবস্থা তো এই যে, তার মস্তক (হিম্মত) স্থান ও কাল অতিক্রম করে সামনের দিকে অগ্রসর হয়ে গেছে। কতই না মুবারক সে হিম্মত যা আদম সন্তান ভিন্ন আর কোথাও পাবে না।

সীরাতুশ্ শরফ প্রণেতা ঠিকই লিখেছেন :

তঁার (শায়খ মাখদুম-এর) চোখ সর্বদাই দুশ্চাপ্য বস্তুর ওপর লেগে থাকত। কেননা প্রাপ্ত দ্রব্য তঁার নিকট অকিঞ্চিৎকর দৃষ্টিগোচর হত এবং প্রশস্ত মনোবল এবং বুলন্দ হিম্মতের কারণে প্রতিটি ক্ষণ ও প্রতিটি মুহূর্তে উন্নততর বস্তু তঁার চোখের সামনে ফিরত।

তিনি অন্যদেরকেও এমনি বিস্তৃত মনোবল ও উন্নত সাহসিকতা অর্জনের নির্দেশ দিয়েছেন।

যদি উভয় জগতই তোমার দরজায় এনে হাযির করা হয় এবং বলা হয় যে, এ সবই তোমার আয়ত্তাধীন, যেভাবে খুশি ব্যবহার কর—তবু তুমি সতর্ক ও হুঁশিয়ার থাকবে। এমনটি যেন না হয় যে, দুনিয়া ও আখিরাতের উর্ধ্বে যে সব বস্তু রয়েছে এর কারণে তা পর্দার অন্তরালে হারিয়ে যায় এবং তদবধি পৌঁছুবার সকল রাস্তা ছিন্ন হয়ে যায়।

তাজরীদ ও তাফরীদ

তাজরীদ ও তাফরীদ-এর অধিবাসীরা সৃষ্টিজগত থেকে সম্পর্কচ্যুতি এবং সত্যপ্রীতির দিক দিয়ে সেই মকাম পর্যন্ত পৌঁছে যান যেখানে কোন অপরিচিতের পক্ষে পৌঁছা কিংবা তার উচ্চতা অনুভব ও উপলব্ধি করা সাধারণের পক্ষে অত্যন্ত মুশকিল ব্যাপার। কেননা যতক্ষণ পর্যন্ত না স্বয়ং তিনি নিজের অবস্থার বর্ণনা দেন কিংবা মনযিলের নিশানা বাতলান তার সন্ধান মেলা ভার। ঐ সব আল্লাহুওয়ালার জনসম্মুখে নির্জনতা অবলম্বন এবং আপন ভুবন সফরের মাধ্যমে মূল্যবান সম্পদ হাসিল হয় এবং তাঁরা 'কাজের সাথে হাত এবং বন্ধুর সাথে হৃদয়' (دست بكار) -এর প্রতিচ্ছবি, পথ-প্রদর্শন ও তরবিয়তের কঠিন দায়িত্বে সমাসীন থাকেন এবং নবী করীম (স)-এর আনুগত্যের শান তাঁদেরকে হামেশা সৃষ্টিকুলের মধ্যবর্তীতে স্থান দেয়। 'তাজরীদ' ও 'তাফরীদ' কোন্ মকামকে বলা হয় এবং যাঁরা এ মকামে পৌঁছে গিয়ে থাকেন তাঁদের অবস্থা কি হয়ে থাকে, তা তাঁর নিজের মুখেই শুনুন :

‘তাজরীদ’ সমস্ত আত্মীয়তা সূত্র ও সম্পর্ক এবং সমগ্র সৃষ্টিজগত থেকে পৃথক হয়ে থাকে। আর ‘তাকরীদ’ নিজে নিজেকে পরিত্যাগ করার নাম-ঠিক তেমনি যেন দিলের মাঝে কোনরূপ ধূলিমালিন্য না থাকে, না থাকে পৃষ্ঠদেশে কোন বোঝা। কারো সঙ্গে হিসাব-কিতাবের কোন সম্পর্ক যেমন থাকবে না-তেমনি থাকবে না অন্তরের মাঝে পার্থিব চিন্তা-ভাবনার কোন বাজার কিংবা মেলা, আর সৃষ্টির সঙ্গে তার কোনরূপ কায়-কারবারও থাকবে না। তার হিম্মত তথা সাহসিকতার বাজপাখি ‘আরশে মু’আল্লাকেও অতিক্রম করে যাবে এবং উভয় জগত অতিক্রম করে স্বীয় পরম আরাধ্যের সান্নিধ্যে গিয়ে উপনীত হবে। উভয় জগত থাকতে দোস্ত ব্যতিরেকে কোন সন্তুষ্টির কারণ যেন না ঘটে এবং উভয় জগতের অনুপস্থিতিতে দোস্তের সঙ্গী হয়েও যেন অখুশিরও কোন কারণ না ঘটে। একজন প্রিয়ভাজন কত সুন্দরই না বলেছেন : ‘আল্লাহ্ সঙ্গে থাকতে কোন ভয়াবহতাই বড় নয় আর আল্লাহ ব্যতীত অপর কিছুই সঙ্গী হয়ে কোন শান্তি ও আরামের উপকরণও শান্তি ও আরামের নয়।’ এজন্যই বলা হয়েছে যে, যে কেউ আল্লাহ্ রাক্বুল ‘আলামীন থেকে দূরে সরে যায় সে প্রকৃতই দুঃখ-কষ্ট ও বিপদ-আপদে নিপতিত, যদি কয়েকটি দেশের ধনভাণ্ডারের মালিকও সে হয়। আর যে কেউ আল্লাহর সঙ্গে নিবিড়ভাবে সম্পর্কিত, সে উভয় জগতের বাদশাহ- যদিও রাতের খাবার তার না জোটে।^১

অন্য আর এক চিঠিতে তিনি লিখছেন :

দোস্ত অস্তিত্ব ব্যতিরেকেও মওজুদ আছেন, আর অন্যরা বিদ্যমান থাকতেও অস্তিত্বহীন। কিন্তু শর্ত এই যে, তুমি গোটা বিশ্ব থেকে পলায়ন করবে এবং নিজের মধ্যে নিজেকে ফিরিয়ে আনবে। দিল্ (অন্তর)-কে নিজের থেকে উঠিয়ে নিজের থেকেই হাত গুটিয়ে নেবে যেমন আসহাবে কাহফ করেছিলেন। নিজের দিলকে কাহফ (গুহা) বানাবে এবং নিজেরই দিলে এসে নিজেই নিজের ওপর জানাযা পড়ে নেবে। নিজের নফসের রাগ ও হিংসা-বিদ্বেষকে নিজের দিল (অন্তর-রাজ্য) থেকে টেনে বাইরে নিক্ষেপ করবে যেন তোমাকে সমগ্র মাখলুকাতের সামনে তুলে ধরা হয় যেমন আসহাবে কাহফকে উদ্ভাসিত করে তুলে ধরা হয়েছিল। (কুরআন শরীফে এতদসম্পর্কিত আয়াত রয়েছে :) “যদি তুমি তাদের অবস্থা সম্পর্কে ওয়াকিফহাল হয়ে যাও তবে তুমি পেছনে ভেগে আসবে, আর তোমার অন্তঃকরণ তাদের প্রভাবে অভিভূত হয়ে পড়বে যদি তুমি তাদেরকে গভীরভাবে নিরীক্ষণ কর।

সৎকার্যে আদেশ এবং মুসলমানদের অবস্থা ও কার্যকলাপ সম্পর্কে চিন্তা-ভাবনা

তাজরীদ ও তাফরীদের এরূপ সমুন্নত মকাম সত্ত্বেও যেখানে দিলে ধূলিমালিন্য এবং কোন মখলূকের সঙ্গে যোগাযোগ কিংবা সম্পর্ক রক্ষার কোনরূপ সুযোগই নেই, সেখানেও তিনি (শায়খ মুনাযরী) আল্লাহর সৃষ্টিকুলের অবস্থার প্রতি করুণাশীল ছিলেন এবং মুসলমানদের অবস্থা ও কার্যকলাপের ব্যাপারে চিন্তা-ভাবনা ও তাদের সঙ্গে ঘনিষ্ঠ সম্পর্ক রক্ষা করে চলতেন। আর সেহেতুই তিনি সমকালীন বাদশাহদের সঙ্গে কখনো কখনো চিঠিপত্রের মাধ্যমে যোগাযোগ রাখতেন এবং ন্যায়বিচার, ফরিয়াদী ও মযলুমের সাহায্য-সহায়তা এবং তাদের হিফায়তের দিকে তাঁদের দৃষ্টি আকর্ষণ করতেন। একবার খাজা 'আবিদ জাফর আবাদীর মালমাত্তা হারিয়ে যায়। এতে তিনি সুলতানুশ শায়খ ফীরোয শাহকে একটি চিঠি লিখেন। এতে তিনি হুযূর আকরাম (সা.) এবং মহান সাহাবা (রা.) বর্ণিত যালিম ও মযলুমদের সম্পর্কিত কতিপয় ঘটনা ও হাদীছ উদ্ধৃত করার পর লিখেন :

আল্লাহর অশেষ শুকরিয়া যে, আজ সেই মহান শ্রদ্ধেয় ও সম্মানিত ব্যক্তি যিনি মযলুম ও অসহায়দের আশ্রয় এবং ইনসারফ ও সুবিচার য়ার দরবার থেকে দুনিয়াবক্ষে প্রকাশিত হচ্ছে, তিনি আজ সৌভাগ্যের এমনি এক দ্বারপ্রান্তে গিয়ে উপনীত হয়েছেন যে সম্পর্কে ইসলামের পয়গম্বর বলেছেন : এক মুহূর্তের ন্যায়বিচার ষাট বছরের ইবাদত অপেক্ষা উত্তম।

হযরত শরফুদ্দীন আহমদ মুনাযরী (র) দীনী ইল্ম হাসিল এবং শিক্ষা ক্ষেত্রে পরিপূর্ণ তালীম লাভ করেন সোনার গাঁওয়ে। এজন্য স্বাভাবিক ও সঙ্গত কারণেই তিনি বাংলা এবং সেখানকার অবস্থাদি সম্পর্কে বিশেষ আগ্রহশীল ছিলেন এবং সেখানকার মুসলমানদের অবস্থাদি সম্পর্কে চিন্তা-ভাবনা ও খোঁজ-খবর নিতেন।

সুন্নতের অনুসরণ

এ পথের সালিক (আধ্যাত্মিক পথের পথিক)বৃন্দ স্বীয় কারামত ও মকামসমূহে যে পরিমাণে উন্নতি করেন তাদের ওপর হুযূর (স)-এর প্রেমময়তা এবং তাঁর পূর্ণ অনুসরণের গুরুত্ব ও আবশ্যিকতাও সেই পরিমাণে দিবালোকের মত উদ্ভাসিত হয়ে ওঠে এবং তাঁদের সামনে আরও সুস্পষ্টরূপে প্রতিভাত হয়ে ওঠে যে, আল্লাহর দরবারে পৌঁছতে এবং গৃহীত (মকবুল) হতে হলে রাসূল

করীয় (স)-এর পূর্ণ অনুসরণ এবং তাঁর আনীত সুলত ও শরীয়তের নিকট পরিপূর্ণ আত্মবিলোপ ব্যতিরেকে সম্ভব নয়। এ প্রসঙ্গে তাঁর (হযরত মুনাযরী-এর) যে 'আকীদা ও সুদৃঢ় বিশ্বাস ছিল তা ভুলে ধরার জন্য নিম্নোক্ত চিঠিটিই যথেষ্ট :

قال الله تعالى : قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ

আল্লাহ্ পাক বলেন : “বল (হে মুহাম্মাদ!) যদি তোমরা আল্লাহর ভালবাসা পেতে চাও তবে আমার অনুসরণ কর; তাহলে আল্লাহও তোমাদের ভালবাসবেন” উল্লিখিত বক্তব্যকেই সমর্থন করে।

এ থেকে জানা গেল যে, কতিপয় অযোগ্য, নাদান ও বাজে লোক যারা তাদের ভ্রান্ত 'আকীদা-বিশ্বাস ও মুর্খতার কারণে মুহাম্মাদুর রাসুলুল্লাহ (স)-এর পথ অবলম্বন করে না-তারা এই উক্তি অনুসারে অত্যন্ত বদবখ্ত তথা হতভাগা। একজন পথ-প্রদর্শক ব্যতিরেকে সোজা-সরল রাস্তায় নিরুদ্দিগ্ন গতিতে চলা এক কথায় অসম্ভব।

এই মূলনীতির ওপর তিনি যেরূপ দৃঢ়তার সঙ্গে আমল করতেন এবং সুলত নববী (স)-এর পরিপূর্ণ অনুসরণের ক্ষেত্রে সদাজাগ্রত থাকতেন, তার পরিমাণ নিম্নোক্ত ঘটনা থেকেও পাওয়া যাবে :

ঠিক যে দিন তিনি ইন্তিকাল করেন তখন তাঁর বয়স ছিল ১২১ বছর। তিনি দুর্বলতা ও শক্তিহীনতার শেষপ্রান্তে গিয়ে পৌঁছেছিলেন। এই অন্তিম মুহূর্তেও পরিপূর্ণ দৃঢ়তা ও অটুট সংকল্প নিয়ে তিনি সুলতের অনুসরণে শেষ ওষু করেন। শায়খ যঈন বদর 'আরাবী ওফাতনামায় লিখেন :

তিনি বদন মুবারক থেকে জামা খুলে ওষুর নিমিত্ত পানি চাইলেন, আন্তিন গুটিয়ে মিসওয়াকের জন্য হাত বাড়ালেন এবং সজোরে বিসমিল্লাহ উচ্চারণপূর্বক ওষু গুরু করলেন। তিনি ওষু করতে গিয়ে প্রতিটি অঙ্গ-প্রত্যঙ্গ ধোয়ার ক্ষেত্রে সাধারণ দু'আ-দরুদ পড়ে চলছিলেন। কনুই পর্যন্ত দুই হাত ধৌত করলেন, কিন্তু মুখমণ্ডল ধুতে ভুলে গেলেন। শায়খ খলীল তাঁকে এ ভুলের কথা স্মরণ করিয়ে দিলেন। এরপর তিনি পুনরায় গোড়া থেকে ওষু করতে গুরু করলেন। বিসমিল্লাহ ও দু'আ-দরুদ পূর্বের ন্যায়ই প্রতিটি নতুন স্থান ধৌতের সঙ্গে সঙ্গে অত্যন্ত ধৈর্য ও সতর্কতার সাথে পড়ছিলেন আর উপস্থিত ব্যক্তিবর্গ বিশ্বয় প্রকাশ করছিল যে, এরূপ অবস্থাতেও তিনি এতখানি অভিনিবেশের পরিচয় দিচ্ছেন! কাযী যাহিদ ডান পা ধোয়ার

ব্যাপারে একটু সাহায্য করবার মানসে হাত বাড়িয়ে দিলেন। তিনি সে হাত ফিরিয়ে দিয়ে বললেন 'থাম'। তারপর নিজে নিজেই ওয়ূ সমাপন করলেন। অতঃপর চিরঞ্জী চেয়ে নিয়ে দাড়ি সুন্দররূপে আঁচড়ালেন, জায়নামায নিলেন এবং দু'রাকাত নামায আদায় করলেন।^১

সুন্নতে নববী অনুসরণের সঙ্গে সঙ্গে স্বাভাবিক অভ্যাসের বশেই তিনি বিদ'আতের প্রতি ছিলেন বিদ্বেশী। বিদ'আতের ক্ষেত্রে তিনি এতখানি সতর্ক ও সাবধানী ছিলেন যে একবার তিনি বলেছিলেন,

এখানে অথবা অন্য কোনখানেই হোক না কেন, সুন্নত ও বিদ'আত সামনে আসামাত্রই সুন্নতকে পরিত্যাগ করা উত্তম হবে যদি সুন্নতকে আঁকড়ে ধরতে গিয়ে বিদ'আতে লিপ্ত হয়ে পড়ার আশংকা দেখা দেয়।^২

১. যঈন বদর 'আরাবীকৃত ওফাতনামা থেকে।

২. খানপুর নে'মত, তৃতীয় মজলিস, চতুর্থ অধ্যায়ের ফারসী উক্তির তরজমা প্রিয় বন্ধু সূফী মুহাম্মাদ হসায়ন সাহেব এম.এ.-এর লিখিত যার জন্য গ্রন্থকার তাঁর নিকট অত্যন্ত কৃতজ্ঞ।

পঞ্চম অধ্যায়

ওফাত

হযরত মাখদূম শায়খ শরফুদ্দীন ইয়াহইয়া মুনায়রী (রা.)-এর জীবন-বৃত্তান্ত, তাঁর কামালিয়াত এবং উচ্চ মকাম ও মর্যাদা সম্পর্কে যা কিছু তাঁর সমসাময়িক জীবনীকাররা ভবিষ্যত বংশধরদের জন্য লিপিবদ্ধ করেছেন তা মোটেই যথেষ্ট নয়। অবশ্য তাঁর ইত্তিকালের বিবরণ যা তাঁর খাস খলীফা ও এসব ঘটনার প্রত্যক্ষদর্শী শায়খ যঈন বদর 'আরাবী লিপিবদ্ধ করেছেন, তাও যদি সংরক্ষিত থাকত তাহলেও তা তাঁর মর্যাদা ও মরতবা পরিমাপ করবার জন্য কিছুটা যথেষ্ট হত। ইসলামী ইতিহাসে কতিপয় মহান বুয়র্গ ও ইমামের ওফাতের ঘটনাবলী এবং দুনিয়া থেকে বিদায় নেবার ও মৃত্যুকে খোশ আমদেদ জানাবার বিবরণ এমনভাবে বর্ণনা করা হয়েছে যে, এথেকে সে সমস্ত মহান ব্যক্তির মর্যাদা, আল্লাহর সঙ্গে সম্পর্ক, ঈমান ও ইয়াকীনের পরিমাপই গুধু হয় না, বরং তা থেকে ইসলামের সত্যতাও দিবালোকের ন্যায় জনসমক্ষে ভেসে ওঠে। কোন উন্নত ও জাতিগোষ্ঠীর মহান বুয়র্গ কিংবা কোন ধর্মের মহান নেতৃবৃন্দের শেষ জীবনের ঘটনাবলী ও শেষ নিঃশ্বাস ত্যাগের বৃত্তান্ত এতখানি প্রভাব সৃষ্টিকারী, ঈমানের আলো বর্ধক ও আবেগ-উদ্দীপক নয় যতখানি ইসলামের মহান ব্যক্তিদের ঘটনাবলী বিশুদ্ধ ইতিহাস আমাদের জন্য সংরক্ষণ করে রেখেছে।

হযরত মাখদূম মুনায়রী (রা.)-এর ওফাতের যে বৃত্তান্ত এখানে বর্ণনা করা হয়েছে তা থেকে তাঁর নজীরবিহীন দৃঢ়তা, শরীয়তের পূর্ণ অনুসৃতির ব্যাপারে আবেগ ও উৎসাহ-উদ্দীপনা, উন্নতে মুহাম্মাদী (সা.)-এর জন্য চিন্তা-ভাবনা, ইসলাম-অনুসারীদের জন্য দরদ, ভালবাসা ও কল্যাণ কামনা এবং জীবনের নাযুক মুহূর্তেও তাদের চিন্তা ও তাদের জন্য দু'আ, আল্লাহ পাকের রহমতের আশাবাদ, সুদৃঢ় বিশ্বাস ও নির্ভরশীলতার সঙ্গে সেই মহান সত্তার পরমুখাপেক্ষীহীনতা ও শ্রেষ্ঠত্বের ভীতি, ঈমানের নিরাপত্তা, উত্তম পরিণাম লাভের চিন্তা ও সতর্ক মনোযোগই প্রকাশ পায়।

হযরত শায়খ যঈন বদর 'আরাবী বলেন :

সেদিন ছিল বুধবার। ৭৮২ হিজরীর ৫ই শাওয়াল তারিখে আমি তাঁর খেদমতে হাযির হলাম। ফজরের সালাত আদায়ের পর তিনি মালিকুশ্-শারক খাজা নিজামুদ্দীন খাজা মালিক নির্মিত নতুন হুজরায় তক্তপোশের ওপর বালিশ হেলান দিয়ে বসেছিলেন। সহোদর ভ্রাতা শায়খ জলীলুদ্দীন, খাস খাদিম এবং আরও কতিপয় বন্ধু-বান্ধব ও খাদেম যারা হযরত শায়খ-মুনাযরী (র)-এর খেদমতের জন্য পরপর কয়েক রাত ধরে জাগ্রত ছিলেন—তাঁদের মধ্যে কাযী শামসুদ্দীন, মাওলানা শিহাবুদ্দীন (যিনি ছিলেন খাজা মীনার ভাগিনা), মাওলানা ইবরাহীম, আমু কাযী, মিঞা হেলাল ও 'আকীক এবং আরও অন্যান্য বন্ধু-বান্ধব ছিলেন। তিনি পবিত্র মুখ দিয়ে উচ্চারণ করলেন, "লা হাওলা ওয়ালা কুওয়াতা ইল্লা বিল্লাহিল 'আযীম।" অতঃপর উপস্থিত ব্যক্তিবৃন্দের দিকে মুখ করে বললেন, তোমরাও বল। সবাই এ হুকুম তা'মিল করল এবং সবাই পড়ল—'লা হাওলা ওয়ালা কুওয়াতা ইল্লা বিল্লাহিল 'আযীম।' অতঃপর মুচকি হেসে বিশ্বায়ের সুরে বললেন : সুবহানাল্লাহ! অভিশপ্ত শয়তান এ মুহূর্তে তওহীদের মসলার ক্ষেত্রেও আমার পদস্থলন ঘটতে চায়—করতে চায় বিভ্রান্ত। আল্লাহর অসীম অনুগ্রহ ও কৃপা, তার দিকে আমি কীভাবে দৃষ্টিপাত ও লক্ষ্য করতে পারি! অতঃপর তিনি 'লা হাওলা ওয়ালা কুওয়াতা ইল্লা বিল্লাহিল-'আযীম' পড়তে শুরু করলেন এবং উপস্থিত সবাইকেও বললেন, তোমরাও পড়। এরপর তিনি নিজে দু'আ-দরুদ ও ওযীফার ভেতর মশগুল হয়ে গেলেন। চাশতের সময় তিনি এ থেকে ফারোগ হলেন। কিছু বিলম্বের পর তিনি আল্লাহ তা'আলার হাম্দ ও ছানার ভেতর মশগুল হলেন, সজোরে 'আলহামদু লিল্লাহ' আলহামদু লিল্লাহ' পড়তে লাগলেন, বলে চললেন আলহামদু লিল্লাহ, আলহামদুলিল্লাহ, আল-মিন্নাতু লিল্লাহ, আল-মিন্নাতু লিল্লাহ।

এরপর হযরত মাখদুম (র) হুজরা থেকে বেরিয়ে হুজরার প্রাঙ্গণে আসেন এবং তাকিয়ার (বালিশ) আশ্রয় নেন। অল্পক্ষণ পরেই হস্ত মুবারক বাড়িয়ে দিলেন যেন তিনি মুসাফাহা করতে চাচ্ছেন। তিনি কাযী শামসুদ্দীনের হাত নিজের হাতের ভেতর টেনে নিলেন এবং অনেকক্ষণ ধরে রাখলেন। অতঃপর তার হাত ছেড়ে দিলেন। খাদেমদের বিদায় পালা তার থেকেই শুরু হল। অতঃপর কাযী যাহিদের হাত ধরে নিজের পবিত্র বুকের ওপর স্থাপন করলেন এবং বললেন : আমরা তো সেই—আমরা তো সেই। অতঃপর

বললেন, আমরাই সেই দিওয়ানা, আমরাই সেই পাগল। এরপর বিনয়-নম্রতা ও দীনতার একটা বিশেষ স্বরূপ প্রকাশ পেল এবং তিনি বললেন, না, বরং আমরা তো সেই দিওয়ানােদের জুতার ধূলি। অতঃপর প্রতিটি উপস্থিত ব্যক্তিকে ইশারা করলেন এবং প্রত্যেকের হাতে ও দাড়িতে চুমো দিলেন, আল্লাহ তা'আলার রহমত ও মাগফিরাতেের আশাবাদী হবার জন্য তাকীদ করলেন এবং বুলন্দ আওয়াজে পড়লেন :

لَا تَقْنَطُوا مِنْ رَحْمَةِ اللَّهِ - إِنَّ اللَّهَ يَغْفِرُ الذُّنُوبَ جَمِيعًا -

“তোমরা আল্লাহর রহমত থেকে নিরাশ হয়ে না। নিশ্চয় আল্লাহ সমস্ত গুনাহ মাফ করবেন।” অতঃপর এই কবিতাটি আবৃত্তি করলেন :

خدایا رحمتت در یائے عام است

از انجا قطرئے برما تمام است

এরপর উপস্থিত ব্যক্তিবর্গের দিকে মুখ ফিরিয়ে বললেন : কাল যদি তোমাদের প্রশ্ন করা হয় তাহলে বলবে—‘লা তাকনাতু মির-রাহমাতিল্লাহ’ নিয়ে এসেছ। যদি আমাকেও বলা হয়—তাহলে আমিও তাই বলব। এরপর কলেমার শাহাদাত বুলন্দ আওয়াজ পড়তে শুরু করলেন :

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ -

অতঃপর নিম্নোক্ত দু'আও পড়লেন :

رَضِيتُ بِاللَّهِ رَبًّا وَبِالْإِسْلَامِ دِينًا وَبِمُحَمَّدٍ صَلَّى اللَّهُ عَلَيْهِ وَسَلَّمَ نَبِيًّا وَبِالْقُرْآنِ إِمَامًا وَبِالْكَعْبَةِ قِبْلَةً وَبِالْمُؤْمِنِينَ إِخْوَانًا وَبِالْجَنَّةِ ثَوَابًا وَبِالنَّارِ عَذَابًا -

অর্থাৎ আমি আল্লাহ পাককে আমার ‘রব’ হিসেবে, ইসলামকে দীন (জীবনব্যবস্থা ও জীবন দর্শন) হিসেবে, মুহাম্মাদ (স)-কে নবী, কুরআন পাককে ইমাম, পবিত্র কা'বাকে কিবলা, মু'মিনদেরকে ভাই, জান্নাতকে আল্লাহদত্ত পুরস্কার এবং জাহান্নামকে আল্লাহর শাস্তি হিসেবে পরিপূর্ণ সন্তুষ্টি ও ভক্তি সহকারে মেনে নিচ্ছি।

এরপর অযোধ্যার মাওলানা তকীউদ্দীনের দিকে লক্ষ্য করে নিজের হাত বাড়িয়ে দিলেন এবং বললেন, পরিণাম ও কল্যাণ শুভ হোক। অতঃপর পবিত্র মুখে ডাক দিলেন, আমু! মওলানা আমু ছিলেন হাজার অভ্যন্তরে। তিনি ডাক শোনামাত্রই—‘এই যে আমি’ বলে দৌড়ে আসলেন। তিনি তার হাত ধরলেন এবং তার পরশ নিজের চেহারা মুবারকের ওপর বুলাতে লাগলেন। তিনি বলতে লাগলেন, তুমি আমার অনেক খেদমত করেছ। আমি তোমাকে পরিত্যাগ করব না। সম্পর্ক গভীর ও গাঢ় রাখ, তাহলে আমরা একত্রে সহাবস্থান করতে পারব। যদি কিয়ামতের দিন জিজ্ঞাসা করা হয়—কি এনেছ? তবে বলবে :

لَا تَنْظُرُوا مِن رَّحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا۔

যদি আমাকেও জিজ্ঞাসা করা হয়, তাহলে আমিও এই জবাবই দেব। বন্ধু-বান্ধবদের বল, ঘনিষ্ঠ ও বন্ধুত্বপূর্ণ সম্পর্ক বজায় রাখতে। আমার সম্মান ও মর্যাদা যদি সেদিন রক্ষা পায় (অর্থাৎ জাহান্নামের হাত থেকে বেঁচে যদি জান্নাত লোকের অধিকারী হবার সার্টিফিকেট লাভ করতে পারি) তবে আমি কাউকেই পরিত্যাগ করব না। এরপর হেলাল ও ‘আকীকের দিকে লক্ষ্য করে বললেন, তোমরা আমাকে অভ্যন্ত খুশি-খোশালীতে রেখেছ, আমার বিরাট খেদমত করেছ। আমি যেমনটি তোমাদের ওপর খুশি ছিলাম—তোমরাও তেমনি খুশি হবে এবং খুশী থাকবে সর্বদাই। তিনবার স্বীয় হাত মিঞা হেলালের পিঠের ওপর রাখলেন এবং বললেন, সফল ও ভাগ্যবান থাকবে। সে সময় তাঁর দু’খানা পা-ই মিঞা হেলালের কোলে ছিল আর তার ওপর তিনি বড়ই মেহেরবান ছিলেন।

ইতোমধ্যে মাওলানা শিহাবুদ্দীন নাগেরী আসেন। তিনি কয়েকবার তাঁর মাথা, মুখমণ্ডল, দাড়ি ও পাগড়ীতে চুমো খেলেন। তিনি আহ! আহ! সূচক আনন্দ-ধ্বনি করছিলেন আর ‘আলহামদু লিল্লাহ’ ‘আলহামদু লিল্লাহ’ বলে যাচ্ছিলেন। তিনি হাত নামিয়ে নেন এবং দরুদ শরীফ পড়তে থাকেন। মাওলানা শিহাবুদ্দীনের নজরও ছিল হযরত মাখদুম (র)-এর চেহারা মুবারকের ওপর এবং তিনিও দরুদ শরীফ পড়ছিলেন। এরপর তিনি মাওলানা শিহাবুদ্দীন-এর ভাগিনা খাজা মুঈন-এর নাম নেন এবং বলেন, আমার বিরাট খেদমত করেছে আর আমার সঙ্গে তার ঐক্যও ছিল। অত্যন্ত সুন্দরভাবে সে আমার সাহচর্যে কাটিয়েছে। তার পরিণামও শুভ ও কল্যাণময় হোক। এই সময় মাওলানা শিহাবুদ্দীন, মওলানা মুজাফফর বলখী ও

মাওলানা নাসিরুদ্দীন জৌনপুরীর নাম নেন এবং বলেন, এ দু'জনের সম্বন্ধে আপনার বক্তব্য কি? তিনি অত্যন্ত খুশিভরে মুচকি হেসে এবং নিজের সকল অঙ্গুলী দ্বারা সিনা মুবারকের দিকে ইশারা করে বললেন, মুজাফফর আমার প্রাণ-প্রতীম, আমার প্রিয়; মাওলানা নাসিরুদ্দীনও ঠিক তেমনিই। খিলাফত ও ইকতিদা গ্রহণের জন্য যে সব শর্ত ও গুণ অপরিহার্য, তা এ দু'জনের মধ্যে পুরোমাত্রায় বিদ্যমান। আমি যা কিছু বলেছি তা এই গরীবদেরকে সৃষ্টির ক্ষেত্রে থেকে হিফায়ত করবার স্বার্থেই বলেছি।^১ এই সুযোগে মাওলানা শিহাবুদ্দীন কিছু পেশ করে আরম্ভ করলেন, মাখদূম। এটি কবুল করুন। তিনি বললেন, আমি কবুল করলাম। এটা কি, আমি তো তোমার সারা ঘর-বাড়িই কবুল করে নিয়েছি। এরপর তাদেরকে টুগী প্রদান করা হল। তারা পুনরুপি বায়'আত হবার দরখাস্ত পেশ করলে তিনি তা কবুল করেন।

এইসব চলকালীন কাযী মীনা হযরত মাখদূম (র)-এর খেদমতে এসে হাযির হলেন। মিঞা হেলাল পরিচয় করিয়ে দিলেন এবং আরম্ভ করলেন, ইনি কাযী মীনা। কাযী মীনা! কাযী মীনা! কয়েকবার উচ্চারণ করলেন। কাযী মীনা বললেন, আমি আপনার খেদমতে হাযির আছি এবং হাতে চুমো দিলেন। তিনি তার হাত স্বীয় চেহারা মুবারকে, দাড়িতে ও গণ্ডদেশের ওপর বুলিয়ে নিলেন এবং বললেন, তোমার ওপর আল্লাহর রহমত হোক। ঈমানের সঙ্গে থাকো আর ঈমানের সঙ্গেই দুনিয়া থেকে বিদায় নাও। স্নেহের সুরে এও বললেন, মীনা তো আমাদের। ইতোমধ্যে মাওলানা ইবরাহীম আসলেন। হযরত মাখদূম (র) তার দাড়িতে স্বীয় ডান হাতের পরশ বুলিয়ে দিলেন এবং বললেন, তুমি আমার অতি উত্তম খেদমত করেছ এবং আমায় পরিপূর্ণ সজ্জ দান করেছ। সম্মান ও মর্যাদার সঙ্গে থাকবে। মাওলানা ইবরাহীম আরম্ভ করলেন, মাখদূম!^২ আপনি কি আমাতে সত্ত্বষ্ট ও রাযী আছেন? বললেন, হ্যাঁ। আমি তোমাদের সবার ওপর সত্ত্বষ্ট ও রাযী আছি। তোমাদেরও আমার ওপর রাযী হওয়া দরকার। যা কিছু আছে সবই আমার পক্ষ থেকে। এরপর কাযী শামসুদ্দীনের ভাই কাযী নূরুদ্দীন হাযির হন। তিনি কাযী নূরুদ্দীনের হাত নিজের হাতের মধ্যে টেনে নেন এবং অত্যন্ত স্নেহ ও প্রীতির সঙ্গে তার দাঁড়ি, চেহারা, গণ্ডদেশ ও হাতের ওপর বার

১. এখানে জানা যায়নি কোন ঘটনার প্রতি এখানে ইঙ্গিত করা হয়েছে।

২. এখানে মুদ্রিত এবং হাতে লেখা কপিতে صبح البياض শব্দটি রয়েছে। সম্ভবত এর অর্থ হবে আজ ভোরবেলা।

কয়েক চুমো দেন। আনন্দের সঙ্গে তিনি আহ্! আহ্! করে যাচ্ছিলেন। তিনি তাকে বললেন, তুমি আমাদের সাহচর্যে খুব থেকেছ আর আমাদের খেদমতও করেছ খুব। আল্লাহ্ চাহে তো কাল (বেহেশতে) একই জায়গায় আমরা থাকব। এরপর মাওলানা নিজামুদ্দীন কোহী হাযির হন। তিনি টুপী মুবারক নিজের মাথা থেকে নামিয়ে তাকে দান করেন এবং উত্তম ফল লাভের জন্য দু'আ করলেন। বললেন, আল্লাহ্ তা'আলা তোমাকে মনুষ্যিলে মকসূদে পৌঁছিয়ে দিন। অতঃপর উপস্থিত ব্যক্তিবর্গের দিকে লক্ষ্য করে বললেন, বন্ধুগণ! যাও, স্বীয় দীন ও ঈমানের উপর কায়ম ও মশগুল থাক।

এরপর লেখক যঈন বদর 'আরাবী তাঁর হস্ত মুবারকে চুমো দিলেন। স্বীয় চক্ষু, মাথা ও শরীরে তার পরশ বুলিয়ে নিলেন। হযরত মাখদূম (র) জিজ্ঞাসা করলেন, কে? আমি আরয় করলাম, আপনার আস্তানার ভিখারী আপনার দৃষ্টি আকর্ষণ করছে এবং আরয় করছে যে, তাকে নতুনভাবে আপনার গোলামীতে কবুল করা হোক। তিনি প্রত্যুত্তরে বললেন, যাও! তোমাকেও কবুল করলাম। তোমাদের ঘর ও পরিবারবর্গের সকল সদস্যকেও কবুল করলাম। ঘনিষ্ঠ ও সুসম্পর্ক কায়ম রেখ। যদি আমার ইয্যত-আবরু রক্ষা পায়, তাহলে আমি কাউকে পরিত্যাগ করবার বান্দা নই। আমি আরয় করলাম, আশা তো অনেকখানিই।

কাযী শামসুদ্দীন আসলেন এবং হযরত (র)-এর পার্শ্বে উপবেশন করলেন। মাওলানা শিহাবুদ্দীন, হেলাল ও 'আকীক আরয় করল যে, মাখদূম! কাযী শামসুদ্দীন সম্পর্কে আপনার কী হুকুম? তিনি বললেন, কাযী শামসুদ্দীন সম্পর্কে আর কী বলব। কাযী শামসুদ্দীন তো আমার সন্তান, কয়েক জায়গায় তাকে আমি সন্তান লিখেছি। চিঠিপত্রে তাকে আমি আমার ভাইও লিখেছি। তার জ্ঞানবত্তা ও দরবেশী জীবন প্রকাশের এজায়ত হয়ে গেছে। তারই খাতিরে এত কিছু বলা ও লেখার সুযোগ এল। তা না হলে এসব কে লিখত? এরপর ভাই ও বিশিষ্ট খাদেম শায়খ খলীলউদ্দীন, যিনি পাশেই বসেছিলেন, তাঁর হাত ধরলেন। হযরত মাখদূম (র) তার দিকে ফিরলেন এবং বললেন, খলীল! সুসম্পর্ক কায়ম রেখ। তোমাকে 'উলামা ও দরবেশরা ছাড়বে না। মালিক নিজামুদ্দীন খাজা মালিক আসবে। তাকে আমার সালাম পৌঁছে দিও। আমার তরফ থেকে ওয়রখাহী করবে এবং বলবে যে, আমি তার প্রতি সন্তুষ্ট, সন্তুষ্টচিত্তে যাচ্ছি। তোমরাও আমার প্রতি সন্তুষ্ট থেকে। আরও বললেন : যতদিন পর্যন্ত মালিক নিজামুদ্দীন আছে, তোমাকে ছাড়বে না।

শায়খ খলীলউদ্দীন অভ্যস্ত অভিভূত ছিলেন। চোখে ছিল তাঁর অশ্রুর বন্যা। হযরত মাখদূম (র) যখন তাঁকে অন্তর-মন বিধ্বস্ত অবস্থায় দেখলেন, তখন

অত্যন্ত স্নেহভরে বললেন, সম্পর্ক বজায় রেখো আর অন্তর-মনকে শক্ত কর। এরপর তিনি বললেন, কে? প্রত্যুত্তরে হেলাল আরয করল, মাওলানা মাহমুদ সূফী। এতে তিনি গভীর আফসোস ও পরিতাপের সাথে বললেন, বেচারী বড় গরীব। তার জন্য আমার বড় চিন্তা, বেচারার কেউ নেই। এরপর তিনি তার শুভ পরিণতির জন্য দু'আ করলেন। এরপর খেদমতে হাযির হলেন কাযী খান খলীল। হযরত মাখদূম (র) বললেন, বেচারী কাযী আমার বহু পুরানো দোস্ত, -আমার সাহচর্যে বহু দিন কাটিয়েছে। আল্লাহ পাক তাকে উত্তম বিনিময় দান করুন এবং তার পরিণতি শুভ হোক। তার সন্তানও আমাদের দোস্ত। সবার পরিণাম ফলই শুভ ও কল্যাণবহু হোক এবং আল্লাহ তা'আলা দোযখের আগুন থেকে রেহাই দিন।

এরপর খাজা মু'ইয়্যুদ্দীন হযরত মাখদূম (র)-এর খেদমতে তশরীফ রাখেন। তিনি তারও কল্যাণ ও শুভ কামনা করলেন। অতঃপর মাওলানা ফযলুল্লাহ কদমবুসী করেন। ভালো, ভালো। আল্লাহ পরিণাম ফল শুভ করুন, বললেন। হযরত মাখদূম (র)-এর ফতুহ নামক বাবুর্চি কাঁদতে কাঁদতে আসল এবং পায়ের উপর গিয়ে পড়ল। তিনি বললেন, বেচারী ফতুহ যা কিছু এবং যেমনটি ছিল, আমারই ছিল। তার জন্যও কল্যাণকর দু'আ করলেন। এরপর মাওলানা শিহাবুদ্দীন কদমবুসী করার সৌভাগ্য লাভ করেন। হেলাল এই বলে পরিচয় করিয়ে দিলেন যে, ইনি হাজী রুকনউদ্দীনের ভাই মাওলানা শিহাবুদ্দীন। তিনি তাঁরও শুভ পরিণতির জন্য দু'আ করলেন এবং বললেন, ঈমান তাজা রেখ, আর আল্লাহর রহমতের প্রত্যাশী হয়ে পড়বে :

لَا تَقْنَطُوا مِنْ رَحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا -

কিছুক্ষণ পর যোহরের কাছাকাছি সময়ে সাযি়দ জহীর উদ্দীন স্বীয় চাচাতো ভাইকে সাথে নিয়ে হযরত মাখদূম (র)-এর খেদমতে হাযির হন। তিনি তাকে একেবারে কোলের ভিতর টেনে নিলেন এবং অত্যন্ত স্নেহ ও করুণাভরে বললেন, আঘি যে পরিণাম! পরিণাম! বলছিলাম-তা এই। এরপর তিনবার তাকে কাছে টেনে নিলেন এবং শেষবার এই আয়াত পড়লেন :

لَا تَقْنَطُوا مِنْ رَحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا -

তিনি উপস্থিত ব্যক্তিবর্গকে আল্লাহ তাআলার রহমত ও মাগফিরাতের প্রত্যাশী ও প্রার্থী করে তুললেন। এরপর সেখান থেকে উঠলেন এবং

হুজুরাতে তশরীফ নিয়ে গেলেন। সায্যিদ জহীরউদ্দীনের সঙ্গে বেশ কিছুক্ষণ বসলেন এবং অনেকক্ষণ ধরে তার সাথে আলাপও করলেন। এরপর খলী-লৈর ভাই মুনাওয়ার আরয পেশ করেন যে, আমি আপনার হাতে তওবাহ করতে ও বায়'আত হতে চাই। তিনি তাকে 'এস' বলে ডেকে নিলেন এবং তার দিকে হাত বাড়িয়ে দিয়ে তওবাহ ও বায়'আত হওয়ার সুযোগ দানে ধন্য করলেন। অতঃপর একটি কাঁচি চেয়ে পাঠালেন। কাঁচি দিয়ে তাঁর চুল কাটালেন ও টুপি পরিয়ে দিলেন এবং বললেন, যাও দু' রাকাত সালাত আদায় করে এসো। ঠিক এমনভাবে তাঁর পুত্রকেও তিনি বায়'আত করেন এবং তার প্রতিও ঐ একই আদেশ দেন।

ইতিমধ্যেই মাওলানা নিজামুদ্দীন মুফতীর ভাই কাযী 'আলম আহমদ মুফতী যিনি ছিলেন বিশিষ্ট মুরীদবর্গের অন্যতম-আসেন এবং অত্যন্ত আদবের সঙ্গে হযরত মাখদুম মুনারী (র)-এর সামনে উপবেশন করেন। এরই মাঝে মালিক হুসামুদ্দীনের ভ্রাতা আমীর শিহাবুদ্দীন স্বীয় পুত্রসহ তাঁর খেদমতে হাযির হন এবং এসে উপবেশন করেন। হযরত মুনারী (র)-এর পবিত্র দৃষ্টি তার প্রতি পতিত হতেই বললেন, কুরআনুল করীমের পাঁচটি আয়াত তিলাওয়াত করতে পারবে? উপস্থিত ব্যক্তিবর্গ আরয করল-ছেলে এখনও ছোট। সায্যিদ জহীর উদ্দীন মুফতীর পুত্রও হাযির ছিল। মিয়া হেলাল যখন দেখলেন এই মুহূর্তে তাঁর কালামে রব্বানী শোনার আগ্রহ খুব বেশি, তিনি তক্ষুণি ছেলেটিকে ডেকে পাঠালেন এবং পাঁচটি আয়াত তিলাওয়াত করে শোনাতে নির্দেশ দিলেন। সায্যিদ জহীরুদ্দীনও যখন অনুভব করলেন মাখদুম মুনারীর (র) তবীয়ত মুবারক কুরআন মজীদ শুনতে খুবই আগ্রহী, তখন স্বীয় পুত্রকে কুরআন মজীদের পাঁচটি আয়াত পড়তে ইশারা করলেন। ছেলেটি সন্মুখে এসে অত্যন্ত আদবের সঙ্গে উপবেশন করল। সে সূরা আল-ফাতহ এর শেষ রুকূর আয়াত *محمد رسول الله والذين معه* থেকে তিলাওয়াত শুরু করল। হযরত মাখদুম (র) তাকিয়ায় হেলাল দিয়ে আরাম করছিলেন, উঠে বসলেন এবং চিরন্তন প্রথা মুতাবিক অত্যন্ত আদবের সঙ্গে দু'হাঁটু মিলিয়ে বসে গেলেন আর গভীর মনোনিবেশ সহকারে কুরআন মজীদ শুনতে লাগলেন। ছেলেটি যখন *ليغيظ بهم الكفار* পর্যন্ত গিয়ে পৌঁছল তখন সে ভীত-সন্ত্রস্ত হয়ে গেল। ফলে তার পক্ষে সামনে অগ্রসর হওয়া অসম্ভব হয়ে দাঁড়াল। তিনি তাকে পরবর্তী শব্দগুলি শিখিয়ে দিলেন। ছেলেটি যখন কিরাত খতম করল তখন তিনি বললেন, খুবই ভাল পড়ে আর

মাখরাজও আদায় করে ভাল, কিন্তু ভয় পেয়ে যায়। এ সময় তিনি একজন পশ্চিমা দরবেশের কথা উত্থাপন করলেন। ঐ দরবেশের তব্বিয়ত যখন ভাল থাকত তখন তিনি কুরআন শরীফ শুনতে খুবই আগ্রহী হয়ে উঠতেন। আর যখন তার তব্বিয়ত ভাল যেত না-তখন তিনি কুরআন শুনতে আগ্রহী হতেন না।

এরপর কাযী 'আলমের প্রতি শরবত ও পান দেবার হুকুম হল। তিনি ওয়রখাহী করলেন (এতক্ষণে না দিতে পারায়)। তিনি শরীর থেকে পিরহান (জামা) খুলতে চাইলেন এবং চাইলেন ওয়ু সম্পাদনের জন্য পানি। আস্তিন গুটিয়ে তিনি মিসওয়াক চাইলেন, সরবে বিসমিল্লাহ পড়লেন এবং ওয়ু শুরু করলেন। প্রতিটি নতুন অঙ্গ-প্রত্যঙ্গ ধৌত করবার ক্ষেত্রে যে পৃথক পৃথক দু'আ আছে তা পড়লেন। কনুই পর্যন্ত দুই হাত ধৌত করলেন, কিন্তু মুখ ধৌত করতে ভুলে গেলেন। শায়খ ফরীদুদ্দীন (রা.) স্মরণ করিয়ে দিলেন যে, মুখমণ্ডল ধোয়া বাকী রয়ে গেছে। তখন তিনি প্রথম থেকেই ওয়ু শুরু করলেন এবং বিসমিল্লাহ থেকে শুরু করে যেখানে যে দু'আ পড়তে হয় অভ্যস্ত সতর্কতা ও মনোযোগের সঙ্গে তা পড়লেন। মুফতী সৈয়দ জহীর উদ্দীন (রা.) এবং হাযিরানে মজলিস দেখছিলেন আর বিস্ময় প্রকাশ করছিলেন এমতাবস্থায়ও তাঁর এতখানি সতর্কতা ও অভিনিবেশ প্রত্যক্ষ করে। কাযী যাহিদ পা ধৌত করার ব্যাপারে সাহায্য করতে চাইলেন। হযরত মাখদূম (রা.) তাকে থামিয়ে দিলেন এবং বললেন, দাঁড়িয়ে থাকো। এর পর তিনি নিজে নিজেই শেষতক ওয়ু করলেন এবং পরিপূর্ণভাবে ওয়ু সমাপনের পরে চিরুণী চেয়ে পাঠালেন, দাঁড়ি আঁচড়ালেন। এরপর মুসান্না (জায়নামায) চাইলেন এবং নামায শুরু করলেন। দু'রাকাত পড়ে সালাম ফেরালেন এবং ক্লাস্ত ও অবসন্ন হয়ে পড়ার কারণে কিছুক্ষণ আরাম করলেন। শায়খ খলীলউদ্দীন আরয করলেন, হযরত! শান্তির সঙ্গে হুজরায় তশরীফ নিয়ে চলুন, ঠাণ্ডা এসে গেছে। তিনি দাঁড়িয়ে গেলেন, জুতা পরলেন এবং হুজরার দিকে চললেন। মাখদূম মুনায়রী (র)-এর একটি হাত ছিল মাওলানা যাহিদ-এর কাঁধে আর অপরটি ছিল মওলানা শিহাবউদ্দীনের কাঁধে। হুজরাতে তিনি বাঘের চামড়ার ওপর শুয়ে পড়লেন। মিঞা মুনাওয়ার তওবাহুর বায়'আতের জন্য দরখাস্ত পেশ করলেন। তিনি তার দিকে হাত বাড়িয়ে দিলেন এবং তাকেও তওবাহ ও বায়'আত দ্বারা ধন্য করলেন। তার মাথার উভয় পার্শ্বের চুলই কিছু কিছু কেটে ছেটে দিলেন, টুপি পরিয়ে দিলেন

এবং বললেন, যাও। দু'রাকাত সালাত আদায় কর। আর এটাই ছিল শেষ তওবাহ ও আখেরী বায়'আত যা তিনি করিয়েছিলেন। এখানেই একটি স্ত্রীলোক আপন দুই পুত্রসহ এসে হাযির হয় ও কদমবুসী লাভে ধন্য হয়। 'আসরের সালাত আদায়ের পর মাগরিবের কাছাকাছি সময়ে খাদেমকুল আরয করল যে, হযরত! চারপায়ীর ওপর আরাম করুন। মাখদুম মুনায়রী (র) চারপায়ীর ওপর তশরীফ রাখেন এবং আরাম করেন।

মাগরিবের সালাত আদায়ের পর শায়খ জলীল উদ্দীন, কাযী শামসুদ্দীন, মাওলানা শিহাবুদ্দীন, কাযী নূরুদ্দীন, হেলাল, 'আকীক ও অন্যান্য বন্ধু-বান্ধব এবং খাদেমবর্গ যারা খেদমতে নিয়োজিত ছিল-চারপায়ীর চারিপার্শ্বে উপবিষ্ট ছিলেন। হযরত মাখদুম (র) কিছু বিলম্বে বুলন্দ আওয়াজে- 'বিসমিল্লাহ' বলা শুরু করলেন। কয়েকবার 'বিসমিল্লাহ' বলার পর জোরে জোরে পড়লেন :

لَا إِلَهَ إِلَّا أَنْتَ سُبْحَانَكَ إِنِّي كُنْتُ مِنَ الظَّالِمِينَ -

এরপর উচ্চৈশ্বরে 'বিসমিল্লাহির রাহমানির রাহীম' পড়লেন। অতঃপর কালেমায়ে শাহাদাত পড়লেন :

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ -

এরপর বললেন :

لَا جَوْلَ وَلَا قُوَّةَ إِلَّا بِاللَّهِ الْعَلِيِّ الْعَظِيمِ -

বেশ কিছুক্ষণ ধরে কালেমায়ে শাহাদাত আওড়াতে থাকলেন। অতঃপর কয়েকবার বললেন :

بِسْمِ اللَّهِ الرَّحْمَنِ الرَّحِيمِ - لَا إِلَهَ إِلَّا اللَّهُ مُحَمَّدٌ رَسُولُ

اللَّهِ -

এরপর অভ্যন্ত অভিনিবেশ সহকারে এবং অন্তরের সমস্ত শক্তি 'মুহাম্মাদ' প্রয়োগে ও গভীর আগ্রহ-উদ্দীপনা সহকারে 'মুহাম্মাদ' 'মুহাম্মাদ' এবং اللهم صل على محمد وعلى آل محمد الخ শেষ পর্যন্ত পড়লেন। অতঃপর নিম্নোদ্ধৃত আয়াত শেষ তক, رَضِيْتُ بِاللَّهِ رَبًّا وَبِالْإِسْلَامِ دِينًا وَبِمُحَمَّدٍ صَلَّى اللَّهُ عَلَيْهِ وَ

পড়ে তিনবার কালেমায়ে তৈয়েবা নির্দিষ্ট নিয়মে পড়লেন। অতঃপর আসমানের দিকে হাত উঁচু করে তুলে ধরলেন এবং গভীর আত্মহ ও মনোযোগ সহকারে, যেমন কেউ দু'আ' ও মুনাজাত করে, বললেন :

اللهم اصلح امة محمد صلعم اللهم ارحم امة محمد صلعم
اللهم اغفر لامة محمد صلعم اللهم تجا وز عن امة محمد صلعم
اللهم اغث امة محمد صلعم اللهم انصر من نصر دين محمد
صلعم اللهم فرج عن امة محمد صلعم فرجا عاجلا اللهم اخذل
من خذل دين محمد صلعم برحمتك يا ارحم الراحمين -

অর্থাৎ “হে আল্লাহ! উম্মতে মুহাম্মদীকে সৎশোধন করো। হে আল্লাহ! মুহাম্মদ (স)-এর উম্মতের ওপর রহম করো। হে আল্লাহ! উম্মতে মুহাম্মদীকে মাফ করে দাও। হে আল্লাহ! উম্মতে মুহাম্মদীর ওপর থেকে বালা ও মুসীবত সরিয়ে নাও। হে আল্লাহ! উম্মতে মুহাম্মদীকে আশ্রয় দাও। হে আল্লাহ! মুহাম্মদ (স)-এর দীনকে যে সাহায্য করে তুমি তাকে সাহায্য কর। উম্মতে মুহাম্মদীর ওপর থেকে বিপদ-আপদ সত্বর দূর করে দাও। হে আল্লাহ! যারা দীনে মুহাম্মদীকে অপমানিত করতে চায়, তাদের তুমি অপমানিত ও লাঞ্ছিত করো। আর এ কেবল তোমারই রহমতে সম্ভব। কেননা তুমিই সবচেয়ে বড় রহমকার।” এই শব্দগুলো উচ্চারণের সাথে সাথেই আওয়াজ বন্ধ হয়ে গেল। সে সময় তাঁর যবান মুবারকে নিম্নোক্ত শব্দসমষ্টি উচ্চারিত হচ্ছিল :

لَا خَوْفٌ عَلَيْهِمْ وَلَا هُمْ يَحْزَنُونَ - لَا إِلَهَ إِلَّا اللَّهُ

এরপর একবার ‘বিসমিল্লাহির রাহমানির রাহীম’ বলেন এবং এরই সঙ্গে আর প্রাণবায়ু বেরিয়ে অনন্তলোকে প্রস্থান করল। তারিখটা ছিল ৭৮২ হিজরীর ৬ই শওয়াল, রোজ বৃহস্পতিবার ‘ইশার সালাতের ওয়াক্ত। পরে বৃহস্পতিবার দিনে চাশতের নামাযের সময় হযরত মাখদুম (র)-কে দাফন করা হয়।^১

সালাতে জানাযা ও দাফন.

সালাতে জানাযা হযরত শায়খ আশরাফ জাহাঙ্গীর সিমনানী (রা.) পড়ান যিনি মাখদুম মুনাযরী (র)-এর ইত্তিকালের পর পৌঁছেছিলেন। লাভাইফে

১. শেখ যঈন বদর ‘আরাবী (র) কৃত “ওফাতনামা” পুস্তিকা, ১৩২৯ হি. আশ্বায় মুদিত।

আশরাফী' গ্রন্থে হযরত মাখদুম সাহেব (র)-এর স্বয়ং নিজের ওসীয়াত ও ভবিষ্যদ্বাণী ব্যক্ত করা এবং হযরত শায়খ আশরাফ জাহাঙ্গীর (র)-এর সেখানে পৌঁছানো ও ওসীয়াত মুতাবিক জানাযা পড়ানোর ঘটনা বিস্তারিতভাবে বর্ণিত আছে। এথেকে অবগত হওয়া যায় যে, মাখদুম সাহেব (র)-এর ওসীয়াত ও তথ্য মুতাবিক জানাযা তৈরি করে রাস্তার ওপর রেখে দেওয়া হয়েছিল এবং তাঁর অপেক্ষা চলছিল। শায়খ আশরাফ জাহাঙ্গীর (র) দিল্লী থেকে বাংলার চিশতিয়া সিলসিলার মশহুর বুয়র্গ হযরত শায়খ 'আলাউদ্দীন 'আলাউল হক লাহোরী পাঞ্জাবী (রা.)-এর খেদমতে তশরীফ নিতে যাচ্ছিলেন। পথিমধ্যে বিহার শরীফে ঠিক সেই সময় পৌঁছান যখন হযরত মাখদুম (রা.)-এর জানাযা তৈরি করে রাস্তার ওপর রেখে দেওয়া হয়েছিল এবং ইমামের জন্য অপেক্ষা করা হচ্ছিল। তিনি জানাযা পড়ান এবং নিজ হাতে কবরে গুঁইয়ে দেন।^২

হযরত মাখদুম (র)-এর কবর কাঁচা এবং তার ওপর কোন গম্বুজ নেই। সূর সালতানাভের যুগে তার আশে-পাশের ঘরবাড়ি, মসজিদ, হাউজ ও ফোয়ারা নির্মিত হয়। কিন্তু যেহেতু হযরত মাখদুম রাসূল আকরাম (স)-এর সুলত পরিপূর্ণভাবে অনুসরণের ক্ষেত্রে অভ্যন্ত সতর্ক ও মনোযোগী ছিলেন, সেটা খেয়াল করে তাঁর কবর যে অবস্থায় ছিল সে অবস্থায়ই রেখে দেওয়া হয়।^৩

সন্তান-সন্ততি ও বংশধর

'সীরাতুশ-শরফ' প্রণেতা লিখছেন :

মাখদুম (রা.)-এর ঔরসে সন্তান-সন্ততির ধারা বর্তমানে একজন পৌত্রীর মাধ্যমে অব্যাহত আছে। তাঁর সাহেবযাদা শাহ যাকীউদ্দীন পিতার জীবদ্দশায়ই বারিকা নামে একটি কন্যা রেখে ইহলোক ত্যাগ করেন। এই কন্যার শাদী মুবারক সায়্যিদ ওয়াহীদুদ্দীন রিবতীর ভাগিনা শায়খ নাজীবুদ্দীন ফিরদৌসী (রা.)-এর সাথে সুসম্পন্ন হয়। এদের দাম্পত্য জীবনে তোহরা নামীয় একটি কন্যা জনপ্রহণ করে যার বিবাহ হয় শিহাবুদ্দীন 'আলভী তুসীর সঙ্গে। শায়খ 'আলীয়ুদ্দীন ও শায়খ ইমামুদ্দীন নামে এদের দুটি পুত্র সন্তান

১. লাভায়েফে আশরাফী, ১২৯৫ হি. দিল্লী থেকে মুদ্রিত, ৯৪ পৃ.।

২. লাভাইফে আশরাফী হযরত নিজামুদ্দীন গামনী, যিনি নিজাম হাজী গরীবুল গামনী নামে পরিচিত-এর কৃত, যিনি হযরত আশরাফ জাহাঙ্গীর (র)-এর মুরীদ ছিলেন এবং তাঁর সাহচর্যে তিরিশ বছর কাটান। এটা হযরত আশরাফ জাহাঙ্গীর (রা.)-এর জীবন-চরিতও বটে, তেমনি তাঁর শিক্ষামালার সংকলনও বটে।

৩. সীরাতুশ-শরফ।

নওশা-ই-তাওহীদ খিলাফত উৎসাদন করেন-তখন দরগাহর খাদেমগণ হযরত বারিকার সন্তানদের নিয়ে এসে খানকাহর খিলাফতের পদে সমাসীন করেন। এঁদের মধ্যে প্রথম বুয়র্গ যিনি গদীনশীন হন, তিনি ছিলেন শাহ বীখ।^১

মাখদুম সাহেব (র)-এর ভাইদের থেকে বংশীয় ধারা অব্যাহত থাকে। তাঁদের বংশধর অদ্যাবধি মুনায়র ও বিহার প্রদেশে বিদ্যমান।

বিশিষ্ট খলীফা এবং মুরীদবর্গ

“সীরাতুশ্-শরফ” প্রণেতা লিখছেন :

মাখদুম (রা.)-এর মুরীদদের তালিকা অত্যন্ত দীর্ঘ। নওশা-ই-তাওহীদ এই সংখ্যা লক্ষাধিক বলেন। এই সংখ্যাকে অতিরঞ্জিত বললে বোধহয় ভুল বলা হবে না। তবে এতটুকু বলা যায় যে, এ সংখ্যা নিশ্চিতই অধিক। আর এর ভেতর হিদায়াত-প্রার্থী ছাত্রদের সংখ্যাও অন্তর্ভুক্ত। হযরত মাখদুম (রা.)-এর নির্বাচিত ছাত্রদের তালিকা নিম্নরূপ :

মাওলানা মুজাফফর বলখী, মালিকযাদা ফযলুল্লাহ, মাওলানা নাসীরুদ্দীন জৌনপুরী, মাওলানা নিজামুদ্দীন দর্দনহিসারী, শায়খ ‘উমর, কুতুবুদ্দীন, ফখরুদ্দীন, শায়খ সুলায়মান খাজগী, খাজা আহমদ, ইমাম তাজুদ্দীন, হুসায়ন মু‘ইয্য বলখী যিনি নওশা-ই-তাওহীদ নামে পরিচিত, মাওলানা কামরুদ্দীন, মাওলানা আবুল কাসিম, মাওলানা আবুল হাসান, কাযী শরফুদ্দীন, কাযী মিনহাযুদ্দীন দর্দনহিসারী, মাওলানা তকীউদ্দীন আওধী, মাওলানা শিহাবুদ্দীন নাগোরী, শায়খ খলীলুদ্দীন, মাওলানা রফী‘উদ্দীন, মাওলানা আদম হাফিয, যঈন বদর ‘আরাবী, কাযী সদরউদ্দীন, শামসুদ্দীন খাওয়ারিয়মী^২, শায়খ মু‘ইয্যুদ্দীন, মাওলানা করীমুদ্দীন, মাওলানা খাজা হামীদউদ্দীন, সওদাগর শায়খ মুবারক, যাকারিয়া গরীব, কাযী খানা

১. সীরাতুশ্-শরফ, পৃ. ১৫০।

২. সীরাতুশ্-শরফ প্রণেতার এখানে ভুল হয়েছে যে, ইনি সেই শামসুদ্দীন খাওয়ারিয়মী যিনি সুলতান গিয়াছুদ্দীন বলবনের রাজত্বকালে শামসুল মুল্ক উপাধি ধারণ করে তখনতনশীন হয়েছিলেন। কিন্তু এটা ঠিক নয়, শামসুল মুল্ক মুসতাওফিল মুমালিক (নিরীক্ষক) মাওলানা শামসুদ্দীন খাওয়ারিয়মী যিনি বলবনের রাজত্বকালে সিংহাসনারূঢ় হয়েছিলেন-অষ্টম হিজরী শতাব্দী-শুরুর পূর্বেই মারা যান। হযরত খাজা নিজামুদ্দীন আওলিয়া (র) তাঁরই শাগরিদ ছিলেন। হয়তো সীরাতুশ্-শরফ প্রণেতা নামের ক্ষেত্রে ভ্রমে পতিত হয়েছেন অথবা হযরত মাখদুম (র) থেকে যিনি ক্ষয়ে লাভ করেছিলেন তিনি অন্য কোন শামসুদ্দীন খাওয়ারিয়মী ছিলেন।

নাজমুদ্দীন শাহ'ইর, কাশী বদরুদ্দীন জাফরাবাদী, মাওলানা লুত্ফউদ্দীন, আহমদ সফীদবাফ, শায়খ যাকীউদ্দীন, মাওলানা নিজামুদ্দীন খানযাদা মাখদুম (র), মাওলানা আহমাদ আমু, মাওলানা যয়নুদ্দীন, শায়খ শু'আয়ব, সায্যিদ শিহাবুদ্দীন, ইমাম হালিফী, হাজী রুকনুদ্দীন, মাওলানা আওহাদুদ্দীন যিনি শায়খ নাজীবুদ্দীন ফিরদৌসীর ভাগ্না, শায়খ রুস্তম ও শায়খ ওয়াজহুদ্দীন এবং শায়খ ওয়াহীদ উদ্দীন [তিনজনই শায়খ নিজামুদ্দীন আওলিয়া (র)-এর বান্ধবা, মাওলানা হুসামুদ্দীন হযরতখানী প্রমুখ।^১

রচিত গ্রন্থাদি

হযরত মাখদুম শায়খ শরফুদ্দীন ইয়াহুইয়া মুনায়রী (রা.)-কে বহু গ্রন্থ প্রণেতাদের অন্তর্ভুক্ত করা হয়। কিন্তু তাঁর প্রণীত অনেক গ্রন্থ ও চিঠিপত্রই কালের বিবর্তনে এবং লোকের গাফলতির কারণে নষ্ট হয়ে গেছে। আবার অনেকগুলির নাম জীবন-চরিতসমূহেও খুঁজে পাওয়া যাচ্ছে না। যে সমস্ত কিতাবের এ পর্যন্ত সন্ধান পাওয়া গিয়েছে কিংবা যে সব গ্রন্থের সন্ধান মিলে কিংবা যেসব গ্রন্থে তাঁর নাম চোখে পড়ে, তা নিম্নরূপ :

রাহাতুল কুলুব, আজওয়াবাহ, ফাওয়াইদে রুক্নী, ইরশাদুত-তালিবীন, ইরশাদুস সালিকীন, রিসালায়ে মাক্কিয়া, মিদানুল মা'আনী, লাতাইফুল মা'আনী, ইশারাতে মুখ্খুল মা'আনী, খানেপুর নে'মত, তুহফায়ে গায়বী, রিসালায়ে দর তলবে তালেবান, মালফুযাত, যাদে সফর, 'আকাইদে শরফী, ফাওয়াইদে মুরীদীন, বাহরুল মা'আনী, সাফারুল মুজাফফার, কানযুল মা'আনী, গঞ্জে লা ইউফনী, মু'নিসুল মুরীদীন, শরাহ আদাবুল মুরীদীন।^২

কিন্তু তাঁর সবচেয়ে বড় স্মৃতি এবং তাঁর উচ্চ মরতবা, তাহকীকের মকাম ও ইজতিহাদী শক্তির সর্বাপেক্ষা বড় প্রকাশ তাঁর 'মকতূবাত' এবং মকতূবাত সাহ সদী' ইত্যাদি নামের গ্রন্থাদি।

১. সীরাতুশ-শরফ, পৃ. ১১৫-১১৬।

২. সীরাতুশ-শরফ, নুহহাতুল খাওয়াতির প্রভৃতি।

ষষ্ঠ অধ্যায় মকতূবাত

মকতূবাত, তাঁর শিক্ষা ও সাহিত্যিক মান

হযরত মাখদূম (র)-এর জীবন্ত স্মৃতি এবং তাঁর বিদ্যাবত্তা ও কামালিয়াতের দর্পণ তাঁর মকতূবাত (চিঠিপত্র)-এর বিরল ও দুর্লভ সংকলন যা শুধু সে যুগের প্রণীত গ্রন্থাদির মধ্যেই নয়, বরং মা'রিফাত ও হাকীকতের গোটা ইসলামী ভাঙরেই বিশেষ বৈশিষ্ট্যের দাবিদার। জ্ঞানের গভীরতা, বিশ্লেষণ ও পর্যবেক্ষণের অভূতপূর্বতা, সমস্যা ও সংকটের গ্রন্থি মোচন, ব্যক্তিগত অভিজ্ঞতা, যথার্থ উপলব্ধি, মুজতাহিদসুলভ জ্ঞান ও দৃষ্টি, কুরআন ও সুন্নাহর বিশুদ্ধ ও গভীর বোধশক্তি, মকামে নবুওতের সম্মান ও মর্যাদার বর্ণনা, শরীয়তের প্রতি সমর্থন ও সহায়তা এবং শরীয়তের সুস্ফাতিসুস্ফাতার দিক দিয়ে আমাদের সীমাবদ্ধ জ্ঞানে গোটা ইসলামী পাঠাগারে হযরত মাখদূম (র) এবং ইমাম রব্বানী মুজাদ্দিদ আলফেছানী (র)-এর মকতূবাতের আর কোন দ্বিতীয় নজীর চোখে পড়ে না। এই সব মকতূবাত ব্যাপক অধ্যয়নের পর পরিমাপ করা যায় যে, উম্মতে মুহাম্মাদিয়া (স)-এর বিশেষজ্ঞ ও 'আরেফীনের জ্ঞান ও চিন্তা-ভাবনার নিপুণতা কোন্ উচ্চ মার্গে পৌঁছেছিল এবং তাঁরা আল্লাহর পরিচয়, ঈমান ও ইয়াকীন, পর্যবেক্ষণ ও বুদ্ধি-জ্ঞান, আত্মার প্রশান্তি ও পবিত্রতা, রুহের পবিত্রতা ও সৌন্দর্য, তীক্ষ্ণ বোধ, চরিত্রের সূক্ষ্মতা, মানবীয় প্রকৃতির দুর্বলতা ও ভুলভ্রান্তির আবিষ্কার ও অনুসন্ধানের ক্ষেত্রে কি পর্যন্ত তরক্কী করতে পেরেছিলেন এবং তাঁদের বুদ্ধিমত্তা ও চিন্তাশক্তি কল্পনার ডানা মেলে কোন্ কোন্ সমুদ্র শাখায় নিজেদের বাসা নির্মাণ করেছে এবং কোন্ কোন্ মহাশূন্যে পাখা মেলেছে।

ইল্ম ও মা'রিফাত ছাড়াও এসব মকতূবাত লেখনীর জোর, বর্ণনাশক্তি ও উত্তম রচনাশৈলীর মাপকাঠিতেও একটি সর্বোত্তম নমুনা। এগুলোর অনেকাংশই এতখানি উন্নত যে, তাকে দুনিয়ার সর্বোৎকৃষ্ট ও উচ্চ পর্যায়ের সাহিত্যের অন্তর্ভুক্ত করা যায়। দুনিয়ার অধিকাংশ ভাষায় এবং জ্ঞান-বিজ্ঞান ও সাহিত্যের শাখায় এই

বাড়াবাড়ি করা হয়েছে যে, শুধু সেই সব ব্যক্তিত্বকেই সাহিত্যিক ও লেখক হিসেবে স্বীকৃতি দেওয়া হয়েছে এবং তাদেরই লেখা ও চিন্তার ফসলকেই সাহিত্যের আদর্শ নমুনা হিসেবে পেশ করা হয়েছে যারা সাহিত্য ও রচনাকে একটি পেশা কিংবা যোগ্যতা ও প্রতিভা বিকাশের একটি মাধ্যম হিসেবে মনোনীত ও নির্বাচিত করেছেন অথবা যারা প্রাচীনকালে সরকার কিংবা দরবারের সঙ্গে সম্পৃক্ত ছিলেন অথবা রচনার ক্ষেত্রে যারা শিল্পসুলভ ও প্রচলিত রীতিনীতি তথা লৌকিকতা রক্ষা করে কাজ করেছেন। এর ফল এই হয়েছে যে, 'আরবী সাহিত্যের ইতিহাসে প্রাঞ্জল লেখক হিসেবে সর্বদাই 'আবদুল হামীদ কাতিব, আবু ইসহাক আস-সাবী, ইবনুল 'আমীদ, সাহিবে ইবনে 'ইবাদ, আবু বকর খারিযমী, আবুল কাসিম হারিরী এবং কাযী ফাযিলের নাম নেয়া হয়ে থাকে। অথচ তাঁদের লেখার একটা বিরাট অংশ কৃত্রিম, জীবন ও আত্মা থেকে মাহরুম এবং প্রভাব সৃষ্টির ক্ষমতা থেকে মুক্ত। তাঁদের তুলনায় ইমাম গাযালী, ইবনে জওযী, ইবনে শাদ্দাদ, শায়খ মুহীউদ্দীন ইবনে 'আরাবী, আবু হাইয়ান তাওহীদী, ইবনে কাইয়িম, ইবনে খালদুন অধিকতর শ্রেষ্ঠ লেখক হিসেবে আখ্যায়িত হবার হকদার। তাঁদের গ্রন্থে বিশুদ্ধ ও শক্তিশালী রচনা, ধ্যান-ধারণা ও আবেগ-অনুপ্রেরণার প্রকাশ এবং মানবীয় প্রভাব ও অনুভূতির চিত্র অত্যন্ত চিত্তাকর্ষক ও হৃদয়গ্রাহী। কিন্তু এসব নিরাপরাধ লোকদের অপরাধ এই যে, তাঁরা কখনও সাহিত্য সাধনা ও রচনাকে তাঁদের চিরন্তন পেশা অথবা যোগ্যতা ও প্রতিভা প্রকাশের মাধ্যম হিসেবে গ্রহণ করেননি। তাঁদের অধিকাংশ লেখার একমাত্র উদ্দেশ্য ছিল ধর্ম ও জ্ঞানের চর্চা করা।

সবচেয়ে মজার ও শিক্ষণীয় ব্যাপার হ'ল এই যে, একই লেখক দু'টি কিতাব লিখেছেন : একটি সরাসরি বুদ্ধিমত্তা ও কৃত্রিমতা দিয়ে পরিপূর্ণ এবং অপরটি নেহায়েত সাদামাটা জৌলুসহীন। সেই যুগের সোসাইটি ও সাহিত্যসেবী গোষ্ঠী প্রথমোক্ত রচনার ভূয়সী প্রশংসাগীতিতে সোচ্চার। সম্ভবত উক্ত গ্রন্থের লেখকও আলোচ্ছ গ্রন্থকে জীবনের উপার্জন এবং অহংকারের পুঁজি মনে করে থাকবেন। কিন্তু বাস্তববাদী যমানা ও বিপ্লবের মহাকাল তার সঠিক ও নির্ভুল ফয়সালা ঠিকই গুনিয়েছে। বুদ্ধিমত্তার ছাপ সম্বলিত চাকচিক্যপূর্ণ গ্রন্থটি পাঠাগারের সৌন্দর্য হিসেবে বিরাজ করতে থাকে এবং অপর কিতাবটির তরে চিরদিনের জন্য খেলাত প্রদত্ত হয় এবং হেমন্তবিহীন উদ্যানের ন্যায় চির বসন্তে পরিণত হয়। ইবনে জওযীর স্বরণীয় ও উল্লেখযোগ্য গ্রন্থ যাকে তিনি বেশ গর্বের সঙ্গে "আল-মুদহিশ" (গভীর বিশ্বয়ে নিষ্কণ্ঠকারী) নামে নামকরণ করেছিলেন—

লোকচক্ষুর অন্তরালে হারিয়ে গেছে, কিন্তু তাঁর সরল ও প্রাজ্ঞল ভাষায় লিখিত صيد الخاطر নামক কিতাবটি যেখানে তিনি অত্যন্ত সরল সহজ তরীকায় স্বীয় জীবনের অভিজ্ঞতা এবং দৈনন্দিন জীবনের প্রভাব-প্রতিক্রিয়া লিপিবদ্ধ করেছিলেন, সম্ভবত যাকে তিনি খুব একটা গুরুত্বপূর্ণও মনে করেন নি- আজ তা সাধারণ্যে প্রিয় এবং সাহিত্যের ছাত্রদের লক্ষ্যকেন্দ্রে পরিণত হয়েছে।

ভারতবর্ষের ফারসী সাহিত্যের ইতিহাস পর্যালোচনা করলে এখানকার সাহিত্য ও রচনার ওপর জহরী আবুল ফযল এবং নে'মত আলী খানের প্রভাব লক্ষ্য করা যাবে। অথচ রচনার জন্য যদি আবেগ ও বাস্তবতার প্রভাবশালী প্রকাশকে মানদণ্ড হিসেবে ধরা হয় তাহলে তাঁদের লেখনীর বিরাট একটা অংশ যেখানে শব্দের চাকচিক্য, বিস্ময়কর কারুকাজ ও শাব্দিক প্রশ্রয় ও পক্ষপাতিত্বের প্রাধান্য ছাড়া কিছুই দেখা যাবে না। ফলে সেগুলো নিজেদের মূল্য হারিয়ে ফেলবে এবং খুব অল্প অংশই সাহিত্য ও রচনার সাধারণ মানদণ্ডে পুরোপুরি উত্তীর্ণ হবে এ সবেয় মুকাবিলায় এমন বহু গ্রন্থ মনোযোগ দেয়ার উপযোগী বিবেচিত হবে যেগুলোর প্রতি সাধারণভাবে সাহিত্যের ইতিহাসকার ও সমালোচকবৃন্দ সর্বদাই উপেক্ষা প্রদর্শন করে এসেছেন। হযরত শায়খ শরফুদ্দীন ইয়াহইয়া মুনায়রী (র) এবং হযরত মুজাদ্দিদ আলফে ছানী শায়খ আহমদ ফারুকী (র)-এর 'মকতূবাত'-এর বৃহৎ অংশ, সম্রাট 'আলমগীর (র)-এর 'রুক'আত', শাহ ওয়ালীউল্লাহ দেহলবী (র)-এর 'ইযালাতুল খিফা' এবং শাহ 'আবদুল আযীয দেহলবী (র)-এর 'তুহফায়ে ইছনা 'আশারিয়া'-এর বহু অংশই সাহিত্য ও রচনাশৈলীর উত্তম আদর্শ ও সফল নমুনা। এমন মনে হয় যে, প্রতিটি ভাষায় সাহিত্যের যে সীমা অগ্রপথিকরা অংকন করে দিয়েছেন, তার চৌহদ্দী থেকে বের হবার, অপরাপর জ্ঞান-বিজ্ঞান ও বিষয়-শাস্ত্রের ভাণ্ডারকে আবর্জনাযুক্ত করার এবং নতুন সাহিত্য-মহারথীদের জিজ্ঞাসাবাদ করার মাথা-ব্যথা সাধারণভাবে সহনযোগ্য মনে করা হয় নি এবং এভাবেই শতাব্দীকাল ব্যাপী ঐ সব সাহিত্য-রত্নরাজির ওপর ধুলির আস্তরণ জমতে থাকে।

সাহিত্য ও রচনার ক্ষেত্রে সাধারণ ঐতিহাসিক ও সমালোচকবৃন্দের অধিকাংশই এই বাস্তবতাকে উপেক্ষা করছেন যে, যে লেখায় উত্তম বাকভঙ্গীর সঙ্গে অন্তরের জ্বালা ও তাপ এবং হৃদয়ের তপ্ত লোহুও শামিল হয় সে লেখায় এমন প্রভাব ও এমন শক্তি সৃষ্টি হয় যে, স্বীয় সমসাময়িক যুগেও হাযারো দিলকে তা আহত করে এবং শত শত বছর অতিক্রান্ত হয়ে যাবার পরও তার সজীবতা ও প্রাণস্পন্দন এবং তার তাহীর ও অভিভূত করবার শক্তি অক্ষত থাকে।

লেখা ও বক্তৃতাকে সর্বোত্তম ও কামিয়াব বানাবার জন্য যতগুলি গুণ ও যোগ্যতা, অলঙ্কারশাস্ত্রের যতবিধ মূলনীতি ও নিয়ম-কানুন আবশ্যিক, সাহিত্য-সমালোচকেরা সে সবেই বিস্তারিত পর্যালোচনা করেছেন এবং প্রতিটি যুগেই তার ওপর বিতর্ক চলে আসছে। কিন্তু খুব কম লোকের কাছেই এটা অনুভূত হয়েছে যে, সেসব গুণাবলী ও যোগ্যতার ভিতর একটি বড় প্রভাব সৃষ্টিকারী ও না ভোলার মতো উপাদান অথবা কার্যকর শক্তি বক্তার খুলুসিয়ত (আন্তরিকতা বা একনিষ্ঠতা) ও বেদনাকাতরতা। সাহিত্য ও রচনাশৈলীর ভাণ্ডারকে যদি একটি নতুন ও অধিকতর বাস্তবসম্মত এবং গভীর দৃষ্টিকোণ থেকে পর্যালোচনা করা হয় তবে তাকে দু'টি ভাগে ভাগ করলে বোধহয় অন্যায় হবে না।

(এক) সে সমস্ত লেখা ও ধ্যান-ধারণার প্রকাশ যা অভ্যন্তরীণ চাহিদা ও দাবি এবং কোন শক্তিশালী দৃঢ়ভিত্তিক 'আকীদা কিংবা বিশ্বাসের আওতাবীনে জন্মলাভ করে এবং যার লক্ষ্য ও উদ্দেশ্য কোনরূপ ফরমায়েশী কিংবা হুকুম তা'মিল করতে গিয়ে, দুনিয়াবী ফায়দা হাসিল অথবা কোন শক্তিশালী শাসক কিংবা বিস্ত-সম্পদের অধিকারী কোন ধনিকের সন্তুষ্টি লাভের জন্য ছিল না, বরং তিনি খোদ নিজ বিবেকের ও 'আকীদার অনুশাসন মেনেছিলেন যার ভেতর শাসক ও ধনিকশ্রেণীর নির্দেশ পালনের চেয়েও অধিকতর শক্তি নিহিত এবং যা উপেক্ষা ও অমান্য করা কোন বিবেকবান মানুষের পক্ষেই সম্ভব নয়।

(দুই) সে সমস্ত লেখা যা কোন হুকুম তা'মিল করতে গিয়ে (অর্থাৎ ফরমায়েশী) অথবা কোন দুনিয়াবী স্বার্থোদ্ধার কিংবা ওপর মহলের কোন ব্যক্তি বিশেষের হুকুম তা'মিলের স্বার্থে লিখিত।

সাহিত্যের এই উভয় প্রকারের ভেতর আসমান-যমীন ফারাক বিদ্যমান। প্রথম প্রকার সাহিত্য দীর্ঘ দিন ধরে সজীব ও প্রাণবন্ত থাকে। তার বিশেষত্ব এই যে, যদি তার উদ্দেশ্য ও লক্ষ্য ধর্মীয় ও নৈতিক চরিত্র সম্পর্কিত হয়, তবে তার হৃদয় ও চরিত্রের ওপর গভীর ও বিপ্লবাত্মক প্রভাব পড়ে। হাযার হাযার মানুষের অন্তরে তা পড়বার পর সংশোধন তথা পরিশুদ্ধির ব্যাপারে উৎসাহ ও প্রেরণার সৃষ্টি হয়। এর বিপরীতে দ্বিতীয় প্রকারের সাহিত্য সাময়িক অভিনন্দন এবং ক্ষণিকের আনন্দ ও তৃপ্তি ছাড়া হৃদয় ও আত্মার ওপর দীর্ঘস্থায়ী কোন প্রভাব রেখে যায় না। তার জীবন ও আয়ু সীমিত ও সংক্ষিপ্ত হয়ে থাকে। প্রথম প্রকারের সাহিত্যে স্বতন্ত্রস্ফূর্ততা ও সহজ সাবলীল থাকে আর দ্বিতীয় প্রকারের সাহিত্যে থাকে শিল্প ও ব্যবস্থাপনাজাত সাজসজ্জা। এই দু'প্রকার সাহিত্যের ভেতর পার্থক্য

সেইরূপ যা এই দৃষ্টান্তমূলক কাহিনীর ভেতর দিয়ে বর্ণনা করা হয়েছে। জনৈক ব্যক্তি একটি শিকারী কুকুরকে জিজ্ঞেস করেছিল, হরিণ পালাবার ব্যাপারে তোমার চেয়ে বেশি এগিয়ে যায় আর তাকে পাকড়াও করার ক্ষেত্রে তুমি এত পিছিয়ে পড় কেন? হরিণ নিজের জন্য দৌড়ায় আর আমি দৌড়াই আমার মনিবের জন্য—এটাই ছিল কুকুরের জবাব।

মোটকথা, এই বাতেনী অবস্থা, বিশ্বাস ও পর্যবেক্ষণ, দা'ওয়াতের প্রাধান্য, আত্মার সঙ্গে সম্পর্কের অধিকারীকে বাস্তবতা সম্পর্কে অবহিত করতে এবং মনুষ্যে মকসুদ তথা অভীষ্ট লক্ষ্যে পৌঁছবার আবেগ ও উৎসাহ, ইখলাস ও বেদনাকাতরতা, আত্মার সৌন্দর্য ও হৃদয়ের পবিত্রতা এবং এ সবার সঙ্গে প্রশান্তকর বিশুদ্ধ আনন্দ ও ভাবার ওপর আল্লাহ পাক হযরত শায়খ শরফুদ্দীন (র) কে-এক মহা সাহিত্যিক মর্যাদা ও মকাম (স্থান) দান করে ছিলেন এবং তিনি স্বীয় ধ্যান-ধারণা ও আবেগ-অনুপ্রেরণা প্রকাশের জন্য একটি স্থায়ী নিয়ম-কানুন সৃষ্টি করে নিয়েছিলেন—যা একমাত্র তাঁরই জন্য ছিল নির্দিষ্ট। তাঁর 'মকতূবাত' শুধু ফারসী সাহিত্যেই নয়, বরং ইসলামী সাহিত্যেও একটি বিশিষ্ট স্থান অধিকার করে আছে এবং মা'রিফাত, হাকীকত, ইসলামের দা'ওয়াত ও সংস্কার-সংশোধনের ভাঙরে কম জিনিসই এমন মিলবে যা স্বীয় সাহিত্য-গুণ, শক্তি ও প্রভাব সৃষ্টিতে তাঁর দ্বিতীয় নজীর হতে পারে।

চিঠিপত্রের (মকতূবাত) সংকলন এবং যাকে লেখা হয়েছে

মকতূবাতের সবচেয়ে মশহূর ও নির্ভরযোগ্য সংকলন সেটি যা চৌসা^১ নামক কসবা (ক্ষুদ্র শহর)-এর শাসনকর্তার নামে লিখিত। এই সংকলনটিতে ১০০ টি চিঠি রয়েছে। কোথাও 'মকতূবাতে শায়খ শরফুদ্দীন ইয়াহুইয়া মুনাযরী'-এর নামে ছাপা হয়েছে, কোথাও 'সাহ্ সদী মকতূবাত' নামে, আবার কোথাও 'মকতূবাতে সদী' নামে। এর সংকলক হযরত মাখদূম (র)-এর বিশিষ্ট ও বিশ্বস্ত শাগরিদ শায়খ যঈন বদর 'আরাবী ভূমিকায় লিখেছেন :

অধম বান্দা যঈন বদর 'আরাবী বলছি যে, কাযী শামসুদ্দীন, চৌসা নামক কসবার শাসনকর্তা বারবার তাঁর খেদমতে আবেদন করেছেন যে, এই গরীব কতকগুলি অসুবিধার কারণে হযরত মাখদূম (র)-এর মজলিসে হাবির হতে এবং তাঁর সাহচর্যের সৌভাগ্য লাভে (যা 'ইলুম ও মা'রিফাত হাসিলের

১. চৌসা হযরত মাখদূম সাহেব (র)-এর আমলে একটি কেন্দ্রীয় ও প্রসিদ্ধ স্থান ছিল। এ যুগে তা প্রাচীন জেলা শাহআবাদ কমিশনারীর একটি অখ্যাত পল্লী।

মাধ্যম) বঞ্চিত। অতএব বিনীত প্রার্থনা যে, 'ইলমে সুলুক (অধ্যাত্ম পথের জ্ঞান)-এর প্রতিটি অধ্যায়েই বান্দার বোধ-শক্তি ও সামর্থ্য যুতাবিক কিছু অংশ যেন লিপিবদ্ধ করে রাখা হয় যাতে দূরে নিষ্কিঞ্চ এই অধম এর থেকে লাভবান হতে পারে। এই দরখাস্ত যা অত্যন্ত ইখলাস ও অনুনয়-বিনয় সহকারে করা হয়েছিল-মঞ্জুর করা হয় এবং হযরত মাখদুম (র) অধ্যাত্ম পথের পথিকদের (সালিকীন) মরতবা ও মকাম এবং মুরীদদের অবস্থাাদি ও কার্যকলাপের ব্যাপারে আবশ্যিকমত কিছু কিছু লিপিবদ্ধ করে দেন এবং এইভাবে ভওহীদ ও মারিফাত, ইশুক ও মহব্বত, আকর্ষণ ও কোশেণ, বন্দেগী ও দাসত্ব, তাজরীদ ও তাফরীদ, প্রশংসা ও ভর্ৎসনা তথা পীর-মুরিদীর অনেক জরুরী ও উপকারী রচনাসমূহ ও হেদায়েত, প্রাচীনকালের বুর্গদের বহু কাহিনী এবং অবস্থা ও কার্যকলাপের অনেক ভাণ্ডারই লেখার ভেতর এসে যায়। এই চিঠিপত্রগুলো ৭৪৭ হিজরীর বিভিন্ন মাসে বিহার থেকে চৌসা নামক পল্লীতে প্রেরিত হত। খানকাহর খাদেম ও উপস্থিত ব্যক্তিবর্গ এসব চিঠি-পত্রের (মাকতুবাতে) নকল রেখেছিল যাতে সত্যের প্রার্থী ও পরবর্তীতে আগত বংশধরদের এটা কাজে লাগে।

অন্য আর একটি সংক্ষিপ্ত সংকলন 'মকতুবাতে জওয়াবী' নামে আলাদাভাবেও প্রকাশিত হয়েছে এবং "সাহু সদী মকতুবাতে" (سه صدی مکتوبات) - এর (ইসলামী কুতুবখানা পাঞ্জাব, লাহোর থেকে প্রকাশিত) সংকলনের ভেতরও शामिल। এটা এসব মকতুবাতে'র অবশিষ্টাংশ যা শায়খ মুজাফফরের নামে তার বিনীত দরখাস্তের জওয়াবে লেখা হয়েছিল এবং এর ভেতর অধিকাংশই আধ্যাত্মিক পথে চলতে গিয়ে আগত সমস্যা ও সংকটের সমাধান এবং উক্ত রাস্তার ধাপে ধাপে উন্নতি, অগ্রগতি ও বিভিন্ন অবস্থার বর্ণনা রয়েছে। এর থেকে শায়খ মুজাফফরের উচ্চ সামর্থ্য শ্রেণী পুরস্কারের পরিমাপ করা যায়। শায়খ মুজাফফর ওসিয়ত করেছিলেন, এসব চিঠিপত্র যেন মৃত্যুর পর তার সঙ্গেই দাফন করে দেয়া হয়। আকস্মিকভাবেই কিছু চিঠিপত্রের ওপর তার খাদেমের নজর পড়ে এবং তারা সেগুলি কপি করে নেয়। এই সংকলন "মকতুবাতে জওয়াবী" নামে চিহ্নিত হয়। সংকলনে আটশটি চিঠি রয়েছে। মকতুবাতে'র তৃতীয় এক সংকলন যেখানে একশো তেপান্নটি চিঠি রয়েছে বিভিন্ন ব্যক্তির নামে। এই মকতুবাতে ৬৬৯ হিজরীর জমাদিউল আওয়াল ও ৭৬৯ হিজরীর রমযানুল মুবারকের মধ্যবর্তী সময়ে লেখা হয়েছে।

যাদের নামে এসব চিঠিপত্র লেখা হয়েছিল, তাদের মধ্যে বিশিষ্ট কয়েকজনের নাম এখানে দেওয়া গেল :

কসবা আঙ্গুলীর অধিবাসী শায়খ 'উমর, কাযী শামসুদ্দীন, কাযী যাহিদ, মাওলানা কামালুদ্দীন সন্তোষী, মাওলানা সদরুদ্দীন, মাওলানা যিয়াউদ্দীন, মাওলানা মাহমুদ সিঙ্গানী, শায়খ মুহাম্মাদ জাফর আবাদী যিনি দেওয়ানা নামে পরিচিত, মাওলানা নিজামুদ্দীন, সুলতান মুহাম্মাদ, মাওলানা নাসীরুদ্দীন, আমীন খান, মালিক খিযির, শায়খ কুতুবুদ্দীন, শায়খ সুলায়মান, সুলতানুশ্ শারক্ ফীরোয শাহ।

রচনার উৎস

হযরত শায়খ শরফুদ্দীন ইয়াহুইয়া মুনাযরী (র)-এর মকতূবাত অধ্যয়ন করলে পাঠকের কাছে পরিষ্কার অনুভূত হয় যে, এই মহাজ্ঞান, এই দুপ্রাপ্য ও দুর্লভ সূক্ষ্ম ব্যাপারসমূহ ও পর্যালোচনা লেখকের শুধু ধীশক্তি, জ্ঞানের প্রাচুর্য, গভীর চিন্তা ও অধ্যয়নেরই পরিণতি নয়, বরং এটা তাঁর ব্যক্তিগত অভিজ্ঞতা, তাঁর গভীর নিষ্ঠা ও বিশ্বাসেরই ফলশ্রুতি। আল্লাহর মহান দরবার, মুখাপেক্ষী নন এমনি শান, তাঁর একচ্ছত্র আধিপত্য ও শ্রেষ্ঠত্ব, গৌরব মহিমা ও সৌহার্দ্য, মু'মিনের আশা ও ভয়, 'আরিফ ও আল্লাহর পথের পথিকদের পারস্পরিক সৌহার্দ্য ও মিলন, আনন্দ ও বেদনা, রহমতের দরিয়ার প্রবল উচ্ছ্বাস, তওবা ও আল্লাহর নৈকট্যলাভের প্রয়োজনীয়তার ওপর যা লেখা হয়েছে, তাতে পরিষ্কার বুঝা যায় যে, কোন গোপন রহস্যভেদী এবং হাকীকতের সঙ্গে পরিচিত কেউ তা লিখেছেন। প্রবৃত্তির ভ্রান্তি, শয়তানের প্রতারণা, নীচ চরিত্র এবং আধ্যাত্মিক পথের ঘাঁটি সম্পর্কে যা কিছু বলা হয়েছে তা সবই দীর্ঘ অভিজ্ঞতা, বিস্তৃত ও কার্যকর জ্ঞানের ওপর প্রতিষ্ঠিত।

তরীকতপন্থীদের ভ্রান্তির ব্যাপারে সতর্কবাণী উচ্চারণ, শরীয়তের আবশ্যিকতা, শরীয়তের কষ্টকর বিধানসমূহের স্থায়িত্ব, বেলায়েতের ওপর নবুওতের প্রাধান্য ও অগ্রাধিকার এবং মকামে নবুওতের মহান মর্যাদা সম্পর্কে যা কিছু লেখা হয়েছে, তার মূল্য ও কদর এবং তার উপকারিতা পরিমাপ করবার জন্য তখনকার সময় ও পরিবেশ সম্পর্কে জানা জরুরী যে সময় ও পরিবেশে এই মকতূবাত লেখা হয়েছে। এখানে আমরা বিভিন্ন শিরোনামের অধীনে সেই সব মকতূবাতের কিছু উদ্ধৃতি পেশ করব। যিনি বিস্তারিতভাবে জানতে ও উপকার পেতে আগ্রহী, তিনি আসল মকতূবাতের শরণাপন্ন হতে পারেন।

সপ্তম অধ্যায়

মকামে কিবরিয়া

দুনিয়া জাহানের মহান স্রষ্টার পরমুখাপেক্ষীহীনতা

একটি পত্রে মহান আল্লাহপাকের পরমুখাপেক্ষীহীনতা সম্পর্কে যা বলা হয়েছে তা হ'ল, তাঁর কোন কর্ম ও সিদ্ধান্তের বিরুদ্ধে কারও কোন বাদ-প্রতিবাদ কিংবা কোন কিছু জিজ্ঞাসা করবার সুযোগ নেই। لَا يَسْتَأْذِنُ عَمَّا يَفْعَلُ وَهُمْ ۖ তিনি যাকে ইচ্ছা ঈমানী দৌলত ও কবুলিয়তের খেলাত দিয়ে ধন্য করেন এবং যাকে ইচ্ছা তাঁর মহান দরবার থেকে বিতাড়িত ও বহিস্কৃত করেন। যাকে ইচ্ছা তিনি মাটির দুনিয়া থেকে সপ্তাকাশের উর্ধ্বে উঠিয়ে নেন এবং যাকে ইচ্ছা সপ্তাকাশের উর্ধ্বে থেকে ধূলি-মলিন দুনিয়ায় নিক্ষিপ্ত করেন।

এটা যদি তোমরা বল : এমনিটি কেন হবে? اگر گوئی چرا چنین است তাহলে প্রদত্ত উত্তর হবে নিম্নরূপ : ذَلِكَ فَضْلُ اللَّهِ يُؤْتِيهِ مَنْ يَشَاءُ : আল্লাহর মহা অনুগ্রহ—যাকে ইচ্ছা তিনি তা দান করেন।

কার এতখানি সাহস যে, আল্লাহ পাককে এটা বলতে পারে, কেন তুমি অমুককে এত ধন-দৌলত দিলে আর অমুককে দিলে না? যেমন একজন বাদশাহ একজনকে ওয়ারতী তথা মন্ত্রিত্বের পদ দিয়ে ধন্য করেন আর অন্যজনকে দারোয়ানী কিংবা চাপরাশির পদে অধিষ্ঠিত করেন, ঠিক তেমনি মহান আল্লাহ পাক যখন কাউকে দীন ও ঈমানের সম্পদ দান করেন, তখন তাকে কখনো মন্দের হাত থেকে সরিয়ে নেন, আবার কখনো তাকে হীন ও নীচ, যালিম ও হারামখোর সম্প্রদায়ের ভেতর থেকে বের করে আনেন। কার এতখানি বুকুর পাটা যে বলবে اَهُولَاءِ مَنَّ اللَّهُ عَلَيْهِمْ مِّنْ بَيْنِنَا . অর্থাৎ এরাই কী সে সমস্ত লোক যাদেরকে আল্লাহ পাক অনুগ্রহীত করেছেন আমাদের মধ্য থেকে? হুকুম হচ্ছে যে, ফুযায়ল ইবন 'আয়ায-সে ছিল ডাকু-তাকে আমার দরবারে নিয়ে এস ; আমি যে তাকেই চাই। বাল'আম বা'উর, যে চার শো বছর পর্যন্ত মুসাল্লা (জায়নামায) থেকে এতটুকু সরে নি,

তাকে আমার দরবার থেকে দূরে নিয়ে যাও; সে আমার দরবার থেকে বহিষ্কৃত। আমি ওম্মরকে চাই, যে পুতুল পূজায় মত্ত; আর 'আযাযীল যে সাত হাজার বছর পর্যন্ত আমার ইবাদতে মশগুল, তাকে আমি চাই না। কার এতখানি সাহস যে বলবে, কেন এমনটি হ'ল?

যদি সেই মহান প্রভুর কৃপাদৃষ্টি একবার নিষ্কিণ্ড হয় তাহলে সব দোষ-ত্রুটিই উপেক্ষণীয় ও বিজ্ঞোচিত, সব অপূর্ণতাই পূর্ণতা, বিশ্রী রূপই সকল সৌন্দর্যের আঁকর। হে ভ্রাত! একমুষ্টি মাটিই তো ছিলে, যিল্লতী ও অবজ্জের অবস্থায় পৃথিমধ্যে পড়েছিল, পায়ের তলায় লেগেছিলে। এরপর মহান কৃপানিধানের করুণাদৃষ্টি পতিত হতেই ঘোষিত হ'ল : **إِنِّي جَائِلٌ فِي الْأَرْضِ خَلِيفَةٌ** (আমি পৃথিবীর বুকে খলীফা হিসেবে পাঠাতে চাই)।”

এই পরমুখাপেক্ষীহীনতাকেই অন্য আর একটি চিঠিতে এভাবে বর্ণনা করা হয়েছে :

উপদেশ ও শিক্ষালাভের জন্য সতর্কীকরণের চক্ষু উন্মোচন কর। আদম (আ)-এর আক্ষেপ আর নূহ (আ)-এর ফরিয়াদ শোন। ইবরাহীম খলীলুল্লাহ (আ)-এর ব্যর্থতা আর ইয়াকুব (আ)-এর মুসীবতের দাস্তান (ঘটনা) কান দিয়ে শোন। কুয়ার মধ্যে নিষ্কিণ্ড ইউসুফ (আ)-এর চাঁদ-মুখ দেখ, হযরত যাকারিয়া (আ)-এর মাথার ওপর করাত এবং হযরত ইয়াহইয়া (আ)-এর গর্দানের ওপর রাখা তলোয়ারও গভীরভাবে অবলোকন কর। মুহাম্মাদুর রাসূলুল্লাহু (স)-এর হৃদয়ের জ্বালা এবং দিলের অস্থিরতা গভীরভাবে লক্ষ্য কর আর পড় :

كُلُّ شَيْءٍ هَالِكٌ إِلَّا وَجْهَهُ -

“সেই পবিত্র মহান সত্তা ব্যতীত আর সব কিছু ধ্বংসশীল।”

একস্থানে আল্লাহ পাকের দরবারের উন্নত ও মহান মর্যাদা বর্ণনা করতে গিয়ে লিখেন :

হে আমার ভ্রাত! ভালভাবে অনুধাবন কর। যে লোকমা (খাদ্যের গ্রাস) শিকারী বাজপাখির জন্য তৈরি করা হয়েছে—একটি চড়ুই কিংবা অনুরূপ ক্ষুদ্রাতিক্ষুদ্র পাখীর পেটে কি করে তা ঢুকতে পারে? সেই লম্বা পোশাক যা ভাগ্যবান ও সম্পদশালী লোকের শরীরের পরিমাপ অনুযায়ী সেলাই করা হয়েছে—তা আমাদের মত নগণ্য ছোটখাট আকৃতির লোকের জন্য কি করে উপযোগী হতে পারে?

অন্য আর এক পত্রে এটা বর্ণনা করতে গিয়ে বলেন,

আল্লাহর করুণা বায়ু যখন প্রবাহিত হয় তখন মাটির পক্ষে পরশমণিতে রূপ নিতে এবং আল্লাহর দরবার থেকে বহিষ্কৃত ও বিতাড়িতের পক্ষে গৃহীত হতে কিছুমাত্র বিলম্ব হয় না। একথা যেখানে ভয়েরও বটে—সেখানে তা অত্যন্ত আশাব্যঞ্জক ও উৎসাহ-উদ্দীপকও বটে।

তিনি আরও বলেন :

এই মহামূল্যবান সম্পদ লাভ আল্লাহর বিশেষ অনুগ্রহের ওপর নির্ভরশীল। এটা কোন দাবি বা অধিকারের বিষয় নয়। সেই মহান আল্লাহর কসম! ব্যাপারটা যদি দাবি কিংবা অধিকারের সঙ্গে সম্পর্কিত হ'ত, তাহলে আমার ও তোমাদের ভাগ্যে একটি বিন্দু পরিমাণও জুটত না। কিন্তু কার্যকারণ সম্পর্ক এর মাঝ থেকে উঠিয়ে নেয়া হয়েছে। এমন কি এখন যেভাবে একজন পবিত্র আত্মাও এই সম্পদের প্রত্যাশী, ঠিক তেমনি বাক-সর্বস্ব ও নাপাক হযারো নগণ্য জিনিসও এর প্রত্যাশী। যে আবর্জনা ও ভস্মস্থূপ কুকুরের আবাসস্থল হতে পারে—তাই একদিন বাদশাহর শাহী দরবারে পরিণত হতে পারে। অবশ্য আল্লাহ পাক তাঁর মহা-হিকমত-এর জন্য কিছু কার্যকারণও নিধারিত করে রেখেছেন।

অপর একটি চিঠিতে এই বিষয়টি এভাবে বলা হয়েছে :

কার্যকারণবিহীন অনুগ্রহ একজনকে অনুগ্রহীত করে—আর কার্যকারণবিহীন ইনসাফ ও সুবিচার অন্যকে গলিয়ে দেয়। 'ওমর (রা)-কে মূর্তিঘর থেকে বের করে এনে মকবুল বান্দা হিসেবে গড়ে তোলা হয়—আর 'আবদুল্লাহ ইবন উবাইকে মসজিদেও অপমানিত ও লাঞ্ছিত থাকতে হয়।

অন্যত্র বলেছেন :

স্বীয় কৃপা ও মেহেরবাণীতে একজন পাপীকে তিনি ডেকে পাঠান যেন তাকে স্বীয় অপার ক্ষমা ও কৃপাসিন্মুতে অবগাহন করিয়ে নিতে পারেন, করুণা ও কৃপার পবিত্রতা যেন হৃদয়-মন থেকে জাহির হয়। তাঁর কহর ও গযব কখনো কোন পবিত্র বান্দাকেও ডেকে পাঠায় যেন তাকে ঘৃণিত ও পরিত্যক্ত মসলিগু ধোঁয়া দিয়ে তার চেহারাকে কালিমামণ্ডিত করতে পারেন। উদ্দেশ্য এই যে, সেই মহাশক্তির রাজাধিরাজ—যিনি সর্বপ্রকার কার্যকারণমুক্ত, তা প্রমাণিত হয়ে যায়। কখনো তিনি কোন হতভাগ্যের অঞ্চল প্রদেশ থেকে কোন নবীকে বের করে আনেন, আবার কখনো নবীর আঁচলের তলা থেকে কোন হতভাগ্যের জন্ম দেন। কখনো কোন কুকুরকে টেনে এনে আওলিয়ার

সারিতে বসিয়ে দেন, আবার কখনো কোন ওলী-দরবেশকেও কুকুরের দীর্ঘ সারিতে দাঁড় করান। কিন্তু যখন তিনি কাউকে কবুল করে নেন তখন তাকে আর ছুঁড়ে ফেলে দেন না, আবার কাউকে পরিত্যক্ত ও বাতিল বলে ঘোষণা করলে অতঃপর কোন কিছুই বিনিময়েই আর তাকে কবুল করেন না।

অপর একটি চিঠিতে লিখেন :

চোখের নজর নিবন্ধ রাখতে হবে 'কুদরত' (আল্লাহ পাক) ও 'ফযল' (অনুগ্রহ)-এর ওপর। যদি চান তবে হাযারো গির্জা ও পূজার ঘরকে তিনি কা'বায় ও বায়তুল মুকাদ্দাসে পরিণত করতে পারেন এবং হাযার হাযার নাফরমান পাপী ও গুনাহ্‌গারকে আল্লাহ্‌র 'হাবীব' ও আল্লাহ্‌র 'খলীল' (বন্ধু) খেতার দিতে পারেন। এর মাঝে কোন কার্যকারণ সম্পর্ক নেই। যদি তিনি চান এক মুহূর্তে হাযার হাযার কাফিরকে মু'মিন বানিয়ে দিতে পারেন, হাযারো মুশরিক ও পুতুল পূজারীকে তওহীদবাদীতে রূপান্তরিত করতে পারেন, আর এর জন্য তাঁর কোন অবকাশের দরকার নেই। হাযার হাযার অভিশপ্তকে অনুগ্রহপ্রাপ্ত এবং হাযার হাযার পানশালাকে তিনি সমান্তরাল রাস্তায় মিশিয়ে দিতে পারেন। এ ব্যাপারে কারও কোনরূপ উচ্চবাচ্য করারও অবকাশ নেই।

অপর এক পত্রে তিনি বলেন :

যা ইচ্ছা তাই তিনি করেন। কারও ধ্বংসের পরওয়া যেমন তাঁর নেই, তেমনি নেই কারও নাজাতের পরওয়াও। একজন উনুজ্ঞ প্রান্তরে পিপাসায় জীবন দিচ্ছে আর বলছে যে, দুনিয়ার বুকে পানির এত নহর বয়ে চলেছে, অথচ আমি এখানে পানি বিহনে জীবন দিতে চলেছি! গায়েব থেকে আওয়াজ ভেসে আসে, হাযারো সিদ্দীক (সত্যবাদী ও বিশ্বস্ত বান্দাহ)-কে আমি ভয়ংকর জঙ্গলে নিয়ে আসি এবং তাদেরকে আমার ইচ্ছাশক্তির তেগ ও তলোয়ার হেনে নিঃশেষ করে দেই যাতে করে কিছু কাক ও শকুন তাদের চক্ষু, চোয়াল ও মাথার খুলি (অর্থাৎ শবদেহ) থেকে নিজেদের রূষী সংগ্রহ করতে পারে। যদি কোন অভিযোগকারী অভিযোগের ভাষা মুখ দিয়ে উচ্চারণ করতে চায়, তখন আমি এই কথা বলে তার মুখ বন্ধ করে দেই যে,

لَا يَسْتَلُ عَمَّا يَفْعَلُ^১ অর্থাৎ পক্ষীকুলও আমার আর সিদ্দীকও আমারই;

মাঝে তোমরা প্রশ্ন উঠাবার কে ?^২

অন্য এক পত্রে তিনি বলেছেন :

কারুরই স্বীয় পরিণতি সম্পর্কে এ খবর ও জ্ঞান নেই যে, তার সঙ্গে কী ব্যবহার করা হবে। দু'ধরনের ব্যবহারের সম্ভাবনাও একেবারে উড়িয়ে দেওয়া যায় না।

দু' ধরনের (ভাল এবং মন্দ) ব্যবহার সম্পর্কিত ঘটনার বেশুমার কাহিনী তিনি এমন প্রভাব সৃষ্টিকারী পত্রে লিখেছেন যে, তা পড়বার পর মানুষের রক্ত পানি হয়ে যায়।

ভাই আমার! রাস্তা নিরাপদ নয়, অথচ মনযিগও বহু দূরে। আমার কাম্য অসীম, শরীর দুর্বল, দিল অসহায়, অন্তর 'আশিক আর মস্তক বাসনাপূর্ণ।

কত চেহারা ই না আছে যেসব কবরের ভেতর কিবলার দিক থেকে ঘুরিয়ে দেওয়া হয়, কত পরিচিত আপনজনই রয়েছে যাকে প্রথম রাত্রিতেই অপরিচিত করে দেওয়া হয়। কত ব্যক্তি আছে যাদেরকে বলা হয় : বাসর রাতের ঘুম ঘুমাও— আর অন্যকে বলা হয় অলক্ষুণে ঘুম ঘুমাও। কখনো বা এমনভাবে পরিত্যাগ করেন যে, কোনরূপ আনুগত্যের বিনিময়েই আর ফিরিয়ে নেন না।

من لم يكن للواصل اهلا - فكل احسانه ذنوب -

পরম স্রষ্টার সঙ্গে মিলিত হবার যোগ্যতা যে রাখে না, তার প্রতিটি সৎকর্ম ও সদাশয়তাই গুনাহরূপে বিবেচিত হয়।

আর কখনো বা এমনি কবুল করেন যে অতঃপর কোন অন্যান্য ও অবাধ্যতারই আর পরওয়া করেন না।

فى وجهه شافع يمحووا ساءته

من القلوب ويأتى بالمعاذير

তার মুখমণ্ডলে সুপারিশকারী আলামত বিদ্যমান। তিনি হৃদয় থেকে পাপের কালিমারাশি বিদূরিত করেন এবং ওয়র কবুল করেন।

খলীলুল্লাহ্ হযরত ইবরাহীম ('আ)-কে পুতুল ঘর থেকে বের হতে দেখ আর يَخْرِجُ الْحَيَّ مِنَ الْمَيِّتِ (যিনি মৃতের থেকে জীবিত বের করেন) পড়; নূহ ('আ)-এর ঘর থেকে কিন'আনকে বেরিয়ে আসতে দেখ আর يَخْرِجُ الْحَيَّ مِنَ الْمَيِّتِ (যিনি জীবিতের থেকে মৃত্যু দান করেন) স্মরণ কর। আদম ('আ)-এর ছবিকে এমনই স্থায়িত্ব দান করলেন যে, পদস্থলনের

ক্ষতিও তা মুছে ফেলতে পারে নি; আর ইবলীসকে সন্ধির স্বরবর্ণের ন্যায় এমনি মুছে দিলেন যে, বিরাট আনুগত্যের হকও তাকে কোন ফায়দা পৌছাতে পারে নি। যেমন কারুর জন্য لَهُمُ الْبُشْرَى (ঈমানদার ও সংকর্মশীলদের জন্য সুসংবাদ)-এর সংবাদ, তেমনি- আল্লাহর দরবার থেকে বহিষ্কৃতদের জন্য لَا بُشْرَىٰ يَوْمَئِذٍ لِلْمُجْرِمِينَ (পাপীদের জন্য আজ কোনই সুসংবাদ নেই)-এর ঘোষণা। যেমনি কোথাও فِي سَيِّمَاهُمْ (তাদের চেহারায় সিজদার দাগ চিহ্নিত দেখবে) আছে, তেমনি- يَعْرِفُ الْمُجْرِمُونَ بِسَيِّمَاهُمْ (পাপীরা তাদের কুৎসিত চেহারার জন্য চিহ্নিত হবে)-ও আছে।

অন্য আর এক চিঠিতে তিনি বলেন :

শাহানশাহ মহারাজাধিরাজ-এর গুণাবলী ও কার্যকলাপ, সৌন্দর্য ও গৌরব-মহিমা, পরাক্রম ও ক্ষমাশীলতা দু'টোই নিজ নিজ কাজ করে যায় আর এ দু'টো গুণই আপন কর্মের ক্ষেত্রে স্বাধীন এবং সৃষ্টি জগতে এটা এমনি ব্যয় হয় যে, ঈমানদারের জন্য ভয় ও প্রত্যাশার মাঝখানে অবস্থান করা ভিন্ন গত্যন্তর নেই।

এক স্থানে আল্লাহ পাকের পবিত্র সন্তার মর্যাদা فَعَالٌ لِّمَا يُرِيدُ (তিনি যা ইচ্ছা তাই করেন)-এর ব্যাখ্যা করতে ও তার উদাহরণ দিতে গিয়ে লিখেছেন :

কখনো করুণাময় সত্তা কার্যকারণহীনভাবে বলেন যে, ভেতরে এসে যাও ; এখানে কুকুরের পায়ের আশপাশকেও বন্ধুর চোখের তুতিয়া বানাই এবং كَلْبُهُمْ بِأَسْفُطِ ذُرَاعِيهِ بِالْوَصِيدِ বলে কিয়ামত পর্যন্ত সময়ের জন্য কুকুরের মর্যাদা বাড়িয়ে দেই। আবার কখনো আল্লাহর ভয়াবহ ও পরাক্রমশালী সত্তা কার্য-কারণহীনভাবে আওয়াজ দেন যে, খবরদার! সাবধান! এখানে ফিরিশতাকুলের শিক্ষক ('আযযীল)-এর মস্তক থেকে -যে সাত লক্ষ বছর আল্লাহর মহান দরবারে ই'তিকাফরত ছিল, শাহী পোশাক খসিয়ে وَإِنَّ عَلَيْكَ لَعْنَتِي (আর তোর ওপর আমার লা'নত ও অভিসম্পাত)-এর কলংক কপালে লাগিয়ে দেন। কখনো ওমরকে-যে ছিল অপরিচিত, মূর্তির সামনে থেকে হটিয়ে নিজের কাছে ডেকে এনে বলেন,

১. এখানে আসহাবে কাহফের কুকুরের মর্যাদার প্রতি ইঙ্গিত করা হয়েছে।

انالك شئت ام ابيت وانت لى شئت ام ابيت (হে 'ওমর!) আমি তোমার, তুমি চাও আর নাই চাও; আর তুমি আমার, তুমি চাও আর নাই চাও এবং বাল'আম বাউরের-যে ছিল নিকট ও পরিচিতজন, ইসম্মে আ'যম-এর মহামূল্যবান খেলাত দ্বারা যাকে ভূষিত করা হয়েছিল-মসজিদ থেকে বাইরে টেনে এনে কুকুরের লম্বা সারিতে বেঁধে দেওয়া হয় এবং বলা হয় فَمَثَلُهُ كَمَثَلِ الْكَلْبِ اِنْ تَحْمِلُ عَلَيْهِ يَلِثُ (তাদের অবস্থা কুকুরের মত হয়ে গেছে। যদি তুমি তাদের ওপর হামলা কর তাহলে তারা জিভ বের করে হাঁপায়, আর যদি তাদের নিজেদের অবস্থার ওপর ছেড়ে দেওয়া হয় তবুও তারা হাঁপায়)। কখনো শত সহস্র প্রকারের বাল-মুসীবত ও দুর্যোগ-তকলীফের নির্ভরম চাকা সেই মহান সত্তার সন্ধান-ভিখারীদের অতৃপ্ত হৃদয়-মনের ওপর দিয়ে চালিয়ে দেন, আবার কখনো কখনো হাযার হাযার বিরাট পবিত্র ও মর্যাদামণ্ডিত স্থানের অধিবাসীদেরকে (অর্থাৎ ফিরিশতাদেরকে) তার অভ্যর্থনায় পাঠিয়ে দেন এবং অত্যন্ত মেহেরবানী ও হৃদয়গ্রাহিতার সঙ্গে তাকে নিজের কাছে ডেকে নেন। কখনো-বা পাহাড়সম গুনাহরাজিও মাফ করে দেন, আবার কখনো একটি সিকি পরিমাণও ছেড়ে দেন না। কখনো বেহেশতের সদর মকামে স্থান দেন, আবার কখনো এমনভাবে বাইরে নিক্ষেপ করেন যে, দরজার ওপর থাকতেও অনুমতি দেন না। এখানে জ্ঞান ও বুদ্ধি থাকে আনতপ্রায় আর পীর-মুরীদ দেওয়ালে অংকিত চিত্রের ন্যায়। এখানে চান এবং তাই ফরসালা করেন যা তিনি ইচ্ছা করেন)-এর বহিঃপ্রকাশ।

মহা করুণা সিঙ্কুর প্রবল উচ্ছ্বাস

যিনি পরমুখাপেক্ষী নন ও যিনি সকল অভাবমুক্ত-সেই মহান আল্লাহর শান, তাঁর সাধারণ ইচ্ছাশক্তি, কুদরতে কামিলা, প্রবল প্রতাপ ও পরাক্রমশীলতা সম্পর্কে ওপরে যে সব উদ্ধৃতি দেওয়া হয়েছে, সব অধ্যয়ন করবার পর মানুষের ওপর একটি ভীতিকর অবস্থার সঞ্চার হয় এবং এটা কিছুমাত্র আশ্চর্য নয় যে, একজন একনিষ্ঠ ও দৃঢ়-বিশ্বাসী ব্যক্তির যবান থেকে, যাকে আল্লাহ পাক লেখনী ও তাৎপর্য বিশ্লেষণ শক্তির পুরোটাই দান করেছেন, পাঠকের ওপর নিরাশার আবহওয়া বিরাজ করতে পারে (আর এটা আল্লাহর অভিপ্রেত নয়)। 'উলামায়ে রব্বানী এবং নায়েবে রাসূল ও নবীগণ সুসবংবাদদানকারী ও ভীতি প্রদর্শনকারী

হিসেবে আদর্শ নমুনা হয়ে থাকেন এবং তাঁরা আল্লাহর বান্দাহগণকে তাঁর রহমত থেকে নিরাশ করেন না, বরং তাদের উৎসাহ ও মনোবল বাড়িয়ে থাকেন এবং আমল ও ক্রমাগত প্রচেষ্টা চালাতে উৎসাহিত করেন। এটাই আখিয়া 'আলায়হিমুস-সালামকে দুনিয়ায় পাঠাবার এবং তাঁর নায়েবগণের দা'ওয়াত ও সকল চেষ্টা-সাধনার আসল লক্ষ্য ও উদ্দেশ্য। তাই গৌরব মহিমার সঙ্গে সৌন্দর্য এবং পরাক্রমশালীতার সঙ্গে ক্ষমাশীলতার শানও তেমনি জোরের সাথে বর্ণনা করা হয়েছে। যেমন :

رَحْمَتِي وَسِعَتْ كُلَّ شَيْءٍ
 قُلْ يَا عِبَادِيَ الَّذِينَ أَسْرَفُوا عَلَىٰ أَنفُسِهِمْ لَا تَقْنَطُوا مِن رَّحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا إِنَّهُ هُوَ الْغَفُورُ الرَّحِيمُ

(বল, হে আমার বান্দাহ সকল! যারা নিজেদের নফসের ওপর বাড়াবাড়ি করেছে, আমার রহমত থেকে নিরাশ হয়ো না। নিশ্চয়ই আল্লাহ সকল গুনাহরাজিই মাফ করবেন। কেননা একমাত্র তিনিই ক্ষমাশীল, দয়ালু)-এর বিস্তারিত বিবরণ তেমনি অলংকার ও বাগ্মিতা প্রয়োগের মাধ্যমে তিনি দিয়েছেনঃ

হে আমার ভ্রাত! আল্লাহ তা'আলার অপার করুণাসিক্তে যখন কারামত ও মাগফিরাতে উত্তাল চেউ ওঠে তখন সমস্ত পদস্বলন ও পাপরাশিই বিলীন ও ধ্বংস হয়ে যায়, সব দোষ-ত্রুটিই বুদ্ধিমত্তায় পরিণত হয়। আর তা এজন্য যে, পদস্বলন ও নাফরমানী ক্ষণস্থায়ী ও ধ্বংসশীল এবং আল্লাহর রহমত চিরন্তন। ক্ষণস্থায়ী ও ধ্বংসশীল বস্তু চিরন্তন ও নিত্য বস্তুর মুকাবিলা কী করে করতে পারে? এই মুঠিভর মাটির সারাটা ভিত্তি রহমতের ওপরই তো! অন্যথায় আমাদের এই অস্তিত্বের এই কালিমাময় পশমী কবুল এবং আমাদের নাপাক মাটির এই বিন্দুর কী ক্ষমতা ছিল যে, রাজাধিরাজের বিস্তৃত আঁচলের ওপর কদম রাখে? কতই না পানশালার অধিবাসী মদ্যপায়ী মাতাল-যাদের চেহারার ওপর শয়তান কালি ঢেলে দিয়েছে এবং যাদের কিসমতের চারা প্রবৃত্তিজাত কামনা-বাসনার আবর্জনা স্তূপে গজিয়েছে, আকস্মিকভাবে প্রেরিত দূত এসে হাথির হয়েছেন আল্লাহ তা'আলার দরবার থেকে তার কবুলিয়তের বার্তা নিয়ে এবং বলছেন- তোমার সাথে আমার কিছু কথা বলার রয়েছে।^১

সাধারণ প্রতিদান

হযরত মাখদুম মুনাযরী (র) চিঠির প্রাপকের উৎসাহ ও মনোবল বাড়িয়ে দেন, অবস্থার সংস্কার ও সংশোধন এবং আল্লাহর রহমতের এমনই আশ্রয় তার ভেতর জন্মিয়ে দেন যেন শাহী দস্তুরখান তাকে নির্বাচিত করে রেখেছে এবং সারাটা দুনিয়াই তাঁর সাধারণ প্রতিদান ও পারিতোষিক আর রহমতের প্রবল জোয়ারে ভাসছে। এখানে কারুর বঞ্চিত হবার কোন প্রশ্নই নেই। কেননা এখানে খোদ প্রেমাপ্পদই তার সন্ধানপ্রার্থী ও আকাঙ্ক্ষী। অন্যথায় কোথায় এই যালিম, মূর্খ ও ধ্বংসশীল মানব- আর কোথায় সেই পবিত্র মহান সত্তা। لَيْسَ كَمِثْلِهِ تَائِرٌ تَائِرٌ অনুরূপ আর কোন সত্তা নেই।

অনুগ্রহের দরোজা খোলা রয়েছে আর দস্তুরখান সামনেই রয়েছে পাতা। জলদি কর এবং নিজেকে তার মধ্যে शामिल করে নাও। হে ভ্রাতা! মানুষ কী করে মানুষকে চাইবে? কিন্তু অসীম সেই অনুগ্রহের ভাণ্ডার-তা প্রভুকে যেমন পরিত্যাগ করে না, তেমনি পরিত্যাগ করে না গোলামকেও। বিত্ত-সম্পদের মালিককে যেমন ছেড়ে দেয় না, তেমনি ছেড়ে দেয় না বিত্তহীন ফকীরকেও। যেমন সূর্য যখন তার উদয় পথে এসে দেখা দেয়, যদি সমস্ত দুনিয়াবাসী সাহসে কোমর বাঁধে যে, তার উজ্জ্বল নূরের একটি বিন্দু পরিমাণও সে হাতে উঠিয়ে নেবে, তাতে সে সক্ষম হবে না। কিন্তু সে স্বয়ং স্বীয় বদান্যতা ও অনুগ্রহ বিতরণের সাধারণ নীতি অনুসারে যেমন করে শাহী-প্রাসাদ ও আমীর-উমারার বাসগৃহের উপর চমক সৃষ্টি করে, তেমনি গরীব ও অসহায় লোকদের দুঃখের কুঁড়ে ঘরকেও আলোক-উদ্ভাসিত করে তোলে। তুমি পানি ও মাটির দিকে দৃষ্টি নিক্ষেপ কর না, সেই সম্পদ ও সৌভাগ্যের দিকে তাকাও, তাকাও يُحِبُّهُمْ وَيُحِبُّونَهُ (আল্লাহ তাদেরকে ভালবাসেন আর তারাও আল্লাহকে ভালবাসে)-এর নির্দেশের প্রতি। এক জায়গায় বলেন : اللَّهُ وَلِيُّ الَّذِينَ آمَنُوا (আল্লাহ ঈমানদারগণের বন্ধু), আবার অন্যত্র বলেন- وَسَقَاهُمْ رَبُّهُمْ (আর তাদের 'রব' তাদেরকে পান করান)। আল্লাহর মুকার্‌রীব ফিরিশতাগণও এই 'ইযুযত ও খেলাত লাভে সক্ষম হয়নি যা তোমরা হাসিল করেছে। ফেরেশতাকুল মুকার্‌রীব (নেকট্যপ্রাপ্ত) ও নিষ্পাপ, পাক ও পবিত্র, নিত্য তসবীহ পাঠকারী ও পবিত্রতা ঘোষণাকারী এবং বিরাত রূহানী শক্তিসম্পন্ন; কিন্তু পানি ও ফুলের ব্যাপারই আলাদা।

দয়ালু সমালোচক

রহমতের এই ব্যাপকতা ও বিস্তৃতি এবং খোদ দয়ালু সত্তার সহায়তা, প্রতিকারের উপায় ও সমালোচনার ভিত্তিতে তিনি বড় বড় পাপে লিপ্তদেরকে দাওয়াত দেন যেন তারা আল্লাহর সান্নিধ্যে ও নৈকট্যে ফিরে আসে এবং খাঁটি অন্তরে তওবাহ করে স্বীয় কিসমত (ভাগ্য) ও স্বীয় হাকীকতের ভেতর বৃহৎ থেকে বৃহত্তর পরিবর্তন ঘটিয়ে নেয়। তিনি এই সুযোগে গুনাহগারদের এবং ঐসব মূল্যহীন বস্তুকে স্মরণ করিয়ে দেন যাদের ও যেসবের দেখতে দেখতে ভাগ্যই পাল্টে গেছে এবং মূল্যহীন বস্তুও অমূল্য বস্তুতে পরিণত হয়েছে। গুনাহর মাত্রা ও পরিমাণ যত বেশিই হোক না কেন, আল্লাহর রহমত তার থেকেও অনেক বেশি বিস্তৃত, ব্যাপক, শক্তিশালী ও বিজয়ী। সওদাকৃত বস্তু যতই দোষক্রটি ও খুঁতযুক্ত হোক না কেন, যখন কটুর সমালোচক খরিদদার তা খরিদ করে নিয়েছে, তখন আর তাতে দোষ কী থাকে আর কারইবা এত স্পর্ধা যে, তার ভেতর থেকেও দোষক্রটি খুঁজে বের করে?

তিনি বলেন :

হে ভ্রাত! তুমি যতই পাপে লিপ্ত হয়ে থাক না কেন, তওবার আঁচল আঁকড়ে ধর এবং আল্লাহর রহমতের প্রতি আশাবাদী হয়ে যাও। কেননা তুমি ফিরাউনের দরবারের যাদুকরদের থেকে নিশ্চয়ই অধিক পাপী নও আর আসহাবে কাহুফের কুকুরের চেয়ে বেশী ময়লা ও অপবিত্রও নও। তুর পাহাড়ের পাথরের তুলনায় অধিকতর নিস্প্রাণ জড় পদার্থ অথবা 'উসতুনে হান্নানা'^১ থেকে বেশি মূল্যহীনও তুমি নও।

তওবার তা'ছীর

তওবাহ দ্বারা মানুষের অবস্থার পরিবর্তন এবং তার তরক্কী ও কামালিয়াত হাসিল হয়ে থাকে। তওবার অবস্থা ও তার শর্তাবলী বর্ণনা করতে গিয়ে তিনি লিখেছেন :

১. "উসতুনে হান্নানা" মসজিদে নববীর সেই খুঁটি যার ওপর ঠেস দিয়ে দাঁড়িয়ে রসূল (স) খুতবাহ দিতেন। মিশরে নববী নির্মিত হবার পর তার ওপর দাঁড়িয়ে খুতবাহ দিলে বিচ্ছেদ ব্যাথায় তার থেকে অক্ষুট স্বরে কান্নার আওয়াজ পাওয়া গিয়েছিল।

এক প্রকারের তওবাহ এভাবে হয় যে, মুরীদ তাতে অনুতপ্ত হয়। এই তওবাকে 'গরদিশ' (আবর্তন, বিবর্তন ও ঘূর্ণন) বলা হয় অর্থাৎ আবর্জনা ও পাপ-পংকিলভার অবস্থা থেকে পবিত্র অবস্থায় সে পরিবর্তিত হয়ে গেল। গির্জা ছিল-মসজিদে রূপান্তরিত হল। পুতুল পূজার ঘর ছিল-ইবাদতখানায় পরিণত হল। বিদ্রোহী ও অবাধ্য ছিল, মানুষ হয়ে গেল। মাটি ছিল-সোণায় পরিণত হল। ছিল অন্ধকার রাত্রি, দিবালোকের ন্যায় উদ্ভাসিত হয়ে উঠল। সেই মুহূর্তে ঈমানদারের হৃদয়-মানসে প্রদীপ্ত সূর্য উদিত হয় এবং ইসলাম আপন সৌন্দর্য তুলে ধরে এবং সে (তওবাকারী) মা'রিফতের রাস্তা খুঁজে পায়।

অষ্টম অধ্যায় মানবতার সম্মান ও মর্যাদা

একটি বিপ্লবাত্মক দা'ওয়াত

কোন গ্রন্থের সর্বাপেক্ষা প্রভাব সৃষ্টিকারী অংশের একটি অংশ সেটাই যেখানে মানুষের মর্যাদা ও মকাম, মানুষের অন্তঃকরণের উচ্চতা ও প্রশস্ততা, তার যোগ্যতা ও তরফদার সজাবনা এবং মুহব্বতের কদর ও মূল্য তুলে ধরা হয়।

এ বিষয়ে কবিতায় হাকীম সানাঈ (র), খাজা ফরীদুদ্দীন 'আত্তার (র) এবং ম্রাওলানা রুম (র) অনেক কিছু বলেছেন। কিন্তু গদ্যে হযরত মাখদুমুল মুলুক বিহারী (র)-এর 'মকতুবাত' (চিঠিপত্রাদি) থেকে অধিকতর শক্তিশালী, অলংকারপূর্ণ ও প্রভাবশালী কোন লেখা আজও আমার নজরে পড়েনি। এগুলি পড়ে মানুষের অন্তরে আস্থা, মনোবল, সাহসিকতা, আশা-ভরসা, উন্নতি ও উর্ধ্বগতি এবং সেই চূড়ান্ত কামালিয়াতের স্তর পর্যন্ত পৌঁছবার একটা তীব্র আকাঙ্ক্ষার সৃষ্টি হয় যা একমাত্র মানুষের জন্যই নির্ধারিত এবং সেই হতাশা ও নিরাশা, স্বপ্ন মনোবল ও অনাস্থা, উদাসীনতা ও লজ্জাশীলতা বিদূরিত হয় যা কতক অদূরদর্শী ও মোটা বুদ্ধির প্রচারকরা সৃষ্টি করে দিয়েছিল এবং যার পরিণতিতে মানবতা উলঙ্গ-অনাবৃত ও সংশোধনের অযোগ্য একটি স্বাভাবিক ত্রুটি এবং ক্ষতিপূরণের অতীত একটি বিচ্ছৃতি ও অপরাধে পরিণত হয়ে গিয়েছিল এবং গুহা ও প্রাচীর গাত্র থেকে এই আওয়াজই আসতে শুরু করেছিল وجودك ذنب و يقاس به ذنب (তোমার অস্তিত্বই একটি পাপ যার সমকক্ষ পাপ আর একটিও নেই) এবং এটাই বুঝানো হচ্ছিল যে, মানুষের উন্নতির পথে খোদ মানবতা সর্বাপেক্ষা বড় প্রতিবন্ধক ও একটি দুস্তর বাঁধা যাকে রাস্তা থেকে হটানো মানুষের জন্য সর্বাধিক জরুরী। মানুষ নিজেকে ফিরিশতাদের ঈর্ষা ও সিঁজদার পাত্র হিসেবে মনে করার পরিবর্তে ফিরিশতাদের ঈর্ষা করতে শুরু করেছিল এবং জড় প্রকৃতি ও মানবীয় বৈশিষ্ট্যসমূহ থেকে মুখ ফিরিয়ে ও বিদ্রোহ ঘোষণা করে নিজের অভ্যন্তরে ফিরিশতাদের গুণাবলী সৃষ্টি এবং তাদের (ফিরিশতাদের তকলীদ অঙ্ক অনুকরণ) করার খাহিশমন্দ হয়ে পড়েছিল।

এরূপ পরিবেশে হযরত শায়খ শরফুদ্দীন ইয়াহুইয়া মুনাযরী (র) একটি অচেনা আওয়াজ উঠালেন এবং এরূপ উৎসাহ-উদ্দীপনা সহকারে ও অলংকারিকভাবে মানবতার সমুন্নতি, মানুষের উচ্চ মর্যাদা ও প্রেমময়তা এবং তাঁর 'খলীফাতুল্লাহ' হবার ঘোষণা দিলেন এই বিষয়টিকে তাঁর "মকতূবাতে" এত পুনরাবৃত্তি করলেন এবং বিভিন্ন কায়দা-কানুন ও প্রথা-পদ্ধতিতে একে বর্ণনা করলেন যে, যদি সেগুলি এক জায়গায় জমা করা হয় তাহলে এ বিষয়ে এমন একটি সাহিত্য ভাণ্ডার গড়ে উঠবে যা পড়ে মানুষের মন উৎসাহ-উদ্দীপনা ও উত্তেজনার প্রাবল্যে পরিপূর্ণ হয়ে যাবে এবং মানুষের বিমর্ষ অভ্যুৎকরণে ও মৃতপ্রায় দেহে নবজীবনের সঞ্চার হবে আর স্বীয় মানবতা ও মনুষ্যত্বের জন্য সে গর্ববোধ করবে।

শ্রষ্টার বিশেষ দৃষ্টি

এক পত্রে তিনি লিখেছেন যে, অস্তিত্ব ও সৃষ্ট বস্তুর সংখ্যা তো অনেকই ছিল এবং একটি অপেক্ষা অন্যটি শ্রেষ্ঠ; কিন্তু প্রেমাম্পদতা ও খিলাফতের গর্বপূর্ণ খেলাত দুর্বলভাবে সৃষ্ট মানুষের দেহ-কাঠামোতেই যেন যথার্থ মানাচ্ছিল। মানুষ নিশ্চয়ই ফিরিশতাদের মত 'মা'সুম' (নিষ্পাপ) ছিল না। তার পক্ষে গুনাহতে লিপ্ত হওয়া কিংবা তার থেকে কোন অন্যায় ঘটে যাওয়াও বিচিত্র কিছু নয়। কিন্তু সৃষ্টি জগতের মহান শ্রষ্টার কৃপাদৃষ্টি সব কিছুই শুধরে নেবার জন্য যথেষ্ট এবং এটা সেই 'পাসঙ্গ' (পাথর যা দাঁড়ি-পাল্লার উভয় দিক ঠিক রাখার জন্য দেওয়া হয়) যা পাল্লার যে দিকেই রাখা হবে সে দিকেই নিঃসন্দেহে ভারী হবে এবং ঝুঁকে যাবে। তিনি বলেন :

অস্তিত্বমান ও সৃষ্ট বস্তুর সংখ্যা তো বেশমার, কিন্তু কোন অস্তিত্বশীল বস্তুর সঙ্গেই সেই কায়কারবার ছিল না, যা ছিল পানি-মাটি মিশ্রিত এই জড়পিণ্ডটির সঙ্গে। যখন তিনি চাইলেন অর্থাৎ আল্লাহ রাব্বুল 'ইয্যতের যখন মঞ্জুর হল যে, মাটির এই জড়পিণ্ডটিকে অস্তিত্বময় রূপ দান করবেন এবং খিলাফতের মহান দায়িত্বে সম্মানীত করবেন, উর্ধ্বজগতের ফিরিশতাকূল তখন সম্বরে আরম্ভ করল, "আপনি যম্বীনের বৃকে এমন একটি সৃষ্টিকে খলীফা বানিয়ে পাঠাতে চাচ্ছেন যারা ফিতনা-ফাসাদ সৃষ্টি করবে।" মেহেরবান চিরন্তন সত্তা জবাব দিলেন, **ليس في الحب مشورة** অর্থাৎ প্রেম কোনরূপ পরামর্শের অপেক্ষা রাখে না, আর 'ইশুক ও তদবীরও একত্র হয় না। তোমাদের তসবীহ ও তাহলীলের কী মূল্য যদি তা

আমার দরবারে কবুল না হয়। আর সে সব গুনাহেই বা কী ক্ষতি যদি আমার গৌরব-মহিমা ও অনুগ্রহ বিতরণকারী ক্ষমা ও মার্জনার পরশ তার উপর হস্ত বুলিয়ে দেয়।

فَاُولٰٓئِكَ يَبْدِلُ اللّٰهُ سَيِّئَاتِهِمْ حَسَنَاتٍ -

“অতঃপর ঐ সব লোকদের পাপরাশিকে আল্লাহ পাক সত্ত্বর পুণ্যরাজিতে পরিবর্তিত করে দেবেন।” তবে হ্যাঁ! তোমরা চিরদিনই সোজা-সরল রাস্তায় চলতে অভ্যস্ত আর তারা চলবে চতুর্দিকে। কিন্তু যখন আমরা তাদেরকে চাইলাম তখন রহমতের ফরাশ তাদের জন্য বিছিয়ে দিলাম। যদি গুনাহ তাদের কপালে কোন কলংক রেখা এঁকে দেয়, তাহলে আমার মেহেরবানী তা মুছে দেবে। তুমি শুধু দেখছ যে, বিভিন্ন কার্যকলাপে আমি তাদের কাম্য। কিন্তু এটা দেখছ না যে, মুহব্বতের ব্যাপারেও সে (মানুষ) আমার প্রার্থিত ও কাম্য। কোন কবি কী সুন্দরই না বলেছেন :

وإذا الحبيب أتى بذنب واحد

جاءت محاسنه بالف شفيع

অর্থাৎ “আমার ‘হাবীব’ (প্রেমিক, বন্ধু) যখন একটি গুনাহ করে, তখন তার সৌন্দর্য ও গুণাবলী হাজারো সুপরিশপত্র নিয়ে হাবির হয়।”

মুহব্বতের আমানত

অন্য এক স্থানে মানুষের প্রেমময়তা ও বিশেষত্বের বর্ণনা দিতে গিয়ে বলেছেন,

মুহব্বতের সঙ্গে অন্য মাখলুকাতের কোন যোগসূত্র ছিল না। কেননা তাদের সাহসিকতা ও হিম্মত উন্নত ছিল না। ফিরিশতাদের কাজ-কর্মে তোমাদের যে ঐক্য ও সামঞ্জস্য দৃষ্টিগোচর হয়, তা এই কারণেই যে, তারা প্রেমের বাণীর লক্ষ্যস্থল নয়। আর মানুষের রাস্তার মধ্যে যে উত্থান-পতন দৃষ্টিগোচর হয় তা এইজন্য যে, তাদের সঙ্গে মুহব্বতের ব্যাপার রয়েছে। অতএব যার স্বাণেন্দ্রিয়ের শেষভাগ পর্যন্ত মুহব্বতের খোশবু পৌঁছেছে-তার উচিত শান্তি ও নিরাপত্তাকে সালাম জানানো এবং নিজেকে নিজ থেকে বিদায় দেওয়া। কেননা মুহব্বত কোন বস্তুরই পরওয়া করে না। আদম (আ)-এর কিসমত ও সৌভাগ্যের তারকা যখন উদিত হল, তখন সারা সৃষ্টি জগতে সৃষ্টি হল একটি উত্তাল তরঙ্গ। কথকরা বলল, এত হাবার বছরের তসবীহ ও তাহলীলকে উপেক্ষা করা হল আর মাটির পুত্তলি আদম (আ)-কে করা হল

মর্যাদামণ্ডিত এবং আমাদের ওপর দেওয়া হল তাঁকে প্রাধান্য ও অগ্রাধিকার।
 আওয়াজ ভেসে এল, তোমরা মাটির এই বহিরাঙ্গ দেখো না, সেই পবিত্র
 অমূল্য রত্নটিকে দেখ যা তার অভ্যন্তরে গচ্ছিত রাখা হয়েছে। وَيُحِبُّهُمْ وَيُحِبُّونَهُ
 মুহব্বতের জ্বলন্ত আগুন তাদের অন্তঃকরণে লাগানো হয়েছে।”
 অপর এক পত্রে এই বৈশিষ্ট্যকে বর্ণনা করতে গিয়ে তিনি লিখেছেন :
 আল্লাহ্‌পাক আঠারো হাজার 'আলম পয়দা করেছেন। কিন্তু এসব মাখলুকাত
 হৃদয়ের জ্বালা ও মুহব্বতের বাণীর সঙ্গে সম্পর্কিত নয় এবং এর থেকে কোন
 অংশও তারা লাভ করেনি। এই মূল্যবান সম্পদ একমাত্র মানুষের হিস্যায়
 এসেছে। অস্তিত্বশীল বস্তুর অন্যান্য শ্রেণীর মধ্যে কারুর ভাগ্যেই এই
 সৌভাগ্য লাভ ঘটেনি।

হাসিলে ওজুদ : মানুষের অস্তিত্ব লাভ

অপর আর এক চিঠিতে পানি ও মাটির 'কিসমত' (ভাগ্য) ও 'ইয্যত
 (সম্মান)-এর কথা বলতে গিয়ে তিনি বলেছেন,

“হে আমার ভ্রাতা! মাটি-পানির সৌভাগ্য কিছুমাত্র কম নয় এবং আদম (আ)
 ও আদম বংশধরের মরতবা কোন মায়ুলী ব্যাপার নয়। 'আরশ-কুরসী, লওহ
 ও কলম, আসমান-যমীন সবই মানুষের বদৌলতেই। উস্তাদ আবু 'আলী
 দাক্কাক (র) বলেন যে, আল্লাহ তা'আলা আদম (আ)-কে স্বীয় খলীফা
 বলেছেন, হযরত ইব্রাহীম (আ)-কে খলীলুল্লাহ উপাধি দান করেছেন
 - وَأَتَّخَذَ اللَّهُ إِبْرَاهِيمَ خَلِيلًا - এবং হযরত মুসা (আ)-এর শানে ইরশাদ
 হয়েছে : وَأَسْطَفْنَاكَ لِنَفْسِي - অর্থাৎ আমি তোমাকে আমার নিজের জন্য
 মনোনীত করেছি; আর মু'মিনদের সম্পর্কে বলা হচ্ছে : وَيُحِبُّهُمْ وَيُحِبُّونَهُ
 (আল্লাহ্‌ তাদের ভালবাসেন আর তারাও আল্লাহকে ভালবাসে)। লোকেরা
 বলেছে যে, যদি এই প্রেম ও মুহব্বতের বাণীর সঙ্গে দিলের কোন সম্পর্ক না
 থাকত তবে 'দিল্'কে দিল্ বলার কোনই অধিকার থাকত না। আর
 মুহব্বতের সূর্ব যদি আদম (আ) এবং তাঁর বংশধরদের মনে-প্রাণে আলো ও
 কিরণ দান না করত, তবে আদম (আ)-এর ব্যাপারটাও অন্যান্য অস্তিত্বশীল
 বস্তুর মতই হত।

আমানতের বোঝা

মানুষের উন্নত মর্যাদা ও তার বৈশিষ্ট্য সেই আমানতের বোঝা কাঁধে উঠানোরই পরিণতি, যা কবুল করতে আসমান-যমীন ও পাহাড়সমূহ বিনীতভাবে অক্ষমতা প্রকাশ করেছিল এবং এই যালিম ও জাহিল মানব তাকে আপন দুর্বল কাঁধে উঠিয়ে নিয়েছিল। তার এই সহায়হীনতা কাজে লাগল। মাটির বিন্দু চিন্তা করল যে, যদি এই বিরাট ও মহান দায়িত্বের যথাযথ হুক আদায়ে কোনরূপ অব-হেলা ও বিচ্যুতি ঘটে যায়, তবে তার কাছে এমন কীই বা আছে যা (শান্তিস্বরূপ) ছিনিয়ে নেওয়া হবে।

পানি ও মাটির মরতবা অতি উচ্চ এবং তার হিম্মত অতি বৃহৎ। দারিদ্র্য, ভিক্ষাবৃত্তি, সম্পদহীনতা যদিও তার জড়পিণ্ডে অনুপ্রবিষ্ট, তবুও যখন আমানতের প্রদীপ্ত ভাস্কর আসমানের বুকে স্বীয় অস্তিত্বের প্রোজ্জ্বল ঘোষণা দিল, জগতের ফিরিশতাকুল—যারা সাত লক্ষ বছর ধরে আল্লাহপাকের তসবীহ ও পবিত্রতা গোষণার ফুল্লকাননে স্বীয় খোরাক সংগ্রহ করছিল এবং *نَحْنُ نُسَبِّحُ بِحَمْدِكَ وَنُقَدِّسُ لَكَ* (আমরা তোমার তসবীহ পাঠ করছি এবং আমরাই তোমার পবিত্রতা ঘোষণা করছি)—এর সরব ধ্বনি উচ্চারণ করছিল, অতি বিনীতভাবে নিজেদের অসহায়তা প্রকাশ করল এবং দুর্বলতার স্বীকৃতি দিল *فَابَيِّنْ أَنْ يَخْمَلْنَهَا* 'অতঃপর তারা দায়িত্ব ও কর্তব্যের বোঝা বহন করতে অক্ষমতা প্রকাশ করল। আসমান বলল, আমার গুণ হল আমার উচ্চতা যমীন বলল, আমার খেলাত (পুরস্কার) হল আমার মাটিময় বিছানা; পাহাড় বলল, আমার পদ তো পাহারাদারী এবং এক পায়ের ওপর মহান স্রষ্টার নির্দেশের অপেক্ষায় দাঁড়িয়ে থাকা; ধন-সম্পদ তথা রত্নরাজি বলল, আমার সীমার মধ্যে যেন চুলও প্রবেশ না করতে পারে। এরপর নির্ভীক মাটির বিন্দুটি দারিদ্র্য ও অনটনের আস্তিন থেকে আবেদনের হাতখানি বের করল এবং দায়িত্ব ও কর্তব্যের মহান আমানতের বোঝাকে বুকে উঠিয়ে নিল। চিন্তা করল না ইহলোক-পরলোকের কোন বস্তুরই। সে বলল, আমার কাছে আছেই বা কী যা ছিনিয়ে নেওয়া হবে। যখন কোন বস্তুরকে হয় ও লাঞ্ছিত করা হয় তখন তাকে মাটির সঙ্গে মিশিয়ে দেওয়া হয়। আমি মাটি, আমাকে কার সঙ্গে মেশানো হবে? সে পুরুষোচিত দৃষ্ট পদভঙ্গীতে সম্মুখে অগ্রসর হল এবং সেই বোঝা যা সপ্তাকাশ ও যমীন বহনে সাহসী হয়নি—হাসি-খুশির সঙ্গে উঠিয়ে নিল এবং 'আরও অতিরিক্ত ও বেশি কিছু আছে কী'—এর সরব ধ্বনি উচ্চারণ করল।

মাটির ঢেলার সৌভাগ্য

অন্য এক জায়গায় লিখেছেন : ‘মুহব্বতের বাজপাখীর আদম (আ)-এর পবিত্র বক্ষ ব্যতিরেকে আর কোথাও নীড় মেলেনি। আসমানের উচ্চতা এবং ‘আরশ-কুরসীর বিশালতা পাড়ি দিয়ে সে প্রেমিকের হৃদয়কে স্বীয় বাসা বানিয়েছে।

একই আলংকারিক ও কারুকার্যমণ্ডিত কলম দিয়ে তিনি লিখেছেন :

পানি ও মাটিকে কম (মূল্যের) মনে ভেবো না। যা কিছু কামালিয়াত পানি ও মাটির ভেতরেই আছে এবং যা কিছুই দুনিয়ার এসেছে, মাটি ও পানির সঙ্গেই এসেছে। এ সব ভিন্ন আর যা কিছুই দৃষ্টিগোচর হয়, তা দেওয়াল চিত্র ছাড়া আর কিছুই নয়।”

অন্য এক স্থানে মানুষের মরত্বা বর্ণনা করতে গিয়ে এবং তার অবস্থার ওপর তার স্রষ্টার অনুগ্রহ ও কৃপা এবং মুহব্বতের দৃষ্টি বর্ণনা করতে গিয়ে লিখেছেন :

হে ভ্রাতা! স্রষ্টার এই মাটি ও পানির সঙ্গে একটি বিশেষ লেনদেনের ব্যাপার এবং বিশেষ অনুগ্রহ রয়েছে। একটি বর্ণনায় এসেছে যে, যখন মালাকুল মওত এই উম্মতের কারও জান কবর করেন, তখন মহান মর্যাদার মালিক রাব্বুল ‘ইয্যত তাকে লক্ষ্য করে বলেন : আগে তাকে আমার সালাম পৌছাও, তার পরেই তার রুহ কবর কর। তুমি কুরআন মজীদে পড়ে থাকবে যে, কিয়ামতের দিন আল্লাহ পাক কোন প্রকার মধ্যস্থতা ছাড়াই মু‘মিনদের সালাম বলবেন - **سَلَامٌ قَوْلًا مِنْ رَبِّ رَحِيمٍ** অর্থাৎ সালাম! শান্তি! দয়ালু প্রতিপালকের উরফ থেকে বাণী।’ যেমনি লা-হাওলাহা ইল্লাল্লাহ’-তঁার কালাম, চিরন্তন- তঁার সালামও তেমনি চিরন্তন। যদি মাটির এই মুষ্টির সঙ্গে এই চিরন্তন অনুগ্রহ ও কৃপাদৃষ্টি না হত তাহলে শেষ দিবসে তাকে সালামও করা হত না।

আল্লাহর গুণ-রহস্যের ধারক ও বাহক

অপর এক চিঠিতে মানুষের শ্রেষ্ঠত্ব, তার খিলাফতের পদ এবং তার উচ্চ মনোবলের পেছনের গোপন-রহস্য বর্ণনা করতে গিয়ে লিখেছেন :

মানুষ আল্লাহর গুণ রহস্যের অধিকারী এবং তাকে **وَنَفَخْتُ مِنْ رُوحِي** (আর আমি ফুৎকার করলাম আমার রুহ)-এর সৌভাগ্য দ্বারা মণ্ডিত করা হয়েছে। রিসালত, আসমানী সহীফা এবং আল্লাহর দীদার লাভের ন্যায় মহামূল্যবান সম্পদ তারই বৈশিষ্ট্যাবলীর অন্তর্গত।

তিনি বলেন :

আল্লাহ তা'আলা আঠারো হাজার 'আলমের মধ্যে কোন শ্রেণীকেই মানব শ্রেণী অপেক্ষা অধিকতর উচ্চ মনোবলসম্পন্ন করে পয়দা করেন নি এবং কোন শ্রেণী সম্পর্কেই **نَفَخْتُ مِنْ رُوحِي** - এর ন্যায় ইরশাদ করেন নি, কোন শ্রেণীর মাঝেই বার্তাবাহক নবী প্রেরণ করেন নি, নাযিল করেন নি কারও প্রতি আসমানী কিতাব কিংবা কোন শ্রেণীকেই পাঠাননি সালাম। স্বীয় দীদাররূপ মহামূল্যবান নে'মত দিয়েও তিনি কাউকে ধন্য করেন নি। একমাত্রই মানুষই তো ছিল, সে স্বীয় মুহব্বতের শক্তি ও উচ্চ মনোবলের কারণে বিচ্ছেদের জ্বালা বহনে সক্ষম নয়। দুনিয়ার মাঝে তার দিলের পর্দা উঠিয়ে নিয়েছেন আর পরিণাম দিবসে তার চোখ থেকে উঠিয়ে নেবেন পর্দা। এরই পরিণতিতে দুনিয়ার ভেতর সে তাঁকে ভিন্ন আর কারও নিকট প্রার্থী নয় এবং পরলোকে তাঁর সৌন্দর্য ভিন্ন তার চোখ কিছুই দেখেনি। এই সবক'টারা মানবকুল **مَا زَاغَ الْبَصَرُ وَمَا طَغَى** (দৃষ্টিশক্তি আচ্ছন্ন হয় নাই এবং সে বিদ্রোহও করে নাই)-এর মকতবেই অধ্যয়ন করেছিল।

সিজদা ও ঈর্ষার পাত্র

অন্য এক জায়গায় মানুষের সেই মর্তবা বর্ণনা করতে গিয়ে, যার কারণে সে ফিরিশতাকুলের সিজদার এবং অন্যান্য তামাম সৃষ্টিকুলের ঈর্ষার পাত্রে পরিণত হয়েছিল, লিখেছেন :

হে আমার ভ্রাতা! যে বস্তু তোমাকে ফিরিশতাদের সিজদার এবং অন্যান্য সৃষ্টিকুলের ঈর্ষার পাত্রে পরিণত করল তা খুবই বিরাট। মানুষ স্বীয় মাটির অস্তিত্বে যতই ধূলি-ধূসরিত হোক না কেন, মৌলিক দিক দিয়ে এতখানি উজ্জ্বল, জ্যোতির্ময় ও পবিত্র যে, ফিরিশতাসুলভ আছর এবং মানবীয় কল্পনাবৃত্তি তার হাকীকত উপলব্ধি করতে অক্ষম ও দুর্বল। যখন এই অর্থের আলোকশিখা প্রোজ্জ্বলভাবে প্রতিভাত হয়ে ওঠে, তখন ফিরিশতাকুল হয়রান এবং আসমান চিন্তাকুল হয়ে পড়ে।

সতর্ক দিল

কিন্তু মানুষ ও মানব শ্রেণীর শ্রেষ্ঠত্ব ও বিশেষত্ব সেই এক টুকরো গোশতের কারণে- যাকে হৃদয় বলা হয় এবং হৃদয়ের কদর ও কীমত এবং জীবন ও জীবনীশক্তির মূল্য সেই রত্নের কারণে যাকে মুহব্বত বলে। দিল সম্পর্কে তিনি বলেন :

আল্লাহ পাক 'আরশ পয়দা করলেন আল্লাহর মুকাররবগণের নিকট সোপর্দ করলেন, বেহেশত পয়দা করলেন এবং রিদওয়ানকে তার পাহারাদারীর দায়িত্বে নিয়োজিত করলেন, দোযখ সৃষ্টি করলেন আর মালিককে তার দারওয়ান নিযুক্ত করলেন। কিন্তু মু'মিনের দিল যখন পয়দা করলেন, বললেন—'দিল' রাহমানের (কুদরতের) দুই অঙ্গুলীর মাঝখানে অবস্থিত।

(القلوب بين اصبعين من اصابع الرحمن) ^১

অপর একটি পত্রে তিনি দিলের বিশালতা, প্রশস্ততা ও শক্তি সম্পর্কে বর্ণনা করতে গিয়ে লিখেছেন :

যদি কোন বস্তু 'দিল' অপেক্ষা অধিকতর প্রিয় ও মূল্যবান হত তবে তিনি (আল্লাহ) তাঁর মা'রিফতের মণি-মুক্তারূপ সম্পদ তার ভেতরই রাখতেন। আল্লাহ পাকের সেই নির্দেশের এটাই অর্থ যে :

لايسعنى سمائى ولا ارضى ولكن يسعنى قلب عبدى

المؤمن -

অর্থাৎ "আসমানে আমার স্থান সংকুলান হয় না, সংকুলান হয় না আমার স্থান যমীনেও; কিন্তু মু'মিন বান্দাহর অন্তরে আমার স্থান সংকুলান হয়।" আসমান আমার মা'রিফতের উপযুক্ত নয়, যমীনও এর উপযোগী নয়; একমাত্র মু'মিন বান্দাহর 'দিল'ই এই পর্বত প্রমাণ দায়িত্ব ও কর্তব্যের পবিত্র আমানতের বোঝা কাঁধে উঠিয়েছে। রুস্তমের ঘোড়াই একমাত্র রুস্তমকে পিঠে বহন করার যোগ্যতা রাখে। কিন্তু আল্লাহ পাকের গৌরব মহিমা-সূর্য যখন পাহাড়ের ওপর-যার অপেক্ষা অধিকতর জমাট শিলাবৎ ও বৃহৎ অবয়বধারী কোন কিছুই জগতে নেই—একবার চমকাল, তখনই তা টুকরো টুকরো হয়ে গেল وَجَعَلَهُ رُكَاً আর সেই সূর্য তিনশো ষাটবার মু'মিনের দিলের ওপর চমকিত হয় আর সে هَلْ مِنْ مَزِيدٍ (আরও অধিক কিছু আছে?)—এর ধ্বনি উঠিয়ে থাকে আর ডেকে ডেকে বলে, الْغِيَاثِ - الْغِيَاثِ আমি পিপাসার্ত!

আমি পিপাসার্ত। ^২

১. ৪৩ নম্বর টিষ্ঠি।

২. ৩৮ নম্বর পত্র।

অধিকতর পরাজিত, অধিকার প্রিয়

'দিল'-এর একটি বিশেষত্ব এও যে, প্রতিটি বস্তুই ভেঙে যাবার পর মূল্যহীন হয়ে যায়-কিন্তু এটা যতবারই ভেঙে টুকরো টুকরো হয়-ততই তা অধিকতর মূল্যবান বিবেচিত হয়।^১ তিনি বলেন :

হে ভ্রাত! ভাঙা জিনিসের কোন মূল্য নেই, কিন্তু 'দিল' (অন্তর) যত টুকরো হয় ততই তা অধিক মূল্যবান বিবেচিত হয়। মুসা (আ) একবার অতি সংগোপনে আল্লাহকে জিজ্ঞেস করেছিলেন, **این اطلبك** - তোমাকে আমি কোথায় তালাশ করব? জবাব মিলেছিল : আমি সেই সমস্ত লোকের নিকট বেশি থাকি যাদের অন্তর আমারই কারণে ভেঙে টুকরো হয়ে যায়- **قال انا**

عند قلوبهم المنكسر -^২

মুহব্বতের রাজত্ব

অন্তরের পুঁজি হ'ল মুহব্বত আর মুহব্বত গোটা সৃষ্টি জগত ও সমস্ত সময়টাকে ঘিরে রেখেছে। ইহ জগত থেকে পরজগত পর্যন্ত এর প্রভাব অব্যাহত। হযরত মুনাযরী (র) বলেন :

মুহব্বতের বাণী তিনকাল (অতীত, বর্তমান ও ভবিষ্যত)-কেই ঘিরে রেখেছে। আদি, অন্ত ও মধ্যবর্তীতে এরই রাজত্ব। বিশেষজ্ঞগণ বলেন : এ জগত ও সে জগত সবই চাইবার জন্য। যদি কেউ বলে যে, সে জগত চাইবার জগত নয়। হ্যাঁ! তবে সালাত ও সিয়াম পালিত হবে না-কিন্তু চাইবার থাকবে। কিয়ামতের দিন তামাম হুকুম-আহকামের ওপর কলম 'মনসুখ' ও 'বাতিল' হয়ে যাবে, কিন্তু এই দু'টি জিনিস চিরদিনের তরে চিরকালের তরে থাকবে আর তা হল আল্লাহর জন্যই প্রেম এবং আল্লাহর জন্যই সমগ্র প্রশংসা।^৩

১. এটাকেই ইকবাল এভাবে বলেছেন :

نه بچا بچا که توڑ که اسمے ، ترا آئینه ہے

وہ آئینه جو شکستہ ہو وعریزتر ہے نگاہ آئینه ساز میں

২. ৪৬ নম্বর পত্র।

৩. ৪৬ নম্বর পত্র।

নবম অধ্যায়

বিশ্লেষণসমূহ ও উচ্চতম জ্ঞান

উচ্চতম ও সূক্ষ্ম জ্ঞান ও নিবন্ধসমূহ

হযরত শায়খ শরফুদ্দীন (র)-এর মকতূবাতে অমূল্য বিশ্লেষণ এবং উন্নত সূক্ষ্ম জ্ঞান ও নিবন্ধরাজির এমন একটি ভাণ্ডার রয়েছে যা হাকীকত ও মারিফতের খুব কম গ্রন্থেই মিলবে। এই গ্রন্থের স্থানে স্থানে এমন সব সূক্ষ্ম বিশ্লেষণ ছড়িয়ে ছিটিয়ে রয়েছে যা ব্যক্তিগত অভিজ্ঞতার নির্যাস, শত শত বছরের রিযাযত ও আল্লাহ-প্রদত্ত জ্ঞানেরই ফলশ্রুতি যা পড়বার পর উন্মত্ততা ও মিষ্টি অনুভূতির এমনই এক অবস্থার সৃষ্টি হয় যা বড় বড় আনন্দধন কোন সাহিত্য-কথিকা ও রসাল-কাব্য থেকে লাভ করা যায় না।

ওয়াহদাতুল শু শুহুদ

এই গ্রন্থে এমন কতক বিশ্লেষণও পাওয়া যায় যে সম্পর্কে বিজ্ঞজন মহলে প্রসিদ্ধি রয়েছে যে, তা কয়েক শতাব্দী পরের বিশ্লেষণ এবং যে শতাব্দীতে (অষ্টম শতাব্দী) হযরত মাখদুম (র) জীবিত ছিলেন, সেই শতাব্দীর কোন লোকই এর সঙ্গে পরিচিত ছিল না। এসব বিশ্লেষণের অন্যতম হল, “তওহীদে শুহুদী” বা “ওয়াহদাতুল শু শুহুদ”-এর মতবাদ। এই মতবাদ বিশ্লেষণের চর্চা বস্তুত হিজরী একাদশ শতাব্দী থেকে শুরু হয়। হযরত মুজাদ্দিদ আলফেছানী (র) যখন “ওয়াহদাতুল ওজুদ”-এর সমান্তরাল এর দাওয়াত ও বিস্তৃত ব্যাখ্যা-বিবরণী পেশ করেন এবং এ ব্যাপারে কোনই সন্দেহ নেই যে, তাঁর বক্তৃতা-বিবৃতি ও তবলীগ এবং তাঁর প্রচারের অবলম্বন-হযরত মুজাদ্দিদ আলফেছানী (র)-এরই দান এবং তিনিই এই মাসআলার ইমাম ও মুজাদ্দিদের মর্যাদা রাখেন। কিন্তু এটা দেখে বিস্মিত হতে হয় যে, দু’শো-আড়াই শো বছর পূর্বে মাখদুমুল যুলুক শায়খ শরফুদ্দীন ইয়াহুইয়া মুনারী (র)-এর মকতূবাতেও অত্যন্ত সুন্দরভাবে এই মাসআলার বর্ণনা মিলে। তিনি স্বীয় ব্যক্তিগত অভিজ্ঞতা এবং উক্ত মকামের বিশ্লেষণের আলোকে এটা প্রমাণ করেছেন যে, সাধারণভাবে যাকে ‘ওয়াহদাতে

ওজুদ' এবং অসত্যের শুধু নিশ্চিহ্ন ও পরিপূর্ণ ধ্বংস মনে করা হয়, তা প্রকৃতপক্ষে 'ওজুদে হাকীকী' বা বাস্তব অস্তিত্বের সামনে অন্যান্য অস্তিত্বশীল বস্তুর এমনভাবে নিম্প্রভ ও পরাভূত হয়ে যাওয়া যেমন সূর্যের প্রদীপ্ত আলোকের সামনে তারকারাজির রৌশনী নিম্প্রভ এবং তার সত্তার অস্তিত্ব গুরুত্বহীন হয়ে যায়। তিনি দু'টি শব্দে এই গুরুত্বকে এভাবে বর্ণনা করেন :

نابودن دیگر است و نادیدن دیگر -

অর্থাৎ “কোন বস্তুর অস্তিত্বহীন ও নিশ্চিহ্ন হয়ে যাওয়া এক জিনিস আর দৃষ্টিগোচর না হওয়া অন্য জিনিস।” তিনি আরও বলেন, এটা এমন একটি নায়ুক ও সঙ্গীন স্থান যেখানে অনেক বড় বড় লোকেরও পদস্থলন ঘটে গেছে এবং যেখানে একমাত্র আল্লাহর তওফীক ও খিযির (আ)-এর মতো কামিল ওলীর পথ-প্রদর্শন ও নেতৃত্ব ব্যতিরেকে হাকীকতের সংকীর্ণ পথের ওপর কায়ম থাকা কঠিন।

সত্য প্রকাশের নূর থেকে 'সালিক' (আধ্যাত্মিক পথের পথিক)-এর ওপর এভাবে জাহির হয় যে, সমগ্র অস্তিত্বশীল ক্ষুদ্রাতিক্ষুদ্র বস্তুর আকার, উজ্জ্বলতা ও দীপ্তি এর উজ্জ্বল প্রভায় তার দৃষ্টি থেকে ঢাকা পড়ে যায়-যেভাবে সূর্যের প্রখর দীপ্তির সামনে অণু-পরমাণুবৎ আলো আড়াল হয়ে যায় এবং সে সব ক্ষুদ্রাদপিক্ষুদ্র অস্তিত্বই নেই কিংবা অণু-পরমাণুগুলো সবই সূর্যে পরিণত হয়ে গেছে; বরং কথা এই যে, সূর্যের প্রখর রশ্মি জাহির হবার পর অণু-পরমাণুগুলোর মুখ লুকানো ছাড়া প্রকাশ্যে চেহারা দেখাবার কোনই পথ নেই। তেমনি একথাও ঠিক নয় যে, বান্দাহ খোদা হয়ে গেছে **تَعَالَى اللَّهُ** কিংবা বান্দাহর অস্তিত্ব বাস্তবে নিশ্চিহ্ন হয়ে যায়। অস্তিত্বহীন হয়ে যাওয়া ও নিশ্চিহ্ন হওয়া এক জিনিস আর দৃষ্টিগোচর না হওয়া অন্য জিনিস। কবি 'আরিফ ঠিকই বলেছেন :

پیش تو حید اونه کہنه است نه نواست

همه هیچ اندھیچ اوست که او است

যখন তুমি আয়না দেখ তখন তুমি আয়নাকে দেখ না এই জন্য যে, তুমি তখন আপন সৌন্দর্যে বিভোর থাক। আবার এও বলতে পার না যে, আয়নার অস্তিত্বই বিলীন হয়ে গেছে অথবা আয়না তোমার সৌন্দর্যের রূপ নিয়েছে কিংবা তোমার সৌন্দর্যই আয়না হয়ে গেছে। 'কুদরত'কে শক্তিসমষ্টির ভেতর এভাবেই দেখা যায়-যাকে সূক্ষীগণ ফানা ফিত-তাওহীদ

বলেন। বহু লোকের কদমই এই জায়গায় পিছলে গেছে। আল্লাহর তওফীক, চিরন্তন অনুগ্রহ এবং মুর্শিদের পথ প্রদর্শন ও নেতৃত্ব ব্যতিরেকে এই প্রান্তর কেউ সহজে অতিক্রম করতে পারে না।

পরিবর্তন ও বিবর্তন গুণাবলীর মধ্যে, সত্তার মধ্যে নয়

এই সন্দেহ দেখা দেয় যে, সূর্যের সামনে অন্যান্য আলোর নিষ্পত্ত হয়ে যাবার যে উদাহরণ দেওয়া হল এবং তা থেকে এটা প্রমাণ করা হল যে, আলো নিশ্চিহ্ন হয় না, শুধু সূর্যের সামনে নিষ্পত্ত হয়ে যায় এবং তার অস্তিত্ব অবজ্ঞেয় দৃষ্টিগোচর হয়। অথচ ঘটনা তো এই যে, সূর্যের সামনে প্রদীপের কোন যথার্থতাই থাকে না, তার অস্তিত্বকে অস্তিত্ব বলাই ঠিক নয়। সে তো তার মুকাবিলায় নিশ্চিহ্নই হয়ে যায়। একই বস্তু একই সময়ে অস্তিত্বশীল ও অস্তিত্বহীন হতে পারে না। শায়খ এর জবাব দিতে গিয়ে বলেছেন যে, এই পরিবর্তন তো গুণাবলীর ক্ষেত্রে, সত্তার ক্ষেত্রে নয়। সূর্য পানির ঝর্ণায় উজ্জ্বলরূপে প্রতিবিম্বিত ও প্রতিফলিত হয়, পানিকে উত্তপ্তও করে তোলে। এর দ্বারা পানির গুণের পরিবর্তন সংঘটিত হয়, পানির মৌলিকত্বে কোন পরিবর্তন ঘটে না—আর পানি কোন অর্থেই সূর্যে পরিণত হয় না।

দ্রুতগতিসম্পন্ন বস্তুর নড়া-চড়া চোখে পড়ে না

কামিল ও পরিপূর্ণতার চূড়ান্ত সীমায় অধিষ্ঠিত ব্যক্তিদের তরফী, আধ্যাত্মিক মকামসমূহ অতিক্রম এবং তাদের বাতেনী অবস্থা এমন হয়ে থাকে যেগুলি—এ পথের প্রাথমিক মুসাফির এবং কখনো ও কোন সময় তাদের সমসাময়িকেরও জানতে পারেন না। আস্থিয়া ‘আলায়হিমুস সালাম এবং কামালিয়াতের ওয়ারিশান ও কামিল আওলিয়া কিরামের কামালিয়াতের অবস্থাসমূহ এমনই সূক্ষ্ম, নাযুক ও গোপনীয় হয় যে, অধিকাংশ সময়ই তাদের সমসাময়িক এবং সাহচর্যে অবস্থানকারী ব্যক্তিবর্গ সে সব থেকে অপরিচিত ও নাওয়াকিফ থাকেন এবং ঐ সমস্ত উন্মত্ত ও আত্মহী ব্যক্তিবর্গ আকর্ষণ ও সলুকের অধিকারীকে প্রাধান্য দেন যারা তাদের পদদ্বয়ের পার্শ্বে পৌঁছুবারও ক্ষমতা রাখেন না। এসব কামিল মহাত্মা যাদেরকে আল্লাহ পাক অতি উন্নতমানের প্রতিভা, সুউচ্চ মনোবল ও অসীম ধৈর্যশক্তি দান করেন, তারা না জামার কলার ছিড়ে ফেলেন, আর না তারা ধ্বনিই উঠান; তারা উন্মত্তবৎ নাচতেও শুরু করেন না। তাদের থেকে অধিক সংখ্যায় কারামত কিংবা অলৌকিক ক্রিয়াকাণ্ড সংঘটিত হয় না অথবা তারা নানা মুখী দাবিও করেন না কিংবা কোন অবস্থার প্রকাশও হতে দেন না।

হযরত শায়খ (র) লিখেছেন যে, গতি যত দ্রুত হবে, ঠিক সে পরিমাণেই তার নড়াচড়া দৃষ্টিগোচর হবে না। তিনি বলেন, ঝড়ো হাওয়া সবাই অনুভব করতে পারে, কিন্তু প্রাতঃসমীরণ যা হৃদয়ের পাঁপড়িদলের সঙ্গে কাতুকুতু খেলে, ফুলের বাগানকে দান করে নব-বসন্ত, এমনি মৃদুমন্দগতিতে প্রবাহিত হয় যে, তার খবরও কেউ রাখে না। এক পত্রে তিনি লিখেছেন :

কোন বস্তুর গতি যখন দ্রুততর হয়ে ওঠে—তখন তা দৃষ্টিগোচর হয় না। তোমরা কি দেখতে পাও না যে, পাথরের যাতা (চাকী) যখন দ্রুতবেগে ঘুরতে শুরু করে.....তখন যে ব্যক্তি দেখে, সে ভাবে—যাতা বুঝি বন্ধই রয়েছে, পাথর বুঝি ঘুরছে না। হযরত জুনায়েদ বাগদাদী (রা.)-কে কেউ বলেছিল যে, আপনি 'সামা' (এক প্রকার আধ্যাত্মিক সঙ্গীত) শ্রবণের সময় নিজের জায়গা থেকে এতটুকু নড়াচড়া করেন না। তিনি তখন নিম্নোক্ত আয়াত তিলাওয়াত করেছিলেনঃ

وَتَرَى الْجِبَالَ تَحْسَبُهَا جَامِدًا وَهِيَ كَمَرٌ مَّرَّ السَّحَابِ ..

অর্থাৎ, “তোমরা পাহাড় দেখে মনে করো যে, তা স্থির দাঁড়িয়ে আছে। অথচ তা মেঘমালার মতই সতত সঞ্চরণশীল।”

ভূমি আমার গতি দেখতে পাও না, গতি যখন দ্রুততায় পর্যবসিত হয়, তখন তা আর চোখে পড়ে না। প্রাতঃসমীরণ এভাবে বয় যে, কেউ তার খবর রাখে না।^১

প্রবৃত্তিজাত কামনা-বাসনার উৎসাদন আসল উদ্দেশ্য ও লক্ষ্য নয়, উদ্দেশ্য ও লক্ষ্য হ'ল তাকে পরাভূতকরণ

তরবিয়ত ও সংশোধনের ধারায় একটা বড় ভ্রান্তি এই যে, সত্যের বহু প্রার্থী ও সিদ্ধিক প্রবৃত্তিজাত কামনা-বাসনার একেবারে জড়েমূলে উৎসাদন চান এবং এটাকে তাঁরা খুবই জরুরী মনে করেন। তাঁরা বলেন যে, তরীকত ও মারিফতপন্থীর অভ্যন্তরে প্রবৃত্তিজাত কামনা-বাসনার মূল উৎসও যেন বাকী না থাকে....। শায়খ মাখদুম (র) বলেন, প্রবৃত্তির উৎসাদন আসল উদ্দেশ্য নয়, বরং পরাভূতকরণই মৌলিক উদ্দেশ্য ও লক্ষ্য। ইমাম গাযালী (র)-ও তাঁর সুবিখ্যাত 'ইহইয়াউল 'উলুম' নামক গ্রন্থে প্রমাণ করেছেন যে, সংশোধন ও তরবিয়তের উদ্দেশ্য ও লক্ষ্য কাম-ক্রোধ ইত্যাদিকে জড় থেকে উপড়ে দেওয়া কিংবা কারুর প্রকৃতিগত যোগ্যতাকে গুম করে দেওয়া নয়, বরং তার ওপর নিয়ন্ত্রণ প্রতিষ্ঠার যোগ্যতা লাভ এবং তাকে পরাভূত করার শক্তি হাসিল করা। কুরআন মজীদের

সূরায় তা'রীফের ক্ষেত্রে الْفَاقِدُ الْغَيْظُ (ক্রোধ উৎসাদনকারী) বলা হয় নি, وَالْكَاطِمِينَ الْغَيْظَ (ক্রোধ দমনকারী) বলা হয়েছে। মূলে যদি ক্রোধেরই উদ্বেক না হত, তাহলে ক্রোধ দমনের কিংবা গিলে ফেলার প্রশ্ন দেখা দিত কীভাবে? শায়খ (র) অভ্যন্ত বিস্তারিতভাবে লিখেছেন :

এটা সেই ব্যক্তির মূর্খতা ও আহম্বকী যে মনে করে যে, শরীয়তের দাবি প্রবৃত্তিজাত কামনা-বাসনা এবং মানবীয় দোষগুণ থেকে একেবারে পাক-পবিত্র হওয়া। তারা এটা চিন্তা করেনি যে, রাসূলুল্লাহ (স) বলেছেন, আমিও মানুষ, কখনো আমিও রাগান্বিত হই এবং তাঁর ক্রোধের প্রতিক্রিয়াও প্রকাশ পেতে দেখা যেত। আল্লাহ তা'আলার ফরমানে- وَالْكَاطِمِينَ الْغَيْظَ (এবং ক্রোধ দমনকারী) বলে তাঁর প্রশংসা করা হয়েছে- রাসূলুল্লাহ (স)-এর প্রকৃতিতে ক্রোধের চিহ্নমাত্র নেই বলে তাঁকে প্রশংসা করা হয় নি। আর শরীয়ত প্রবৃত্তিজাত কামনা-বাসনা থেকে মুক্তির দাবি কী করে করতে পারে যখন হযূর (স)-এর ন'জন স্ত্রী বর্তমান ছিলেন। যদি কারুর প্রবৃত্তিজাত কামনা-বাসনা একদম নিঃশেষ ও নির্মূল হয়ে যায়- তবে তার চিকিৎসা করা দরকার যেন তা পুনরায় ফিরে আসে এবং তার ভেতর তা পুনরপি সৃষ্টি হয়। কেননা পরিবারের সদস্য ও সন্তান-সন্তুতিদের প্রতি স্নেহ-মমতা, জিহাদের ময়দানে কাফিরদের প্রতি ক্রোধ, সন্তান-সন্তুতি তথা বংশের ধারাক্রম ও সুনাম বজায় রাখা এসব 'নফস' (প্রবৃত্তি) জাত অনুভূতি ও কামনা-বাসনার সঙ্গে সম্পর্কিত। পয়গম্বরগণও ('আ) এ আকুলতা ব্যক্ত করেছেন যেন তাঁদের বংশের ধারা অব্যাহত থাকে। কিন্তু শরীয়তের দাবি এই যে, কামনা-বসনাকে নিয়ন্ত্রিত ও পরাভূত রাখতে হবে, রাখতে হবে আহকামে শরীয়তের অধীন, যেমনিভাবে ঘোড়া লাগামের এবং কুকুর শিকারীর নিয়ন্ত্রণাধীনে থাকে। কুকুরকেও ট্রেনিংপ্রাপ্ত হতে হবে। এমন যেন না হয় যে, শিকারীর ওপরই সে হামলা করে বসে। শিকারের জন্য ঘোড়ার আবশ্যিকতাও রয়েছে। কিন্তু এমন ঘোড়ার দরকার যাকে পোষ মানানো হয়েছে, -নইলে সে স্বীয় আরোহীকেই নিচে নিক্ষেপ করবে। ক্রোধ এবং ইন্দ্রিয়জাত কামনা-বাসনাও ঠিক তেমনি কুকুর ও ঘোড়ার মত। পারলৌকিক সৌভাগ্যকেও এ দু'টি বস্তু ব্যতিরেকে শিকার করা সম্ভব নয়। কিন্তু শর্ত এই যে, তা হবে অধীনস্থ ও নিয়ন্ত্রণাধীনে। যদি তা প্রাধান্য পায় এবং বিজয়ী হয়-তাহলে এ দু'টিই ধ্বংসের কারণ হবে। অতএব রিয়াযত ও মুজাহাদার আসল উদ্দেশ্য ও লক্ষ্য হল-এ দু'টি গুণকে পরাজিত ও পরাভূত করা এবং তা বাস্তবে সম্ভব।

কারামতও (অলৌকিকতা) এক প্রকার মূর্তি

যেভাবে ওপরে বলা হল যে, হযরত মাখদুম (রা.)-এর যমানায় চারিদিকেই ছিল কারামতের চর্চা। জনসাধারণ একে বুযগীর জন্য অপরিহার্য শর্ত এবং জনপ্রিয়তা ও ব্যাপকভাবে গৃহীত হবার মাপকাঠি বলে মনে করত! হযরত মাখদুম (র) এই সাধারণ প্রবণতা ও প্রসিদ্ধির বিপরীতে এটাই প্রমাণ করতেন যে, কারামতও আহলুল্লাহ তথা আল্লাহ্‌ওয়ালা ব্যক্তিদের জন্য একটি পর্দা এবং আল্লাহ ব্যতীত অপর শক্তির সঙ্গে জড়িত ও বিলুপ্ত থাকার প্রমাণবহ। আর এদিক থেকে এটা এক ধরনের মূর্তিও বটে যাকে অস্বীকার করা এবং এর হাত থেকে দূরে সরে থাকা কোন কোন সময় জরুরী হয়ে পড়ে।

কারামতও এক ধরনের মূর্তি। কাফির মূর্তির সঙ্গে সম্পর্ক রাখে এবং এই সম্পর্ক রাখার কারণে সে আল্লাহর দূশমনে পরিণত হয়। যখন মূর্তির সঙ্গে সম্পর্কচ্ছেদ ও মুক্ত থাকার ঘোষণা দেওয়া হয় এবং ইচ্ছা ব্যক্ত করা হয়, তখন সে আল্লাহর দোস্তে পরিণত হয়। 'আরিফগণের মূর্তি (বোত্) হচ্ছে কারামত। যদি কারামতের ওপর কেউ তুষ্ট ও তৃপ্ত হয়ে যায়, তাহলে সে বধিত ও (আল্লাহর দরবার থেকে) বরখাস্ত হয়। আর যদি কারামতের সঙ্গে সম্পর্কহীনতার প্রকাশ ঘটায়, তাহলে (আল্লাহর) মুকার্রাব তথা নৈকট্যপ্রাপ্ত বান্দাহগণের অন্তর্ভুক্ত হয় ও তাঁর দরবারে উপনীত হয়। একারণেই আল্লাহ পাক যখন তাঁর মকবুল বান্দাহগণের থেকে কারামতের প্রকাশ ঘটান তখন তাঁদের অন্তরে ভয়-ভক্তি ও বিনয় মিশ্রিত ভাবের আধিক্য ঘটে, দীনতা ও নম্রতা পূর্বের তুলনায় বৃদ্ধি পায়, বর্ধিত হয় তাদের জীতি।^১

কাশ্ফ, কারামত ও ইস্তিদরাজ

'সিন্দীক' (সত্যবাদী, বিশ্বস্ত ও আমানতদার) বান্দাহগণের ওপর 'কাশ্ফ' ও সঠিক দূরদৃষ্টির মাধ্যমে যে সব বিষয়ের প্রকাশ ঘটে এবং ভবিষ্যতে সংঘটিতব্য যে সব ঘটনা তাঁদের সামনে উদ্ভাসিত হয়, হতে পারে যে, কোন কোন লোকের বেলায় অনুরূপ বিষয়ের প্রকাশ ঘটে না। কিন্তু এর দ্বারা তাদের সম্পর্কে কোন আপত্তি উঠানো চলে না এবং তাদের কামালিয়াতের কোন ত্রুটিও এতে প্রমাণিত হয় না। আপত্তিজনক এবং ত্রুটিযুক্ত বস্তু বলতে 'ইস্তিকামাত' (সুদৃঢ় ভিত্তি)-এর সংকীর্ণ পথ থেকে সরে যাওয়া। 'সিন্দীক'গণের ওপর এভাবে যেসব বস্তু ও বিষয় উন্মোচিত হয়ে পড়ে তা তাদের 'ইয়াকীন' বৃদ্ধির কারণ হয় এবং এর দ্বারা তাদের

‘মুজাহাদাহ্’-এর মধ্যে অধিকতর পরিপক্বতা এবং তাদের সদৃশ্যাবলী, উন্নত ও প্রশংসিত চরিত্রের মধ্যে আরও উন্নতি ঘটে। আর এ ধরনের অবস্থা যদি এমন লোকের ক্ষেত্রে সংঘটিত হয়, যে ব্যক্তি শরীয়তের হুকুম-আহকামের পাবন্দ নয়, তাহলে সে এর পরবর্তী কারণ এবং এর ধোঁকা ও বোকামীর মাধ্যমে পরিণত হয়। সে এর ধোঁকায় পড়ে লোকদেরকে পর্যুদস্ত ও নিকৃষ্ট ভাবে শুরু করে। কখনো এমন হয় যে, ইসলামের সম্পর্ক থেকেও সে বিচ্ছিন্ন হয়ে যায় অর্থাৎ সে আর মুসলমান থাকে না এবং সে ‘আহকামে ইলাহিয়া’ তথা ঐশী-বিধানের সীমারেখা এবং হালাল-হারামের অস্বীকারকারীতে পরিণত হয়ে যায়। সে সুনুতের অনুসৃতি পরিত্যাগ করে এবং ‘ইলহাদ’ ও ‘যিন্দিকী’ ভাবধারার শিকারে পরিণত হয়।

সেবার মর্যাদা

‘সালিক’-এর জন্য একটি মহান কর্ম ‘খেদমত’ বা সেবা। খেদমতের ভেতর সেই সমস্ত উপকারিতা ও বৈশিষ্ট্য রয়েছে যা অন্য কোন ‘ইবাদত ও আনুগত্যে নেই। এর একটি এই যে, সেবার কারণে ‘নফস’ (প্রবৃত্তি) মৃত হয়ে থাকে এবং তা থেকে কর্তৃত্ব ও নেতৃত্ব, অহংকার ও গর্ব বের হয়ে যায় এবং সৃষ্টি হয় বিনয় ও নম্রতা। খেদমত তথা সেবা তাকে সভ্য ও সুজন বানিয়ে দেয়, তার চরিত্রকে সঠিকভাবে গুধরে দেয়, তাকে সুনুত ও তরীকতের জ্ঞান শেখায়, নফসের অন্ধকার ও বিপদাপদ দূর করে দেয়। এটা মানুষকে সুন্দরদর্শী ও ক্ষীণ আত্মা বানিয়ে দেয়; তার ভেতর ও বাহির আলোকিত হয়ে যায়। এসব উপকারিতা খেদমতের সঙ্গে নির্দিষ্ট। একজন বুয়র্গকে কেউ প্রশ্ন করেছিল, আল্লাহ পর্যন্ত পৌঁছতে কতগুলি রাস্তা রয়েছে? জবাবে তিনি বলেছিলেন, অস্তিত্বশীল প্রাণী এবং দুনিয়ার মধ্যে যতগুলি অণু-পরমাণু রয়েছে, এতগুলিই রাস্তা রয়েছে আল্লাহর কাছে পৌঁছতে। কিন্তু কোন রাস্তাই হৃদয়ের শান্তি ও তৃপ্তি দান অপেক্ষা অধিকতর শ্রেষ্ঠ ও নিকটতম নয়। আমরা এই রাস্তা ধরেই আল্লাহকে পেয়েছি এবং আমাদের সাথে সংশ্লিষ্ট ব্যক্তিদেরকে এরই ওসিয়ত করেছি।

ইসলাহে নফস-এর মানদণ্ড

‘ইসলাহে নফস’ তথা নফসের সংশোধনের মানদণ্ড ঐ সব মহাত্মার দৃষ্টিতে অত্যন্ত উন্নত এবং মহান। বস্তুতপক্ষে এ ব্যাপারে ভূগিলাভ করা খুবই মুশকিল যে, নফস্ খোদায়ী দাবি থেকে পশ্চাদপসরণ এবং প্রবৃত্তি ও কামনা-বাসনাজাত বিষয়বস্তুর পাকড়াও থেকে মুক্ত ও স্বাধীন হয়ে গেছে এবং তরবিয়ত ও ইসলাম

(আধ্যাত্মিক প্রশিক্ষণ ও সংশোধন)-এর সেই মকামে পৌঁছে গেছে যে, এখন তার ওপর আস্থা স্থাপন ও নির্ভর করা চলে। হযরত শায়খ শরফুদ্দীন (র)-এর নিকট তার আলামত এই যে, সে স্বীয় খাহেশ ও অভিপ্রায় অনুসারে অগ্রসর হবে না, শরীয়তের হুকুম মুতাবিক চলবে, শরীয়তের হুকুম-আহকামের তথা বিধি-বিধানের ক্ষেত্রে রুখসত কিংবা জটিল ব্যাখ্যার আশ্রয় নেবে না। যদি নফসের ওপর কোন বিশেষ প্রবৃত্তিজাত কামনা-বাসনা ও স্বভাব বিজয়ী থাকে তবে বস্তুতই সে সেই জানোয়ারের অনুরূপ, যে এই কামনা-বাসনার সবচেয়ে বড় প্রতিনিধি ও প্রকাশস্থল। এক পত্রে তিনি বলেন :

আমার ভ্রাত! মানুষের নফস বড় ধোঁকাবাজ ও প্রতারক। সে হামেশাই মিথ্যা দাবি ও বাগাড়ম্বর করে যে, প্রবৃত্তিজাত কামনা-বাসনা আমার শাসনাধীন হয়ে গেছে। তার থেকে এর প্রমাণ চাওয়া উচিত এবং তার প্রমাণ একমাত্র এই যে, সে স্বীয় হুকুমে এক কদমও অগ্রসর হবে না, চলবে শরীয়তের নির্দেশ মারফিক। যদি সে সর্বদা শরীয়তের অনুসৃতি ও আনুগত্যে তৎপরতা প্রদর্শন করে তবে সে ঠিকই বলছে। যদি সে শরীয়তের বিধি-বিধানে নিজস্ব ইচ্ছা-অভিরুচি ও অভিপ্রায় মারফিক রুখসত ও জটিল ব্যাখ্যা-বিশ্লেষণ চায় তবে সে হতভাগ্য- এখন পর্যন্ত ফাঁদে পড়া বন্দী। যদি সে ক্রোধের দাস হয়, তবে সে মানুষরূপী একটি কুকুর। যদি সে হয় উদরের দাস অর্থাৎ পেটসর্বস্ব, তবে সে একটি আস্ত জানোয়ার, আর সে যদি হয় বদ প্রবৃত্তিজাত কামনা-বাসনার হাতে বন্দী, তবে সে নিকৃষ্ট শূকর; যদি সে বেশ-ভূষা ও সৌন্দর্যের গোলাম হয়, তবে সে পুরুষরূপী স্ত্রীলোক। কিন্তু যে ব্যক্তি নিজেকে শরীয়তের আহকাম মারফিক সুসজ্জিত করে এবং নফসের পরীক্ষা নিয়ে থাকে, নিজ প্রবৃত্তির বাগডোরকে শরীয়তের হাতে তুলে দেয়, যে দিকে শরীয়ত ইঙ্গিত করে, সে দিকেই নিজ প্রবৃত্তিকে ঘুরিয়ে দেয়-কেবল তখনই বলা যায় যে, তার গুণাবলী তার শাসনাধীন ও নির্দেশানুগত হয়ে গেছে। অতএব যে সমস্ত লোককে আল্লাহ পাক দূরদৃষ্টি দান করেছিলেন এবং যারা বাস্তবতার প্রতি দৃষ্টি রেখেছিলেন, তাঁরা শেষ নিঃশ্বাস ত্যাগ করা পর্যন্ত স্বীয় নফসকে তাকওয়া ও আল্লাহুতীতির লাগাম পরিয়ে রেখেছিলেন।^১

দশম অধ্যায়

দীনের হিফায়ত ও শরীয়তের সাহায্য-সমর্থন

একটি সংস্কার ও সংশোধনমূলক কাজ

হযরত শায়খ শরফুদ্দীন ইয়াহুইয়া মুনায়রী (র)-এর সমগ্র কার্যাবলী শুধু এই নয় যে, তিনি ভারতীয় উপমহাদেশের অধিবাসীদেরকে আল্লাহর রাস্তা দেখিয়েছেন, মা'রিফতে ইলাহী ও আল্লাহর সঙ্গে সম্পর্ক সৃষ্টির আবশ্যিকতা ও গুরুত্ব হৃদয়মূলে গেঁথে দিয়েছেন, হাজার হাজার লাখ লাখ মানুষের অন্তরে 'ইশকে ইলাহী তথা বিভূ প্রেম এবং আল্লাহকে চাইবার আত্মহ সৃষ্টি করে দিয়েছেন, 'সলুক' ও মা'রিফতের গোপন রহস্য ও ক্ষুদ্রাদপিক্ষুদ্র বিষয়াবলী এবং সূক্ষ্মাতিসূক্ষ্ম ও উচ্চতর জ্ঞানরাজির প্রকাশ ঘটিয়েছেন, বরং উন্নতের অন্যান্য কতিপয় সংস্কারক-সংশোধক ও চুলচেরা বিশ্লেষণকারী দার্শনিকদের মত তাঁর এটাও একটা বিরাট ও আলোকোজ্জ্বল কৃতিত্ব যে, তিনি সঠিক মুহূর্তে দীনের হিফায়তের পবিত্র দায়িত্ব আঞ্জাম দিয়েছেন, মুসলমানদের দীন ও ঈমানকে বিভ্রান্ত সূফীদের বাড়াবাড়ি ও সীমাত্রিকতা, 'মুলহিদ'দের বিকৃতি এবং 'বাতেনী' ও যিন্দীক ফিরকার প্রভাব থেকে হিফায়ত করেছেন এবং সে সব ভুল ধারণা ও বিভ্রান্তিকে দিবালোকে উদ্ভাসিত করে তুলেছেন যা বদ-'আকীদাসম্পন্ন সূফী, মূর্খ ও জাহিল পীর এবং দর্শন ও বাতেনী ধ্যান-ধারণা প্রভাবিত প্রাচ্যবিদদের দাওয়াত ও তবলীগ দ্বারা ভারতীয় উপমহাদেশের ন্যায় একটি বহু দূরে অবস্থিত রাষ্ট্রকে (যেখানে ইসলাম বহু যোরালো চড়াই-উৎরাই পার হয়ে পৌঁছেছিল এবং কিতাব ও সুন্নত থেকে সরাসরি জ্ঞান অর্জনের উপায়-উপকরণ প্রথম থেকেই কমায়ের ও সীমাবদ্ধ ছিল) মোহগ্রস্ত করে রেখেছিল। তিনি স্বীয় মকতূবাতে সে সব 'আকীদা ও ধ্যান-ধারণার ওপর চরম আঘাত হানেন যার প্রচ্ছন্ন ছায়ায় এখানে ইলহাদ, কুফরী ও যিন্দীকী ভাবধারা বিস্তার লাভ করছিল এবং ইসলামী 'আকীদা নড়বড়ে হচ্ছিল। ইসলামের বিশুদ্ধ 'আকীদা এবং আহলে সুন্নত ওয়াল জামা'আতের দৃষ্টিভঙ্গি ও নীতি-পদ্ধতির পক্ষে তিনি অত্যন্ত প্রভাবমণ্ডিত ও জোরদার ওকালতী

করেন। তিনি যে হাকীকত ও মা'রিফতের ক্ষেত্রে অভ্যস্ত উন্নত ও মহান মর্যাদার অধিকারী ছিলেন, পৌছেছিলেন কাশ্ফ, শুহূদ ও দীপ্তির উচ্চতর মকামে, রিয়াযত ও মুজাহাদার দীর্ঘ ও কঠিনতম স্তরগুলো অতিক্রম করেছিলেন এবং রিয়াযত ও মুজাহাদা তথা আধ্যাত্মিকতার ময়দানে 'ইমাম' ও মুজতাহিদ-এর মরতবায় উপনীত হয়েছিলেন-এ ব্যাপারে সবাই একমত। এজন্য এক্ষেত্রে তাঁর প্রদত্ত ব্যাখ্যা-বিশ্লেষণ বিশেষ মূল্য ও গুরুত্ব রাখে এবং তাঁকে প্রত্যাখ্যান বরং অবজ্ঞা ও উপেক্ষা করা বড় বড় আধ্যাত্মিক দীপ্তিতে দীপ্তিমান ও কাশ্ফসম্পন্ন মহাপুরুষের পক্ষেও সম্ভব নয়। কেননা তাঁর ব্যাপার তো এই ছিল যে,

هون اس كو چه كے هر نره سے اگاه
ادھر سے مدتوں آیا گیا ہوں

অর্থাৎ “এই গলি-পথের প্রতিটি অনু-পরমাণু সম্পর্কে আমি অবহিত আছি, কেননা বহুকাল যাবত এ পথেই আমি আনাগোনা করেছি।”

বিলায়েতের মর্যাদা থেকে নবুওতের মর্যাদা উত্তম

দীর্ঘকাল ধরে তাসাওউফের কতিপয় মহলে এমত ধারণা প্রচার করা হচ্ছিল যে, বিলায়েতের মকাম নবুওতের মকাম থেকে উত্তম ও শ্রেষ্ঠ এবং তা এজন্য যে, আল্লাহুর সেই মহান সত্তার প্রতি মনোনিবেশ এবং সৃষ্টি জগতের সঙ্গে সকল সম্পর্ক চ্যুতির নাম ‘বিলায়েত’-আর নবুওতের বিষয়বস্তু মানুষকে আল্লাহুর পথে দাওয়াত জানানো যার সম্পর্ক সৃষ্টিজগতের সঙ্গে। এজন্য ওলীর সেই মহান সত্য সত্তার প্রতি নিবেদিতপ্রাণ এবং নবী সৃষ্টিজগতের কল্যাণের প্রতি নিবেদিতপ্রাণ হওয়া অপেক্ষা নিঃসন্দেহে মহান ও উত্তম। অবশ্য এদের মধ্যে কেউ কেউ কিছুটা সতর্কতা অবলম্বন করেছেন। তাঁরা বলেন, সাধারণভাবে বিলায়েতের মর্যাদা নবুওতের মর্যাদা থেকে উত্তম নয়, বরং উল্লিখিত কথার মর্মার্থ এই যে, নবীদের বিলায়েত তাঁর নবুওতের মর্যাদা অপেক্ষা উত্তম। নবী যখন স্রষ্টার প্রতি মশগুল হন তখন তাঁর এই অবস্থা সৃষ্টিজগতের প্রতি তাঁর দাওয়াত জানানোর ধারাবাহিক দায়িত্ব পালনে মশগুল হবার অবস্থা থেকে উত্তম হয়ে থাকে।

কিন্তু উল্লিখিত বক্তব্যের ঘুরিয়ে ফিরিয়ে যে অর্থই বের করা হোক না কেন, এইরূপ ‘আকীদা ও ধ্যান-ধারণা দ্বারা নবুওতকে অবজ্ঞা ও খাটো করে দেখার রাস্তা খুলে যায়, এর গুরুত্ব ও মর্যাদা কমে যায়, খুলে যায় ইলহাদ ও যিন্দিকী ধ্যান-ধারণা। হযরত শায়খ শরফুদ্দীন ইয়াহুইয়া মুনাযরী (রা.) এ ধরনের ‘আকীদা অভ্যস্ত দৃঢ়তার সঙ্গে প্রত্যাখ্যান করেছেন এবং জোরালো ও

বিস্তারিতভাবে প্রমাণ করেছেন যে, নবুওতের মকাম বিলায়েতের মকাম অপেক্ষা লক্ষণে উন্নত ও মহান। নবীর সমগ্র অবস্থা ও গোটা মুহূর্ত ওলীর সমস্ত হালত ও সময়ের চেয়ে উত্তম। শুধু তাই নয়, নবীদের একটি নিঃশ্বাস আওলিয়াগণের সারাজীবনের সাধনা অপেক্ষাও উত্তম। এক্ষেত্রে তিনি মুহাফিক ও 'আরিফসূলভ অনেক কথাই লিখেছেন এবং যেহেতু তিনি নিজেই বিলায়েত ও মা'রিফতের উচ্চতম মরতবায় অধিষ্ঠিত ছিলেন, এজন্য তাঁর মতামত ব্যক্ত করা শুধু তাঁর অপূর্ব মেধাশক্তি ও জ্ঞানশক্তির ফলশ্রুতিই নয় বরং তা ব্যক্তিগত অভিজ্ঞতা ও পর্যবেক্ষণের ওপর স্থাপিত। একটি পত্রে তিনি লিখেন :

আমার প্রিয় ভাই শামসুদ্দীনের জানা দরকার যে, তরীকতের বুয়র্গগণের সম্মিলিত মতে—সকল সময় এবং সকল অবস্থাতেই আওলিয়ায়ে কিরাম আখিয়ায়ে কিরাম (আ)-এর পদাংকানুসারী এবং আখিয়ায়ে কিরাম (আ) আওলিয়াকুল অপেক্ষা শ্রেষ্ঠ ও মর্যাদাবান। বিলায়েতের দ্বারা যে নৈকট্যলাভ ঘটে, তা আখিয়া কিরামের হিদায়াতের তুল্য। সকল নবী (আ)-ই বিলায়েতের অধিকারী, কিন্তু ওলী-আওলিয়া কেউই নবী হন না। আহলে সুন্নত ওয়াল জামা'আত এবং তরীকতের মুহাফিক (বিশেষজ্ঞ)-গণের এই মাসআলার ক্ষেত্রে কোনরূপ ইখতিলাফ কিংবা মতভেদ নেই। অবশ্য মুলহিদদের একটি দল বলে যে, আওলিয়া আখিয়ায়ে কিরাম অপেক্ষা অধিকতর মর্যাদাবান। তারা তাদের বক্তব্যের সমর্থনে এই দলীল পেশ করে যে, আল্লাহর ওলীগণ সব সময় আল্লাহুতেই বিভোর থাকেন, আর আখিয়ায়ে কিরাম (আ) অধিকাংশ সময়ই সৃষ্টিকুলকে দাওয়াত জানাতে ও তবলীগে মশগুল থাকেন। অতএব যে ব্যক্তি আল্লাহুতে মশগুল থাকেন সর্ব মুহূর্তে—তিনি সেই ব্যক্তি অপেক্ষা উত্তম ও মর্যাদাবান হবেন যিনি কিছু সময় মাত্র আল্লাহুতে বিভোর থাকেন। একটি দলের (যারা সূফী-দরবেশগণের সঙ্গে মুহব্বতের দাবিদার এবং যারা তাঁদের সম্পর্কে ভাল ধারণা পোষণ করেন এবং আনুগত্য-অনুসরণের ভান দেখান) বক্তব্য এই যে, বিলায়েতের মকাম নবুওতের মকাম অপেক্ষা অধিক মর্যাদামণ্ডিত। কেননা নবী ওহীর ইল্মের অধিকারী আর আওলিয়া গোপন রহস্য-জ্ঞানের অধিকারী। ওলীগণ এমন সব গোপন রহস্য অবগত হয়ে থাকেন যে সম্বন্ধে নবীগণ থাকেন অনবহিত ও বেখবর। তারা ওলী-দরবেশগণের জন্য 'ইল্মে লাদুনী-র অধিকারী হওয়া প্রমাণিত করেন এবং এক্ষেত্রে (কুরআনে বর্ণিত) হযরত মুসা ('আ) ও হযরত খিযির ('আ)-এর ঘটনা দলীল হিসেবে পেশ করেন। তাঁরা বলেন, হযরত খিযির (আ) ওলী ছিলেন আর হযরত মুসা (আ) ছিলেন নবী। হযরত মুসা ('আ)-এর ওপর জাহিরী ওহী আসত। যতক্ষণ পর্যন্ত ওহী

আসত না- তিনি কোন ঘটনার গোপন-রহস্য এবং কোন কথার অন্তর্ভুক্তি ভেদ অবগত হতে পারতেন না। হযরত খিযির (আ) 'ইলমে লা দুন্নী'র অধিকারী ছিলেন বিধায় তিনি ওহী ব্যতিরেকেই গায়েব তথা অদৃশ্য বস্তু ও জগত সম্পর্কে জেনে নিতেন। এমনকি হযরত মূসা ('আ)-কেও তাঁর অধীনে শাগরিদী (শিষ্যত্ব) করার আবশ্যিকতা দেখা দেয়। আর সবাই জানে যে, শাগরিদ অপেক্ষা উস্তাদ অধিকতর উত্তম ও মর্যাদাবান হয়ে থাকেন। কিন্তু এটা মনে রাখা দরকার যে, এই তরীকার নেতৃবৃন্দের -দীনের ব্যাপারে যাঁদের ওপর নির্ভর করা যায়-তাঁরা এ ধরনের উক্তি ও 'আকীদা সম্পর্কে অভ্যস্ত নাখোশ এবং তাঁরা একথা মেনে নিতে আদৌ রাযী নন যে, কারোর মরতবা আখিয়ায়ে কিরামের মরতবা অপেক্ষা অধিকতর উন্নত কিংবা তাঁদের সম্মানের হতে পারে। রইল হযরত মূসা ('আ) ও হযরত খিযির ('আ)-এর ঘটনা। এর জবাব এই যে, হযরত খিযির ('আ) আংশিক ফযীলতের অধিকারী ছিলেন এবং তা ছিল তাঁর বিশেষ ঘটনাবলীর ইলমে লা দুন্নী। আর হযরত মূসা ('আ) সাধারণ ফযীলতের অধিকারী ছিলেন। আংশিক ফযীলত ব্যাপক ও সাধারণ ফযীলতকে নাকচ করতে পারে না-পারে না মনসূখ করতে। যেমন, হযরত মারইয়াম ('আ) এক ধরনের ফযীলতের অধিকারিণী ছিলেন। যেহেতু তাঁর গর্ভে পুরুষের সংসর্গ ব্যতিরেকেই হযরত 'ঈসা ('আ) পয়দা হয়েছিলেন। কিন্তু এজন্য তাঁর মর্যাদা ও ফযীলত হযরত আয়েশা (রা.) ও হযরত ফাতিমা (রা.) অপেক্ষা অধিক গুরুত্ব ও প্রাধান্যের অধিকারী নয়। তাঁদের ফযীলতের প্রাধান্য ও গুরুত্ব দুনিয়ার নারীকুলের ওপর। মনে রেখো, আওলিয়াকুলের সকলের সব 'আমল ও অবস্থা, স্বাস-প্রস্বাস ও গোটা জীবন নবীদের একটি কদমের মুকাবিলায়ও ক্ষুদ্র ও অস্তিত্বহীন দৃষ্টিগোচর হবে। আওলিয়াকুল যে বস্তুর প্রার্থী, যে বস্তুর জন্য তাঁরা দুর্গম পথ অতিক্রম করেন, করেন কঠোর পরিশ্রম ও মেহনত, আখিয়ায়ে কিরাম বহু আগেই সেখানে পৌঁছে গিয়ে থাকেন। আখিয়ামে কিরাম তাঁদের দাওয়াতী কাজ আল্লাহর হুকুমের আঞ্জাম দিয়ে থাকেন এবং হাযার হাযার আল্লাহর বান্দাহকে আল্লাহ্‌প্রাপ্ত ও তাঁর সান্নিধ্য লাভের অধিকারী বানিয়ে দেন।

আখিয়ায়ে কিরামের একটি নিঃস্বাস ওলীদের সমগ্র জীবনের সাধনা থেকেও উত্তম

আখিয়ামে কিরামের একটি নিঃস্বাস আওলিয়ায়ে কিরামের তামাম জীবন অপেক্ষা উত্তম। আর তা এজন্য যে, আওলিয়ায়ে, কিরাম যখন চরম মার্গে উপনীত হন-তখন 'মুশাহাদাহ' (পর্যবেক্ষণলব্ধ জ্ঞান)-এর সংবাদ দেন এবং মানবীয় অন্তরাল থেকে মুক্তি পান, যদিও সে অবস্থায়ও তাঁরা মানুষই থাকেন।

পক্ষান্তরে পয়গম্বরগণ প্রথম পদক্ষেপেই 'মুশাহাদা'র মকামে অধিষ্ঠিত হন যা আওলিয়া কিরামের সর্বোচ্চ ও সর্বশেষ ধাপ। অতএব আওলিয়াকে আশ্বিয়ায়ে কিরামের ওপর কিয়াস করাই ঠিক নয়। হযরত খাজা বায়েযীদ বিস্তামী (র)- কে কেউ প্রশ্ন করেছিল যে, আশ্বিয়ায়ে কিরামের অবস্থাসমূহ সম্পর্কে আপনার অভিমত কি? তিনি বলেছিলেন যে, তওবাহ্। তওবাহ্! এ ব্যাপারে (মন্তব্য প্রকাশের) কোন অধিকারই আমাদের নেই। অতএব আওলিয়া কিরামের মরতবা সম্পর্কে অন্যান্য সৃষ্টিকুলের জ্ঞান ও উপলব্ধি এবং ধ্যান-ধারণা যেরূপ ক্ষীণ ও প্রচ্ছন্ন, ঠিক তেমনি আশ্বিয়ায়ে কিরামের মরতবাও আওলিয়াকুলের জ্ঞান ও উপলব্ধির উর্ধ্বে। আওলিয়া আশ্বিয়ায়ে কিরামের অকৃত্রিমতায় আপন গতিতে ধাবমান আর আশ্বিয়ায়ে কিরাম আওলিয়া কিরামের মুকাবিলায় উড়ন্ত গতিতে ধাবমান। আর এটা তো ঠিক যে, পায়ে চলার গতি উড়ন্ত গতির মুকাবিলা করতে পারে না।

আশ্বিয়ায়ে কিরামের দেহ আর আওলিয়ার আত্মা

আশ্বিয়ায়ে কিরামের মাটির দেহ পাক-পবিত্রতা ও আল্লাহর নৈকট্যলাভের ক্ষেত্রে আওলিয়ায়ে কিরামের ভেদ ও রহস্যের সমতুল্য। অতএব ঐ দুই ব্যক্তির মধ্যে বিরাট পার্থক্য বিদ্যমান যাদের একজনের দেহ যেখানে পৌঁছে, সেখানে অন্যজনের শুধুমাত্র ভেদ ও রহস্য পৌঁছাতে পারে।^১

শরীয়তের চিরন্তনতাও অপরিহার্য

এমনি আর একটি ভ্রান্ত ধারণা কতিপয় মহলে বিস্তার লাভ করেছিল যে, শরীয়তের বাধ্য-বাধকতা ও অনুসরণের আবশ্যিকতা একটি বিশেষ সময় ও বিশেষ সীমারেখা পর্যন্তই সীমাবদ্ধ; 'সালিক' যখন পর্যবেক্ষণের মকাম এবং 'ইয়াকীন'-এর মরতবায় উপনীত হয়, পৌঁছে যায় আল্লাহর সান্নিধ্যে, তখন সে শরীয়তের পাবন্দী ও শরঈ বাধ্যবাধকতা থেকে মুক্ত ও স্বাধীন হয়ে যায়। এরূপ আকীদা সাধারণ্যে বেশ ব্যাপক ও জনপ্রিয় হয়ে ওঠে এবং বহু 'মুলহিদ-কাফির' ও বে-আমল সূফী ও অকাট মূর্খ পীর-দরবেশ এর মাধ্যমে এ এক বিরাট ফিতনার সূত্রপাত করেছিল এবং এর দ্বারা কতিপয় মহলে শুধু বিশৃঙ্খলা ও বে-আমলই নয়, 'ইলহাদ ও যিন্দিকী' ভাবধারাও বিস্তার লাভ করেছিল। কতক লেখাপড়া জানা লোকও এ 'আকীদাকে দৃঢ় ভিত্তির ওপর দাঁড় করাবার স্বার্থে কুরআন মজীদে মশহূর আয়াত **واعبد ربك حتى يأتك اليقين** অর্থাৎ

“এবং ইয়াকীন তোমাতে না আসা পর্যন্ত তুমি তোমার প্রতিপালকের ‘ইবাদত (দাসত্ব ও গোলামী) কর”^১—এর দলীল পেশ করে এবং বলে যে, ‘ইবাদত ও শরীয়তের পূর্ণ আনুগত্য ও অনুসরণের সিলসিলা ততক্ষণ পর্যন্ত কায়েম থাকা দরকার যতক্ষণ পর্যন্ত না ‘ইয়াকীন’ হাসিল হয়। ‘ইয়াকীন’ হাসিল হয়ে গেলেই শরীয়তের কষ্টকর বিধানগুলো পালনের বাধ্যবাধকতা অপসৃত হয়ে গেল। হযরত শায়খ শরফুদ্দীন (র) এ ধরনের অমূলক ‘আকীদা ও বিভ্রান্তিকে অত্যন্ত জোরের সাথে প্রত্যাখ্যান করেছেন। এ বিষয়ের ওপর তাঁর কতিপয় ‘মকতূবাত’ (চিঠিপত্র)ও রয়েছে যেখানে তিনি পূর্ণ জোশ ও শক্তির সঙ্গে এটা প্রমাণ করেছেন যে, শরীয়তের প্রতি পূর্ণ আনুগত্য ও পাবন্দী শেষ নিশ্বাস ত্যাগের প্রাক-মুহূর্ত পর্যন্ত অক্ষুণ্ণ থাকে এবং কোন অবস্থাতেই ও কোন সময়েই শরীয়তের অবশ্য পালনীয় বিধানগুলো থেকে মানুষ অব্যাহতি পায় না।

শরীয়তের পূর্ণ পাবন্দী সর্বাবস্থায় অপরিহার্য এক পত্রে তিনি লিখেছেন :

প্রিয় ভাই শামসুদ্দীন! অবগত হও যে, শয়তান কখনও কখনও সুফী ও আহলে রিয়াযতের ওপর এটা জাহির করে যে, পাপ পরিত্যাগের আসল উদ্দেশ্য হল প্রবৃত্তিজাত কামনা-বাসনা পরাভূত এবং মানবীয় দোষ-গুণ এতে পর্যুদস্ত হয়ে যাবে এবং অন্য উদ্দেশ্য এই যে, আল্লাহ তা‘আলার স্বরণ তাঁর ওপর বিজয়ী হবে আর দিল্ হবে মানবীয় অন্ধকারাচ্ছন্নতা ও যিকরে ইলাহীর প্রভাব থেকে মুক্ত, যার ফলে সে আল্লাহর মা‘রিফতের হাকীকত লাভ করবে। শরীয়তের পাবন্দী পরিপূর্ণ মিলনের কা‘বা গৃহে পৌঁছবার একটি রাস্তা মাত্র। যে ব্যক্তি এই কা‘বাগৃহে পৌঁছে গেছে, তার আবার রাস্তা, খোরাক কিংবা সওয়ারীর কী আবশ্যিকতা থাকতে পারে? অতঃপর শয়তান এই দলকে বুঝাতে শুরু করে যে, যদি সে সালাত আদায় করে তবে তা তার জন্য অন্তরায় সৃষ্টি করবে। আর তা এজন্য যে, সে আল্লাহর সান্নিধ্য লাভে সক্ষম হয়েছে। এ সমস্ত লোক বলে যে, আমরা তো চিরন্তন মুশাহাদার মধ্যে অবস্থান করি এবং সালাত, রুকূ ও সিজদার আসল উদ্দেশ্য এই যে, গাফিল দিল্ তথা মানুষের অলস অন্তর সর্বদা তাঁর উপস্থিতিতে আবিষ্ট থাকবে। আমরা এক মুহূর্তও গাফিল হই না, আধ্যাত্মিক জগতের সেই দৃশ্যমান বস্তু দেখি যা আখিয়ায়ে কিরামকে পবিত্র প্রতিবেশে দেখানো হয়। আমাদের আবার ঐ সব ‘ইবাদত-বন্দেগী ও শরীয়তের বিধি-বিধান

১. আয়াতের সঠিক তাফসীর জানতে খ্যাতনামা মুফাসসিরদের তাফসীর দেখুন। এখানে ইয়াকীন অর্থ যত্ন।

পালনের কী আবশ্যিকতা থাকতে পারে? প্রকৃতপক্ষে এটা খোদ ইবলীসের অবস্থা ও তারই ঘটনার ন্যায়। সে তার নৈকট্যের পূর্ণতা দেখেছিল এবং বলেছিল যে, আদম (আ)- কে সিজদা করে কী লাভ? আদমের মর্যাদা তার তুলনায় কম; তাকে সিজদা করায় আমার কী ফায়দা হবে? আল্লাহ্ তা'আলা কুরআন মজীদে তার ঘটনা অলীক কাহিনী কিংবা উপন্যাস হিসেবে পেশ করেন নি, বরং সেইসব লোকের জন্য শিক্ষণীয় উপদেশ হিসেবে বিবৃত করেছেন যারা এ ধরনের শয়তানী বিভ্রান্তির শিকার। তারা যেন জানতে ও বুঝতে পারে যে, যে কোন মুকার্‌ব (নৈকট্যপ্রাপ্ত) বান্দাহর পক্ষেও শরীয়তের আনুগত্য ব্যতিরেকে মুক্তির কোন উপায় নেই। যে সমস্ত বুয়র্গানে দীন বলেছেন যে, শরীয়তের অনুসরণ আল্লাহ তা'আলা পর্যন্ত পৌঁছবার একটি সরল রাস্তা- তাঁরা ঠিক ও সত্য কথাই বলেছেন।

শরীয়তের স্থায়িত্বের গোপন রহস্য

শয়তান এখানে একটি বিষয় ঐ দলের দৃষ্টি বহির্ভূত রেখেছে। সে তাদের এটাই বিশ্বাস করিয়েছে যে, শরীয়তের উদ্দেশ্য হল শুধু আল্লাহর হৃদয়ী লাভ করা। আসলে এটা একটা ভ্রান্ত ধারণা। শরীয়তের উদ্দেশ্য এটা ব্যতিরেকে আরও আছে। দৃষ্টান্তস্বরূপ বলা যায়, পাঁচ ওয়াজ সালাত এমনই যে, যেমন কোন পরিপূর্ণ জানালায় পাঁচটি কীলক (পেরেক) মারা হয়েছে। যদি কীলকটি তা থেকে আলাদা হয়ে যায় তবে জানালাটি সম্পূর্ণতা থেকে বিচ্ছিন্ন হয়ে পড়বে, যেমনটি খোদ ইবলীস আল্লাহর বন্দেগী থেকে বিচ্ছিন্ন হয়ে পড়েছিল। যদি কেউ বলে যে, এই পাঁচ ওয়াজ সালাত কী করে পাঁচটি কীলকের মত হবে যা সম্পূর্ণ জানালাটি আটকে রেখেছে? তার জবাব এই যে, তা চেনা মানুষের ক্ষমতার বাইরে। এটা বস্তুত এমনই যেমন বিভিন্ন জিনিস ও ঔষধপত্রাদির মিশ্রণ। বুদ্ধি এর কারণ নিরূপণে অক্ষম-যেমন চুষক পাথর কেন লোহাকে নিজের দিকে আকর্ষণ করে তা কেউ জানে না।

একটি পরিপূর্ণ দৃষ্টান্ত

শরীয়তের অবশ্য পালনীয় বিধি-বিধানসমূহ ও হুকুম-আহকামের পাবন্দীর মধ্যে কী হিকমত রয়েছে এবং তা মানুষের দীন ও ঈমান এবং স্বীয় স্রষ্টার সঙ্গে সম্পর্ক বহাল রাখার ক্ষেত্রে কী পরিমাণ জরুরী-তার একটা প্রকৃত উদাহরণ দিতে গিয়ে তিনি বলেন :

এক ব্যক্তি পাহাড়ের চূড়ায় একটি প্রাসাদ (মহল) নির্মাণ করল। সেখানে সে বিভিন্ন প্রকারের ও বিভিন্ন কিসিমের নৈমত-সামগ্রী জমা করল। যখন তার

অন্তিম মুহূর্ত ঘনিষে এল-তখন সে তার ছেলেকে ওসিয়ত করল যে, তুমি এই প্রসাদকে সংস্কার ও সংশোধনসহ সকল উপায়ে ব্যবহারে লাগাতে পারবে। কিন্তু খোশবুদার একটি ঘাসের একটি অংশ যা আমি পেছনে ছেড়ে যাচ্ছি- সেটি যদি শুকিয়েও যায় তবুও তা বাইরে ছুড়ে ফেলবে না। পাহাড়ের চূড়ায় যখন বসন্তের মৃদু হিল্লোল দেখা দিল, তখন পাহাড় ও প্রান্তর সবুজ শ্যামলিমায় ছেয়ে গেল; বহুবিধ সতেজ ও খোশবুদার ঘাসের জন্ম হল-যা সেই পুরনো ঘাসটির চেয়েও তরতাজা। এর ভেতর থেকে অনেক ধরনের ঘাস ও ফুলই সেই প্রাসাদে এল যার খোশবু সারা মহলকে সুগন্ধিময় করে তুলল এবং তার সামনে উজ্জ পুরনো শুকনো ঘাসের খোশবু মিইয়ে গেল। ছেলোট মনে করল যে, আমার শ্রদ্ধেয় পিতা এই পুরনো ঘাসটি মহলে এজন্য রেখেছিলেন যে, তার খোশবু চতুর্দিকে ছড়িয়ে পড়বে এবং তার দ্বারা এই জায়গাটি খোশবুময় হয়ে উঠবে। এখন এই শুকনো ঘাসটি কোন্ কাজে আসবে? যে মুহূর্তে উল্লিখিত মহলটি ঐ ঘাস থেকে মুক্ত হয়ে গেল, তখনই একটি কালো সাপ গর্ত থেকে বেরিয়ে এল এবং ছেলোটিকে কামড়ে দিল। অমনি সঙ্গে সঙ্গে সে মৃত্যুর কোলে ঢলে পড়ল। এর পেছনে কারণ কী ছিল? ঘাসটির দু'টি উপকারিতা ছিল। প্রথমত, সে খোশবু দিত। দ্বিতীয়ত, তার ভেতর একটি উল্লেখযোগ্য গুণ এই ছিল যে, ঘাসটি যেখানেই থাকত, তার ধারে-কাছেও সাপ ঘেঁষতে সাহস পেত না। অর্থাৎ ঘাসটি ছিল সাপের প্রতিষেধক যা আর কেউ জানত না। ছেলোট তার মেধাশক্তি ও প্রখর বুদ্ধিমত্তার জন্য গর্বিত ছিল। কিন্তু এ আয়াতের মর্মার্থ তার জানা ছিল না **وَمَا أَوْتِيْتُمْ مِّنَ الْعِلْمِ إِلَّا قَلِيْلًا** (আর তোমাদের খুব অল্পই জ্ঞান দেওয়া হয়েছে)। সে তার জ্ঞান ও মেধার অহমিকায় মারা গেল। এভাবেই এই-কাশফ ও কারামতের অধিকারী দল এই বিভ্রান্তির শিকার হয়েছে যে, শরীয়তের যে গোপন রহস্য ছিল তা তাদের সামনে উদ্ভাসিত হয়ে গেছে এবং এইগুলো ভিন্ন শরীয়তের আর কোন গুণ রহস্য নেই। অথচ এর চেয়ে বড় ভ্রান্তি আর কিছুই হতে পারে না যা এ পথের পথিক 'সালিক'দের সামনে কখনো কখনো দেখা দেয় এবং বহু লোকই এর শিকার হয়ে ধ্বংস হয়ে গেছে। ঐ সমস্ত লোক শরীয়তের একটিই উদ্দেশ্য ভেবে বসে আছে। অথচ এটা বুঝতে চেষ্টা করে নি যে, এর ভেতর অন্যান্য গুণভেদও রয়েছে। তারা এটাও খেয়াল করে নি যে, যদি অন্যান্য হিকমত না থাকত তাহলে নবী করীম সাল্লাল্লাহু 'আলায়হি ওয়া সাল্লামের এত

সালাত আদায়ের কী দরকার ছিল যার কারণে তাঁর কদম মুবারক ফুলে যেত? তিনি একথা বলেন নি যে, এটা উম্মতের ওপর ওয়াজিব- পয়গম্বরের ওপর নয়।^১

‘উলামা ও কামিল বুয়র্গগণের আদর্শ

যেসব ‘উলামায়ে কিরাম, মাশায়িখ ও সূফী কামালিয়াতের দরজায় পৌঁছে গেছেন, তাঁরা বুঝেছেন যে, শরীয়তের প্রত্যেকটি বাধ্য-বাধকতার ভেতরই একটি রহস্য রয়েছে, যার সঙ্গে আখিরাতের মহাসৌভাগ্য ও সম্পৃক্ত ও জড়িত। এমন কি এসব বুয়র্গ নিজেদের শেষ নিঃশ্বাস ত্যাগের মুহূর্ত পর্যন্ত শরীয়তের আদবসমূহের মধ্যকার একটি আদবও ত্যাগ করেন নি। হযরত জুনায়দ বাগদাদী (র)-এর একজন খাদেম তাঁকে তাঁর ইস্তিকালের সময় ওষু করাচ্ছিল। সে দাঁড়ি খেলাল করাতে ভুলে যায়। তিনি তার হাত-পা চেপে ধরলেন যেন এ সুন্নতটিও ভালভাবে আদায় করা হয়। লোকেরা বলল : “হযরত! এই মুহূর্তেও কি এতটুকু শিথিলতা উপেক্ষার যোগ্য নয়?” তিনি বললেন, “আমি আল্লাহ পর্যন্ত এর বরকতেই পৌঁছুতে পেরেছি।” কামালিয়াতের অধিকারীদের এটাই ছিল রীতি। ফেরেববাজ লোকেরা সত্বরই ধোঁকায় পতিত হয়। যে বস্তুকে তারা দেখতে পায় না এবং যে বিষয় তাদের উপলব্ধিতে আসে না তাকেই তারা অস্তিত্বহীন মনে করেছে। ফজরের সালাত দু’রাকাত, জোহরের চারি রাকাত, আসরের চারি রাকাত, মাগরিবের তিন এবং ‘ইশার চারি রাকাত; অতঃপর প্রতিটি রাকাতেই একটি করে ‘রুকু’ ও দু’টি করে সিজদা রয়েছে। এসবের ভেতর এমন এক রহস্য ও বৈশিষ্ট্য রয়েছে যার কামালিয়াত হাসিলের ক্ষেত্রে বিশেষ ভূমিকা রয়েছে—এবং ইস্তিকালের মুহূর্ত পর্যন্ত তা বাধ্যবাধকতা সহকারে মেনে চললে তার আছর ও প্রতিক্রিয়া জাহির হয়। যদি ‘সালিক এসব ছেড়ে দেয় এবং দুনিয়া থেকে চলে যায় তাহলে সে আখিরাতে দেখতে পাবে নিজের ধ্বংস। সে সময় বলবে, হায়! আমার সে কামালিয়াতের কি হল? জবাব দেওয়া হবে, সে কামালিয়াতের তজ্জায় কীলক ছিল না। ফলে মরণের সময় তা মূল থেকে উপড় গেছে, ঠিক তেমনি যেমন করে ইবলীসের তামাম কামালিয়াত একটি নাফরমানীর কারণেই মাটিতে মিশে গেছে।

হযরত শায়খ শরফুদ্দীন (র) এ ব্যাপারে এত দৃঢ় বিশ্বাসী ও আপোসহীন ছিলেন যে, তিনি একটি পত্রে এই ‘আকীদাকে (শরীয়তের পাবন্দী বিশেষ হালতে ও মকামে জরুরী নয়) প্রত্যাখ্যান করত বলেন :

এটা ভুল এবং মুলহিদদের মাযহাব যারা বলে, যখন হাকীকত পর্যন্ত পৌছে গেছি এবং কাশ্ফ ও শুহুদ হাসিল হয়ে গেছে, তখন শরীয়তের হুকুম উঠে গেছে। এ ধরনের 'আকীদা ও মাযহাবের উপর লা'নত।'

শরীয়তের শর্ত

তিনি তামাম মুহাক্কিক সুফীর মত অত্যন্ত দৃঢ়তার সঙ্গে এই উক্তির সমর্থক ও দাবিদার যে, সলুক ও তরীকত হাসিল করা শরীয়তের অনুসরণ ব্যতিরেকে সম্ভব নয়। এক পত্রে তিনি বলেন :

যে ব্যক্তি তরীকতের ক্ষেত্রে শরীয়তের অনুসারী না হবে, তরীকতের দ্বারা তার কোন ফায়দা হাসিল হবে না। এটা মুলহিদদের মাযহাব যে, এগুলো একটি অন্যটির সহযোগিতা ব্যতিরেকেই চলতে পারে। তারা বলে যে, হাকীকত যখন প্রকাশ হয়ে গেছে তখন শরীয়তের আবশ্যিকতা আর অবশিষ্ট রইল না। আল্লাহর লা'নত হোক এই 'আকীদার ওপর। বাতেনী ব্যতিরেকে জাহেরী মুনাফিকী ছাড়া আর কিছু নয়, ঠিক তেমনি জাহেরী (শরীয়ত) ব্যতিরেকে বাতেনী (তরীকত ও মা'রিফত) পরিষ্কার কুফরী ছাড়া আর কিছুই নয়। জাহের (শরীয়ত) বাতেন (তরীকত) ব্যতিরেকে ক্রটিযুক্ত আর বাতেন জাহের ব্যতিরেকে এক ধরনের মস্তিষ্ক বিকৃতিরই নামান্তর। জাহের সব সময়ই বাতেনের সঙ্গে সম্পৃক্ত এবং জাহের (শরীয়ত) বাতেন (তরীকত, মা'রিফত ও হাকীকত-এর সঙ্গে এমনভাবে সম্পৃক্ত যে, তা কোনক্রমেই একটির থেকে অপরটি আলাদা হয় না।'

মুহাম্মাদ (স)-এর পদাংক অনুসরণ ব্যতিরেকে গত্যান্তর নেই

হযরত মাখদুম (র) মকতূবাতে অত্যন্ত আবেগ-উদ্দীপনার সঙ্গে এবং অত্যন্ত আস্থা ও ইয়াকীনের সঙ্গে এ কথার তবলীগ করতেন যে, হযরত আকরাম (সা.) যিনি রাব্বুল 'আলামীনের মাহবুব বান্দাও বটেন, তাঁর পরিপূর্ণ অনুসরণ ব্যতিরেকে নাজাত লাভ সম্ভব নয়-সম্ভব নয় হাকীকত পর্যন্ত উপনীত হওয়া কিংবা কামালিয়াত ও পারলৌকিক সৌভাগ্য লাভ করা। যেমন আল্লাহ তা'আলা বলেছেন :

قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ -

বলুন (হে রসূল!) তোমরা যদি আল্লাহকে ভালবাস তবে আমাকে অনুসরণ কর, আল্লাহ তোমাদের ভালবাসবেন। [সূরা আলে-ইমরান : ৩ : ৩১]

ফিরদৌসিয়া সিলসিলার প্রচার এবং এর কতিপয় কেন্দ্র

হযরত মাখদুমুল মুলক (র)-এর পর ফিরদৌসিয়া সিলসিলা কতটুকু উন্নতি করেছিল তা কোন গ্রন্থেই লিখিত আকারে দৃষ্টিগোচর হয় না। অতঃপর মাওলানা মুজাফফর বলখী ('আদন' বন্দরে যিনি শায়িত) তাঁর স্থলাভিষিক্ত হন এবং বিহারের খানকাহতে এই সিলসিলা জারী হয়। স্বীয় যুগে মাখদুম শাহ শু'আয়ব ফিরদৌসী ইবন মাখদুম জালাল মুনায়রী, যিনি মাখদুমুল মুলক (রা.)-এর চাচাতো ভাই— মুঙ্গের জেলার শেখপুরাতে খানকাহ কায়েম করেন। অতঃপর তাঁর খান্দানের লোকদের দ্বারা অদ্যাবধি এই সিলসিলা সেখানে কায়েম আছে। মাখদুম শাহ শু'আয়ব ফিরদৌসীর (বুয়র্গানে ফিরদৌসিয়ার অবস্থা বর্ণনায়) 'মানাকিবুল আসফিয়া' নামে একটি কিতাব রয়েছে যা প্রকাশিত হয়েছে এবং বর্তমান গ্রন্থ লিখতে উক্ত কিতাবের বিশেষ সাহায্য নেওয়া হয়েছে। হযরত মাখদুম (র)-এর পর 'মুনায়র'-এ ফিরদৌসী সিলসিলার উন্নতি ঘটে। এর ভেতর তাঁর খান্দানের মাখদুম শাহ দৌলত মুনায়রী (মৃত্যু ১০১৭ হিজরী) অত্যন্ত মশহুর বুয়র্গ ছিলেন। তাঁর একজন মুরীদ ও খলীফা আমানুল্লাহ সিদ্দিকী আসী সিদ্দিকা কর্তৃক উত্তর প্রদেশ থেকে এ সিলসিলা জারী হয়। সম্ভবত দশম শতাব্দীতে পাটনা জেলার মতেতাহাতে ফিরদৌসিয়া সিলসিলার একটি খানকাহ কায়েম হয়েছিল এবং অদ্যাবধি এ সিলসিলা জারী রয়েছে। বিহার প্রদেশে এমন কোন খানকাহ নেই যেখানে এই সিলসিলা নেই। মহীশূর রাজ্যের মিশমার ভাটকল নামক মহল্লায়ও এই সিলসিলার খানকাহ আছে।

হযরত মাখদুম সাহেব (র)-এর দোহা ও হিন্দী প্রবাদ বাক্য

বিহার ও তার আশে-পাশে হযরত মাখদুম (র)-এর বহু দোহা ও হিন্দী প্রবাদ বাক্য সাধারণ্যে এখনো জনপ্রিয় এবং বহুলভাবে প্রচলিত।